





The Library of the  
Wellcome Institute for  
the History of Medicine

MEDICAL SOCIETY  
OF  
LONDON  
DEPOSIT

Accession Number

Press Mark

WARST, C.X.







HYDRARGYRO  
TENTAMEN  
PHYSICO-  
CHEMICO-MEDICUM.

---

*PARS PRIOR.*

---

AUCTORE  
CHRISTIANO XAVERIO WABST M. D.



*VINDOBONAE,*

---

EX TYPOGRAPHIA TRATTNERIANA.  
CIS. MDCC. LIV.

Simplex, & cognito ponderi argenti vivi innitens  
explicatio mirabilium horum effectuum sufficere visa fuit:  
Quaedam tamen serio haec meditati obvenerunt dubia,  
quae non prurigne obloquendi Viris, quos veneror, sed  
veritatis amore, meliora addiscere paratissimus, propo-  
nam. *Ill. L. B. van Swieten Comment. Aphor. ad §. 135.*





L. B.

**A**D perfectam, atque intimam Hydrargyri, mirabilis hujus metallici corporis cognitionem vix quempiam eluctari posse: illiusque attributa, qualitates, & effectus inter praecipua Physicae, & Medicinae mysteria esse recensendos, compertissimum habeo. Nihilominus operae me pretium facturum existimavi, si ea, quae a probatissimis Chemicis, Physicis, & Medicis sparsim de illo sunt vulgata, uno

P R A E F A T I O.

comprehensa opere proponerem. Quod ut facerem, jure illud studium, quo cum res caeteras, quantum illae quidem ad Physicam, & Medicinam spectant, tum Hydrargyri principia, proprietates, & vires indagare praecipue satago, ansam mihi praebuit.

Perfuasissimus enim sum, ex toto *Minerali*, ut vocant, *Regno* corpus esse nullum, quod sive in experimentis Physicis, sive operationibus Chemicis majoris esset momenti; quodque mirabiliores in corpore humano effectus exfereret; effectus, inquam, quorum, diversis in regionibus, testis non raro ipse, admiratorque fueram, quando illud a Medicorum nonnullis ad instar universalis fere remedii, sano ratiocinio quantumvis reclamante, in casibus omnino desperatis, even-



P R A E F A T I O.

eventu plerumque felicissimo , adhiberi videbam. Usque adeo Virgilianum illud : *Audentes fortuna juvat* (a) etiam in isthoc medicamento verum est deprehensum !

Nec vero defuit opportunitas illud experiundi : praesertim cum maxime terminati belli Italici tempore , inter copias AUGUSTISSIMAE IMPERATRICIS , ET REGINAE NOSTRAE, Medici fungerer officio.

Inde huc evocatus , dum instituto sapientissimo ILLUSTRISSIMI PRAESIDIS NOSTRI (Viri ut ad omnigenae eruditionis , sic ad salutaris artis cum primis incrementa nati , quem suspicit eruditus orbis , quem fera venerabitur , & obstupescet posteritas ) pro indipiscendis in Facultate Viennensi Docto-

) ( 3

ris

(a) Virg. Æneid. X. v. 234.

P R A E F A T I O.

ris juribus, & immunitatibus, examen denuo subire, ac publice disputare jubeor, TENTAMEN hocce concinnare institui; quod cum opinione prolixius evaderet, ac interea praefixi temporis induciae ad finem vergerent, cogor telam inceptam abrumperere, pertexturus eandem, si DEUS vitam, viresque suppeditarit, & conatum hunc meum Lectoribus non injucundum esse cognovero.

Itaque geminas in partes totum displicetur pensum, quarum ANTERIOR, praesens nempe, tribus absolvetur Sectionibus, ita ut *Prima* Hydrargyri definitionem, denominationes, ac differentias varias, loca natalia, modum colligendi, ac depurgandi exponat: *Alter*a Metallorum, tum Hydrargyri praecipuis genefin, principia, & mixtiones enucleet:

## P R A E F A T I O.

cleet : *Tertia* vero singulares hujus corporis proprietates inquirat, diversasque erga Ignem, Aërem, Aquam, erga Metalla tam nobilia, quam ignobilia, scrutetur habitudines.

PARS POSTERIOR vero, quam alio tempore coram sistere meditor, habitus Hydrargyri ad Antimonium, Zincum, Marcasitam, Auripigmentum, Arsenicum, Sulphur, aliaque Mineralia investigabit ; tum, quo pacto se cum Salibus quibuscunque, cum Spiritibus, & Oleis gerat, referetur. Demum ejus in corpus humanum vires, & agendi modum, quatenus hic ex principiis Physico-Chemicis deduci possit : usum & abusum multiplicem, ac effectus in morbis quibusdam salutares, perniciosos in aliis, ostendere adlaborabo.



## P R A E F A T I O.

Latinitate utar in arte recepta magis ,  
quam ad Facundiae Tullianae leges exacta ;  
siquidem vocabula nonnulla ( *Terminos Tech-  
nicos* appellant ) stilo ad Augustaei Seculi  
elegantiam expolito , ne Latinissimus qui-  
dem aliquis Latina reddiderit , nisi sensa sua  
obscuris circumlocutionibus malit in-  
volvere , quam usitato sermone  
manifestare.







# SECTION I.

De Hydrargyro, ejus denominationibus, ac differentiis, loco natali, quomodo colligatur, ac depurgetur.

## CAPUT I.

*Quid sit Hydrargyrum?*



§. 1.

HYDRARGYRUM est corpus metallicum singulare, tactu frigidum, sicco fluore, non nisi metalla madefaciente, admirabili pondere conspicuum, splendore argenteo nitens, summa mobilitate gaudens, admodum penetrans, volatile, omnem ignis vim eludens, ex particulis sphaericis, laevigatis, & politis constans.

§. 2. **D**efinitio haec ut melius intelligatur, ejus partes singillatim sunt expendendae; ac primo quidem notandum, eam non ex primis corporis hujus principiis, sed ex attributorum, & qualitatum collectione deductam esse.

A

§. 3.



§. 3. **V**ocatur *corpus metallicum*, quia non solum eundem agnoscit locum natalem, sed & pondere, tanquam charactere metallorum proprio, mollite fluida, qua metallum fufum repraesentat, splendore metallico, infociabili statu cum substantiis non metallicis: Et contra, facili cum aliis metallis, sulphure item, & salibus conjunctione, notas metalli exhibet. Differt tamen a veris metallis, dum haec duritiem, ductilitatem, fixitatem majorem, minoremve habent, prout magis, aut minus nobilia sunt; praeterea in igne liquefcunt, in aëre indurefcunt, superficie superiore convexa, malleabilitatem fervant, gravitatem simul, splendoremque metallicum ab Hydrargyro diverfum praeseferunt. Unde & *singulare* dicitur; quia non solum fluore suo sed imprimis volatili, & per calorem mire expansili indole a caeteris metallis multum deflectit.

§. 4. **T**actu *frigidum* vocatur, quia, licet nullum corpus in eodem aëre magis caleat, quod experimentis thermometro institutis ostenditur: tamen digito tactum, aestate etiam calidissima, sensum, ac ideam frigoris in nobis excitat; hujus autem phaenomeni ratio nititur sequentibus: omne corpus liquidum, quo densius est, eo citius refrigerat immersum calidum, quia longiori tempore indiget, ut ab eodem igne aequaliter incalescat; unde Hydrargyrum tardius incalescit reliquis omnibus corporibus, auro excepto; ignis enim ex uno corpore in aliud transiens debet commovere ejus partes, quod eo citius fit, quo haec mobiliiores, tenuiores, & rariores, ut in lana: tardius vero quo copiosiores, solidiores, magisque cohaerentes, ut in hydrargyro: hinc & plures vires ignis absumit pro ratione suae densitatis; corpora itaque, quae majorem copiam ignis in se habent, tanto citius eam amittunt, quanto densius in fluidum immittuntur; sic ferrum calefactum in aëre diutius calorem retinet, in aqua citius amittit; haec enim octingenties, & quinquagesies fere densior; in hydrargyro vero citissime, utpote quod aquam densitate quater decies fere superat, idque eo contingit citius, quo corpus calidum fluido frigido immersum celerius agitatur; tum enim assidue novo frigido liquori applicatur (a). Concurrit simul *color splendidus*, qui facit, ut tardius, incalescat; quo candidiora enim sunt corpora, eo majori vi lucem igneam reperiunt, & quidem in  
omni

(a) Boerhaave. Elem. Chem. Tom. 1. P. 2. pag. 143. 144. Paris. 1733.

omni puncto eadem prorsus virtute aequabilissime, cum expuris consentent particulis homogeneis (b).

§. 5. **A**t semel calefactum hydrargyrum calorem longe diutius retinet, quam corpora caetera leviora, imprimis si spatio inhaereat valde raro, aut prorsus vacuo; cujus causa ex majore densitate est repetenda; haec enim celerem ignis egressum impedit, cum ejus particulae sphaericae plus massae corporeae sub minore superficie contineant, namque haec figura caloris tenacissima est tum ob superficiei, ratione molis, parvitatem, cum ob partium aequabilem ad infimum centrum accommodationem, & a superficie aequabilem recessum. Verumtamen sensim ad atmosphaerae ambientis redit temperiem; omnia enim corpora, licet calidissima, si diu in eodem aëre quiescant, semper ad eundem caloris, frigorisve gradum reducuntur; unde neque alcohol vini purissimum hydrargyro tum calidius habendum. Cur vero idem certum tantum caloris gradum nanciscatur, sexcentesium nempe, in Thermometro Fahrenheitiano, eundemque, ac oleum bulliens, licet quindecies ponderosius sit oleo: majorem autem, quam aqua, quae ebulliens calorem habet ducentorum, & tredecim graduum: ratio forte, praeter ipsam molem, dari non potest (c).

§. 6. **P**orro hydrargyrum *fluore sicco* gaudet, qualis nusquam in tota rerum universitate occurrit, cum non madefaciat id, supra quod fluit, sibi homogenea fluiditate cohaereat, & nullo frigore consolidetur, licet illud ad 40. gradus infra 32. seu gradum congelationis, arte deductum sit, & adeo densari queat, ut ad  $\frac{1}{269}$  suae molis contrahatur (d).

§. 7. **S**iccus vocatur ille *fluor* soli hydrargyro proprius, cum omnis humiditatis expers sit, id est: quia humidi sensationem in nobis non excitat; licet certo respectu humidus dici possit, quatenus cum corporibus metallicis eandem speciem adhaesionis subit, quam humida alia universim praestant, metalla injecta solvit uti aqua salem; imo quod mirum, in aqueam pelluciditatem converti posse traditur, qua de re suo loco dicetur.

(b) Idem ibid. pag. 128.

(c) Idem ibid. pag. 143.

(d) Idem ibid. pag. 89.



§. 8. **E**st autem humidum inter, & fluidum, insignis differentia; namque humiditas ipsi speciei essentialis est, fluiditas ex aggregatione humidi purioris nascitur, adeoque humidis quasi accidentalis existit (e).

§. 9. **H**umidum igitur sensationem a sicco fluore §. 7. diversam nobis imprimit, aliis corporibus facile adhaeret, cum salinis, terreis, facile connectitur, ab aëre calido commovetur, motuque aëris absente in aggregatum fluidum coit; omne enim humidum aptum est ad fluiditatem, licet non omne fluidum ad humiditatem. Hydrargyrum tamen, & ipsa metalla fluida, eandem illam adhaesionem cum congeneribus corporibus fubeunt, quam humida quaecunque, ad plura alia corpora.

§. 10. **F**luidum vero non ex unica particula, sed plurium congerie constituitur, quae singulae seorsim sumtae tam parvae sunt, ut omnes fugiant sensus, pressioni cuicunque cedant, & facillime moveantur ita, ut vel motae in loco suo maneant, id est: circa axem; vel inter se invicem loca mutant, cum perpetua mutatione contiguitatis, & fociae quietis, unde facile quodcunque corpus gravius, ulterius motum, per aggregatas fluidi particulas transpellitur, quae singulae per se firmatae, & solidae, in superficie probabiliter sphaericae, & politae; dum in unico se se tangunt puncto, hinc parum cohaerentes, minimae vi cedunt, & ad motum valde proclives sunt (f); cumque in hydrargyro haec omnia concurrant, *fluidum* merito vocatur.

§. 11. **S**unt & aliae fluiditatis causae, sine quibus corpus nullum fluidum existeret, *aër* nempe, & *ignis*. Aëris siquidem potestas immensa est, dum fluidus, invisibilis, pellucidus, elasticus, gravis, exhalationibus variis impraegnatus, in omnia se se insinuat spatia, corpora cuncta penetrat, aequaliter comprimit, atterit, compingit, exagitat, aufert, destruit, in motum deducit, & per calorem agitatus eo agit violentius, quo ipse est densior (g); hinc & minimis hydrar-

(e) Stahl. Opusc. Chym. Phys. Med. pag. 100.

(f) Ibid. pag. 107. seqq.

(g) Boerh. El. Chem. Tom. 1. part. 2. pag. 227.



drargyri globulis interspersus haeret, cujus actione vivida non interrupta ita inter se, & locali motu volvuntur, disjungunturque, ut facile cedant aliorum contactui, in quo natura fluidi, juxta omnes Physicos, reposita est. Hinc & Hoffmannus (*h*) Mercurii confectionem artificialem metallorum, conflictui salium, & productioni fluidi aetherei, aëris nempe subtilissimi in particulas metallicas agentis, tribui voluit, dicens: quod mediante fermentatione, & ebullitione cum salibus diversi generis instituta, peritiores operationum Chemicarum ex plumbo, vel Regulo antimonii Mercurium fluentem conficere sciant, dum partim salia cohaesionem metallorum disjungunt, sicque in fluorem adigunt: partim salium conflictu & mutua reactione producitur, vel colligitur insignis copia fluidi aetherei, & in rapidiorem cietur motum, quo assidue circa axem circumaguntur obsequentes, ad motum antea pronae, metallorum particulae, sicque mercurii naturam & proprietates omnino assumunt.

§. 12. **I**gnis autem causa praecipua est omnium effectuum; cujus nota primaria calor, qui omnia corpora penetrat, dilatat, movet, agit, & fluidi cujuscunque elementa mira sua vi, nunquam quidem in minores partes dividit, eas tamen in majorem molem extendit, & valide inter se commovet; ideoque solus omnia fluida conservat; hinc si aqua ad gradum 32. frigescat, fieri non potest, ut aqua maneat, verum in glaciem duram eam consistere est necesse. Cel. Boërhaavius, qui haec omnia eleganter describit, subjungit, aquam tantum aquam esse per motum insiti ignis, non ex natura propria & absque igne seorsim consideratam (*i*). Hydrargyrum, & alcohol in frigore extremo fluida quidem manent, attamen in gradu motus sui a vehementi adeo frigore manifeste impediuntur, uti in extractione per spiritum, amalgamatione per mercurium sub sensu cadit; imo hydrargyri pondus fere  $\frac{1}{7}$  gravius, vel levius fit a solo calore, vel frigore nobis hactenus noto, sic, ut sensim per frigus ad pondus auro proximum accedat (*k*), & tandem, si frigus semper augeretur, integre fors consisteret. Patet igitur, & aërem, & ignem inter praecipuas fluentis Hydrargyri causas merito recenseri.

A 3

§. 13.

(*h*) Oper. omni. Phys. Med. T. IV. p. 578. Edit. Genev. 1748.

(*i*) Boerh. El. Chem. T. 1. P. 2. p. 214. seq.

(*k*) Idem ibid. p. 89.

§. 13. **Q**ualis autem sit ipsius hydrargyri constitutio, quae principia, undenam ejus particulae sic sint dispositae, ut aëris, & ignis concursu corpus metallicum fluido-siccum efficiant, & ab aliis metallis figura, gravitate, cohaesione, fixitate, differre faciant, alibi erit dicendi locus. Cur vero fluiditas mercurii humiditate careat, rationem affert Cel. Hoffmannus (l): quia ejus corpuscula adeo densa, laevigata, & exilissima sunt, ut non facile in suo motu sisti, & aliis corporibus adhaerere queant. Accedit, quod fluidum corpus, compositum ex meris particulis gravioribus, dum corpus solidum tangit, ab illo non tanta vi attrahatur, quanta fluidi corporis particulae inter se cohaerent; quodque praeter mercurium vix corpus ullum fluidum existat, quod ex particulis ejusdem gravitatis esset compositum: ideoque materia fluida quaecunque, corporibus solidis specificè levioribus fortius adhaerescit, quam illius particulae inter se: solo excepto mercurio (m).

§. 14. **D**icitur hydrargyrum *mirabili pondere conspicuum* (§. 1.) cum sit corpus auro excepto, gravissimum omnium; id enim solum, mercurio currenti injectum, fundum petit, testatur idem Geber: *non submergitur aliquod metallorum in mercurio, nisi sol* (n). Et Isidorus, referente Unzero: (o) *si super hydrargyri sextarium centenarium saxum imponas, oneri statim resistit; si vero scrupulum auri injeceris, pondus ejus non sustinet*. Agricola quoque (p) inquit: *in duobus mercurii talentis unum ferri talentum innatat, unus vero aureus denarius mox mergitur*. Notandum tamen, quod omnia metallorum amalgamata, mercurio injecta, fundum pariter petant, licet metalla omnia, dempto auro, mercurio innatent; eorum siquidem porum aëre sunt repleti, & aëreae particulae vesicularum instar corpora haec natationi apta reddunt, eadem prorsus ratione, qua lignum ab aqua sustineri videmus. Verum amalgama quodcunque se habet ad mercurium ratione gravitatis, ut lignum, cujus poros aqua intime subivit, ad aquam ipsam; nam illud quoque ab aqua intime penetratum eidem non ultra supernatat (q).

§. 15.

(l) Op. omn. T. IV. p. 578.

(m) Kruger Natur-Lehre 1. Theil §. 223.

p. 258.

(n) Summ. perfect. Magist. pag. 42. Gedan. 1682.

(o) Anat. spa-

gyr. merc. Lib. 1. p. 11.

(p) Agricola de fossil. L. 8. C. 7.

(q) Kruger

Natur-Lehre 1. Theil C. 5. p. 222.



§. 15. **G**ravitatis materia suppeditatur hydrargyro a terra illa solida, ex qua suam nanciscitur consistentiam, cujus particulae singulae, minutissimae licet, arcte adeo sibi mutuo accumbunt, ut non nisi angustissima inter se constituent spatiosa, soli subtilissimo aetheri aditum praebentia. §. 11. Docent hoc experimenta tubo Torricelliano instituta; hinc densa mercurii moles a circumambiente universali fluido ita comprimitur, ut corpus insignis gravitatis necessario constituat (*r*); pondus enim a gravitate per numerum partium corpus constituentium multiplicata dependet; gravitas vero, seu vis illa, qua corpora ex quiete in linea perpendiculari deorsum moventur, proportionalis est quantitati materiae, non magnitudini superficiei; cum igitur particulae mercurii sphaericae sub parva mole plus massae comprehendant, densioresque sint, cuncta reliqua, praeter aurum, gravitate superant. Fluiditas vero, & mobilitas gravitati nihil derogat, sed eam potius auget; namque & metalla igne liquefacta graviora fiunt, argentum enim solidum fuso injectum supernatare cernitur, uti glaciem aquae innatare videmus.

§. 16. **I**nsuper hydrargyrum *splendore argenteo* nitet; nempe splendor, lucis est reflexio vividissima, collectionem omnium radiorum coloratorum in se comprehendens; namque corpora polita, & specularia omnia lucem eadem fere vi reperiunt, qua illam acceperunt. Haec autem reperiunt sua potentia sic mutat nervos opticos, ut in mente splendoris idea inde nascatur. Tali modo imago solis vividissime reperiunt splendorem oculis nostris intolerabilem inducit. Ratio igitur, cur hydrargyrum hoc, & non alio modo lucem reflectat, a particularum laevigata superficie, opacitate, densitate, & singulari ejusdem qualitate dependet; qua de re imprimis legi merentur Viri celeb. Newton in Lect. opt. (*s*) & Boyle (*r*), qui posterior, praeter alia pulcherrima, sequens recenset experimentum: *curiositate ductus*, inquit, *argentum vivum in cucurbita ampla, capitulo vitreo instructa destillavi, observavique, operatione, eo caloris gradu, qui ad propositum meum requirebatur, peracta, interno alembici parieti multitudinem*

(*r*) Fr. Hoffm. T. IV. p. 579. in Dissert. (*s*) Part. 2. Sect. 1. prop. 3. p. 171. seq. Edit. Londin. 1729. (*r*) Experiment: Hist. Color. P. 2. C. 1. p. 36. seqq. Genevae 1677.

nem orbicularium guttularum adhaesisse, atque, ut nosti, mercurium esse corpus speculari, sic unaquaeque harum particularum parvum erat, rotundumque speculum, & plurimis earum confertim sibi invicem adjacentibus, eae tum meo, tum eorum, quos ad spectaculum invitaveram, iudicio, vitrum, cui adhaerebant, corpus manifeste album visui reddebant. Haec tamen, inquam, albedo, ab exiguitate, & proximitate parvulorum mercurii globulorum dependebat, quorum superficierum convexitas aptos eos reddebat, ad repraesentandum in angusto spatio, diversimode positis spectatoribus, lucidarum imaguncularum multitudinem. Illa vero qualitas dicta, seu specialis constitutio mercurii, unde omnia sic se habent, originem debet proportionatae mixtioni principiorum mercurium constituentium, de quibus postea.

§. 17. **S**umma autem *mobilitas* hydrargyri patet omnibus, & visui facile se offert; si enim parum mercurii supra tabulam politam, & laevigatam fundatur, mox in plures dividitur guttulas hinc inde velociter currentes, quae digiti contactum cursu ulteriore statim eludunt, dum in minores, pariter currentes, diffiliunt globulos; idem quoque in Thermometro Fahrenheitiano manifestum fit, ubi a minimo calore, ut manus applicatae: imo & ab hominis adstantis atmosphaera, extenditur, & in motum deducitur; a gradu vero caloris, ebullientem aquam parum superantis, jam in auras dispergitur. Mobilitas haec oritur a certa particularum dispositione, quae praeprimis in sphaerica figura consistit, cujus superficies politae, & laevigatae in unico puncto se se tangunt. His igitur dotibus cum gaudeat hydrargyrum, necessario mobilissimum est. Nititur autem constitutio mercurii, principiis illum constituentibus debita proportionem mixtis, concurrente simul aethere subtilissimo §. 15., cujus celerrima & jugi motione particulae minimae mercurii basin constituentes rapide circa axem suum aguntur, & accedente simul mira illa, & nunquam explicabili partium se se mutuo attrahentium virtute, sphaericam induunt figuram, atque in plurimos globulos stupendae parvitatis, maximeque laevigatos efformantur, qui tamen oculis, bono microscopio armatis, conspici possunt. (u)

§. 18..

(u) Fr. Hoffm. T. IV. p. 578.



§. 18 **E**isdem quoque fundamentis §. 17. nititur hydrargyri summa *penetrabilitas*, quæ sequentibus evincitur experimentis: Si partem tubuli vitrei, ex majore capacitate in tam angustam desinentis, ut pilum vix capere possit, immittas in vasculum mercurio repletum, superiore tubuli parte aperta: in instanti tubulus replebitur mercurio, & quidem eo usque, quousque immissus fuerit; mirum sane, quod per canalem angustissimum, cujus foramen inferius vix visibile, tanta mercurii quantitas, tam cito, ascendat; ex quo ejus agilitas & penetrabilitas cognoscitur. Notum est, eum per corium, etiam fortissimum, transiri posse; sed magis mirum, quod Illustr. Wolfius docuit: eundem ligna quoque penetrare & quidem per poros aëreos juxta canales succiferos ligni decurrentes (w); si enim patina lignea supra recipiens antliae pneumaticae agglutinetur, in eamque mercurius infundatur, tumque aër citissime exantletur, mercurius, penetrato ligno, in vacuum depluet. Corpori animali applicatus, quam mire illud penetrat! actio item in metalla prorsus est stupenda; ea enim non penetrat modo, verum etiam dissolvit, & friabilia reddit; hinc & a plurimis pro prima habetur metallorum materie, quod tamen verosimile non videtur ob rationes alibi recensendas. Imo, teste Bechero (x), ipsa vitra permeat, quod nec subtilissimus vini spiritus facit. Idem alibi confirmat, dicens: *nec vos celare volo, in communi mercurio tantam vim penetrantem latere, ut etiam vitra crassissima penetret, ac tingat, salium ope* (y).

§. 19. **V**olatilitas Hydrargyri eisdem suffulta est fundamentis, quæ §. 17. haec autem imprimis ex facili corporis hujus gravissimi per auras dissipatione §. 15. elucescit; nam ope caloris paulo majoris, quam bullientis aquae, atomi mercuriales elewantur sensim, & sub forma vaporis fere invisibilis penitus exhalant; quod si calor amplius augeatur, perexiguo temporis spatio tota hydrargyri massa evanescit: unde illius tenuitatem, ac superficiem modo incredibili augeri est necesse. Magis adhuc eadem hydrargyri volatilitas amu-

B

leto-

(w) Wolff. Nutzliche Versuche P. 3. C. 5. §. 67. p. 244.  
p. 358. & 375.

(y) Idem ibid. p. 339.

(x) Phys. Subterr.

letorum effectibus comprobatur; quos Wedelius ex Hercule Saxoniae in Tract. de Med. Facult. describit.

§. 20. **P**artículas ejus sphaericas esse, & politas, patet iterum ex summa illius mobilitate §. 17. ex divisibilitate, penetrabilitate, volatilitate §. 18. 19, & ex solutione ejus cum aqua forti, ubi clare apparet, in menstruo solvente, quod infinitae particulae sphaericae in forma fumi eleventur (7). Sic & a calore in fumum, & vaporem actus si corio humido excipitur, globulos innumerabiles ostendit; quin & in ipsis praeparatis mercurialibus, ut Æthiope minerali, mercurio dulci, &c. bono microscopio, veri deteguntur globuli mercuriales (a). Praeterea hydrargyrum hasce qualitates haberet nunquam, nisi partes ejus sphaericae, politae ac laevigatae forent, sed, aliorum instar metallorum sibi continuae, quasi inuncatae, inter se haererent.

§. 21. **E**x hæcenus dictis ergo patet, quid, qualeque sit hydrargyrum? de quo tractationem praesentem instituere volui. Suadet nunc ordinis, & instituti ratio, ut ejus Etymologiam, & Synonymias varias expediam, priusquam ad alia progrediar.

## CAPUT II.

### *De variis hydrargyri denominationibus.*

§. 22. **C**orpus hoc metallicum variis, multisque insignitur nominibus, horum usitatorum cognitionem reliquarum rerum investigationi praemittendam consultum judico. Vocatur igitur ὑδράργυρος, vel ὑδράργυρος Dioscoridi, nomine derivato ab ὕδωρ aqua, & ἄργυρος argentum, quasi aqueum argentum, aqua argentea, vel aqueae fluiditatis, diceret. Aristoteli, & Theophrasto ἄργυρος χύτρον, item ἄργυρος κινητὸν, argentum fusile, mobile, audit (b).

§. 23. **A**rgentum vivum quoque dicitur, ob splendorem argenteum §. 16., & pondus §. 14.; vivum autem ob suam

(7) Lemery Cours de Chymie. C. 3. p. 181. Lyon-1724.

(a) Backer Von microscopio Cap. 50. p. 309.

(b) Fr. Hoffm. T. IV. p. 577.



mobilitatem vividam §. 17. & instar aquae undantem; aequat enim argentum in igne fluens.

§. 24. **M**ercurii vero speciosum nomen unde illi adhaeserit, incertum; an quia semper mobile, & volatile, uti Mercurius Deorum nuncius olim depingebatur? an a planeta, a quo veteres Astrologi, & Chemici statuerunt, hoc corpus influxum habere? an quia variis formis recipiendis aptum natum est, uti Mercurius coelestis, qui, ex mente Astrologorum, influentias, ut vocant, varias suscipit? an ab Hermete Trismegisto, seu Mercurio Ægyptiaco? an ab alia, prorsus arbitraria, aut imaginaria analogia? id vero etiamnum dubium, controversumque est. Quod si eo in sensu accipiat, ut Mercurius pro principio statuatur, illud hoc vocabulo designatur, quod est *fluidificans*, seu *mercurificans* alia metalla, uti Chemici loqui amant, de quo postea. Ab aliis pro principio Chémico, seu omni illo liquore sumitur, qui non inflammatur, sive sit spirituosus, acidus vel aquosus.

§. 25. **S**ignificatio autem Characteris ꝯ ex hieroglyphica scribendi ratione desumitur; hujus enim intima, & media pars purum aurum denotat, sed superius argenti colorem apparere, dum interim subest acre rodens, quibus inde separatis purum aurum remanet, sed vivum. Id de argento vivo asserunt Adepti (c). Potest tamen significatio hujus characteris alio quoque modo explicari, quod nempe Mercurius ex mente Becheri (d) *decompositum sit corpus ex particulis metalli cujusdam, auri nempe, vel argenti vel Cupri &c. & superveniente principio fluidificante mercuriali dicto*, quod in omni acido haerere asserit alibi (e), unde & *fluidum amalgama & metallum fluidum* audit.

§. 26. **V**ivus, seu currens vocatur Mercurius, quod, quasi viveret, currendo se moveat. Communis autem dicitur, ut ab animato, de quo inferius, differat; quodque sine arte, a sola natura in mineris producat (f).

B 2

§. 27.

(c) Boerh. El. Ch. T. 1. P. 2. p. 18. (d) Phys. Subterr. L. 1. Sect. 5. C. 7. p. 199.  
(e) Idem ibid. p. 271. (f) Idem ibid. p. 208.

§. 27. **A**qua *sicca* etiam nuncupatur, manus non madefaciens; *aqua*, quia fluit in frigido aëre, aquae instar, & guttatim destillat: *sicca* vero, quia non adhaeret, nec humectat, nisi metalla, quae solvit, ut aqua sales; cum iis permiscetur, coagulatur, vel, uti dicunt, amalgamatur; unde & *aqua metallorum solvens* nuncupatur.

§. 28. **P**raeterea & *miraculi naturae* nomine donatur, quod nullum existat corpus illi simile; fluidum nempe, & siccum, & immutabile; licet enim specierum innumerarum larvam assumat, arte tamen ad pristinam formam reduci potest, sicque multorum expectationem deludit, quare & *Protheus* nominatur.

§. 29. **A**b aliis *natura imperscrutabilis* praedicatur, ob summam nempe partium individualium homogeneitatem, cuncta Chemicæ analyseos instrumenta frustrantem; unde forte inter elementa magis, quam ullum e peripateticis collocari meruisset, uti sentit Stahlus (g).

§. 30. **C**el. Hoffmannus (h) Mercurium vocat *fluorem aethereum* specificis particulis metallicis saturatum, quod patere inquit, ex artificiosa mercuriorum metallicorum praeparatione, quae absolvitur effluviis aethereis ex salibus invicem colludentibus ortis, & ex rotunda, quae propria est materiae primi elementi, qua semper gaudet mercurius, forma §. 17., demum & ex eo, quod mercurius igne forti tractatus copiam aquae insipidae largiatur; id enim fieri asserit ex magnetismo quodam mercurii, dependente a particulis aethereis in mercurio eminentibus, quae, impetu caloris motae, novum aetherem, cum matrice sua aquea attraherent.

§. 31. **V**omicam liquoris aeterni appellare Plinio placuit; cum ex fodinis continuo fluidus prodeat, sic autem ait (i): *est & lapis in his venis, cujus vomica liquoris aeterni argentum vivum appellatur.*

§. 32.

(g) Fund. Chym. Dogm. p. 123.

(h) Op. omn. supplem. 1. p. 129.

(i) Plinius. Hist. Nat. T. II. L. 33. Cap. 6. p. 622. Paris. 1723.



§. 32. *Servus fugitivus* etiam nominatur, quia igne in partes tenuissimas sub halitus forma dividitur, ac dissipatur; unde ab aliis *mercurius alatus, volatilis, fugax* dicitur.

§. 33. Denique & alia plurima illi imponuntur nomina, ut *Chamaeleon*, quod varios suscipit colores. *Hermes*, ab Hermiete Trismegisto. *Electrum*, quod ex diversis metallis confusus sit. Reliquas Arabicas, Chaldaicas, mysticas, atque barbarie ipsa horridiores denominationes iis relinquo, quibus Oedipum agere, & verborum aenigmata solvere volupe est, meque jam ad variorum mercuriorum differentias, & ad loca natalia indicanda convertito.

### C A P U T III.

*De differentia, variisque hydrargyri speciebus, ac notis.*

§. 34. Mirum quibusdam videri poterit, me indagandae Mercuriorum differentiae proprium assignare capitulum, cum non pauci unicum existere autument: Verum diversae corporis huius inveniuntur species, quae pro diversitate soli natalis, minerae, puritatis naturalis, artificialisve geneseos, & praeparationis, inter se differre possunt: unde distinctas exhibent notas, quoad gravitatem specificam, fluiditatem, nitorem, habitumque diversum ad alia corpora; ut adeo non sine ratione triginta sex enumeret species Thurneisserus, quas non nomine solum, verum etiam natura diversas esse asseverat (k).

§. 35. Est igitur hydrargyrum vel *nativum*, a natura in regione subterranea productum; vel *artificale*, ex metallis nempe arte productum. *Nativum* primo distinguitur pro diversitate soli natalis; unde Plinius Hispanicum, Theophrastus Colchicum: Recentiores Transylvanicum, Bohemicum, & praecipuis Germanicum, quod

(k) Alchym. magna L. 6. C. 3. p. 85. Berlin. 1592.

quod in Carnioliae Ducatu eruitur, commendant, qua de re sequenti capite plura.

§. 36. **P**orro nativum vel est *virgineum* vel *vulgare*. *Virgineum* vocatur, quod omnino purum, currensque intra terram, ejusque lacunas, in quas confluit, invenitur, indeque colligitur; raro tamen sic fossoribus occurrit, idque non nisi pauca quantitate. Frequentius & aequè purum, sub globulorum nitidissimorum forma, inhaeret mineris colore cinereis, vel murinis, ex quibus sola lotione, vel ictibus mallei, sine igne elicitur. Haec species levior, purior, subtilior, magisque penetrans creditur, & ab Alchemistis magis spiritualis habetur; hinc Becherus, *Mercurius Virgineus*, inquit, *a communi differt, quod aurum cum mercurio Virgineo amalgamatum & igni expositum, omnino ab illo tollatur, id quod communis praestare nequit* (l).

§. 37. **H**ydargyrum autem *vulgare* illud dicunt, quod in globis effoditur, & mineris inhaeret solidis, magis, minusve compactis, colore vario praeditis, plerumque tamen rubro, hepatico, fusco, modo subflavo, modo spadiceo conspicuis; consistentia autem solida harum minerarum una cum coloris varietate pendet a diversa miscela sulphuris, Mercurii, & substantiae terreae, vel lapideae; sunt enim minerae Mercurii vel sulphureae, & ex utriusque miscela Cinnabarinae, quae si rubrae, valde ponderosae, plus, minusve transparentes, plerumque unam partem sulphuris, & sex pluresve partes Mercurii continent (m). Aliae vero minerae sunt lutosae, terreae, ac lapidosae, sicque Mercurius nativus duplici modo rebus aliis mistus in fodinis occurrit. Sunt, qui huic speciei mercurium ex Cinnabari factitia, aliisque praeparatis Mercurialibus refuscitatum adnumerent; verum hic ad depurationes, & praeparationes potius est amandandus.

§. 38. **P**er Hydargyrum *artificiale* intelligitur *Mercurius metallorum*, seu *corporum* dictus, qui ex metallis, arte producitur. Est metallicum corpus a principio mercuriali in statum currentem deductum

(l) *Phys. Subterr. suppl. 1. C. 5. p. 315.* (m) *Waller. Mineral. clas. 3. p. 285.*



ductum (n). Praeterea a communi differre dicitur gravitate specifica, majore fixitate, subtilitate, penetrabilitate (o).

§. 39. **M**ercurius *animatus* iterum praeparatione differt, ut alibi demonstrabitur, & ad usum medicum imprimis laudatur (p). Sic & *Philosophicus*, quem Cel. Hoffmannus obtineri dicit, si partes metallicaе terrestres a spiritu mercuriali aethereo artificiosa encheiresi separentur (q). Becherus vero Mercurium Philosophorum a communi differre dicit, quod in communi terra fluidificans assumpto quodam metallo jam aliquod decompositum constituerit; in philosophico vero terra illa virginea adhuc sit, nullo minerali maculata, & proinde capax recipiendi sulphur solis perfectum (r). Notandum autem, quod etiam mercurius animatus saepe Philosophicus audiatur: Dicit enim alibi Becherus (s) *Philosophicus ille mercurius vocatur, qui in actu est, nominatur etiam animatus, quasi viveret; cum motum habeat, nempe animam mineralem*; additque, hunc mercurium se ipsum coquere, & perficere, aureum esse, in metalla potenter agere, praesertim in aurum, quod resolvat ad excalescentiam usque; illa attenuet, ut per corium transeant, & arripiat secum per retortam, ut indivisibiliter cum illo permaneant.

§. 40. **D**istinguitur ulterius hydrargyri species una ab altera, quoad ejus diversam mixtionem; cum enim, ut Becherus vult (t) Mercurius sit fluidum amalgama, mixtio nempe principii fluidificantis mercurialis dicti, cum quodam metallo: tot mercurios esse dicit, quot sunt metalla, quae terrae, seu principio illi fluidificanti, misceri possunt. Hoffmannus statuit, mercurium vulgarem componi ex particulis metallicis, & spiritu astrali subtilissimo; has particulas metallicas autem, non semper a Saturno, & bismutho suam petere originem, sed saepe alia quoque metalla mercurii ingredi naturam (u) neque ullus invenitur mercurius, qui non ex metallo vel uno vel diversis simul, constet, licet difficulter id manifeste-

(n) Becher. Ph. subt. suppl. 1. p. 298.

(o) Junk. consp. Ch. T. I. Tab. 17. p. 396.

(p) Fr. Hoffm. T. IV. in Triade Diss. p. 585. seqq. (q) Idem suppl. 1. P. 2. Dissert. de Cinab. Antim. p. 129. seqq.

(r) Ph. subt. L. 1. Sect. 5. C. 3.

p. 199. (s) Idem ibid. p. 382.

(t) Phys. subt. L. 1. sect. 5. C. 3. p. 199.

(u) Frid. Hoffm. suppl. 1. part. 2. p. 130.

nifestetur, ob principii fluidificantis copiam, ut supra laudatus Becherus innuit. Unde Mercurius *Solaris*, *Lunaris*, *Jovialis*, &c. esse potest. Quod si *Solaris* sit, evaporatus in cochleari argenteo maculam aureo - flavam relinquit: & sic de caeteris. Talis enim, pergit dictus Author, (x) si argento in cineritio fluenti sub tegula fornicata, & ad extremum flosculos facienti, jam jam coruscaturus aliqua pars injiciatur, argentumque postea probetur, dabit perspicuam auri probam. Unde & Boyle (y) quandoque mercurii crudi solutiones cum bona aqua forti factas, virides observavit, qui color procul dubio a particulis cupreis mercurio immixtis ortus est. Quanta autem hic rursus differentia mercuriorum!

§. 41. **P**raeterea hydrargyrum *purum* distinguitur ab *impuro*: *Purum* dicitur, quod splendidissimum, summe fluidum, & ut Bernoulli (z) ait, quod facile se discuti patitur in grumulos minimos, qui promptissime abeunt in globulos hinc inde celerrime discurrentes, si vel leviter attingantur; additque, signum esse mercurii optimi, si lagenae vitreae inclusus, & vehementer concussus in superficie sua bullulas quasdam spectandas offert, liquoris instar spumantis; quae vero bullulae momento iterum dissiliunt. Insuper cuticulam in sua superficie nullam contrahit, nec digitos, chartamve albam affricu denigrat, per corium pressus nihil impuri relinquit, neque cum aqua tritus illam turbidam reddit; purus porro mercurius igni expositus non crepitat, sed promte exhalat, nec ullam maculam lividam, aut nigrescentem relinquit, aqua forti solutus colorem menstrui non mutat, nec quicquam impuri deponit; optimus vero imprimis est censendus, qui metalla promptissime aggreditur, eorumque cohaesionem citissime divellit.

§. 42. **I**mpurum autem, quod heterogeneis est inquinatum particulis, noscitur ex contrariis §. 41.; tale enim digitos saepe impressos nigro colore inficit, cuticulam in superficie contrahit, colorem saepe lividum induit, in calore ficcaturum si sub dio exponatur, humiditatem attrahit, atomosque pulverulentas in se recipit, in

(x) Becher. *Phys. subt.* L. 1. p. 209. (y) *Traët. de color.* p. 147. & *Introd. ad Hist. qualit.* part. p. 4. (z) *Op. omnia.* Genev. 1742. Tom. II. p. 351.



in guttulas exacte rotundas non facile dividitur, sed corpuscula format oblonga, atque in eo lentor, & quasi torpor aliquis conspicitur, dum per corium transprimitur, multum impuri relinquit. Notandum tamen, tale hydrargyrum perfectam quandoque mentiri puritatem, & tamen inquinamenta sulphurea, aliave continere.

§. 43. **A**ttamen utraque haec hydrargyri species a Mercurio elementari distinguatur est necesse; nam hic simplicissimus, subtilissimus, immutabilis est, nec sub tam crassa forma per se colligi, aggregari, aut cognosci potest, nisi aliis corporibus mixtus, & quasi conglutinatus, qualitates suas exferat (a).

§. 44. **T**andem breviter perstringi meretur differentia hydrargyri a diversis ejus productis petita; pro varia enim elaboratione varia sortitur nomina, uti *Mercurius sublimatus*, *praecipitatus*, *albus*, *ruber*, *viridis* &c. Sciendum item, antiquiores scriptores voce *Mercurii*, plerumque sublimatum: *argenti* vero *vivi* nomine, hydrargyrum indicasse.

## C A P U T IV.

### *De hydrargyri natalibus locis horumque indicationibus, & signis.*

§. 45. **H**ydargyrum regionem plerumque subterraneam pro natali agnoscit loco; licet in fluviis quoque, lacunis palustribus, plerumque saluginosis, in coeno, ac luto platearum, praesertim post imbres copiosiores, repertum non nunquam fuisse, Authores testentur (b).

§. 46. **L**oca vero, seu montes, corpore hocce metallico, suis in recessibus divites, externa quoque praebent indicia, quae, post Vitruvium, Palmarium, & Caesalpinum describit Lemery (c). Montium nempe illorum superficies plerumque fragilibus, albisque  
C faxis,

(a) Junker. confp. Chym. T. 1. p. 983.

(b) Idem ibid. p. 1010. Stahl. specim.

Becher P. I. Sect. 2. p. 113.

(c) Cours de Chymie p. 187.

faxis, calcis vivae instar, tecta apparet; plantae, ibi crescentes, majores, viridioresque conspiciuntur, arbores tardius germinant, raro florent, & saepe numero steriles sunt. Aqua regiones illae ut plurimum abundant, vapores densi, imprimis Aprili, & Majo, mensibus, crebraeque conspiciuntur nebulae graves, nec alte a terra elevari potentes. Addunt non nulli, quod, si hae notae septentrionem respiciant, venae longe abundantiores ibi lateant, quod, mea sententia, veritati adeo consentaneum non videtur.

§. 47. **H**orum tamen locorum, in quibus hydrargyrum, ejusve minerae inveniuntur, paucitas memorabilis est, cum, in comparatione aliarum fodinarum metallicarum, hae longe sint rariores; certe his, quae vivimus temporibus, earum numerus ultra quinque, aut sex non se extendit.

§. 48. **P**lures quidem recensentur variis ab Authoribus provinciae mercurio quondam divites, quarum pleraeque nunc exhaustae, aut steriles, aut incultae sunt. In universo oriente vix ullae conspectae sunt. De Indiae tamen quibusdam Tractibus, ut China, Insula Borneo, uti & in Japoniae fluviis, pauca ejusdem ramenta reperiri legimus (d). Olim & in America meridiana, Regno Peruviano, ad urbem Oropesam, prope Limam, hydrargyri mineram Anno 1566. a Lusitano quodam detectam obscure innuit Alvarus Alphonsus Barba (e); quae tamen hodie omnes exaruerunt. Talis quoque eruta fuit in Colchis, ut prodit Theophrastus, in rupibus inaccessis: talis nata est in Carmania, ut Juba scripsit; talis in Æthiopia referente Timagene apud Plinium (f). In Hispaniae Provincia Andalusia ad pagum Almaden; prope Calatravam, in Regno Castiliae; in montibus Pyrenaeis, in Sisaponensi regione, in Baetica, Minerae Mercurii olim frequentes, feracissimaeque exstiterunt, quarum tamen hodie vix non omnes aut exhaustae, aut, ob incolarum inertiam, neglectae sunt (g).

§. 49.

(d) Fr. Hoff. T. IV. p. 577. (e) Berg Büchl. p. 117. Franckf. 1739. (f) Hist. Nat. Tom. II. L. 33. C. 7. p. 625. (g) Sam. Puffendorf Introd. ad hist. Europ. p. 90. Francofurt. 1704.



§. 49. **S**imiliter in Gallia, vertente priore seculo, venas cinnabarinas, & mercuriales circa Monspelim in Occitania, & in Provincia Normanniae prope Sanctum Laudum, vulgo St. Lo, non longe a Carentano oppido, inventas ferunt (*h*). Sic Josephus Valdambrinus Medicus Cortonensis in scripto Italico de hydragyro Cortonensi mentionem facit, cujus tamen usum minus tutum praedicat, uti legitur in Aët. Erudit (*i*). In Polonia, in monte Gimnaveda, sex milliaribus Cracovia diffito, mercurius repertus dicitur, qui certis anni temporibus ad terrae superficiem sponte erumpit, idque maxime in autumnis & circa festum S. Joannis Baptistae, ita ut multa illius grana, pisorum instar, in radicibus graminum se collegisse testetur Author Tyrocinii Chemici (*k*). Sic & in ditone Solodurensi ad pagum Pipp, in prato quodam, falicibus confito, elegans argentum vivum se collegisse memorat Thurneisserus (*l*).

§. 50. **N**ec minus in interioribus Germaniae Tractibus, ad Greifenthalii, & Walckenrodae Thuringiae oppida, passim minerae cinnabarinae colliguntur vel purae, vel cum terra calcaria, & lapidea, quae partim in fontibus, partim sub terrae recessibus inveniuntur. Sic Petrus Albinus aliquot massulas Mercurii minerae cinerea in Voigtlandia, non procul a Schoenek, effossas notat (*m*). Alii de coccinea minera Schoenbachii ad Egram, in Bohemia, uti & in ejusdem Regni circulo Cubitensi, & Beraunensi, meminere; in horum rivis quibusdam, granorum forma, & subter rubro solo, in ipsis rusticorum casis se deprehendisse narrat Rudolphi: Praetermitto plures alias, uti Franconicam, Marpurgo-Hassiacam, Tyrolensem, &c. quae omnes, teste Junkero, (*n*) steriles hodie sunt. In Ungaria tamen hodiedum, ad oppidum Cremnitz, & imprimis in Transylvania prope Szalatnam, mercuriales existunt fodinae, minime sane praetereundae.

§. 51. **N**ullibi vero, aetate nostra, sive abundantius, sive melius hydrargyrum obtinetur, quam in Carniolia, Circuli

C 2

(*h*) Lemery Cours de Chymie C. 8. p. 187. (*i*) Aët. Erud. Lips. 1747. Mens. Nov. p. 665. (*k*) Beguin. L. 2. C. 15. p. 305. Genev. 1659. (*l*) Alchym. magn. L. IV. C. 5. p. 86. (*m*) Fr. Hoffm. T. IV. p. 577. (*n*) Consp. Chem. T. I. Tab. 39. p. 1009. seq.

culi Austriaci Ducatu, ubi praesertim ad Hydriam, vulgo Idriam oppidum tanta illius est ubertas ut uno anno 1752, quod ex testibus autoptis accepi, ultra ter mille centenarios, seu 300000. libras, ponderis civilis, inde eruerint. Primus ibi Mercurium detexit do-  
liarius quidam, Anno 1497. cui per sylvam erranti, & ad mon-  
tanum rupeum tractum accedenti, e quo limpida profiliebat aqua,  
in mentem venit ad captandam hanc aquam, vas aliquod suppose-  
re; rediens aliquanto tempore post, vas aqua plenum, & in ejus  
fundo portionem argenti vivi insignem reperit, quam in oppidum tu-  
lit, & vendidit, tandem super eo interrogatus, locum indicavit.  
Atque hæc de hydrargyri locis natalibus sufficiant. Superest, ut ejus  
collectionem in fodinis, & educationem ex mineris contemplemur.

## CAPUT V.

*De Collectione hydrargyri in fodinis, ejusque educatione ex  
minerais.*

§. 52. **H**ydryrgyrum vel fluidum, & currens in terrae visceribus  
occurrit, & in lacunis, in quas ex fodinarum venis, mi-  
nerisque confluit, variis modis, sed non adeo facile colligitur; cum  
fluens se se in terrae poros insinuet. Collectum aqua copiosa ablu-  
tur, ad terram, si quae adhaeret, separandam; non numquam ace-  
to, aut sale purgatur, ad metallicas particulas, forte admistas, ab-  
sumendas, tandem per pannum xylinum, vel alutam transprimitur,  
siccatur, & in vasa convenientia infunditur; atque hic Mercurius  
*Virgineus* vocatur.

§. 53. **V**el effoditur in glebis variis, argillacis, faxeis, fissilibus,  
mollibusve, saepe guttulas mercurii puri continentibus,  
colore diverso praeditis, modo cinereo, modo fusco, modo plumbeo, quan-  
doque in lapide candidissimo, alias sub forma pyritis aurei, vel argentei  
coloris spectandum se praebet, quale in Normannia e terra rubra ef-  
fossus est (o). Atque hae *minerae mercurii* dicuntur.

§. 54.

(o) Geoffroy Mat. Med. P. I. p. 245.



§. 54. **V**el eruitur sub specie minerae solidae, compactae; saepe faxeum accrementum habentis, coloris plerumque magis, minusve rubicundi, hepatici, quod *minerae cinnabarinae*, vel *cinnabaris nativae*, nomine venire solet, quod *veteribus minium*, Graecis, ἀμμιον, & ἄνθραξ vocabatur Vitruvio, teste Geoffroy loco citato, & Caesalpino (p).

§. 55. **E**x mineris, §. 53, si mercurius iis sub nitidorum globulorum forma inhaereat, uti saepius contingit, glebis his comminutis, sola cribratione, lotione, vel ictibus mallei, sine igne elicitur, & ad *Virgineum* pertinet. Vel ex illis, dum omni sulphure carent, sola destillatione simplici, nulla re addita, educitur, idque vel per *ascensum*, ut vocant, vel *descensum*.

§. 56. **P**er *ascensum*: dum minerae contusae retortis ferreis, vel terreis immissae, igne sufficienti urgentur. Hoc modo e minera elevatur hydrargyrum fumi instar, qui in collo retortae in guttas concreescens destillat in aquam vase recipiente contentam, & in liquorem argenteum coalescit. Plures mercurium educendi methodos jam Dioscorides (q), Agricola (r), Libavius (s), alique monstrarunt.

§. 57. **P**er *descensum* autem elicitur ex minera, siquidem haec dives est, methodo expeditiori: mineram nempe effossam conterunt, & in fictilia quaedam angusto praedita orificio reponunt; orificia vero recenti arborum musco claudunt, vel ferream laminam perforatam imponunt, & firmant, dein fictile alterum huic simile, latioris tamen oris, sub humo condunt, & prioris repleti inversum orificium huic immittunt, rimasque optime luto claudunt, ita, ut vasa haec bene unita & firmata sint, vacuo sub terra latente: pleno autem extra terram eminente. Itaque plurima fictilia in aperta area seriatim collocant, ignem in eorum ambitu succendunt, cujus vi argentum vivum ex minera per muscum, vel ferrum perforatum de-

C 3

stillat

(p) Andr. Caesalp. de metall. L. 2. p. 160. Norimb. 1602.

(q) L. 5. C. 70.

p. 935. Basil. 1598.

(r) Georg. Agric. de re metall. L. 9. p. 343. seqq. Basil.

1561.

(s) Comment. Alchym. P. I. L. I. p. 149. Francof. 1606.

stillat in subiecta vasa sub humo condita, quae postea refrigerata eximunt, & in utriculos aptos reponunt. vid. Matthiolus (t) aliique supra citati.

§. 58. **Q**uae vero minerae copioso scatent sulphure, alia tractantur methodo. Hae plerumque rubrae sunt, quae si terantur in pollinem, ruborem exhibent elegantissimum; sulphur enim si mercurio vivo misceatur, eum inspissat, & coagulat; quod docet confectio cinnabaris artificialis. Unde tales minerae igni impositae vaporem sulphureum penetrantissimum exhalant. Attamen haec nativa Cinnabaris tam eleganti nunquam gaudet rubedine, quam quidem factitia.

§. 59. **E**x his mineris §. 58. licet simili quoque modo, ac §. 56. 57. elici possit mercurius, requiritur tamen singularis encheiresis; talia nempe his mineris sunt addenda, quae sulphur in se recipere, vel ejus acidum absorbere apta nata sunt; sic enim his vinculis expediti globuli mercuriales, simul ope ignis mobiles, ac vivi, promte in vas subiectum propelli possunt. Huc imprimis facit calx viva, limitura ferri, cineres clavellati, & in parvis experimentis sal tartari, vel lixiviosus quicumque (u).

§. 60. **L**onge vulgarior vero sequens est methodus: minerae §. 58. contusae, vel, si nimis petrosae fuerint, in molendinis prius contritae, eluantur aqua communi ab omnibus terreis inquinamentis, dein siccatae, vel solae, vel addita calce viva, indantur retortis ferreis, ac destillationi, vel per ascensum, vel descensum committantur; sic enim vel solius ferri, ex quo vas conflatum est, vel calcis vivae ope, applicato igne, sulphur minerale abripitur, quod hucusque mercurium ligaverat; nam dum ferro se jungit, mercurium deserit, qui sic liberatus transit in aquam frigidam vase recipiente contentam, ibique colligitur. Vid. Authores §. 56. & 57. cit. item. Plinium (w) Junckerum (x) Hoffmannum. (y). Sed jam ad hydrargyri depurationem gradus promovendus est. C A-

(t) Comment. in Diosc. ad L. 5. C. 70. p. 935. seq. Basil. 1598. (u) Neumann Chym. med. Dogm. T. I. P. 3. p. 212. (w) T. II. L. 33. C. 8. p. 626. (x) Consp. Chem. T. I. p. 984. (y) Op. omnia. T. IV. p. 577.



## CAPUT VI.

*De Hydrargyri depuratione.*

§. 61. **Q**uamquam hydrargyrum, quamdiu quidem in sodinis haeret, non tam facile impuritatibus inquinari posse videatur, dum fluidum in terrae visceribus existit; & multo adhuc minus, dum, sulphuris vapore coagulatum, cinnabaris nativae nomine obtinetur: constat tamen ex dictis. §. 40. seqq. varias dari species hydrargyri, variaquae heterogenea naturam mercurii posse ingredi, adeoque a particulis impuris, metallicis, arsenicalibus, terreis, sulphureo-falinis, inquinari, ejusque texturam, ac virtutes immutari, minime improbabile esse. Conf. dicta §. 49. de hydrargyri Cortonensis usu minus tuto.

§. 62. **L**ibavius quoque memorat, se Mercurium vivum e Voigtlandia quandoque accepisse, qui saepissime per pannum trajectus, licet citra omne artificium e minera erutus fuerit, perniciosam nihilominus nigredinem recuperarit, multasque scorias arsenicales, sulphureas, seu venenosas fuligines, a vicinis mineralibus impressas evomuerit (z).

§. 63. **N**ec minus frequenter inquinatur, & adulteratur hydrargyrum a fraudulentorum impuris technis, plumbo nempe, quod interventu bismuthi ita mercurio miscetur, ut, si quantitate non excedat, una cum mercurio per corium, imo destillatione per retortam transeat. Fraudem hanc a Quercetano, paucisque aliis detectam fuisse Hoffmannus refert (a) tuncque infensa symptomata inferre, & perniciosos a plumbo cruciatus, etiam Fernelius est expertus. Quo autem pacto impurus dignoscatur, §. 42. indicatum est.

§. 64. **C**onsequitur proinde ex dictis §. 62. 63. mercurii vivi depurationem saepe necessariam esse tam ad usum Medicum, quam

(z) In Tract. de ign. natur. Cap. 30. p. 57.  
T. IV. p. 578.

(a) Op. omn.

quam ad Chemicum, aliaque experimenta. Depuratio vero diversis modis instituitur, prout nempe diversis mercurius scatet impuritatibus.

§. 65. **S**implex illius purgandi modus, si pulvere adhaerente solum sit spurcatus, sequens est: Committitur nempe alutae optimae in orbiculum sectae, ac in saccum formatae; hic faccus forti funiculo superius colligatur arctissime, tunc supra vitrum amplissimum, patinae modo efformatum, fortissime premitur, mox transfundat mercurius purus, ac pulverulentum illud in corio remanet (*b*).

§. 66. **H**ydrargyrum pulvere inquinatum potest etiam alio modo repurgari, si nempe aqua copiosa saepius lavetur; alii, aquae loco, vinum, vel & spiritum vini adhibent. Boknius credit, hydrargyrum, si diu per se teratur, fordes suas tandem etiam sponte deponere (*c*). At si plumbum, bismuthi ope, mercurio immistum sit, illud una cum mercurio per corium transibit.

§. 67. **S**i pinguedine quadam infectum sit, lavatur lixivio forti, vel coquitur lixivio saponis, agitando virgulis, dein, repetitis lotionibus aquae servidae, a pinguedine liberatum, per infundibulum chartaceum, cujus apertura exigua sit, transmittitur, ut sic exsiccet, omnesque adhaerentes faeces removeantur (*d*).

§. 68. **S**i particulis alcalicis, vel metallicis abundet, repetitis vicibus aceto affuso tam diu eluatur, dum acetum ita limpidum fiat, atque affusum est. Quod si acetum inde dulcescat, indicium est, mercurium plumbo adulteratum esse. Alii eum aceto, & fale, simul agitando, purgant; alii supra ignem ponunt, usque dum fumare incipiat, omnisque aër per calorem expulsus sit, postea per linteum siccum fale ex parte repletum tamdiu transprimunt, donec non amplius nigrescat (*e*).

§. 69.

(*b*) Boerh. El. Chem. T. II. P. 3. process. 193. p. 306. (*c*) Juncker. Consp. Chem. T. I. Tab. 39. p. 985. (*d*) 'S Gravelande Phys. Elem. Math. T. II. L. IV. C. II. N 2498. p. 680. (*e*) Kruger Natur-Lehre P. I. p. 630.



§. 69. **M**elius tamen purgatur hydrargyrum, imprimis, si particulis metallicis contaminatum sit: destillando ex retorta vitrea pura, igne arenae, sine ulla additione, in vas itidem vitreum, retortae accommodatum, utrimque apertum, infra patenti orificio mersum sub aqua; Sic ascendit tota mercurii massa, siquidum is purus est; si vero impurus, faeces pro ratione relinquit, id quod Boerhaavius tribus vicibus cum eodem tentavit mercurio (*f*). Notandum item, mercurium leni igne paullo diutius digestum heterogenea saepe ad superficiem ejicere, imprimis si plumbum cum bismutho ipsi admixtum sit, quod alias in destillatione una cum hydrargyro per retortam transire dicitur a Bechero (*g*), aliisque; hinc sola dicta methodo inde separari potest. Attamen etiam mercurius pro puro habitus, longa digestionem, in pulverem nigrum pro parte faceffit (*h*).

§. 70. **O**ptime quoque purgatur mercurius, maxime si sulphureis, arsenicalibusve scateat inquinamentis, quando dupla quantitate calcis vivae prius in aëre extinctae (*i*), vel cineribus clavellatis, aut martis limatura permistus ex retorta vitrea igne arenae destillatur. Idem obtinetur, si aliquot unciae mercurii cum sufficiente quantitate salis tartari, ex retorta, igne primum leni, postea fortissimo, destillantur. Hoc tamen modo, adnotante Cel. Hoffmanno, multum mercurii perit, ita, ut ex unciiis sex non nisi quatuor recuperentur. Causam hujus adhuc obscuram, & ulterius indagandam esse monet (*k*).

§. 71. **O**mnium vero purissimus, & ab omnibus particulis heterogeneis liber obtinetur per coagulationes, sublimationes, amalgamationes, resuscitationes; hoc autem variis absolvitur methodis: vel enim mercurius sulphuri mistus sublimatur in cinnabarim, dein, additione calcis vivae, vel limaturae martis, reducitur: vel cum acidis salinis variis, ut sale communi, vitriolo, &c. in *sublimatum* mutatus, prioribus additis resuscitatur: vel sublimatum hocce cum sulphure, vel antimonio, in cinnabarim antimonii evehitur, ac inde

D

de

(*f*) Boerh. El. Chem. T. II. proc. 193. p. 307.

(*g*) Phys. sub. L. I.

p. 198. (*h*) Boerh. El. Chem. T. I. P. 2. p. 193.

(*i*) Idem ibid. T. II.

proc. 193. p. 307.

(*k*) Op. omn. suppl. I. P. 2. p. 137.

de denuo elicitur. Quod si haec operatio repetitis vicibus instituitur, hydrargyrum longe purissimum existere est necesse.

§. 72. **S**unt denique, qui mercurium cum metallis varie tractandum praecipiant, quem non puritate solum sed & virtute nobiliorem existere contendunt, & *animatum*, vel *philosophicum* vocant. Eum vero cum primis laudant, qui cum Regulo antimonii, sive simplice, sive martiali, addito argento, aut etiam sale alkali, aut ammoniaco, amalgamatus, tritus, digestus, sublimatus, sicque repetitis vicibus perfectus impetratur. Mercurium sic tractatum Becherus (*l*), Hoffmannus (*m*), Stahlus (*n*) Junckerus (*o*), multi-que alii, uno ore, splendidissimum, purissimum, virtutibus longe excellentiorem, & nobiliorem, spirituales, astralesque deprædicant; eundem citius & minore quantitate cum metallis amalgamari, cujus partes duae partem unam auri penitus dissolvunt, evaporatum ex cochleari argenteo, maculam ex flavo rubicundam elegantissimam relinquere; unde tam ad usum medicum, quam chemicum, eundem præstantiorem habendum esse.

(*l*) Phys. subt. suppl. II. p. 410. seq.    (*m*) Op. omn. T. IV. Dissert. 3. p. 585.  
 item in suppl. I. P. I. p. 197. & P. 2. p. 130.    (*n*) Fund. Chym. p. 134.  
 (*o*) Consp. Chem. T. I. p. 397. & 1021.





## S E C T I O II.

De Genesi , atque principiis corporum metallicorum ,  
& Hydrargyri.

### C A P U T I.

*De Genesi Corporum in genere.*

§. 73. **G**enesis totius macrocosmi , rerumque omnium in eo existentium verbo unico *fiat* (*p*) , absoluta fuit ; hinc prima totius universi principia , *ex nihilo* facta , simul mixta existere ; ut proinde ultima simplicitas , atque puritas rerum quarumcunque non nisi in adducto ADORANDI CREATORIS verbo sit quaerenda.

§. 74. **A**ër igitur , & aqua , ignis , ac terra ; imo & exilissimae horum omnium atomi ut primum productae , mixtae pariter fuerunt ; quid enim aliud sibi velint Divina illa verba : *Divisit lucem a tenebris , divisitque aquas ab aquis , congregentur aquae in locum unum , & appareat ariditas* (*q*) ; nisi quod primo Creationis tempore omnia confusa , & permista , deinde a se invicem separata fuerint ? at vero ne quidem post hanc separationem simplicia , & pura persisterunt ; siquidem ex aggregatione , & numero plurium unius speciei , vel ex mixtione , seu copulatione specie plurium principiorum in unam compagem , coaluerunt , quae nunquam per se pura , colligi , demonstrarique possunt.

§. 75. **C**uncta proinde , quae sensibus usurpare licet , *principiata* jam sunt ; hinc de principiis omnium primis qui laborant , aquam cribro hauriunt , cum constet ea *nihilum* fuisse. *Principia* igitur dum nominabo imposterum , *principiata* intelligi velim.

D 2

§. 76.

(*p*) Genes. I. v. 3

(*q*) Ibid. v. 4. 6. 9.

§. 76. **P**rincipia illa solent vocari, quae simplicia, pura: & e quibus corpora omnia Geocosmica, vel natura, vel arte fiunt, & in quae iterum redeunt, ac ultimo resolvuntur. Haec autem resolutio corporum in materias diversas docet illorum ex diversis principiis compositionem; etenim si ex uno tantum aggregata essent principio, in diversa resolvi nequaquam possent. Haec Becherus primus, tum ex praxi chemica, tum sana ratione demonstravit esse aquam, humidum illud fluidum; & terram, siccum nempe densum. Hoc vero posterius triplex agnovit, primum *vitrescibile*, maxime proprie *terra*, dictum, pro vera basi, ac velut reliquorum receptaculum statuit; secundum *inflammabile*, Veteribus sulphur; tertium *mercuriale fluidificans*, aliis Mercurius vocatum (r). Sal autem, sulphur, & Mercurius, quae ab aliis pro principiis sumuntur Chemicis, ex principiis diversis jam sunt mixta; hinc pro veris principiis nullo modo haberi possunt.

§. 77. **H**aec vero principia §. 76. pura ostendi nequeunt; cum ab initio Creationis aëri, aquae, aliisque corporibus, firmitus, laxiusve immixta inhaereant. §. 73. 74. Praeterea, per se considerata, tam exilia sunt, ut omnes fugiant sensus, multo minus per instrumenta nota excipi, aut in aggregatum purum colligi possint; licet enim aëri omnium levissime inhaereant, & cum illo hinc inde moveantur, ex illo tamen ita separari nequeunt, quin in occurrentia, sibi proportionata, corpora se insinuent, iis uniantur, novamque rursus subeant mixtionem.

§. 78. **E**ffectibus tamen variis, qualitatibusque corporum, tum & nova inde orta miscela varia, sese nobis manifestant; cum tanquam simplicissima, subtilissima, immutabilia, illaesis suis proprietatibus, magnitudine, figura, mobilitate, ex uno mixto resoluto in aliud, vel naturaliter transeunt, vel arte transponuntur.

§. 79. **C**um igitur instituti ratio postulet, ut de hydrargyri generifi, atque principiis, agam, quantis haec res urgeatur diffi-

(r) Phys. subterr. L. I. Sect. 1. C. 4. & Sect. 3. C. 1. seqq.



difficultatibus, primo exponam. Deinde, cum hoc corpus metallicum sit, de metallorum una cum hydrargyri genesi, & mixtione, Veterum, Recentiorumque expromam sententias; tum qua ratione, quibusque metalla coalescant principiis, indagabo; demum & ipsum, quo hydrargyrum enascatur, modum, atque principia coram sistere conabor.

## C A P U T II.

### *De Difficultatibus hydrargyri genesin, ac mixtionem explicandi.*

§. 80. **O**rigo harum difficultatum ad sequentia praecipue referri potest capita: primum, quod paucae admodum sint hydrargyri fodinae, facta cum aliis mineralibus comparatione; unde illius observationes naturales adeo frequenter institui nequeunt; deinde pretium ejus non exiguum, indoles in igne fugax, cunctos Chemicorum conatus hucusque eludens, plerosque de penitioris illius cognitione desperare facit. Tum constantia immutabilis, productio artificialis paucissimis nota, periculum operationum; dum enim in vapores attenuatur Mercurius, vitae, & sanitati valde noxius est deprehensus, quod plurimos absterruit, quo minus illum, uti metalla caetera, perscrutarentur. Denique & alias, sive publicas, sive privatas ob causas factum est, quod pauci, si tamen ulli, fuerint, qui ea loca, unde Mercurius eruitur, omni cum industria rimati fuissent, & phaenomena ibi obvia per exactas plurium annorum observationes orbi erudito propalassent.

## C A P U T III.

### *De variis Veterum, Recentiorumque opinionibus circa metallorum, & hydrargyri generationem.*

§. 81. **M**ultifariae admodum de generatione, ac principiis metallorum aequae atque hydrargyri apud Veteres, Recentioresque

tioresque fovebantur sententiae. Aristoteles siquidem duo exhalationum statuit genera; unam nimirum exhalationem *aridam*, ex qua fossilia omnia generantur, & res durae; *vapidam* alteram, ex qua fiunt metalla; has autem jungi terrae crassae & viscosae, particulis quibusdam, quae illo humore, seu exhalatione conglutinatae, indurataeque, frigore vel metalla, vel lapides fiunt, prout major vel minor fuerit interni humoris copia (s); & alibi dicit de Mercurio, eum fieri ex vapore aqueo, sed aëris plus continere (t). Huic subscribit Caesalpinus (u), Janus Lacinius (x), Peripatetici & Academici fere omnes.

§. 82. **P**lato ex humore crasso metalla fieri putat, vocatque metalla aquas fusiles, ex quibus aurum, ac caetera metalla generari tradit (y): unde & Cardanus rationem suggerit, cur metalla nitida sint; nam *nitor*, ait: *fit ex humido puro, nitido, & solidido, in quo lux colligitur, ut in speculis* (z). Zabarella materiam metallorum existimat esse perfectam omnium elementorum mixtionem, duobus halitibus praecipue constantem, quorum alter ignis, ac terrae, alter aëris, ac aquae naturam referat (a).

§. 83. **A**gricola vero ait, plus aquae in metallis esse, terrae minus; simplex enim aqua, pergit, non est eorum materia, sed mixta cum terra (b). Ab hac sententia non abludit Scaliger, dicens: *est namque metallum aquea terra, multo frigore congelata, quae non potest, nisi multo calore, in pristinum fluorem restitui* (c). Thomas Morestinus aquam qualitate impressa laborantem, & habentem potestatem coagulandi, materiam metallorum esse statuit; *non enim est*, inquit, *invenire purum, putumque elementum, nosque ponimus talem aquam, qualem mundus habet, & natura eam voluit esse, id est: contagio aliorum laborantem* (d).

§. 84.

(s) Arist. L. 3. Meteor. C. 6. T. 1. p. 820. Edit. Paris. 1639. (t) Id. ibid. p. 835.  
 (u) de metall. L. 3. C. 1. p. 168. & 192. (x) L. 1. Chem. Art. p. 12. Norimb. 1554. (y) Plato in Timaeo p. 1064. Francof. 1602.  
 (z) Hier. Card. L. VI. de subtil. p. 148. Norimb. 1550. (a) Zabarella Comment. in L. 1. Phys. Arist. Text. 68. Venet. 1601. (b) Georg. Agricola L. V. de ort. subterr. p. 72. (c) Jul. Scalig. in Card. Exerc. 20. Franc. 1612. (d) Thom. Morestin. Lib. novus de metall. caus. p. 36. Francof. 1593.



§. 84. **I**n Tractatu quodam singulari de metallis ex Hispanico idiomate in Gallicum traducto, & ab authore anonymo edito habetur: omnia metalla ex humido unctuofo, subtili, viscofoque, materia nempe propria, & essentiali sulphuris: ac terra subtili, generari per calorem, & vim formantem naturae; calorem autem in finem certae speciei determinari per virtutem formalem coeli, astro- rum & quatuor Elementorum (e); & alibi de hydrargyro idem Au- thor ait: esse corpus ex materia fluida, fere ut aqua, substantia nempe viscosa, subtili, & abundanti humido, & frigido compositum, omnique gaudere dispositione, ut fiat metallum (f). Cum autem aquam frigidam Veteres dixerint, uti constat ex Aristotele (g), & Plutarcho, qui dicit: *stoici frigidum aeri adscribunt, Empedocles & Strato aquae (h)*: Quidam Mercurium aqueum credidere, & hinc frigidum illum esse statuerunt; hos inter Gabriel Fallopius refert, Mauritanos non valentes dormire, ob intensissimum aestum in stratis, utres implere certa quantitate Mercurii reddentis eos frigi- dos, quos postea ipsi sibi supponunt, ut quietius dormiant (i). Agricola idem asserit: *Mauri enim, inquit, cum ardore solis omnia torrentur, argentum vivum in lacum effundunt, atque injecto corio super ipsum strati se refrigerant (k)*. Avicenna illi secundum frigi- ditatis gradum attribuit (l); cui adstipulatur Albertus Magnus (m), sic & Rhases L. 8. ad Almanforem, referente Untzero, scribit: in si- mia, quae argentum vivum biberat, sanguinem concretum circa cor inventum fuisse, unde argento vivo frigiditatem assignat (n). Cae- salpinus quoque ait: *argentum vivum, quamdiu in sua natura est, frigidum est, nec multum differt a plumbo (o)*. Quo & Plinius col- lineare videtur, dicens: *omnia, quae minio in medicinae usu traduntur, temeraria arbitror, praeterquam fortassis illito capite, ventreve sangui- nem sistendum, dum ne quid penetret in viscera, ac vulnus attingat: aliter utendum non equidem censeam (p)*. Frigidae & humidae natu-  
rae

(e) *Traité singulier de met.* Paris. 1743. T. I. p. 1. 10. & 31. (f) *Ibid.* L. 4. p. 136. seq. (g) L. de generat. & corrupt. Cap. 3. p. 729. (h) *Plut.* in L. de primo frigido. p. 948. (i) *Fallop.* de metall. C. 37. p. 216. versu. *Venet.* 1584. (k) *Agricol.* L. 8. de nat. fossil. C. 18. p. 336. *Basil.* 1546. (l) *Avic.* T. I. p. 267. *Venet.* 1595. (m) L. de mineral. C. 1. p. 327. (n) *Untzer.* *Anat. Spagyr. mercur.* L. 1. p. 49. *Halae Sax.* 1620. (o) L. 3. de metal. p. 195. (p) *Plin.* T. II. L. 33. p. 626.

rae argentum vivum esse declarat Lonicerus (q). Uti & Joh. Costaeus his verbis : *glacie , nive , ac hydrargyro nihil frigidius percipitur* (r). In quantum vero illud frigidum dici mereatur , §. 4. dictum est.

§. 85. **H**is e diametro sunt oppositi Authores non pauci , qui hydrargyrum calidum esse contendunt: Sic Aristoteles, inquirens, cur mercurius natura aqueus, a frigore non concre scat, rationem subjicit , *quia habet in se multum aeris a natura calidi* (s). Galenus hydrargyro vim erodentem adscribit , & inter alia caustica , & potestate calida eundem reponit (t). Haly Albas filius argentum vivum acutum, & comburens esse pronunciat (u). Platearius quoque illud calidum, & humidum esse in quarto gradu judicat; quia dissolvit, incidit, penetrat (x). Fallopius putat, Mercurium esse quidem calidum, & siccum, sed non in tali gradu, ut exurat (y). Vidus Vidius autem ait : *argentum vivum constat particulis diversis ; superant tamen in eo partes calidae, ob quas magis calefecit, quam refrigerat* (z). Paracelsus vero sentit, vitam mercurii nihil aliud esse, quam interiorem calorem, & exteriorum frigiditatem, hoc est: interius eum calefacere, exterius frigefacere (a). Basil. Valentinus: mercurium totum purum putum ignem intrinsecus esse defendit (b). Baccius denique inquit: *argentum vivum, cum sit natura calidissimum, ac totum vaporabile, & igneum, morbos tamen inducit frigidos, quod naturae humanae inimicum, urit adhibitum humores usque ad humidum radicale, dissolvensque spiritum, destruit calorem innatum* (c). Glauberus itidem ab hac sententia minime alienus est, dum mercurium ignem invisibilem vocat, licet ignari eum frigidum declament (d). Ita scilicet contrariis distrahuntur Authores

(q) Lonicer. P. III. herbar. p. 316. Francof. 1565. (r) J. Cost. Disquis. Physiol. L. II. p. 71. Bonon. 1589. (s) Arist. L. IV. Meteor. C. 8. p. 835. (t) Gal. L. 4. de simpl. med. Fac. C. 19. p. 30. Venet. apud Juntas 1597. (u) Haly Albas fil. L. 2. Practices, C. 48. de corp. metall. p. 104. Venet. 1492. (x) Joh. Platearius L. de simplici med. C. 5. fol. 2do. verso. (y) Fallop. de fossil. C. 37. p. 217. versa. (z) Vid. Vidius L. de curatione generatim C. 13. p. 60. versa. Venet. 1586. (a) Paracels. Vol. II. de natura rer. L. 4. de vita rerum p. 91. Genevae 1680. (b) In cursu Triumph. antim. p. 88. Lips. 1604. (c) Andr. Baccius L. 2. de vinorum naturali hist. C. 3. p. 56. Romae 1596. (d) Joh. Rudolph. Glauber. oper. Chym. in miner. P. 3. pag. 380. seq. Francof. 1658.



res opinionibus; quod si vero rem ipsam propius inspiciamus, hydrargyrum de se neque calidum, neque frigidum esse constabit; a posteriori tamen, quatenus nempe motum humorum adauget, calidum: quatenus vero, eliminatis humoribus, motus minuitur, ab effectu frigidum salutare posse, alibi dicetur.

§. 86. **N**on minus diversae circa metallorum, ac Mercurii generationis occurrunt sententiae, quorum agmen ducit Author quidam anonymus in libro, qui, *aurea Catena Homeri* inscribitur: hic sperma ponit universale ex aqua & spiritu a Deo creatis ortum, quod & aquam primordiale chaoticam vocat, in cujus centro duo haerent diversa salia, masculinum & foemininum, nitrum scilicet, & sal, quae unita sperma corporeum macrocosmi exhibent. Hoc omnium sublunarium rerum primam materiam esse affirmat, sed quae tamen nondum specificata sit; unde & in omnibus subjectis duo haec salia vel fixa, vel volatilia esse, prout magis, vel minus digesta sunt. His positis supponit aquam illam primordiale salibus istis impregnata a calore subterraneo fermentationem subire, & in vapores acido-vitriolicos elevari, qui a centro terrae versus superficiem tendentes, penetrando per terrae, lapidumve rimas, fissuras, cuniculos, crassiores sui partem ad eorum latera deponit, quae iis adhaerendo in humidum aqueum spissescens, & viscidum coeunt; alteram vero volatiliorem ad terrae superficiem ascendere, exhalare, & tam in vegetabilia, quam in auras se insinuare, nebulasque, nubes, pluvias &c. efformare. Humidum autem illud viscidum, quod lateribus terrae adhaeserat, hujus partes tenuiores sensim magis magisque dissolvit, sic cum soluta hac terra coagulatur in materiem crassiores, viscidam, oleosam; *Gur* vel *vitriolum dictam*; & hanc primam sulphuris, vel mercurii, vel arsenici, materiem esse decernit. Haec liquida, viscida, pinguis materies, postea vel collecta manet in loco commodo, siquidem talem nata sit: vel depluit in rimas, venas, antrave terrarum, ubi quiescens, dum a calore liquidior pars sensim evaporavit, figitur, coagulatur primo in marcasitam, quam proximam esse metallorum materiem sibi persuadet, dein vero in aurum, argentum, aliudve metallum, prout vapores puriores, plus minusve acidi corrosivi, terra soluta purior, vel impurior, ca-

E

lor-

lorque subterraneus intensior, vel remissior exstiterit. Vapores autem illos a nonnullis mercuriales, & sulphureos vocari; sale mercurium: nitrum vero sulphur esse docet (e).

§. 87. **H**elmontius, alter Author heteroclitus, ex quo forte prior suam doctrinam hausit, de metallorum genesi sequentia tradit: *Radices*, ait, seu fermenta mineralium sedent in loco immediate, ac in dierum plenitudinem sine fastidio anhelant, quam ubi semen complevit, tum Gas, obsidens aquam, semen a loco suscipit, quod aquae sulphur dein impraegnat, aquam condensat, atque sensim in aquam mineralem transplantat. Non raro enim contingit, quod metallarius infodinis saxa diffringens, dehiscat paries, & rimam det, unde tantillum aquae subalbidae viridescens manavit, quod mox concrevit instar saponis liquidi (Bur voco), mutatoque deinceps pallore subviridi flavescit, vel albescit, vel saturatius viridescit; sic enim visum est, quod alias intus, absque saxi vulnere fit, quia succus ille interno efficiente perficitur. Est ergo prima seminis metalli vita in condo, sive promtuario loci, homini plane incognita. At ubi semen in lucem, liquore vestitum prodit, & Gas incepit sulphur aquae inquinare, vita est seminis media; ultima vero cum jam indurescit. Est autem ultima seminis metallici vita, prima metallorum, vel illi saltem proxime conjuncta. Dum vero ista massa sulphur spirat, succusque intus claudit mercurium, tum inquam, vita metallorum media; ultima vero, ubi fixitatem, venaeque subtilitatem propriam acquisivit (f). Et alibi: Muria ex mari per canales lapideos absorptum, sensim per vividum terrae Archaeum salium naturam amittit: vel si salium in locis fermenta alicubi existant; ipsae aquae semina, tam diversorum salium, quam lapidum, & metallorum naturam induunt ac transmutantur in ejusdem fructus. Varia quoque salia ex aqua crescere dicit, tanquam primogenituram aquae sibi spondentis; hinc dein in Bur, sive primam mineralium sobolem, fatiscere, atque seminum ductu degenerare, sic quidem aquae fructus obstipant sui fontis conductus, ultimaque maturitate acquirunt illius mineralis perfectionem, cujus destinationem semina prae se ferebant in fermentis locorum hospitata (g). Negat autem, sale, sulphur, & Mercurium

cor-

(e) Aurea Catena Homeri P. I. C. 23. p. 171. seqq. Lipsiae 1738.

ab Helmont. ort. med. pag. 157. Amstelod. 1648.

(f) Joh. Bapt. (g) Id. ibid. p. 58.



corporum, esse principia universalia (*h*). De Mercurio vero alibi dicit: illum ex sola aqua elementari, & virtute simplicissimi feminis mercurialis coalescere in corpus indivisibile, impenetrabile, inseparabile, quod inter generata par non habet (*i*). Alius Author de metallorum, atque Mercurii genesi, forte eadem, sed aliis verbis, tradit: metalla nempe generari ex immaturo acido, subtili & volatili liquore, qui pingui commixtus, & sale metallico crassiore solutus, coagulatur diuturna coctione, & digestionem, in metallum maturum, diversum quidem, pro varietate horum principiorum, indole, proportionem, fixiori aut molliori mixtura, ut & gradu coctionis diverso. Liquorem autem illum acidum subtilem, dum metalla igne liquantur, quoad optimam subtilissimam partem avolare, & dissipari. Mercurium vero tunc generari: si liquor ille mercurialis, acidus, subtilis, & volatilis, subtili sulphure, sale volatili urinoso, paucoque sale communi, arsenicali misceatur, & pauca subtili terra temperetur absque forti digestionem (*k*).

§. 88. **G**laubero videntur omnia metalla ex uno gigni femine, spiritu nempe astrali, qui certo terrae loco quiescens, ut semen virile, terrae humidae in antris subterraneis se insinuat tanquam matrici, cum qua, pro diversa sua puritate, varia metalla efformat; quam primum enim spiritus sulphureus se aquae immiscuit, aqua communis amplius non est, sed initium partus metallici, qui apud Philosophos Mercurius audit, qui tamen necdum currit, nec metallicus apparet, sed aquae viscofae instar se spectandum praebet, & a metallicolis *Gur* vocatur; qui si loco commodo, & conveniente calore foveatur, longo tandem tempore in metallum abit; adeoque metalla omnia e femine astrali, ope humiditatis commodae, in qua semen corporale fit, generantur. *Nemo miretur, pergit dictus Author, e subtilissimo vapore, dum humido jungitur, metalla nasci; spiritus enim astralis ope aquae in loco terrae commodo corporalis fit, pondusque ex terra acquirit. Falsum autem est, metallum ex sulphure, & mercurio currente fieri, sed ex spiritu astrali*

E 2

sul-

(*h*) Idem ibid. p. 410. (*i*) Id. ibid. p. 407. (*k*) Urbanus Hierne Ast. Chym. Holm. T. I. C. 17. p. 128. seq. Holmiae 1753.

*sulphureo, calido & sicco, & aqua terrestri viscosa; uti ex semine masculino, & foeminino omnia generantur metalla (l).*

§. 89. **K**unckelius, ille Chemicorum Phoenix, materiale metallorum principium aquam agnoscit, quae sit materia unctuosa, & viscosa seu materia coelestis, quam sperma universale vocat, ex qua oriuntur omnia; quae pinguis & glutinosa in omni aqua haeret, ut in matrice (*m*). Hujus spermatis universalis receptaculum terram esse, alibi monet (*n*). In qua per vim ignis subterranei aliqua ejus pars in antris subterraneis per poros terrae penetrans, ibique collecta, & stagnans, in terram mutatur, & coagulatur in metallum diversum, pro varietate loci, caloris, frigoris, cum unum metallum alium caloris gradum, quam alterum, requirat. Materiam autem illam unctuosam in loco ubi minor est calor, mutari in materiam perlatam, quae sit mercurius vivus.

§. 90. **N**axagoras per solem, & salem naturae cuncta constitui affirmat; salem vero illum non salis communis, sed natri vel aluminis plumosi facie apparere (*o*). Per solem sulphur, seu spiritum mineralem igneum: per salem vero Mercurium intelligit, qui tamen non sit mercurius currens vulgi, verum vivus quidam vapor, unctuosus, & humidus; ex humido enim fieri lapidem mineralem, ex unctuofo vero corpus metallicum (*p*); monet vero, falsum esse, metalla ex argento vivo generari, cum argentum vivum eodem jure metallum sit, uti aurum, & argentum, compositum scilicet ex duobus elementis, aqua & terra. Sulphur vero ei non actu inesse sed potentia (*q*).

§. 91. **C**el. Rohaultius metallorum genesin derivat ex partibus salis, aquae, & corporum oleosorum simul junctis, motisque, & per meatus angustos in locum aliquem deductis, ubi dum inter se quiescunt, in exigua dura corpora, qualia esse primas metallorum partes,

(*l*) Joh. Rud. Glauber op. Chym. P. II. p. 337. seqq. (*m*) Kunckel laborat. Chym. P. I. C. 4. p. 35. Hamburg. 1738. (*n*) Ibid. p. 70. seqq. (*o*) De Naxagoras aureum vellus P. I. C. 5. p. 277. Francof. 1731. (*p*) Ibid. p. 281. (*q*) Ibid. p. 266. seq.



animo fingere possumus, coalescunt; id autem potius fieri in interiori terrae parte, quam in ejus superficie; quia ibi terra solida est, & ad haec corpuscula efformanda accommodatior: superficies enim tantis undique rimis, ac fissuris dehiscit, ut aër multaque alia corpora se immittere, ac impedire possint, ne quid fixum metallisque constituendis idoneum ibi enascatur. Mercurium vero metallis adnumerat, quod variis modis indurescere aptus si natus, uti si plumbi liquati fumo exponatur &c. Cur autem liquidus sit, rationem subjicit: quia fieri potest, ut partes metallicae adeo laeves, & politae sint, ut per paucis in punctis se contingant; id dum evenit, liquidum utique corpus constituunt. Differentiam igitur omnium metallorum inter se, a diversitate primarum partium ipsa constituentium, a magnitudine, soliditate, figura &c. repetendam esse (r). Elementa porro tria tantum statuit: *primum* vocat pulverem tenuissimum, qui sit paullo crassiorum partium in rotunditatem effictarum, quasi scobs, ac intertrimentum. *Secundum* partes illas in rotunditatem tornatas. *Tertium* autem materiae particulas, quae figuras abnormes, perplexas, & impeditas conservant; necdum vero evictum esse, quod ignis, ex primo, ex altero aër, aqua ex tertio praecipue conflata sit (s).

§. 92. **P**erspiciacissimus naturae scrutator Leeuwenhoek de generatione metallorum sequentia ponit: *majori ut opinor, ratione, asserere licebit, quod, ubi vapores metalla secum ferentes, partibus majoribus metallorum occurrunt, illi his coagulentur, sicque corpus metallicum augeant (t);* & alibi censet: metalla in lapidibus generari non posse, nisi eatenus, quatenus, dum lapis crescit, eidem vapores auri, argenti, antimonii, &c. admiscentur, simulque increfcunt (u). Unde patet, Celeberrimum virum credidisse, metallum quodcunque ex proprio vapore sui generis nasci, atque cum oculatissimo Swammerdamio statuiffe, in universa rerum natura nullam penitus dari generationem proprie sic dicendam, sed hujus jam factae continuationem (x).

E 3

§. 93.

(r) Jacob. Rohault. Physf. P. III. C. 6. p. 379. Lugd. B. 1739.

(s) Ibid. p. 105.

(t) Leeuwenhoek in Arcan. nat. contin. Epist. 100. p. 118.

(u) Ibid. Epist.

114. p. 75.

(x) Swammerdam. Biblia naturae T. I. C. 3. p. 34. Leyd.

1737.

§. 93. **M**ulti vero non infimae notae Philosophi , & Chemici metalla ex fale, sulphure, & mercurio generari pronunciarunt, quorum coryphaeus est Theophrastus Paracelsus ( quamquam Isaacus Hollandus dudum ante ipsum idem senserit ) dicens: omnia septem metalla nasci ex mercurio , sulphure, & fale, attamen distinctis, & peculiaribus coloribus. Mercurium spiritum esse; sulphur animam; sal corpus; additque paullo post: in montibus per Archaeum terrae omnia septem metalla generari, mercurium vivum matrem esse omnium septem metallorum, cum sit metallum apertum, quod uti colores omnes in se comprehendit, quos in igne ex se reddit, ita etiam in se metalla omnia continet, quae tamen extra ignem ex se non praebet &c. animam autem illam non sulphur vulgare combustibile, sed incombustibile, quod spiritum cum corpore ligat & unit ita, ut inde valde nobile corpus gignatur (y). Et alibi dicit: *nam in dimidia generatione, & usque ad dimidiam generationem omnia metalla sunt mercurius* (z). Huic fere consentit le Febure dicens: *metalla originem ducunt a succo salino, & mercuriali, qui in visceribus terrae, virtute & calore sulphuris induratur* (a). Mercurium autem nominat liquorem mineralem, metallicum, volatilem. Sic Turneisserus principia metallica sal, sulphur, & mercurium assumit (b); in quo etiam clarissimum Linnaeum consentientem habet, qui & metalla ex fale, sulphure, & mercurio constare asseverat: & mercurium metallis adnumerare non dubitat (c).

§. 94. **V**erum contra hos magna contentione insurgit Thomas Erastus, asserens: *prima principia metallorum non sunt sal, sulphur, & mercurius* (d). Atque cum illo Pererius pluresque alii, nec sane sine fundamento, idem confirmant; siquidem salem communem, sulphur, & mercurium, nequaquam simplicia, sed composita esse corpora facile quisque perspicit.

§. 95.

(y) Theophr. Parac. Vol. II. L. I. de generat. rer. nat. p. 87. Genev. 1658. (z) Id. Vol. I. L. 3. de morb. metall. pag. 722. (a) le Febure Chymischer Handleiter p. 565. Nürnberg. 1576. (b) Alchym. Mag. L. 6. C. 2. p. 82. (c) System. nat. p. 160. 171. Lipsiae 1748. (d) In Disp. de metall. P. 2. p. 284. Basil. 1572.



§. 95. **C**el. Hombergius dictis tribus principiis *terram* quoque addit, inter quae sulphur vocat principium activum, terram passivum, tanquam matricem reliquorum, salem & mercurium principia media nominat; cum nihil per se operentur, sed per unionem sulphuris tantum ad actionem disponantur, in resolutione tamen metallorum haecce reperiri. Hanc resolutionem in eo consistere, quod in Mercurium reducantur; quod fieri ait, vel per mercurium praeparatum solventem, vel per sales resuscitantes, vel per speculum causticum: primam methodum facile succedere, si mercurius resolvens ad manus sit; secundam difficilius, magnamque requiri attentionem; tertiam haud esse difficilem, modo magnum speculum causticum, quod quatuor pedes in diametro habet, praesto sit. De principio autem sulphuris, & salis dicit, ea non sub sensus cadere, nisi uni, alterive reliquorum juncta sint. Salis, ut principii hanc dat definitionem: esse materiam in aqua solubilem, & per ignem immutabilem, variasque hujus classes indicat (e). Sulphur alibi, principium activum nominat, quod in resolutione perit, hinc nullam ejus certam haberi cognitionem, nisi quod se immisceat aliis principiis, eorum pondus, & volumen mutet, eaque varie inter se conjungendo, varias materias producat. Idem hoc sulphur materiam esse lucis (f). Materias vero sulphureas in tres classes dividit; *prima*: dum principium hoc se terrestri materiae sociat, sulphur siccum resinofum producit, uti sunt Lithantraces, sulphur commune, succinum, asphaltum &c. *Secunda*: si materiae aqueae inhaeret, pinguedines varias, olea, spiritum vini, generat. *Tertia*: si cum materia mercuriali conjungitur, sulphur efformat metallicum, quod principium ex uno corpore in aliud transire immutatum affirmat, ac speciosis evincere conatur experimentis (g). Mercurium pro principio Chemico alio loco declarat, licet non gaudeat natura principiorum §. 76.; partes hujus globulos parvos, sphaericos esse; metallum autem fieri: si ejus partes minimae undiquaque perforatae materia lucis repleantur, & in unam conjungantur massam; hinc pro diverso ejus statu triplicem illi assignat figuram: *in primo*, dum fluidus; partes ejus minimae, sphaericam densam habent figuram: *in secundo*, materia lucis globulos sensim perforat,

seque

(e) Mem. Ac. R. Sc. 1702. p. 33. 36. seqq.  
1710. p. 225. seqq.

(f) Ibid. 1705. p. 88.

(g) Ibid.

seque in illos insinuat, tumque metallum constitui : *in tertio*, metallo destructo, & expulsa materia lucis, materiam perforatam remanere (*h*).

§. 96. **L**emery metalla generari credit, ex aqua fale acido impraegnata, quae fermentatione, caloreque subterraneo, in terris particulariter dispositis coaguletur, digeratur, ligetur, atque in locis subterraneis coquatur ita, ut inde varia oriantur metalla, pro varietate materiae & matricis, cui inhaerent; quo magis vero per fermentationem ad latera ejiciuntur partes crassiores, eo duriora, compactiora, ponderosioraque enasci metalla, cum partes tantum subtilissimae sic uniantur, ac corpus densum, minusque porosum constituent (*i*). Mercurium metallis adscribit; an vero reliquorum mixtionem constituat, dubitare videtur (*k*). In plumbo tamen & sulphur & mercurium contineri pronunciat (*l*). Cuprum abundare vitriolo, & sulphure (*m*); Stannum materiam malleabilem sulphuream, & facile fundendam esse (*n*). Ferrum denique componi dicit, ex fale vitriolico, sulphure, & terra, nec bene mixtis, nec coctis (*o*). Lemery junior vero dicit: particulas igneas in metallis adeo firmiter latere, ut nulla suae praesentiae signa exhibeant, cum ob densitatem corporum adeo fortiter retineantur, ut spatiola illa, in quibus haerent, non nisi gradu ignis majori destruantur, ut inde evadere queant (*p*). Alibi materiam ignis fluidum singulare vocat, cujus proprietates, non tantum motui violento suarum partium, sed & earum figurae constanti assignandas esse (*q*).

§. 97. **C**el. Geoffroy ex terra metallica, & principio sulphureo inflammabili salino componi metalla: Mercurium vero ex terra vitrescibili volatili, quae metallicum splendorem, ac fluiditatem a sulphureis particulis mutuatur, existimat exoriri (*r*). In introductione in materiam medicam vero, ubi de variis concretionibus sulphureis loquitur, ac praesertim de illis, quae bituminis, vel pinguedinis terrae nomine veniunt, ait: *Si illud bitumen permiscetur cum terris,*  
*quae*

(*h*) Ibid. 1709. p. 106. seqq.      (*i*) Cours de Chym. p. 64. 65.      (*k*) Ibid. p. 77.  
 (*l*) Ibid. p. 131.      (*m*) Ibid. p. 144.      (*n*) Ib. p. 113.      (*o*) Ib. p. 155.  
 (*p*) Mem. Ac. R. Sc. 1709. p. 400.      (*q*) Ibid. 1712. p. 51.      (*r*) Ibid. 1707.  
 p. 193. & Mat. Med. P. I. pag. 271. & 318. Paris 1741.



*quae scatent salibus, & quae sunt ut plurimum fusiles, & in vitri speciem mutari possunt, tunc gignuntur corpora solida, ductilia, malleabilia, aemulancia metallorum splendorem, id est: gignuntur metalla (s). Huic Helvetius iisdem fere verbis adstipulatur (t).*

98. **C**el. Cramer metallorum genesin ex principio inflammabili, ac terra metallica repetendam censet; dicit enim: *dantur terrae & lapides, quae intimiore principii inflammabilis conjunctione in metallicum statum abeunt, quemadmodum & destructa metalla in scoriam, vel cineres conversa, ejusdem materiei unione in metallicam denuo formam redeunt (u)*; omnes enim mineras in terris & lapidibus latere (x), terras autem has metallicas a lapidibus vulgaribus distinguit, quod per reductionem in metalla abeant, talesque in omnibus mineralibus plus, minusve haerere (y). Inflammabile illud principium, quod ad compositionem metallorum, & semimetallorum ingredi ait (z), a sulphure vulgari distinguit, quia hoc, ratione admixti acidi, vires longe alias exferit, quam sincerum principium inflammabile (a), quod unicum tantum dari in rerum natura docet; nec minerale ab animali, vel vegetabili discrepare; totumque, quod inter varia sulphura datur discrimen, solummodo in diversa cum heterogeneis mixtione, mixtionisque modo, consistere; per cuncta naturae regna, ipsamque atmosphaeram distributum esse; nusquam constare, sed jugi circulo ex uno in alterum regnum transire; neque etiam in statum aggregatum redigi purissimum posse; & a quibusdam pro igne materiali elementari haberi (b). Mercurium autem perfectum metallum nequaquam esse judicat (c). Similem vero opinionem fovet Cel. Frid. Hoffmannus, dum inquit: sulphureum principium per totum terrae ambitum circulare, perque omnes mineras dispersum haerere; prout autem terra metallica differt in bolis, & lapidibus, varias metallorum species produci, adeo, ut sulphur, & terram fluxilem pro veris & unicis metallorum principiiis se agnoscere fateatur. Ab hoc autem principio sulphureo, caloreque subterraneo mirabiles effectus, montium deflagrationes, terrae

F

que

(s) Id. ibid. P. I. p. 250. ibid. introd. p. 22. (t) Adrian. Helvet. Princip. Phys. T. II. p. 241. Francof. 1754. (u) Elem. Art. docim. Lugd. Bat. 1744. P. 1. p. 327. seq. (x) Ibid. p. 251. (y) Ibid. p. 249. (z) Ibid. p. 72. (a) Ib. p. 102. (b) Ib. p. 14. (c) Ib. p. in ox cit.

que motus incredibiles derivari debere contendit (*d*). Per hoc autem principium non intelligit sulphur commune, quod generari tradit ex acido quodam salis subtili, & principio oleoso, ac inflammabili per intimam horum unionem; sed acidum illud, in aëre volitare, & esse vel sulphuris, vel vitrioli, vel aluminis, quod ad sulphur generandum requiratur. Alterum autem principium inflammabile, ex combustibilibus, calore solari, forma vaporum, in atmosphaeram transire; quae, haec bina, beneficio frigoris, in suprema aëris regione semper obvii, per nubes, & ventos invicem uniri, sicque verum sulphur in aëre gigni, quod mutua particularum inter se actione, ac reactione accenditur (*e*). Tale autem sulphur ad metallorum genesin non conferre probat, cum potius metalla destruat, & in vitriola convertat. Metalla quoque ex mineris, nisi sulphure prius separato, reduci non posse; a sulphure omnia metalla, excepto auro, immutari, cum aurum perfectissimae sit mixtionis, nec vehementissimo igne destrui, nec in calcem, nec rubiginem converti queat (*f*). Mercurium autem constare dicit ex particulis metallicis fluore aethereo saturatis (*g*).

§. 99. **S**upereft tandem, ut & illorum adducamus nomina, qui materiam metallorum, mercurium & sulphur esse statuerunt. Ingens profecto jam a primis temporibus horum fuit numerus; Rogerius Baco principia mineralia in mineris, mercurium, & sulphur esse dicit, atque ex istis procreari cuncta metalla (*h*). Gerard. Dorneus; argentum vivum, & sulphur, tanquam prima metallorum principia ponit (*i*). Idem Laurentius Ventura his afferit verbis: *quoniam omnia metalla communicant in una materia, quae est argentum vivum* (*k*). In eandem conspirat sententiam Langius (*l*), et Mylius his verbis: *Mercurius mater est omnium metallorum* (*m*). Vogelius vero probare nititur, quod Mercurius supra terram per artem, in mine-

(*d*) Fr. Hoff. op. om. suppl. I. P. I. p. 190. (*e*) Id. T. IV. L. 3. obs. Phys. Chem. obs. 9. p. 531. seq. (*f*) Ibid. obs. II. p. 533. (*g*) Id. ibid. suppl. I. P. 2. C. 3. p. 129. (*h*) In speculo Alchym. C. 2. p. 258. Norimb. 1541. (*i*) Chym. Art. Theor. Tract. 2. C. 2. p. 41. 1568. (*k*) De rat. confic. lap. Phil. p. 2. Basil. 1571. (*l*) L. I. Epist. 43. p. 314. (*m*) In praefat. Basilic. Chym. p. 3. Francof. 1619.



mineris vero per naturam, in aurum, argentumque convertatur (n). Arnoldus Villanovanus, ex sulphure, & argento vivo sub terra aurum, argentumque effici tradit; de mercurio vero alibi dicit, quod is in sua radice sit compositus ex terra alba, subtili, sulphurea, cum aqua clara, fortiter admista, donec fiat substantia una, mox quiescens in superficie plana; homogeneous autem esse in natura, quoniam aut remaneat totum in igne fixum, aut totum ex eo avolet in fumum, cum sit incombustibile, & aëreum (o). Et paullo post: *argentum vivum fit ex vero sulphure non urente.*

§. 100. **R**ichardus Anglus Medicus, qui circa annum 1230. floruit, eadem fere de generatione metallorum, & mercurii protulit dicendo: *argentum vivum in sua radice prima est compositum ex terra alba, subtili, nimium sulphurea, cum aqua clara fortiter admixta, & unita tali unione, per minima, quousque humidum temperatur a sicco, & siccum ab humido aequaliter, donec fiat substantia una, non quiescens in superficie plana, nec adhaerens tangenti propter siccitatem, quae alteravit aqueitatem in ipso. Est autem homogeneous in natura, vel enim totum remanet in igne, & fixum: vel totum evolat in fumum, cum sit incombustibile, & aereum; & hoc est signum perfectionis, & ideo, cum postea de terra sulphurea decurrit, & calefit, superius ascendit. Unde in sua natura est, ut per calorem subtilisetur. Verumtamen continua sublimatione nimium sublimando depuratur, decoquitur, & inspissatur, ac per sulphur album, ac rubeum gradatim plus congelatur. Quod quidem sulphur dissolvitur multoties, & postea congelat mercurium, & illius sublimatione inceratur caloris actione, donec vix mille annis successive & operatione naturae in perfectum metallum congeletur (p). Thomas Aquinas in secretis Alchymiae Cap. 3. sic citante Untzero, dicit: *materia substantialis omnium metallorum est argentum vivum; unde in aliquibus metallis est coagulatum debili coagulatione, in aliquibus autem forti (q).**

F 2

Ma-

(n) Ewald. Vogeli de Lap. Phys. condit. C. 4. p. 150. Colon. Agr. 1595. (o) T. II. L. I. Rosar. Phil. C. 5. p. 1999. item C. I. p. 1994. & C. 2. p. 1995. Basil. 1585.  
(p) Correct. Alchym. C. 7. p. 6. Argent. 1581. (q) Ant. spagyr. Merc. L. I. p. 80.

Matthiolus quoque ait : *Philosophorum sententiam secutus affirmo, argentum vivum esse materiam ad generationem metallorum proximam (r).*

§. 101. **B**eguinus existimat, quod natura, uti in terrae superficie plantas, sic in locis subterraneis metalla, quamvis tardius, ex vapore humido unctuofo argenti vivi & sulphuris vitriolati generet; unde hydrargyrum matrem metallorum, sulphur vero patrem dici; mercurium instar foeminae frigidum & humidum: sulphur autem, utpote marem, calidum, & siccum esse judicat (s). Videntur autem Authores isti Gebrum secuti, qui dudum pronunciavit, metalla fieri ex sulphure, & argento vivo, per successivam, & diuturnam inspissationem, & perfectissimam in mineris decoctionem ita, ut per mixtionem sicci subtilis terrei, & humidi viscosi per minima, humidum a sicco, & siccum ab humido temperetur, ut fiat substantia una, in suis partibus homogenea, & temperata inter durum, & molle, atque in concussione extensiva (t). Mercurium autem ait, esse aquam viscosam, substantiae albae terreae viscosae, in visceribus terrae per calorem temperatissimum unitam totali unione per minima, quousque humidum temperatur a sicco, & siccum ab humido aequaliter (u). Sulphur autem illud sic definit: esse pinguedinem in minera terrae, per temperatam decoctionem inspissatam, quousque induretur & sicca fiat (x).

§. 102. **C**el. quoque Boerhaavius idem sensisse videtur, dum ait: *Omnia igitur illa praestiterunt, ut mirabundus mecum laudaverim Alchymistas antiquos, qui dictavere nobis palam, solo sincero argento vivo per sulphur densans stipato aurum nasci, argentumque; caeteris metalis minus purum mercurium, minus defaecatum sulphur, coeuntia miris modis, originem veram dedisse (y).* Simul negat, basin metallorum esse terram; enimvero ea non terram, sed argentum vivum pro basi admittentia, immutabilia hinc videntur in cunctis (z). Quod & immortalis Boyle confirmat asserendo: *atque hic porro observo,*

(r) Comment. in L. 5. Diosc. C. 70. p. 935. Basil. 1598.

(s) Tyrocin.

Chym. L. 2. C. 13. p. 330. Genev. 1659.

(t) Geber. in summ. perfect.

Magist. L. I. C. 7. p. 18. Gedan. 1682.

(u) ibid. C. 15. p. 41.

(x) ibid.

C. 13. p. 39.

(y) Boerh. El. Chem. T. I. P. 2. p. 352. Paris. 1733.

(z) ibid. p. 353.



*servo, me videre nunquam potuisse ullam terram, aquamve proprie sic dictam, vel ab auro, vel ab argento, ut alia nunc metallica corpora taceam, separari (a).* Cui tamen Becherus respondet: *terrea autem esse, ipse primus aspectus demonstrat, praesertim sub ignis anatomia (b).*

§. 103. **E**x hac sententia §. 99. seqq. orta fuit opinio illorum, qui metallis adnumerant mercurium, existimantes nimirum, eum semper, & ubique ad generationem metallorum concurrere, quod & illa mirifice adpetat, & cum iis naturali quasi desiderio conjungi amet; accedit, quod mutationem variam subeat, pondere vero aurum proxime aemuletur. Unde dicit Paracelsus: *Ideo autem mercurium metallum esse oportet, quia per Alchymiam in malleationem, & fabricationem reducitur (c).* Idem statuisse Naxagoram, Rohaultium, Linaeum, Lemeryum, aliosque, supra §. 90. seqq. dictum est.

§. 104. **C**ontrarium alii mordicus tuentur, inter quos Cel. Hombergius §. 95. Thomas Aquinas in Lib. Lil. Bened., referente Untzero, ubi, *mercurius, inquit, non est metallum, sed habet se ad metallum, tanquam farina ad panem; non enim farina panis, sed fit panis, si addatur fermentum, & aqua; ita mercurius potest fieri metallum, secundum sui immunditiam per appositionem fermenti, & aquae miscentis (d).* Cui adstipulatur author anonymus in L. secret. max. asserens: *mercurium non esse metallum, sed principium metalli; quod vero principium, non est ipsum totum.* Cl. Hamberger dicit: *se dubitare, an majori jure mercurius inter metalla, quam aqua inter solida, ex regno animali vel vegetabili desumta, referri queat (e).*

§. 105. **I**nsuper, hydrargyrum nequaquam posse metallis adnumerari §. 3., sequentia confirmant: neque enim est concretum consistens, nec igne fusile, aut fixum, nec ictu mallei in longum & latum ductile. Sed nec metallorum principium jure dici potest; siqui-

F 3

dem

(a) Boyle Chemist. scept. p. 126. Genev. 1677.

sect. 3. C. I. p. 58.

(c) Paracels. Vol. II. Tract. I. de Mineral. p. 349.

(d) Untzer Anat. spag. merc. L. I. p. 99.

p. 299. Jenae 1735.

(b) Becher. Phys. subt. L. I.

(e) Elem. Phys. §. 377.

dem ejus fodinae parciores & rariores, reliquis omnibus occurrunt; cum tamen si principium foret metallorum, in horum fodinis crebro inveniri, vel vaporibus suam praesentiam clarius testari, ac linteis humidis expansis globulorum forma inhaerere deberet. Etenim quam longe plus ferri, cupri, stanni, plumbi, imo argenti, & auri, identidem effodiatur, quam mercurii, quis non perspicit? atqui vix ulli associatus minerae reperitur, si unam auream interdum excipias; chemicis tentaminibus, haud scio, an unquam in verum metallum mutetur, aut fixus reddatur; nec apparet quidpiam, quod mercurium in fodinis figere ac transformare valeat. Sed nec in metallorum augmento tam singularia producit phaenomena, neque coctione, uti dicunt, in perfectum metallum unquam concrevit; namque nec ferrum, stannum, cuprum, vel plumbum, quadam sui parte in aurum argentumve mutata, in fodinis unquam sunt deprehensa. Sed nec mercurius ut principium, sine ulla additione ex metallis elici, separarique potest; imo potius metalla perfecta, ut aurum & argentum, si cum mercurio vulgari certa encheiresi tractentur, absque manifesta partium separatione, tota fere in mercurium metallicum transeunt (*f*), quod fieri nequaquam posset, si mercurius solus extraheretur.

§. 106. Denique Cel. Becherus solidis experimentis, sana ratione sussultus, clare demonstravit, rerum omnium principia catholica terram esse & aquam, prout nempe in creationis actu existere. Alia autem ex aqua tantum, alia ex terra, quaedam ex utroque mixta ponit, atque in haec bina ultimo reduci posse. Varias item terrae statuit species §. 76., ex quibus quaedam corpora perfectius mixta nonnulla imperfectius, composita vocat. Illa autem genuina rerum principia dicenda esse, ex quibus corpora constant, in dies miscentur, ac praeparantur. Cum autem de corporibus metallicis tantum hic sermo sit, generale ponit axioma: substantiam metallorum, & lapidum, terream esse; ex diversis autem terris metalla mixta esse, ex mixtorum diversitate elucescere ait, ex tribus nempe illis terrae speciebus vitrescibili, inflammabili, & mercuriali. Mercurium corpus esse decompositum, ex principiis metallicis, ac terra  
tertia

(*f*) Stahl. Fund. Chym. p. 125. & Juncker Consp. Chem. T. I. p. 1003.



tertia fluidificante mercuriali (g). Fundamenta haec Illust. Stahlius innumeris experimentis illustravit, plurimosque inde naetus est sectatores, inter quos Neumannus, Pott, Roth, Henckelius, Junckerus, Wallerius, alii; quibus & ego, ratione & experientia convictus, adstipulor; jamque ad generationem corporum metallicorum transeo.

## C A P U T IV.

### *De Genesi metallorum, & Hydrargyri.*

§. 107. **N**ullum est dubium, quin metalla, eorumque principia, a DEO T. O. M. jam ab initio, uti reliqua omnia corpora, producta fuerint, in loco competenti, subterraneo nempe conditorio, cum gravia ad centrum tendant; DEUM enim in hujus universi creatione eundem ordinem servasse, quem hodie naturae cursum vocamus, ratio sana suadet, ut credamus; aërem autem, & aquam, licet, ut leviora, in circumferentia haereant, in globum hunc nostrum terraqueum, ob hujus porositatem, introducta esse, tanquam in subjectum, in quod haec duo elementa agunt, sensus, & experientia docent; adeo, ut terra omnium corporum mater, & receptaculum esse videatur. Aër autem & aqua, in hac matrice contenta, a calore subterraneo, partim ab attritu aëris elastici ad corpora pariter elastica, partim a calore solis omnia penetrantis orto, rarefiunt, continuo moventur, & omnia iis occurrentia corpora mobilia & solubilia afficiunt, sibi admiscunt, & auferunt forma vaporis ex loco in locum.

§. 108. **E**rgo in imis montium recessibus, ubi metalla, eorumque principia latent, per motum aëris, ibi densissimi, calorisque subterranei, forte & torrentis aquae, metallica, aliaque concreta sulphurea, salina, arsenicalia &c. hinc inde rursus resolvuntur, attenuantur, in vapores varios elewantur; uti fodinae consumtae, & fragmenta venarum sterilia, docent, in quibus nihil nisi materia porosa,

(g) Becher Phys. subterr. L. I. sect. 3. C. I. pag. 56. 58. seqq.

sa, arenosa, vel limosa invenitur; quod etiam halitus in subterraneis cuniculis, e rimis & fissuris lapidum, imo & mineris recenter apertis erumpentes, probant, qui magnum in antris illis calorem producunt, fossoribus tusses, raucedines, aliosque inferunt morbos, imo & candelas extinguunt, aut, si peioris sint indolis, flammam lampadis dilatant, fossoresque suffocant. Testatur idem Cel. Boerhaavius: *oriuntur quandoque fumi olidi, pingues, suffocantes, in fodinis, satisque crebro fossores infestant, ad quos illata candelae accensae flamma ingens subito incendium excitat, extremo cum periculo (h).* Cum autem omnes vapores naturaliter a centro terrae in altum eleventur, non raro in terrae superficie, praeprimis matutino rorido tempore, flammulis subinde in talibus locis emicantibus, se se manifestant, quo fit, ut gramina, & arbores quasi torreant, suffocent, comburant (i), nivem hyeme cadentem colliquant, occurrentes terrarum cumulos variis coloribus, seu potius solutionibus impraegnent, viatorum nares feriant, & aquas, si quidem iis occurrunt, minerales reddant; non mirum proinde, pergit Boerhaavius, *coelo sereno saepenumero improvise circa fodinas fumos apparere, qui flammam facis extinguunt, quum in aerem rapi ita queant, & densissima, specie fumi corpora, ut definiri vix possit, qualia fuerint (k).*

§. 109. **V**apores hi, §. 108. *minerales* vocantur, nam principiis metallicis gravidi sunt; differunt vero inter se, pro varietate contentorum, suntque vel *sulphurei phlogistici*, materia nempe inflammabili repleti: vel *mercuriales*, particulis mercurialibus, metalla fluidificantibus, plus minusve stipati: vel denique aliis *heterogeneis*, *salinis*, *arsenicalibus*, &c. inquinati, qui cum aëre per longinquos tractus, sinus, cuniculos, lapidumque rimas, hinc inde acti, eis varie vel plane non cohaerent, dum a resistente eorum superficie reperiuntur, aut per aliorum poros libere transiunt; aliis non nisi superficietenus & laxè admodum adhaerent, dum per repetitos aëris appulsus alio auferuntur, vel continuo aquae affluxu abripiuntur, in qua subsidentes cum convenientibus & proportion-

(h) Boerhaav. Elem. Ch. T. I. P. 2. pag. 262  
pag. 36. (k) Elem. Chem. T. I. P. 2. p. 263.

(i) Becher. Phys. subtt. L. I.



portionatis terrae particulis, si quibus occurrant, cohaerent, coagulanturque; vel si dicti vapores in fodinis, particulas alias, terrestres, imprimis vitrescentes, nanciscantur, cum quibus particulae illae inflammabiles, & mercuriales, amice magis, &, liceat ita loqui, sympathice cohaerent, iis, vel ob figurae, vel alius causae incognitae convenientiam mox fortius applicantur, attrahuntur, a sequentibus vaporibus similibus augefcunt, cum iisdem intime uniuntur, solidantur; atque sic pro vaporum, terraeque varietate, ac diversa proportione, varia mineralia, metallaque efformantur. Sed de his plura Becherus in sua Physica subterranea, Stahlius in specimine Becheriano, Junckerus (l), Lehmannus (m), alique.

§. 110. Si enim terra vitrescibilis subtilissima, & purissima duobus aliis principiis, phlogistico scilicet, & mercuriali (de quibus in sequentibus dicetur) pariter puris, cum aëre vaporis ad instar vagantibus, certa, & convenienti proportione mixta, digesta, cocta, si particulae istae arctissime combinatae sint ita, ut plures in unam moleculam, adeoque in corpuscula sensibilia, tenaciter aggregentur & coëant, fit metallum purum. Ut adeo tritum illud, *corruptio unius est generatio alterius*, hic praecipue locum habeat.

§. 111. Si autem terra illa vitrescibilis crassior, impura magis, aliisque heterogeneis inquinata fuerit, vel vapores fulphureis, acidis arsenicalibus exhalationibus foedati occurrerint; vel alterius utrius portio excesserit, ob tenacem adhaesionem, interventum impurius substantiae, minusque arctum principiorum connubium, nec miscelam debita proportione factam, imperfecta enascentur metalla, quae rursus, pro varietate loci, terrae, vaporum, coctionisque, & varium particularum heterogenearum interventum, diversa existunt. Quare Becherus: *Dico itaque in veritate, inquit, quod ad generationem cujuscunque metalli aliud nihil neque naturaliter, neque artificialiter requiratur, quam duplicatus ille subterraneus aëreus, & aqueus, seu sulphureus, & mercurialis vapor, & terrae species, quae utrumque*  

G

hunc

(l) Conspect. Chem. T. I. Tab. 32. pag. 756. seq.  
 tall müttern, und Erzeugung der Metallen.

(m) Abhandlung von Me-

*hunc fumum recipiat, atque figat (n). Et alibi: Silicem, & arenam talis naturae fixativae, & facultatis receptricis, ac retentricis talium vaporum esse, non modo autopsia; sed & extra mineras experientia demonstrat (o).*

§. 112. **Q**uodsi mixto vere metallico, uni alterive, qualia in fodinis mercurialibus occurrunt, vapores tales quasi fortuito abundantius superveniant, qui principio illo mercuriali, alteri inflammabili fere semper comite, copiosius repleti sunt, nascitur inde metallum mollissimae consistentiae, quod, aetheris simul concurrentis, & per calorem agitati ope, fluidum evadit §. 11. seqq., sicque hydrargyrum generatur (p). Hinc Becherus (q) Stahlusque (r) affirmant, hydrargyrum ex substantia quadam metallica, & superabundante illo principio fluidificante mercuriali, quod molliem, & malleabilitatem infert, summae post aquam tenuitatis confluisse. Quare & alio in loco Becherus ait: hydrargyrum esse amalgama fluidum, compositum ex essentia mercurificante, & ipsis metallicis atomis (s). Hoffmannus de eadem materie inquit: *Spiritus aethereus quasi menstrui vices gerens, in subterraneis antris appellens ad metallicas minuias, illas emollit, solvit, ac fluxiles reddit, sicque compositus evadit fluor, dictus mercurius vulgi, manus non mae faciens (t).* Becherus pariter in mercurificatione, aëris in corpus ingressum admittit, mediante principio illo fluidificante, seu mercuriali (u). Notandum tamen, quod, licet mercurius corpus decompositum sit, ex particulis nempe metallicis, & principio illo fluidificante, sola tamen digestionem in substantiam vere metallicam transmutari nullo pacto possit, quamdiu aliqua pars in illo ita exsuperat, ut in soliditatem metallicam per se nunquam redire queat; tam firmiter enim illud principium metallicas particulas sibi immixtas tenet, ut difficillime a se invicem iterum separari valeant; at si fortiore igne tractetur, principium illud praedominans, utpote volatile, immixtas particulas metallicas secum in auras rapit.

§. 113.

(n) Becher Phys. sub. suppl. I. C. 6. p. 330. (o) Ibid. pag. 465. (p) Stahl. Fund. Chym. pag. 143. seq. (q) Phys. sub. p. 56. (r) Fund. ch. p. 125. (s) Phys. sub. p. 199. (t) Op. omn. Suppl. I. P. 2. C. 2. p. 129. (u) Phys. Subt. L. I. Sect. 5. C. 7. p. 213.



§. 113. **U**ti autem haec omnia §. 108. 109., in penetralibus subterraneis naturaliter ita contingunt, sic ars quoque naturam imitari, & resolutione corporum in vapores, horumque applicatione debita ad alias convenientes materias, varias novas mixtiones producere potest; ex terra enim vitrescente arenosa, & inflammabili illo, atque mercuriali principio, si debite applicantur, produci possunt vitra varie tineta, calces variae compositionis, metallica mutationes, metallorum ex sua crasi destructiones, & in pristinum statum restitutiones, seu reductiones; fixorum volatilisationes, volatilium fixationes, aut saltem ligationes, per modum firmitioris mixtionis sub forma sicca terrea. Et haec omnia evidenter per artem demonstrantur, experimentisque rite institutis, & exacte perpenſis, metallorum principia, quantum quidem scrutinio Physico-Chemico innotescunt, magis dilucidantur; sic ex limo, & oleo lini, vel alia inflammabili substantia ferrum produci potest, quod Becherus omnium primus invenit, ac processum totum candide communicavit (x), ac idem alii plures tentando experti sunt. Ita exterius, & conjunctione principii sulphureo-salini argentum produci potest, uti Henckelius demonstravit, qui arsenici solutione per cretam imbibita, argentum obtinuit (y); quod & Lehmannus confirmat (z). Ex terra vero cuprum, stannum, plumbum, imo forte quid amplius arte produci posse, Stahlius asseverat (a). Vitra varia quomodo vel ex metallis ipsis producantur, vel additione principiorum metallicorum varie, & artificiose tingantur, Kunckelius in arte Vitraria, Neumannus (b), alique plures describunt. Per vaporem plumbi, hydrargyrum ei expositum calcinatur, firmumque & fragile fit, & vicissim, si metalla vaporibus mercuriali exponantur, fragilia evadunt; vapores corrosivi corporibus metallicis applicati, ea exedunt, & in calcem convertunt (c). Sulphur hydrargyro mixtum, & sublimatum, illud & ligat, & quodammodo figit; metalla si calcinentur, principio inflammabili privantur, & in calcem fatiscunt, quae tamen calx, addito rursus dicto principio, in pristinam formam reducitur. Eadem,

G 2

ustio-

(x) Ph. subst. suppl. I. C. 2. p. 294. (y) Henckel kleine mineralogische Schriften. p. 289. & 298. (z) Lehmann Loc. Cit. p. 46. seq. (a) In Opusc. Phys. Chym. p. 391. (b) Neum. Chym. Med. Dogm. T. I. P. I. p. 362. seqq. (c) Id ibid. p. 317. & 351.

ustione, & fusione, cum additione principiorum mobilissimorum, volatilia fiunt, quod in sublimatione Gebriana videre est. Tandem, introducto copioso fluidificante principio, in mercurium abeunt, quae super re alibi experimenta recensentur.

## CAPUT V.

### *De primo metallorum principio, terra nempe vitrescibili.*

§. 114. **V**ariae quidem dantur, communi nomine, terrae, quae certo respectu distingui possunt in animales, vegetabiles, & minerales; cum ex trium naturae regnorum corporibus educi queant. Ast hae rursus dividuntur a Bechero, in calcarias seu alcalinas, & vitrescibiles (*d*), cui & Stahlius consentit (*e*). Neumannus autem (*f*), & Pott (*g*) duas alias superaddunt, argillaceam nempe, & gypseam; lapides quoque terris adnumerant, cum potiori parte terra pura consent. Has autem omnes non nisi sola aggregatione differre volunt, attamen diversimode si misceantur, varias constitui terras, sed quae omnes pro maxima sui parte, ex terra pura vere elementari componantur, cui vel aquae, vel sulphureae, vel salinae particulae se insinuarunt. Sed harum omnium effectus, ac differentiae, apud citatos auctores fusius legi possunt. Primordialis terra vere elementaris, pura per se, in toto universo nusquam occurrit, sed vel in aëre & aquis suspensa haeret, vel aliter aggregata, mixtaque reperitur, uti reliqua principia §. 74. 76. 109.; unde & Cel. Boerhaavius, nomine purae terrae illam solam intelligit, quae ex faecibus pluviae, omnibus vegetabilibus, & animalibus, nonnullisque mineralibus, in cineres reductis arte elicitur, quaeque ignis vieducta de compositis, magna eget sollicitudine, priusquam pura haberi queat, semper salium fixorum usque in vitri originem tenax (*h*). Verum, pace immortalis Auctoris dixero, haec quoque terra in elixivatione, & exsiccatione, aërem heu quot rebus inquinatum! denuo

(*d*) Ph. subt. L. I. p. 61. (*e*) Opusc. Phys. Chym. p. 390.  
T. I. P. I. p. 295. (*g*) In Tract. I. de Lithogones. p. 3.  
T. I. de terra p. 220. 352. seqq.

(*f*) Chym. Med.  
(*h*) Elem. Chem.



denuo in se recipit, adeoque omnino pura haud unquam obtineri potest. Praebet tamen certe principium & basin metallis, aliisque omnibus corporibus, hinc pro principio est agnoscenda; etenim ipse Cel. Boerhaavius antiquissimorum Chemicorum dictum confirmat, terram solam esse, quae sulphur retinet, & sales, illique fixitatem esse tribuendam (i); & alibi ait: eam solam cunctis dare propriam formam, suoque vinculo, caetera ligare, constantiae & tenacitatis (k).

§. 115. **I**lla autem terra, quae imprimis ut principium ad metallorum genesis & mixtionem concurrit, & cui vapores illi §. 108. seq. libenter se jungunt, in igne fusilis & vitrescens reperitur, a natura jam ad generationem metallorum proxime disposita est, imprimis illa species lapidum, seu terrae, quae transparens, alba, a metallicis non raro calx, vulgo *zarter Kalk*, *Quarz oder Schiefer* vocatur, & semper matricem bonae minerae praebet, sine qua minera nulla bona est, nec fertilitatem promittens; huius defectu tanquam matricis, vel principii vere metallici, reliqua duo principia, quae fumi forma plerumque cernuntur, parietibus adhaerent, ac varii generis flores, tophos, fluores, coloresque metallicos producant steriles (l). Terra haec interdum sub aquae, & vaporum larva apparet, unde lapides producantur, nutriuntur, crescunt. Becherus asserit, se durissimos lapides, solius ignis & aquae communis ope, in mucorem resolvisse, imo & CrySTALLUM in massam pellucidissimam, instar gelatinae tractabilem, in igne fusilem, miraculi instar commutatam asservare (m). Ab hac autem terra, dum fumi more vagatur, non raro reliqui duo vapores §. 108. 109. in aëre capti figuntur, & forma absolutissima minerarum, parietibus affiguntur, quas vernacula lingua *gediegen Erz* appellant (n); atque hanc terram in fumo, & aëre haerere posse, ne ipse quidem diffitetur Boerhaavius (o).

§. 116. **H**aec species terrae, vitrescibilis nempe, saepe variis rebus permixta invenitur, ideoque juxta diversam ejus mixtionem

G 3

nem

(i) Idem. ibid. p. 343. (k) Idem ibid. p. 347. (l) Bech. Ph. subt. L. I. Sect. 3. C. 2. p. 62. (m) idem ibid. pag. 63. (n) id. ibid. pag. 65. (o) Elem. Ch. T. I. P. 2. pag. 338. seq.

nem a metallicolis varia nanciscitur nomina, dum eam vel *Spath blen-then*, vel *Katzen-Silber* vel *Talck*, &c. vocant; in perfectis metallis haec purior est, ac tenuior, uti in eorum vitrificatione apparet; ast in imperfectis crassior, sic stanno sub calcaria facie inesse deprehenditur, atque in ferro pulverulenta, friabilis, limosa, conspicitur, quam ad terram vegetantium, & animalium plus accedere dicit Cel. Boërhaavius (*p*). Verum & haec in vitrum abit, quod simplici chalybis allifu ad filicem apparet; scintillae enim inde exsistentes, charta pura exceptae, globuli vitrei esse cernuntur. Omnia enim metalla, foco Villettiano in vase myrrhino exposita vitrescunt (*q*); asseritque Becherus: omnes vegetabilium & animalium terras vitrescere posse; vegetabilem quidem terram, colorem in vitro viridem, vel subcaeruleum, indelebilem sui regni asteriscum, fervare; animalium vero diaphanum, omnium vitrorum nobilissimum fusile, sui generis colore tinctum praeberere, prioribus vitris mineralibus & vegetabilibus per omnia homogeneum (*r*).

§. 117. **H**aec autem vitrescens terra cur imprimis avide arripiat vapores minerales §. 108, 109; & vicissim, cur hi libentius, & quasi sympathice illi se intime jungant, ratio videtur esse; partim in ipsa similitudine specifica substantiae terreae, partim in tali mutua figurae proportionem, & convenientia §. 109, tam particularum minimarum inflammabilium hujus vaporis, quam ipsius terrae vitrescibilis, secundum aliquod superficiei suae latus, ut pluribus punctis physicis se tangant, cohaereant, moxque novum centrum constituent, secundum quod in variis excentricis lineis impulsa, pro una moveantur; specialissima autem habitudo, aut certe indubiae figurae ratio, determinatu impossibilis est.

§. 118. **Q**uod vero variae tales existant terrae, quae metallicae sint indolis, atque ad generationem metallorum accommodae, sequentia docent: arenae vix non omnes aurum continent; terrae rubicundae ut haematites, rubrica fabriles, lapis granatus, boli

(*p*) Elem. Chem. T. I. P. 2. pag. 351. & 353. (*q*) ibid. pag. 134. (*r*) Bech. Ph. subst. L. I. Sect. 3. C. 3. p. 67.



boli rubrae, smiris &c. substantiam mixtioni ferreae proximam exhibent; unde v. g. rubrica fabrilis, per extractionem cum spiritu salis, illo principio ferreo ita privari potest, ut nil, nisi albus remaneat limus. Ochra cum oleo lini tractata, cuprum praebet (s). Cadmia terrea, lapidosa, cum cupro ita combinari potest, ut non solum formam metallicam referat, sed etiam exquisitam ductilitatem cum illo sustineat, ut in foliola deauratoria metallica diduci possit, manet tamen illa cadmia sub ipsa mixtione cum cupro vere terrea, ita ut forma tenuissimi pulveris, ex eo rursus separari queat, quando aurichalci limatura cum mercurio rite amalgamatur, ac dein cum aqua simplici teritur & elutriatur; imo potest ex dictis foliolis metallicis illa terra momentaneo actu in auras abigi, sola nempe candelae flamma admota, qua tale foliolum, mox incandescens, cupreum; vel cupri cineri simile evadit. Praeterea asserit Becherus, quod ex argilla communi, cum oleo lini in globulos formata, in retortam vitream immissa, post distillationem, fortiori igne peractam, globuli remaneant nigro-leucophaei, seu ex albo & fusco mixti, ex quibus tritis, ablutis, grave nigrum sedimentum remanet, unde mediante magnete, ferrum multum auri continens extrahere licet. Idem affirmat, ex arena cum argento in vitrum liquata, post reductionem, argentum melioris notae, imo & parum auri obtineri, additque, quod, si argilla, arena, smiris, haematites, granatus, talcum, cadmia, vel id genus alia, quodvis horum separatim, cum debita quantitate antimonii liquefiant, quaelibet harum terrarum species metallica evadat, atque ex parte regulum formet (t). Ex his ergo patet, terram metallicae propinquam esse indoli, & metallicas mixtiones vere subire; attamen stricte sic dictam terram ex metallis separare, perquam difficile esse, ob sui cum reliquis principiis mixtionem tenacissimam, nisi forte ex quibusdam ignobilioribus, in quibus terrea substantia crassior ita abundat, ut intimae mixtioni reliquorum principiorum & coalitui firmissimo resistat.

§. 119. **M**etalla autem terreae esse indolis, apparet ex loco ipsorum natali, ex eorum absoluta siccitate, soliditate, densitate, ita

(s) idem ibid. p. 95.

(t) id. ibid. pag. 426.

ita ut ex illis nullo artificio quicquam humoris elici queat, & licet in igne fluant, flexibilia, & malleabilia sint, omnis tamen terra vitrescibilis pariter in igne fluit, & quamdiu candet, flexibilis est & malleabilis. Sunt quidem mineralia quaedam mobilia & volatilia, semper tamen sicca, & ad solidas aggregationes apta manent. Insuper metalla omnia quandam prae se ferunt cum terris harmoniam, dum igne fluentia cum variis terreis corporibus miscelam fubeunt, aquae vero ingressum summopere respuunt, fragoremque excitant summo saepe cum periculo, si vel unica ejus guttula fluenti metallo accedat. Denique & in resolutionibus, five per ignem in flores & fumum, five per aquas in calcem, imo & in ipsa liquefactione, sicca semper, terreaque videntur.

§. 120. **P**atet itaque, metalla terram tanquam basin reliquorum principiorum continere §. 118. 119; at vero idem etiam evincit corporum horum ductilium, opacorum, cum mercurio plurimum conspirantium, mutatio in substantiam terrae analogam, dum nempe, separatis principiis alterius indolis, mox manifeste in calcem fatiscunt, quae tamen calx, restitutione illorum principiorum, quibus orbata fuit, in pristinum corpus metallicum reducitur. Idem docent vitrificationes; pleraque enim metalla fortiori igne, vel speculo caustico, dum ante dictis privantur principiis, in vitrum abeunt, substantiam nempe fragilem, ductilitati e diametro oppositam, pellucidam, a mercurii intimiore contactu alienissimam, & pristinum sui ipsius corpus averfantem. Unde vitrum plumbi, nec ipsum plumbum liquefcens ingreditur, sed illi supernatat; idem etiam in vitro antimonii videmus, quod neque cum regulo, nec ullis metallis misceri potest; possunt tamen vitra haec, uti calces metallorum, pristinae restitui formae. Haec autem in vitrum conversio, competit terris, limo, sabulo, arenis, silicibus, & imprimis terrae illi metallicaе §. 115. Vitra haec ex terris confecta, cum vitris metallicis intime, ope ignis, inter se coeunt. Quod sane, uti & omnia hactenus §. 118. 119., dicta, satis puto evincunt, terras vitrescibiles metallicaе, & vicissim, metalla terreae penitus indolis esse, terramque ceu basin reliquorum principiorum agnosci debere.

§. 121.



§. 121. **C**el. Boerhaavius quidem inquit: *Recentiores suis nixi experimentis, ubique in analysi, & compositione metallorum loquuntur de terra vitrescibili, quae stabilem daret metallis basin, veterum tamen puto, non respondere terram, quam ita de metallis educi statuunt; vere nec nomen terrae, sensu accurato mereri; enim vero laboravi ipse quam plurimum hac in re, neque talem ibi terram detexi haecenus* (u). Fatetur tamen, terram, quam definit, esse corpus *fossile, simplex, durum, friabile, in igne fixum, non fluens, in aqua, alcohole, oleo, aëre, dissolvi non potens, omni fere fossili noto immistam esse, portione quidem majore, minore, semper aliqua; in metallis tamen difficilius demonstrari* (x). Unde alio loco *fere profiteri velle, dicit; aurum, argentum, argentum vivum, in natura sua nihil quicquam habere terrae, sed tantum donari tali ingenio, ut, licet in minima possibilia divisa sint, semper tamen retineant naturam fusilem in igne, aut ductilem sub malleo. De auro simul testatur, se hoc redegisse, per acida fossilia, in liquorem, formasse de eo molles pastas, confecisse calcem variis modis, posse idem facile verti in oleum puniceum volatile, in speciem butyri, in vitrum quoque transire, terramque quam perfectissime referre, eam tamen semper redire reductione in idem aurum prorsus non mutatum* (y). Quae dicta satis indicant, Virum Celeberrimum & Becherum, & mihi consentire; aliam enim terram Becherus non statuit pro principio metallorum, nisi vitrescibilem, quae, expulsis reliquis principiis metallicis, vitrum praebet, iisdemque redditis in pristinum corpus redit §. 120. Licet autem Cel. Boerhaavius terram vitrescibilem terrae indolem renuere, & ingenium metallicum redolere dicat (z): atque arenam, quae ad hanc classem pertinet, falsissime pro terra a multis haberi; cum crystallos pellucas varias repraesentet (a). Tamen terra vitrescibilis non pura elementaris terra est, sed maximam partem ex vera elementari terra constat, multo fors puriore illa, quae ex pluvia, vel cineribus vegetabilium arte elicitur, & summo igne catoptrico quoque vitrescit, qualis neque vera elementaris dici meretur, ob rationes §. 114. recensitas; arena enim, ait Stahlius, *per singula sui grana purius ho-*

H

moge-

(\*) Boerhaav. El. Chem. T. I. P. 2. pag. 350. (x) ibid. pag. 335. (y) ibid. pag. 352. (z) ibid. pag. 349. (a) ibid. pag. 354.

homogeneum aggregatum quoddam est, si non absolute, & unice terrei illius, quod Becherò primum numeratur, principii, certe tamen plurimum illius complectens; patet effectu, qui a solo superficiali contactu corpusculorum superficiem in singulis granis constituentium oritur, dum calci vivae miscetur, ubi a nudo tali superficiali contactu cum ea in saxeam penitus duritiem indurescit, quae tamen calx absque arena semper mollis, friabilis, pulverulenta manet (b). De vera enim elementari terra nullam habemus notitiam, nisi de qualitatibus illis, quas in aggregato habet; unde cum Becherò, & Stahlius terreum illud vocat: quod veram basin, receptaculum, matricem, reliquis omnibus praebeat, & aggregationes siccas, solidas, densas, ex pure homogeneo concursu suae unius speciei corpusculorum, sine aliis sociis, subit ac efformat (c). Terra autem vera elementaris, siquid de ea dicere licet, videtur esse subtilissima, simplex, homogenea, insipida, inodora, fixa, dura, in prima sua origine, ob tenuitatem clara, pellucida, a qua omnia corpora soliditatem, ac basin habent, haeret in aqua, quae inde congelatur, constituit crystallos, gemmas, vitrorumque solida corpora, nec tamen horum claritatem turbat, hinc & talis vitrescibilis vocari meretur; quam primum autem hanc ex corporibus arte quis vellet elicere puram, crassiora corpuscula terrea tantum acquirit in aggregato, subtilissimis illius partibus fors avolantibus; nec pura, elementaris, tunc amplius vocari potest §. 114.

§. 122. Cur autem terrae metallicaе vitrescibiles sint, & metalla, expulsis reliquis principiis in vitrum abeant iterum reducibile, ratio quaedam est, quia particulae salinae, vel inflammabiles, ipsi tam arte inhaerent, ut non facile integre inde separari queant; hinc Becherus dicit: *qui metalla vera methodo philosophica in terram (puram nempe & irreducibilem) reducere scit, gloriari potest, se in Chemia excellere* (d). Neminem autem artis fusoriae gnarum latere, dicit, quanta metallis infusione per terrarum, aut lapidum, vel calcis additionem, metamorphosis accedat, seque observasse: varias terras metalla ingredi, ut homogeneum mixtum cum eis, verumque in omnibus probis augmentum faciant; notamque esse ter-

(b) Specim. Becher. p. 37.

(c) ibid. pag. 42.

(d) Phys. subt. pag. 427.



terram, quae, liquefacto argento injecta, in mixtum ejus ingreditur, cupellam sustinet; dum autem tale argentum in aqua forti solvitur, eadem in pristina forma ad fundum decedit terra fixa, ut antea, nec in metallum reducibilis (e). Patet igitur, substantiam metallorum terream: terras vero in diversis metallis diversas esse, horum diversitates imprimis calcinatione, & vitrificatione demonstrari. Atque haec de terra vitrescibili, ut primo metallorum principio dicta sunt.

§. 123. **S**upereft, ut reliqua §. 109. 110. exponantur. At vero longe majorem in his esse difficultatem, vel ex eo elucescit, quod impossibile fit, ut metalla, post mixtionem primam in mineris, in diversa sua principia reduci queant, ob intimam, firmissimam, homogeneam mixtionem, summamque principiorum tenuitatem; quidquid autem hic fieri potest, in eo absolvitur, ut principia homogenea ipsis essentialiter superaddi, sicque transfusione, & varia mixtione, ex uno corpore resoluta in aliud transponi possint; quod & ipse Becherus confirmat, dicens: *corpora vero haec cum prorsus homogenea sint, & fortissimae mixtionis, omnibus elementis, & resolutionibus in partes principales, tenacissime resistunt: ita ut ejusmodi subjecta per se in principia non reduci possint; sin vero per addita solvantur, illico novae decompositiones fiunt, quae genuinam veritatem simplicium partium obscurant sic, ut decomposita magis, quam simplicia principia ob oculos veniant (f).*

## C A P U T VI.

*De secundo principio Metallorum inflammabili nempe, seu Phlogisto.*

§. 124. **I**ntelligitur per hoc principium materia simplicissima, subtilissima, solidissima, terrea, mobilissima, probabiliter sphaerica, quae aequaliter ubique expansa, rebus omnibus, plus, minus, immista haeret, unde omnes res ignem concipiunt, vel candentem

H 2

vel

(e) Phys. subt. suppl. I. pag. 292. (f) Ibid. L. I. p. 59.

vel flammantem, quæ verum & unicum est ignis nutrimentum; vel, ut Stahlius loquitur, *specificum & primarium ignei motus subiectum* (g). Haec ab aliis habita est pro humido quodam unctuofo, subtili, (§. 81. feqq.). Ab aliis pro vapore acido volatili §. 86.; pro materia coelesti, spiritu astrali, ab Helmontio *Gas* vocatur (§. 87. feqq.). A quibusdam pro pulvere subtilissimo in rotunditatem effiecto §. 91.; pro anima corporum, principio activo, quod sub sensus non cadit, & in omni resolutione perit §. 91. 93. 95. Nonnulli fluidum singularre, aliqui pinguedinem terrae nominant §. 96. 101.

§. 125. **T**ale vero principium existere, nullus mortalium dubitare potest, dum omnium trium regnorum corpora ignem concipiunt; cum vero id nec ab aëre, nec aqua, nec terra, & multo adhuc minus a sale, Mercuriove, ut principiis, oriri possit; consequens est, aliud quid existere, quod corpora habilia reddit, ut ignescere, lucere, flammam concipere, urere queant; hinc licet per se nunquam purum colligatur aut demonstretur, (nisi forte in foco speculorum causticorum) neque ullus conceptus a priori, ut vocant, de illius constitutione, aut habitu ad actiones, vel passiones, ob rationes ante §. 77. dictas, haberi possit; ex effectibus tamen, tale existere, luce clarius est.

§. 126. **P**ropria vero hujus principii sedes, aër est, quocum scilicet omnium facillime sociatur, nec ex mixtione quacunque, nisi solo aëris interventu, elici, sejungique potest; in hunc enim, velut in suam sedem, velocissime transmigrat; hinc nusquam in rerum natura purum deprehenditur, cum nec fluidae nec solidae aggregationi, sed potius subtilissimae in aëre expansioni quam maxime aptum natum sit, cui, ex innumerabili, perpetuaque mixtorum resolutione, per deflagrationem, fermentationem, putrefactionem, &c. se insinuat, & in immensum spatium diffusum, ignem, calorem, & lumen fors efformat.

§. 127. **E**x aëre in varias derivatur mixtiones vegetabiles, animales, minerales; abundantius tamen observatur in sulphure communi, oleis, resinis, axungis, &c. durioribus vero, fic-  
ciori-



cioribus, terreisque partibus undecunque intime, & accuratius intermixtum haeret; cum aqua difficilius, nec nisi mediante fale coalescit (*h*); si vero cum ea tenuissime dispersum sit, pinguis texturae forte imbibit primordia (*i*). Sub sua vero siccescente, solidescente dispositione, mineralia & metalla intime ingreditur, tanquam principium, & *sulphur metallorum* vocatur, ob promptum ejus cum terris coalitum *terram* appellavit Becherus.

§. 128. *Simplicissimum* dicitur, dum, ut principium purum, nulli alii rei admistum, consideratur; *subtilissimum* autem, quia ob suam subtilitatem nunquam sensibus apparet, omnia corpora penetrat, & densioribus materiis associatum, iis, tam ratione subtilitatis, quam mobilitatis, eo majorem subtilitatis speciem conciliat, cum etiam durissima, crassissimaque aggregata, immixtione sui, mollia, fusilia, leviora, quin & volatilia efficiat; ita cerussa antimonii, vel vitrum metallicum quodcunque, per additionem, & immixtionem hujus principii non tantum fluidiora, & vere metallica evadunt; sed &, majori carbonum copia addita, volatilia redduntur, ita, ut in auras florum forma, evolent. Ferrum & cuprum, addito sulphure communi, cito in fluorem abeunt. Notandum tamen, quod licet hoc principium per se consideratum subtilissimum sit, in corporibus tamen, quibus immixtum haeret, sine concursu aëris, fixissimum persistat; sic v. g. carbones, fuligo purior, volatilis, omni excluso aëre, in igne immutata manent, accedente libertate aëris mox ignescunt, & insensibiliter in auras avolant, fuligo quidem tota, carbones parum cinerum tantum relinquunt.

§. 129. *Solidissimum* autem, & vere corporeum hoc principium esse, testatur Boerhaavius, dum ipsum ignem vere corporeum subtilissimum, solidissimum, simplicissimum, mobilissimum agnoscit (*k*), asseritque, illum corpora tam bene componere, quam dividere, (*l*), motum, & collectum apparere (*m*), cum corporibus aliquem nexum habere, oleosis majori copia inhaerere (*n*), iisque alimentum

H 3

illud

(*h*) Idem Experim. observ. Chym. & Phys. Exp. 140. pag. 194. (*i*) Id. Opusc. Phys. Chym. p. 339. (*k*) Boerh. El. Chem. T. I. P. 2. p. 208. seqq. (*l*) Id. ibid. p. 220. (*m*) Ibid. p. 109. (*n*) Ibid. p. 143.

illud inflammabile revera simul cum terra, sale, & aqua, immistum esse (o), porro materiem hanc phlogisticam non a sole emitti, sed tantum in rectas parallelas dirigi (p). Mirum fane est, quod Becherus refert, ipsos Solis radios in corpus pulverulentum converti posse (q). Digbaeus quoque confirmat, se vidisse virum integerrimae fidei, qui, ope vasorum vitreorum peculiari modo effectorum, & artificiose dispositorum, collectos solis radios in pulverem, fusci, aut purpurei in rubrum vergentis coloris, commutavit; nec fraudi locum patuisse, nil enim vasis contentum fuisse; Experimentum tamen peragi debuisse calidiore anni tempestate. Hac operatione aliquot diebus continuata binas uncias pulveris collectas fuisse, cujus naturam mire subtilem describit, ut ipsum etiam aurum vi sua penetraverit (r). Idem fere Hombergii experimentum indigitat; is quatuor uncias reguli antimonii martialis in pollinem redacti, foco magno vitri dioptrici Ducis Aurelianensis exposuit, illumque cochleari ferreo agitando tam diu reliquit, donec fumare desineret; pulverem hunc hac methodo auctum invenit ad tres drachmas, & aliquot grana, nempe ad decimam fere partem molis totius; dum autem postea pulverem hunc vero vitri illius foco exposuit, mox in vitrum aurantii coloris fusus, una cum augmento priore, octavam quoque sui ponderis partem amisit; unde probabile: fumos in prima calcinatione semiunciam de regulo abstulisse; ultimam autem fusionem tres drachmas materiae inflammabilis e radiis solis prius introductae absumfisse (s). Sic & Cl. Pott mira profert exempla, quae in idem conspirant; ait enim, mercurium cum metallo aliquo limato, in mortario vitreo per 36. horas continuo agitatum colorem auri plane induisse, modo dies serenus fuerit, & sol saltem semihoram luxerit; aliter enim experimentum nequaquam successisse; quod fieri, ait, a materia lucis impellente, uti, per motum caloris, atramenti sympathetici, ex minera bismuthi, vel cobalti, facti, litterae prius in charta invisibiles, mox virides producuntur. Meminit idem salis cujusdam mineralis, cujus granum unum in aquae fluviatilis libris quatuor solutum in vitro aperto nonnemo aëri exposuit ita, ut radii solis perpendiculariter inciderent, qui in aqua illa adeo

(o) Ibid. p. 220. (p) Ibid. p. 135. (q) Phys. subt. L. I. p. 119. seq. (r) Digbaei Tract. de immortal. animae P. I. C. 7. p. 47. seq. (s) Mem. Ac. R. sc. 1705. p. 94. seq.



adeo visibiliter se fixerunt , ut spatio quadrantis , aut semihorae , aqua tota colorem pulcherrime rubrum acquisiverit ; quod si verò intra hoc tempus nubes intercurrissent , superiorem tantum aquae partem tinctam fuisse , quae deinde fundum petierit , reliqua clara remanente , donec redeuntibus solaribus radiis tota tingeretur. Quod si radii plane non admissi fuerint , tum enimvero aquam continuo albam perstitisse (t).

§. 130. **P**raeterea inflammabile hoc principium corporeum esse , probat imprimis artificialis sulphuris productio , cujus inventionem Cel. Stahlus debemus ; si enim sal aliquis medius (ex acido vitriolico , & alkali fixo constans , uti est v. g. Tartarus vitriolatus) & salis communis vel alkali fixi aequalis portio ad unciam unam crucibulo igni imposito simul fluant , fluentique massae drachma una pulveris carbonum injiciatur , obtinetur massa rubra , quae humectata nigrescit , foetet ; si in aqua solvatur , & solutioni clarae acetum instilletur , praecipitatur pulvis , qui levi colligatione sulphur verum , citrinum , minerale exhibet (u). Quis non videt , principium verum inflammabile ex carbonum pulvere injecto ab acido vitriolico assumptum fuisse , sicque hac nova mixtione in sulphur verum abiisse ? omne enim sulphur commune ex hoc principio , & acido enascitur ; & hoc inflammabile principium ex novo hoc mixto pro lubitu rursus expelli , iterumque introduci potest ; acidus autem ille sal , & principium hoc inflammabile , ex nullo alio , quam mutuo terrae genio , ut nempe terra cum terra , tam facile connectuntur , mixtionemque subeunt ; Sal enim terra constat , & aqua : ideo sal communis , si in aëre per attractionem humidi solvatur , & destilletur , idque repetitis vicibus , tandem in aquam fere dulcem , ac terram fatuam inertem resolvitur , evanescente sic sensim acido , & , ut Pott loquitur , centrum suum repetente (x).

§. 131. **P**incipium autem inflammabile terreum esse , tam a priori , quam posteriori patescit , & primum quidem experimentis §. 129. 130. tum & ex eo , quod non solum cum vegetabilibus , imprimis eorum resinis , animalibusque mixtionem subeat , eorum pingui-

tudi-

(t) Dissert. von Feuer und Licht. p. 64.

(x) Observat. de sale com. p. 8.

(u) Stahl. opusc. Phys. Chym. p. 142. seq.

tudinosas, oleosasque partes praecipue constituat : sed & imprimis largissima copia in subterranea existat regione, ibique multo firmiorem cum plerisque mineralibus, praecipue metallis, subeat miscelam. Quod autem vegetabilibus, & animalibus ob partem horum terrestrem, maxime insit, patet in confectione carbonum ; dum enim in exustione, aëre liberiori excluso, simul aquosae expelluntur partes, principium hoc subtilibus terreis unitum partibus manet, omnemque deinceps penitiorum aquae contactum excludit ; quare & nulli putredini obnoxii solent esse carbones, cui tamen ligna quam maxime sunt exposita. Olea, etsi volatilia, limpidissima, tenuissima, dum in aëre aperto accenduntur, flammam concipiunt, in cuius medio si cochlear, aut solidum quodvis, teneatur, momentaneis successibus partes aquosae, aliaeque, in auras avolant ; principium vero hoc, terrestribus particulis firmiter adhaerens, cum iis, fuliginis facie, solido illi objecto se applicat ; haec fuligo sicca, nigra, in libero aëre levi candentis filii contactu ignem concipiens, sensim tota evanescit. Idem hoc principium corpora quaecunque, ad quorum mixtionem copiosius concurrunt, ab omni intimiore cum aqua commercio excludit ; sic acidum, quod aquam libenter in sui miscelam recipit, dum cum phlogisto in sulphuris naturam coivit, mox omnem cum aqua societatem respuit ; & licet in nonnullis mixtionibus cum aqua per medium salinum conciliari videatur, tamen & illa portio aquae, cum qua copiosius cohaeret, miscelam cum reliquis aquis nequiquam subit, quod in oleis, pinguedine &c. videre est, quae aquae semper supernatant. Unde ratio patet, cur hoc phlogiston amice adeo, atque intime jungatur metallis, quae indolis pariter terreae, aquam nullo pacto admittunt. Ut igitur sal est illud principium terreum, quod absque aquositate miscela consistentiam lapideam, vitrescentem, crystallinam praebet, metallicisque mixtionibus praecipuam largitur hypostasim : ita hoc principium inflammabile tam in sulphuris, quam mineralium genesi terreo huic fundamento quasi superstruitur (y).

§. 132. **A** posteriori porro hoc principium terreum esse demonstratur ; quod e mixtionibus suis tenuibus, & crassioribus



bus, solidis & fluidis, in substantiam solidam, siccam & terream reducatur: cum solidissimis terreis concretis promte misceatur, ut cum metallis vitrisque; imo phlogiston illud, dum ex corporibus solidis accensis sub specie flammæ expellitur, in ipso suo itinere in forma sicca terrea excipi, terrisque metallicis insinuari queat; si enim cineres plumbi, vel lithargyrium, vel cerussa, super plano foco cum tecto fornicato, flamma transcurrente seu reverberante diutius uritur, ab insinuatione hujus principii per actualem ignitionem admodum attenuati, colorem rubrum contrahit, fitque *minium*, qui tamen color evanescit iterum, si minium illud super carbones ardentes uratur; evadit enim flavum, ac tandem cinereum. Si tunc phlogiston illud carbonibus adhuc crassius involutum addatur cineribus illis, redintegrat illos primo corporea sua accretione, ut pristinam recuperent faciem metallicam; si vero largius addatur & simul diutius agitetur, metallum totum in volatilem fuliginem dissipat (z). Notandum autem: principium hocce e mixtione, atque indole terrea difficulter admodum in statum fluidum reduci.

§. 133. **E**xistentia hujus principii & mixtio in metallis patet *primo*, quod pleraque sulphureum in igne odorem spirent, uti & minerae, si sublimatione tractentur; tum ex simplici ustione vel calcinatione metallorum ignobilium in cineres & calces, ubi principium illud, occurfu liberi aëris, uti ex lignis aliisque combustibilibus, in auras avolat: aëre vero omnino excluso, in calcinatione immutabile perstat, nec metallum suum deserit. Sic ferrum in vase probe clauso diutius calcinatum in chalybem abit, nunquam in calcem. *Secundo*, ex effectis ejus, quos per intimam sui mixtionem in ipsis metallis exserit, quod illa tenera, mollia, fusilia, volatilia reddit, uti patet ex experimento §. antecedenti descripto. *Tertio*, ex deflagratione illorum cum nitro, quod tantum cum corporibus inflammabili hoc principio copiosius imbutis accenditur; ideoque ferrum, stannum, vel regulus antimonii, mediante nitro, in aëre aperto accenduntur, principio suo inflammabili spoliantur, abeuntque in calcem albam terream. *Quarto*, ex reductione talium calcium, cinerum, vitrorumque metal-

I. lico-

(z) Stahl. Exper. Obs. Chym. Phys. p. 149. seq.

licorum, in pristinum metallum, per hujus principii restitutionem : si nempe fuligo volatilis, pinguedo, cera, sapo, fluxus niger, carbonēs &c. iis superaddantur.

§. 134. **I**ta calx seu cerussa antimonii, quando super carbone per ignem lampadis, tubulo caementario aurifabrorum ignitur, aut foco speculi ustorii exponitur, vix ullos emittit fumos ; simul ac vero ex illa parte, qua carbonem immediate tangit, ignis admoveatur, mox in regulum reviviscens fumos copiosos spargit, ac florum forma in auras penitus dispergitur, nisi statim removeatur (a). Idem cum plumbo, quanquam tardius succedit, qua super re varia instituit experimenta Cel. Geoffroy (b). Crocus Martis, quanquam difficulter in vitrum fluat, addito tamen hoc principio, pristinam ferri formam recipit. Plumbi calces, cineres, minium, lithargyrium, cerussa, in igne vitrescunt ; vitro huic fluenti frustulum carbonis injice, & plumbum recuperasti ; pari quoque ratione vitrum antimonii in regulum reduces. Stanni cinis, addito paucō sale alkalino, & carbonibus in stannum confluit ; quod si stannum idem in cochleari ferreo patulo, igne auctiori tractetur, cuticulam pulverulentam in superficie format, eandemque versicolorem, qua semota nova mox renascitur ; si vero cuticula seu calx stanni, reliquo stanno fluenti una cum frustulo sebi, aut cerae injiciatur, & bacillo ligneo agitetur, tota pulverulenta portio colliquescit, stannumque subiens, superficiem speculi instar nitidam relinquit. Cineres cupri cum tribus partibus salis alkalini & una tartari crudi, debito igne fusi, addito boracis in vitrum liquati pauxillo, quo fusio promoveatur, in cuprum nitidum tractabile redeunt. Plura de his Neumann. (c) Stahl. (d), alique. Cupri autem vel & ferri limatura non rubiginosa, si crucibulum ita adaptetur, ut flamma sulphuris in ipsam limaturam reperiatur, mox in massam colliquescit. Quin & limus communis figulinus, qui per se in vitrum abit lividum, cum oleo seu pinguibus in novam mixtionem ferri abit ; uti si bolus communis cum aluminis & salis solutione probe uniatur, tumque resiccata massa in crucibulo rimam habente inclusa per duas tresve

(a) Idem specim. Becher. p. 72.

(b) Mem. Acad. R. sc. 1709. p. 162. seqq.

(c) Chym. Med. T. I. P. I. pag. 369. seqq.

(d) Exper. & observ. Chym.

Phys. obs. 18. p. 21.



tresve horas fortiter calcinetur, ferrum inde obtinetur, cujus inventi gloria Stahlio debetur (*e*).

§. 135. **I**psum quoque sulphur minerale, (quo nomine non sulphur commune, seu mixtum ex acido vitriolico, & principio inflammabili, sed solum phlogiston, ut principium metalla constituens, intelligi velim) certa encheiresi ex metallis educi potest; quod terreum esse, metallis molliem impertire, causamque materialem cohaesionis, & colorum efficere probabile admodum est; idem tamen, ratione puritatis, mixtionis variae, volatilitatis, fixitatisve, valde variat; in sulphure enim communi, aliisque inflammabilibus oppido volatile est: in metallis ignobilioribus constantius: in nobilibus & perfectis fixissimum & constantissimum apparet (*f*). Semper tamen idem immutabile manet principium, quod cum arctissime haereat metallis immixtum, resolutio ac separatio a reliquis non levem poscit operam; revera tamen & iis inesse, & extrahi posse, sequentia evincunt.

§. 136. **S**I argentum aqua-forti solvas, & solutionem sale communi prius in aqua soluto praecipites; tum, hydrargyro adjecto, aquositatem omnem abstrahas; in fine igne violentissimo sublimando, mercurium obtinebis principio inflammabili, quod ex argento recluso attraxit, junctum, ac in cinnabarim sublimatum. Eadem prorsus methodo ex plumbo, ferro, cupro, mutatis mutandis, hoc principium evocari potest, imo & ex auro, modo id prius debite praeparatum, subtile ac volatile redditum sit, cinnabaris obtinetur, quae tamen aliqua ex parte reduci potest. His operationibus metalla, suis corrosivis prius soluta, aliquatenus quidem, sed superficialiter tantum recluduntur; unde post abstractionem menstrui, vel corporalem praecipitationem, facillime in pristinum reducuntur corpus; dum autem, iuxta salis vel olei vitrioli quantitate addita, horum salium terra, metallorum poris aliquatenus reclusis se insinuat, simili terrae se associat; unde terra haec augetur, proportionalis mixtio metalli mutatur, alteratur, destruitur, resolvitur, ut tam firmiter principia inter se cohaerere am-

I 2

plus

(*e*) Opusc. Phys. Chym. pag. 380.  
p. 4.

(*f*) Joh. Henr. Pott observ. de sulphure met.

plius nequeant, hinc Mercurius postea injectus, sulphur metallicum acido vitriolico jam unitum arripit, cum eo firmiter, convenientia quasi naturali, coagulatur, ac in cinnabarim sublimatur. Sed de his prolixius Hoffmannus agit (g).

§. 137. **N**ec vero existimet quispiam, cinnabarim hanc, esse mercurium a concentratis salibus ita coloratum; siquidem is, ad metalla suis corrosivis soluta, adjectus, sine additione salis, vel olei vitrioli abstractione & sublimatione, neutiquam ruber sed albus semper obtinetur, sed nec a sale, vel oleo vitrioli, colore rubeo tingitur; a primo enim fit sublimatus albus: a secundo praecipitatus, itidem albus (h). Unde patet, hoc processu principia metalli vere praeparari, disjungi, & principium illud inflammabile metallorum reipsa cum mercurio uniri, & in cinnabarim sublimari; neque enim haec cinnabaris ullam salis indolem prae se fert; namque plane insipida est, nec mercurii sublimati, vel praecipitati instar fragilis, sed compacta; neque ut ille, aliaque salina composita, in aqua solubilis, multo vero minus metalli particulas cum mercurio forte elevatas continet, nam nec per alkalica, nec pingua, nec per boracem &c. in corpus metallicum reduci umquam potest; accedit, quod metalla, iterata ejusmodi tractatione, pondere vere decrescant, tandemque ita destruantur, ut extracto demum omni sulphure, reliquum in corpus metallicum plane reduci nequeat, sed verum metalli sal largiatur. Licet autem pars inflammabilis nitrosi aliquid forte ad rubrum colorem cinnabaris contribuere possit, vel quaedam particulae metalli minimae ipsi connecti, quod diversitas coloris pro varietate metalli assumti indicare videtur: tamen nec nitrum nec metalla per se tractata, cinnabarim talem unquam suppeditant. Recensentur & alii modi principium hoc inflammabile ex metallis extrahendi, de quibus Hoffmannus & Pott, loc. cit. consuli possunt. Bècherus etiam, ex omnibus metallis sulphur extrahi, & in cinnabarim sublimari posse asserit (i). Et alibi: metalla, si menstruo pingui, uti spiritu Terebinthinae, tractentur, pro sui varietate varias praebere

(g) Op. omn. suppl. II. P. I. pag. 34. seq. (h) Juncker Confp. Chem. T. I. Tab. 39. p. 997. (i) Oedip. Chym. pag. 85. Francof. 1716.



bere tincturas, quas a sulphure metallorum oriri, ac inspissatas sulphur siccum exhibere ait (k). Qua de re & Thomsonus Anglicus audiri meretur, dicens: *cum enim sulphura metallorum sint pingua, & oleosa illorum principia, ratio sane suadet, ut optime pinguibus oleosis, & alkalinis menstruis, tanquam sui homogeneis dissolvi & extrahi possint* (l).

§. 133. **S**upereft, ut modus ostendatur, sulphur illud metallicum, si lubuerit, a mercurio liberandi, & separandi; pluribus id viis tentari potest: primo: si solutioni, post hydrargyrum injectum §. 136., aliquot uncias mercurii sublimati addas, ac denuo sublimationem instituas, tumque sublimatum omne in aqua communi solvas, illud simul mercurium ex cinnabari arripiet, & sulphur in fundo relinquet. Ex eadem cinnabari cum aceto fortissimo, vel sale tartari oleoso, sulphur extrahi potest ita, ut mercurius in fundo remaneat, solutio tunc abstrahi & sulphur remanens in spiritu vini dissolvi poterit. Vel cinnabari huic, partes quatuor aquae fortis affunde, & abstrahere, ultimo ignem fortiozem admove; sic mercurius fallia arripiet, & cum iis in sublimatum elevabitur, sulphure iterum in fundo remanente. Item: cinnabari aliquid alkalinum adde, tum mercurium ex retorta in vas recipiens expelle; sulphur cum basi alkalina jungetur. Massa haec exemta solvatur in aqua, tum aceto affuso, sulphur praecipitetur.

§. 139. **P**atet igitur ex dictis, principium hoc inflammabile terreum ad metallorum mixtionem necessario concurrere, cum ex illis arte rursus educi possit. Ordo jam nunc exigit, ut tertium principium, *fluidificans* nempe, seu *mercuriale* Becheri, exponere instituam.

(k) Ibid. p. 83.

(l) Thomson. Epil. Chym. pag. 12. &amp; 71.

## CAPUT VII.

*De tertio principio metallorum, fluidificante, seu mercuriali dicto.*

§. 140. **N**emo Physicorum facile inficias iverit existere causam, quae facit, ut metalla ductilitatem, mollitiem, nitorem ac fusilitatem in igne: hydrargyrum vero fluorem siccum mirabilem, in summo etiam frigore perstantem habeat. Id nonnulli tribuunt vaporis aqueo aërem continenti, quidam aquosae viscidae subtili substantiae. Alii aquae elementari, liquori subtili acido-volatili; alii sulphureis particulis dictos effectus adscribunt; aut liquorem metallicum volatilem, vel & ipsum mercurium pro principio hosce effectus efficiente agnoscunt; aliqui demum solam figuram particularum, aut calorem & aërem subtilissimum ad id sufficere arbitrantur. vid. sect. hujus Cap. III.

§. 141. **C**um autem subiectis illis, quae examini subjiuntur, utique inesse debeat id, quod ipso effectum se se manifestat, si metalla, ac hydrargyrum praeprimis, consideremus: apparet in illis mollities quaedam particularis quasi specifica, tum & malleabilitas, ductilitas, fluor in igne fere mercurialis: in hoc autem, fluor quidam siccus mirabilis, a nullo calore vel frigore noto cohibendus; qui effectus nec a terra vitrescibili, nec a principio illo puro inflammabili, multo minus ab aqua, quam omnia metalla omnino respiciunt, nec ab aere denique, aut calore tantum dependere videntur; terra enim vitrescibilis per se in frigore fragilis, nullam mollitiem, flexilitatem aut ductilitatem prae se fert; nam de terra calcarea quid dicam, quae & in ipso igne fluens in calcem abit? Alterum vero principium inflammabile, in quantum fere semper a mercuriali participat, metallis pariter dictas dotes conciliat §. 128., sed nunquam metalla fluida reddit, uti patet in auro, ferro, &c. in quibus phlogiston multo copiosius haeret, quam in hydrargyro, nec tamen illa fluorem siccum habent in frigore; imo. si purum hoc phlogiston terrae



terrae vitrescibili miscetur, illam quidem colore tingit, nequaquam tamen mollem, malleabilem, flexibilem, fluidam efficit; patet in granatis, aliisque gemmis naturaliter tinctis, quin & ipsa vitra, gemmaeque artificiales idem evincunt. Calor & aër ad fluiditatem haud parum quidem contribuunt §. 11. 12., nunquam tamen constat, ab his corpora aggregata solida, pure terrea, homogenea, in fluorem deducta fuisse; licet corporibus jam aliunde ad fluiditatem dispositis, motum floris excitare, conservare, augere possint.

§. 142. **P**atet ergo ex dictis, aliud quid esse, quod in metallis, ut Becheriana phrasi utar, metalleitatem quasi absolvat, eaque specificet, mercurium autem ad fluorem suum mirum disponat. Hoc principium sparsim definit: esse materiam terream, siccam, subtilissimam, volatilem, quae metallis mollitiem siccam, nitorem specialem & fluxum illum mercurialem in igne, verbo: metalleitatem dat; quod si nimium superveniat, metalla, eorumque principia emollit, diluit, & in liquorem mercurialem, volatilem deducit, id est: Mercurium currentem efficit (*m*). Afferit simul, hoc mercuriale principium arctum nexum habere cum principio inflammabili, hujus ut umbram corporis vestigia legere, atque obscurius in aëre, aqua, terra, pinguibus omnibus, fuligine, aceto, tartaro, urina, & imprimis in sale communi haerere; qua propter in hoc sale tam principium sulphureum arsenicale, quam mercuriale metalleitatis & agnoscit & distinguit; haec tamen arctissime inter se cohaerere, difficillime a se invicem segregari posse autumat (*n*). Unde & Stahlius conjicit, principium ignescendi, & mercurificandi, non toto genere, ne quidem specie, sed probabilius forte solum numero diffidere (*o*).

§. 143. **C**um igitur certum sit, tale principium existere §. 141., illius naturam & qualitates paullo curatius oportet expendere. Terreum, siccum, & subtilissimum illud esse, ratio & experientia docet; cum metallis imprimis proprium sit, atque *metalleitati* directe inserviat, mixtionemque ipsorum penitus compleat, propter  
coali.

(*m*) Bech. Phys. sub. L. I. Sect. 3. C. 4. p. 76. seq.  
I. p. 333.

(*o*) Stahl. specim. Bech. p. 80.

(*n*) Idem in Phys. sub. suppl.

coalitum cum duobus ante demonstratis, terreae & ipsum indolis esse debet; praesertim cum phlogisto seu inflammabili principio semper inhaereat §. 142, omnem humiditatem aqueam respuat §. 131.; praeterea ex ipsa siccitate, densitate, pondere mercurii idem patet. Becherus terream ejus indolem ex contrario probare nititur: quod nempe terreis fluor mercurialis sistatur, uti a sulphure, & fumo saturni: sic mercurius in amalgamatione cum aliis, tantum de iis in se recipit, & emollit, quantum in fluidificante hoc principio excedit; si enim nimium addatur metalli, ita ut illae partes fluidificantes superentur, amalgama indurescit; in amalgamatione enim non tantum superficialis, sed intima mixtio fit per minima; nam si mercurius cum plumbo amalgametur, & per retortam iterum abstrahatur, notabiliter gravior & alteratus secedit, ita ut plumbi portionem sibi unitam per retortam secum ducat, quae non nisi lenta digestionem ab eo separari potest; unde & mercurius tunc tardius currit, cuticulamque facit; indeque patere ait Becherus, principium hoc fluidificans in hydrargyro excedere, quod cum particulis saturni intimam subit mixtionem, easque fluidas reddit; si autem particulae siccae, terrestres nimia addantur copia, fluidificans illud principium superatur, indurescit amalgama, fluiditasque perit (p). Simile quid fere de auro afferit, de quo alibi.

§. 144. *Siccum* illud esse, patet ex eo, quod molities metallis ab illo conciliata, imo & ipse fluor mercurii siccus sit; unde materia, quae hunc efficit, pariter sicca esse debet; licet enim haec suo effectu a reliqua simpliciore, & propria indole terrea declinare videatur, hae tamen ipsius proprietates omnes specificae sunt, siccitatem servant, omnemque corruptibilitatem respuunt. Hydrargyrum quidem, per solam digestionem in substantiam vere metallicam nunquam mutatur, hoc tamen siccitatem hujus principii neutiquam revellit, sed confirmat, principium hoc fluidificans in illo exsuperare, & difficulter separari posse; attamen si longiori tractetur digestionem, in siccam pulverulentam terream calcem abit, qua de re alio loco agetur. Insuper notandum, quod si mercurio, qui hoc principio redundat, partes terreae intime misceantur, ille firmitatem inde acquirat; dum  
enim

(p) Bech. Ph. subt. L. I. p. 198. seq.



enim per insinuationem salinarum particularum terrearum fluidificans illud contemperatur, firmissimam inde Mercurius acquirit duritiem, uti patet in confectione mercurii sublimati, atque in coagulatione sic dicta hydrargyri, Boylei fide firmata, quae fit ex hydrargyri unciis duabus, aeruginis unciis duabus cum dimidia, salis communis uncia semis vel integra, aceti vini, & aquae limpidae, aequali portione libra una; flores aëris, hydrargyrum, & salem probe misce, mixturam cum tantillo aceti & aquae immitte sartagini, in qua eam super igne per aliquot horas frigendam cura, jugiter ipsam agitando, & plus aceti, & aquae identidem adfundendo, prout illud, quod erat infusum, absumitur; tum mixturam exime, eamque in diversis aquis solícite ab adhaerentibus salibus ablue, dehinc omnem humiditatem aqueam mundo linteo desicca, & nitens habebis amalgama, argentum vivum fere referens. Siccata haec mixtura diu fatis, postquam penitus refrixit, non tantum mollis est, sed tam prope ad fluorem accedit, ut in modulum immitti, & toreumata inde formari queant, siquidem dextre confecta sit; ea, postquam per aliquot horas aëri minus frigido, quam est ipsa mixtura, exponitur, tantam acquirit duritiem, ut contra pavementum allisa resiliat, & fragilitatem, qualis est nimis indurati chalybis, habeat (q). Idem confirmatur per condensationem mercurii in confectione cinnabaris, ubi principium fluidificans superfluum per accretionem substantiae sulphureae coagulatur, & fixatur: cui, ut Becherus ait, si superveniat vitriolum, spiritus nempe ejus volatilis, aut concentratus in oleo sulphuris, completur essentiali & specifica coagulatione, & fixatione, fit verum metallum (r). Ex quo profecto elucet sicca principii hujus indoles.

§. 145. *Subtilissimum* autem illud esse, patet ex eo, quod omnes fugiat sensus, neque per se purum unquam colligi, & excipi possit. Idem confirmat productio mercurii ex statu solido in fluidum siccum §. 142; hinc causa tantae subtilitatis utique admodum subtilis esse debet; eo ipso tamen non tam insigni mole, aut pondere conspicua, cum effectus *subtilisationis* crassas tales affectiones non

K

ad-

(q) Boyle Tract. de fluidit. & firmit. sect. 74. p. 92. p. 419. seq.

(r) Becher Concord. Chymic.

admittat. Unde & Becherus de qualitatibus principiorum ait: *quod basi inservit, siccus: quod coagulat, & conglutinat humidius: quod format, subtilius est.* Diversas tamen horum principiorum esse mixtiones, plus humiditatis habere plumbum, quam cuprum: plus fluiditatis stannum, quam argentum &c. (s). De volatilitate autem principii hujus nemo facile dubitabit, cum & ipse mercurius, in quo principium hoc abundat, volatilis sit.

§. 146. **E**xposita natura & qualitatibus hujus principii, superest, ut videamus, num illud vere insit corporibus dictis §. 142. ? ac primo, an existat in aëre; suadent sane, ut id credamus, corporum concretorum perpetuae resolutiones, & in aërem exhalationes, atque similium novae regenerationes, dum principia materialia ex aëre, qui rerum omnium Chaos est, iterum excipiuntur, colliguntur, concresecunt; huc Cel. Boerhaavius conspirat, dum ait: *quam frequens est videre marcasitas, pyritidas, lapides vitriolicos, metallicas exhaustas materies, ita mutari ab aëre; cui exponuntur, ut crescant, maturentur, mutantur, renoventur, de novo impraegnentur, iterum delitescant; vera sobole metallica; videtur sane aër seminator catholicus* (t). Vapores ipsi in fodinis tali principio gravidi, qui in mineris metalla, ac aurum ipsum solvunt, ac volatilia reddunt, idem docent; experientia enim constat, ubi antea centum annos fodinae metallo divites fuerunt, illas jam steriles existere; & aliis in locis, ubi nullum unquam metallum observatum fuit, illa nunc reperiri; unde qualitates hujus principii resolventes, & in volatilitatem ducentes apparent. Becherus autem dicit: *liquor ille vaporosus, ob subtilem suam penetrantiam, crassissimos quoque lapides, & terras penetrat &c. imo metalla attractiva facta, & aëri exposita, tractu temporis in mercurium conversa, ipse se vidisse testatur* (u). Similiter vitriolum aëri expositum post aliquod tempus in mercurium conversum fuisse memorat; quin & plumbea pondera horologio in turri appensa, libero aëris concursu, albissimam contraxisse lanuginem, quam abrafam levi negotio in mercurium currentem convertit (x).

§. 147.

(s) Bech. Phys. subst. L. I. p. 68. seq.

(u) Bech. Phys. subst. Suppl. L. p. 312.

(t) Boerh. El. Chem. T. I. P. 2. p. 264.

(x) Idem ibid. L. I. p. 211.



§. 147. **U**nde constare videtur, hoc mercuriale, uti reliqua metallorum principia in aëre haerere; *haec enim vero & ipse in aere deprehendi certus sum*, ait Boerhaavius (y). Becherus observavit, quod in arena, mediante sole, aurum generetur, & narrat de quodam Helveto, qui arenam, ex qua prius aurum separaverat, soli exposuit, & post aliquod tempus, facta lotione, aurum iterum in ea invenit, idque multoties. Alterum exemplum adducit de quodam Jesuita, qui in Musaeo suo vitra, arena & aqua plena, habuit, & tanquam certum asseveravit, se certis vicibus aurum inde eluere. Constat item observatis haud dubiis, metalla non tantum extra mineras, sed & in ipso aëre, ferrum, aes, aliaque huiusmodi, nata fuisse; Quod varii perhibent Authores, inter quos Avicenna, citante Untzero: in Perside non semel aenea corpora, hamatis sagittis similia, coelo coruscante defluxisse; delapsam aliquando fuisse molem ferream 50. librarum, adeo duram, ut frangi nequiverit (z). Gasto Claveus in Apologia contra Erastum, ait: *Si in nubibus ex duplici illa exhalatione frigore densata ferrum gigni, & in terram decidere verum est: quanto magis subtus terram ex eadem exhalatione frigore densata, metallum gigni verosimile est?* Ita ex eo Becherus (a), qui eodem loco ex Petermanni Eterlin Chronico Helvetico refert: *magna tempestate cum projectu multorum lapidum coelo molem ferri decidisse, quae in longitudine sedecim, in latitudine quindecim, in crassitie duos pedes habuerit.* Et Plinius: *pluisse ferro in Lucanis, anno antequam M. Crassus a Parthis interemtus est, omnesque cum eo Lucani milites, quorum magnus numerus in exercitu erat. Effigies, quae pluit, spongiarum fere similis fuit, aruspices praemonuerant superna vulnera* (b). Harduinus in notis ad hunc locum dicit: *Praeterire silentio nefas est, quod Dio refert L. 75. pag. 860. Severo imperante argenteam pluviam decidisse: eo argento nummos aereos fuisse oblitos; quod tamen intra tres dies evanuerit.* Videtur fane haec pluvia ex mercurio fuisse; cum nummos aereos argenteum colorem tam cito evanidum inde obtinuisse dicat. Egomet non ita pridem vidi lapidem, aspectu & gravitate metallicum, quinque librarum pondere,

K 2

dere,

(y) Elem. Ch. T. I. P. 2. p. 262.

(z) Untzer. Anat. spagy. mercur. p. 84.

(a) Phys. sub. suppl. I. p. 303.

(b) Plin. Hist. N. T. I. L. 2.

C. 57. p. 102.

dere, externe nigrum, fuligine quasi obduetum, interne gryseum, parum splendentem, qui ex Bohemia huc transmissus fuit, ut AUGUSTISSIMO IMPERATORI traderetur; is, ut ex relatione constat, in Circulo Bechinenfi, prope Tabor, die tertio Julii 1753., cum circa octavam vespertinam, vento tranquillo, nec nisi paucis nubeculis apparentibus, subito tres horrendi fremitus, tonitru instar audirentur, cum pluribus aliis talibus lapidibus, quorum aliqui undecim libras pendebant, cum sibilo ex aëre delapsus est. Quod rursus confirmat, principia ad lapidum, metallorumque genesin requisita, cum aëre in altum rapi.

§. 148. **I**n aqua vero hoc principium fluidificans latere, probare nititur Becherus, ex aquis mineralibus, spiritu calido fontium, scaturiginum, stagnorum, maris. Aqua pluvialis putrefacta destillatione spiritum ardentem praebet, qui suo sali junctus, praestat in solutione auri, aliorumque metallorum (c). Boerhaavius ex Aëtis Lipsiensibus idem confirmat dicens: *aquam purissimam digestam diu, putrefactam foetere, destillatam dare spiritus oleosos, utcunque inflammabiles. Si autem digesta, putrefacta, destillata, & concentrata sit, dare spiritum fragrantissimum, qui ipsum auri corpus sine strepitu blandissime solvit (d).* Hoffmannus de aquis mineralibus inquit: *iis inesse materiem fluidam, aetheream, subtilem, volatilem, elasticam, quam spiritum mineralem vocat, universalem causam omnis spiritus ascentiae, in regno animali, vegetabili, & minerali deprehendendam, cum universali, minerali, sulphureo ente combinatam, omnesque inferiores terrarum tractus pervagantem, animam mineralium, variarumque mutationum ac effectuum fontem atque causam, in omnibus mineris sub forma vaporis penetrantis sulphurei praesentem, praeterlabentibus aquis in terrae visceribus se se ingerentem, medicaque eas virtute imbuentem (e).* Idem fere sentit Becherus dicens: *larvari hanc terram (mercurialem) vel aquae vel fumi specie; adhaerere nonnunquam minerarum parietibus, tenuium filamentorum, nivis, aut nitri florum instar, perlarum nitore; dari aquas minerales, quibus continetur, totumque mare ea plenum fieri; esse enim & primum ens salis, seu terram, unde sal illud fit (f).*

Prae-

(c) Phys. subt. Suppl. I. p. 312. (d) Elem. Chem. T. I. P. 2. p. 321. (e) Hoff. Oper. omn. T. V. in Opusc. de Aq. Mineral. p. 135. (f) Phys. subt. L. I. p. 81.



Praeterea, & hujus, & reliquorum principiorum in aqua existentiam evincit ipsa metallorum in aqua productio; cum ex arena fluviorum, etiam in Europae nostrae regionibus,amenta, & puriora auri grana colligantur; sic ex sabulo Salae prope Jenam; Ilmae, & Schwarzae in Thuringia; Rheni, & Danubii hinc inde; Albis prope Dresdam; Ederae in Hassia, &c. Aurum autem sub tali forma in fluviis nostris obvium quidem, sed non adeo copiose e montium venis vel lapidibus durioribus abreptum esse, sed vel hic generari, vel certe augmentum capere probabilius est. Nec veteribus incognita fuit auri e fluminibus collectio, ut ex Plinio patet, qui aliquot auriferos fluvios recenset, Padum in Italia, in Thracia Hebrum, Pactolum in Lydia, Gangem in India, in Hispania Tagum (g). De quo postremo & Ovidius, Phaëtonis incendium describens, eleganter canit:

*Quodque suo Tagus amne vehit, fluit ignibus aurum (h).*

Denique cum notum sit, aquam infinitis aliis inquinari; quid mirum, si & de metallis participet?

§. 149. **I**n terra idem principium quasi domesticum esse, nemo non persuasissimum habet, qui vaporum mercurialium in fodinis existentiam, eorumque effectum in mineris, generationem metallorum, & hydrargyri ipsius, attente considerat; praesertim cum & ipse mercurius, terreo-salinis, aut sulphureis particulis junctus occurrat, ac pro ratione vel in cinnabarim, vel in realgar, seu arsenicum concreseat; quae decomposita etiam ars imitatur, dum ex hydrargyro & sulphure, cinnabaris factitia: ex hydrargyro & salibus vero, arsenicum artificiale, nempe mercurius sublimatus, paratur.

§. 150. **I**n pinguibus vero, cineribus, fuligine, tartaro, aceto, reconditam esse terram illam mercurialem, docet pinguium adustorum vis in generando ferro, & volatilibus reddendis metallis, eorumque reductione ex cineribus, vel vitro; licet enim haec soli phlogisto adscribi queant, ductilitas tamen, mollities, & malleabilitas, quae simul producitur, videtur potius huic principio attribui debere, ob rationes §. 141. adductas. Cupri dealbatio per cineres; auri vero per

K 3

faeces

(g) Plin. Histor. Nat. T. 2. L. 33. p. 616. (h) Ovid. Met. 2. v. 251.

faeces nigras ex tartaro elixiviatas, idem confirmant; sales quoque pinguiore, volatiles, urinosi, uti & acetum, mercurificationem metallorum adjuvant, teste Bechero (i), qui porro ait: *Alkalia volatilia, & solventia, talem larvatam terram dealbantem continere, mediante qua metallorum mercurificatio fieri possit*; quam sententiam ut magis firmet, sequentis experimenti instituendi author est: *Smegma, oleum vel pingue quodcunque, arsenico misce, & per retortam destilla, urgente igne sublimatur in collum arsenicum insigniter metallisatum, antimonii instar, quod tamen metallum non est; addito enim igne, sub campana flammare incipit, in qua flamma ens mercurii abit, & arsenicum in pristina forma sublimatur in campanam.* Junckerus tamen, addere arsenico jubet cineres clavellatos (k). Stahlius autem de eodem haec habet: *quae imprimis lucem aliquam hujus principii (mercurialis) dare possunt, sunt illa experimenta, per quae metallica corpora sine mercurio fluida reddi possunt*; ex quibus unicum tantum experientiae testimonio se prosequi posse fateatur: illud nempe, quod ex regulo antimonii cum sale tartari & aceto, juxta Hollandi, Basilii Valentini, & Kerkringii praescriptum, paratur (l). Similiter Junckerus affirmat, a salibus tartareis vegetabilium, a fuligine, sale urinae, metalla subtiliora reddi, ac in fluxum mercurio similem converti (m). Denique Cl. Rieger ex Ettmüllero citat: si in solutione salis ammoniaci cum aqua communi, Venus aliquoties exstinguatur, crustam albam argenteam inde acquirere (n).

§. 151. **I**n sale communi, & marino, tale praesto esse principium, quod tam metallorum, quam imprimis mercurii mixtionem subtilissimam ingreditur, & constituit, probatur experimentis; quandoquidem latens in acido salis communis principium disponit metalla ad fluiditatem, & volatilitatem, augendo in iis hanc partem constitutivam mercurialem. Aurum, per acidum salis volatile reddi, destillari, sublimari potest. Luna cornea per illud fluida redditur, cerae instar, & femidiaphana, simulque adeo volatilis, ut a leni igne in auras avolet. Sic Saturnus corneus, & Bismuthum, uti & regulus antimonii, ope acidi hujus, in butyrum migrant. Plumbum cum stanno & mercurio sublimato si destilletur, in spiritum fumantem, valde volatilem convertitur;

(i) Phyl. sublt. Suppl. I. p. 299. (k) Consp. Chem. T. I. Tab. 43. p. 1071. (l) Stahl in Specim. Becher. Part. I. Sect. 2. p. 99. (m) Consp. Chem. T. I. Tab. 4. p. 90. (n) Rieger Introd. ad not. rer. nat. T. I. Part. I. p. 294.



titur; ferrum cum dicto acido in forma florum sublimatur, cuprum vero volatile fit. Idem acidum, ex eodem hoc principio, albis metallis imprimis avide se sociat, mercurium, plumbum, bismuthum, argentum ex solutionibus cum acidis fortioribus factis attrahit, & separat, quod non facit in solutione auri, ferri & cupri; quin etiam terras omnes, quae alias fluorem respuunt, fluxiles reddit; cum mercurio solo in formam siccam ex solutione abit, qui, si saepius cum illo tractetur, augmentum inde acquirit (o), metallis firmiter adhaeret, neque in solutionibus per destillationem facile iterum separatur, uti acidum nitri, & vitrioli, sed firmiter manet in illis haerens, & vel crucibula perforat, vel cum iis ascendit, & sublimatur.

§. 152. **M**agnae certe dignitatis sunt hic experimenta, quibus, uti testantur Authores, ex metallis, solo salium beneficio, sine hydrargyri additione, mercurius suscitari potest. Afferit Becherus, pluresque cum illo: ex plumbo, vel antimonio, mediante solo sale communi, verum vivum mercurium currentem produci posse, uti saepius in praxi se expertum dicit; adducitque Kircherum dicentem: plumbum perpetuis aquis falsuginosis damnatum, in hydrargyrum solvi, quod ipse cum sale communi paucarum horarum spatio absolvi tradit (p). Methodum simul monstrat ex saturno corneo facto, cum sale communi, & terra Passavienſi mixtis & destillatis, mercurium verum producendi (q). *Quid vero mirum*, inquit alibi, *si ex partibus, quae tale compositum constituunt, illud ipsum decompositum fiat, quod mercurium vocamus?* Non minorem sane admirationem, certe accuratorem indagationem meretur, si fides habenda relationi, quod Chineses & Japonenses aurum & ferrum ita emollire sciant, ut ipsis, quasi plumbo, omnia imprimant, eaque postea in pristinam duritiem reducere norint (r). Gloriatur quidem Becherus, se ferrum, additione pulveris liquatorii, juxta Paracelsi traditionem, in plumbum mutasse; Glauberiana quoque fusilitas ferri, beneficio tartari, ejusdemque tractatio cum fluxu nigro, mira quidem, longe tamen aliena est ab indole & flexilitate plumbi. Libavius tamen asserit: ferrum mollescere,

ut

(o) Becher Phys. Subt. p. 456  
p. 205.

(p) Id. ibid. L. I. p. 314.  
(r) Stahl specim. Becher. p. 81.

(q) Idem ibid.

ut sit ductile & tractabile, si oleis & aquis dulcibus, pinguedinem, & lentorem quendam habentibus, restinguatur saepe (s).

§. 153. **D**istinctissime tamen hoc principium in metallis, praecipue-  
que in hydrargyro, apparet; ita, ut de illius existentia  
vix dubitare liceat; ideoque inquit Becherus: *ipsa metalla, & mine-  
ralia suum existere huic essentiae debent; ea enim praesente metalla sunt,  
ea avolante in terram rediguntur, ea nimia quantitate accedente, liqui-  
da, & mercurius fiunt* (t). Arte autem impossibile est, ob fortissi-  
mam mixtionem, quidquam e metallis elicere, quod eorum simplex  
principium est; nisi, superaddendo unum, vel alterum, proportio-  
nalis mixtio mutetur, eorum cohaesio alteretur, & convenientibus  
adhibitis materiis, novae fiant decompositiones, uti §. 77, 123, 136.  
demonstratum est. Per illam autem essentiam, Becherus non intelligit  
mercurium vivum; addit enim: *mercurius autem crudus non est ullius  
metalli principium, sed ejus ens, quod metalla currere facit, iisque me-  
tallicitatem dat, est omnium metallorum principium* (u). Unde & me-  
talla certas proprietates cum hydrargyro communes habent, nitorem,  
pondus, *metalleitatem*, fluxum in igne, quo mercurii currentis formam  
adfectant, atque ex eadem ratione, metalla ductilia promptam cum ipso  
mercurio subeunt associationem, imo sine ulla hujus adhibitione, &  
ipsa in mercurium deduci possunt; plurimi vero philosophorum con-  
stanter adfirmant, illa vera metallorum principia esse, quae iis juncta,  
sine nova mutatione speciei externae, iis reale & homogeneous prae-  
bent augmentum; ex quo enim aliquid fit, id ejus verum principium  
censendum est (x). Cum autem Becherus observaverit, mercurium  
corporibus metallicis amicabiliter, & quasi sympathice uniri, ac post  
sublimationem, frequentem abstractionem super metallis, ac praecipi-  
tationem cum ipsis, veram alterationem relinquere: hinc conclusit,  
esse in mercurio terram, quae metallis pro principio sit (y). Per  
dictas autem terras, non intelligit actu sed solum potentia minerales,  
& metallicas; *primae*, de qua Sectionis hujus Capite quinto actum,  
tribuit *lapideitatem*, quam in omni alkali latere dicit. *Secundae*,  
quam

(s) Andr. Libav. Alchym. L. II. C. 8. p. 53. Francof. 1606. (t) Bech. Ph. subst.  
suppl. I. p. 313. (u) Idem ibid. p. 318. (x) Idem ibid. L. I. p. 60.  
(y) Idem ibid. Suppl. I. p. 292.



quam superiori capite proposui, colorem assignat, eamque in nitro ac sulphure praecipue haerere. *Tertiae* denique, de qua nunc differo, *metalleitatem* adjudicat, eamque in sale communi latere existimat (z).

§. 154. **T**ertiam autem hanc terram, seu principium fluidificans, si quis sibi parare velit, hoc vel a *posteriori* incipiendo, a mercurio separari posse, Becherus innuit: abstrahendo illud a partibus metallicis, ut ita separentur, quae antea per illud in fluxu steterant: vel a *priori*, ex isto principio illud fumendo, quod in mineris abundat, & vel aquae, vel fumi specie: vel minerarum parietibus adhaerens, tenuium filamentorum, nivis vel florum nitri instar, per larum nitore, occurrit; addit ulterius: ex eo liquorem, Alcahest dictum, parari posse, eumque insipidum penetrantissimum, plane non corrosivum, qui corpora penetrans, in subtilissimas atomos reducit, & cum aqua miscetur; ab illa autem non iterum separatur, quod cum sit metallorum principium, eorum mixtis tenacius adhaeret, perfectis tamen prae imperfectis, ea emollit, mercurificat, & si nimium adhibeatur, aurum, ob aequalem suam, & tenacissimam mixtionem intime recipit, ac in destillatione punicei liquoris forma secum elevat; alia metalla in diversas discerpit substantias, & in minimas tandem redigit atomos, unde facile graviores particulae subsident, quae aureae plerumque aut argenteae sint indolis; fere uti metalla, soluta in aqua forti, plus semper auri praebent, quam igne, & communi examine probata: vel, ut argentum in aqua forti solutum, indies non nihil calcis auri dejicit. Licet autem tam in regno animali, quam vegetabili, terra quaedam huic, de qua loquimur, analoga sit, (uti Becherus ait) liquorem tamen Alcahest, qui talis pura terra est, mineralis scilicet, reliquis duabus non associari posse asserit; cum multo tenuior, magis digesta, longeque fortior, & penetrantior sit reliquis (a). De simili fere Alcahest, seu menstruo universali primus mentionem fecit Paracelsus, post eum Helmontius, pluresque alii, ut P. I. Faber in Ephem. Germaniae; item in memoriis Trevoltiensibus 1707, 1708, & Academiae Regiae Parisinae 1735. Junckerus quoque & Wedekindus in peculiari dissertatione Jenae habita, Ettmullerus, &c. Cel. Boerhaavius autem fatetur, se nescire, quid de

L

re

(z) Idem ibid. L. I. p. 88.

(a) Idem ibid. L. I. p. 79. seqq.

re ipsa dicendum sit ; suadet tamen, ut sal marinus, & mercurius, omni modo chemico tractentur, nunquam fore, ut operae poeniteat (b). Boylei quoque verba hic praecipue locum merentur : *menstruum quoddam novi, inquit, quod amicus noster paravit, statuitque ingeniosorum ordini brevi impertire, adeo penetrans, & potens, ut, nisi adhibita multa sollicitudine, & nonnulla peritia, ipsum me fefellerim, adminiculo ejus purgatum etiam aurum revera destruxerim, illudque redegerim in metallicum corpus alterius coloris, & naturae, uti experimentis de industria factis deprehendi ; ac nisi legitimae quaedam causae pro tempore id prohiberent, possem forte uno, alterove experimento fide propria hic ostendere, ejusmodi menstrua parari posse, quae ex corporibus eliciant, retineantque partes aliquas, quas etiam magis judiciosi & expertiores Spagirici pronunciarunt, non posse vi ignis resolvi : quamvis, quod te notare velim, in neutro horum exemplorum aurum, gemmaeve in ullum aliquod ex tribus primis resolvantur, sed solum in nova concreta reducuntur* (c). Tale autem principium cum in hydrargyro imprimis haereat, ibique praedominetur, quid mirum, effectus ejus esse particulares, penetrantiae, dissolutionis, resolutionis in metallis, aliisque corporibus, humano non excepto ? atquae haec de intricatissimi hujus principii natura dicta sufficiant ; superest, ut hydrargyri principia singillatim expendamus.

## C A P U T VIII.

### *De Hydrargyro, ejusque Principiis singillatim.*

§. 155. **H** hydrargyrum dupliciter considerari potest, vel ut corpus mixtum ex principiis haftenus expositis : vel ut corpus decompositum, dum nempe particulae metallicaе jam mixtae, unius vel plurium specierum, a superveniente abundantiore vapore, seu principio mercuriali fluidificante, emolliuntur, aetheris simul concurrentis, & per calorem agitati ope, in corpus fluidum decompositum, id

(b) Boerh. Elem. Chem. T. I. P. 2. pag. 461. p. 138. seq.

(c) Boyle Chymist. scept. Parte 6.



id est : mercurium currentem , vertuntur §. 109. 112. Qui tamen ita productus quoad sua principia constitutiva parum, vel nihil a superiore differt; cum & ipsa metalla ex iisdem constent principiis; nisi quod is magis, minusve purus, nempe vel solaris, vel lunaris, &c. inde nascatur.

§. 156. **Q**uocunque autem modo consideretur, semper admodum difficile, si non plane impossibile est, illum in sua principia resolvere, & haec demonstrare; idque ob horum volatilitatem, firmissimamque mixtionem §. 10. Per combinationem tamen, & mixtionem horum principiorum, quae per se considerata non sunt mercurius, illum producere, sicque a priori, ejus principia demonstrari posse, peritis certo constat. Uti enim ex introductione principii phlogistici, & mercurialis, in limum, ferrum: ex insinuatione inflammabilis illius principii in ochram, cuprum producitur; uti quidam, referente Junckero (*d*), elapso saeculo Senatui Parisino stannum obtulit, ex terris, & carbonibus conflatum, quod aequè bonum erat, ac Anglicum: uti denique plumbum, si per intimam introductionem terrae vitrescibilis, inflammabile illius principium subigatur, & uti artifices loquuntur, inceretur, in verum argentum vertitur, quod experimentum in praxi facillimum, neque ignotum asserit Stahlus (*e*). Sic & simili modo metalla, si iis principium fluidificans copiosius intime introducatur, emolliuntur vel integre, vel pro parte ita, ut in mercurium abeant currentem. Idem naturaliter in mineris fit, ubi certi terrae mercurificantis tractus, venas metallicas attingunt, resolvunt, & contenta metalla ita rarefaciunt, ut mercurii forma in ipsis mineris sua sponte fluant (*f*).

§. 157. **N**otandum, quod, licet ex imperfectioribus metallis mercurius produci queat, tota tamen quantitas assumpta nunquam in eum vertatur; omne enim illud, quod *metalleitati* heterogeneum, & quasi inquinamentum est, ab hac ipsa operatione coërceri nullatenus valet; sic & Luna cornea per spiritum nitri facta, quae tum, per insinuationem particularum salinarum, ponde-

L 2

re

(*d*) Junck. Consp. Chem. T. I. Tab. 32. p. 837.  
69. (*f*) Bech. Phys. subt. L. I. pag. 198.

(*e*) Stahl. Spec. Bech. P. I. pag.

re aucta conspicitur, in argentum nunquam tota reduci potest; cinabaris pariter, ob accretum sulphur, tota in mercurium nequaquam redit. Talis tamen terra a metalleitate prorsus aliena, quae semel metallicum constituit corpus, sed mercurium, artis violentia, ut Stahlus ait, deseruit, si mercurio iterum intime misceatur, & cum eo coëat, in eandem speciem metalli iterum concrefcit; in quo Stahlus Helmontio, & Bechero adstipulatur (g). Perfecta autem metalla cum augmento potius, quam dispendio ponderis, in mercurium converti posse censentur.

§. 158. **M**odum mercurificationis metallorum quod attinet, Becheri monitum hic inculcatur a Stahlio: metalla nimirum, quae amalgamationem facile ferunt, cum mercurio mercurificari posse; quae solutionibus magis obsequuntur, salinis mediis pro mercurificatione tractanda esse; quae vero sublimationibus magis obediunt, hac commode & efficaciter subigi; has autem sublimationes, ne spem fallant, volatilibus, urinosi, & fuliginosi solutionibus, praecipitationibus, digestionibus, cohobationibus, aut alkaliciis pinguibus adjuventis, institui debere (h).

§. 159. **A**pparet ergo ex dictis, a principio mercuriali metalla emolliri, ac, si copiosius accedat, fluida reddi, ipsumque hydrargyrum fluidum esse amalgama, mixtum ex principio fluidificante, & metallo quopiam, aut saltem illorum principiis; unde tot mercurii sunt, quot metalla, quae amalgamationi obediunt, imo & ex diversis interdum enascitur, cum & venae plerumque variis turgent metallis, ideo & *electrum* cognominatur. Quod autem haec tam difficulter demonstrentur, causa est intima principii fluidificantis mixtio, quod principium cum volatile sit, & praedominans, metalla vel secum in auras rapit, vel cum iis coagulatur potius, quam ea sibi eripi patiatur. Quare in mercurii tractatione, & fixatione, tam varia, & mira occurrunt phaenomena.

§. 160. **Q**uo vero de principiis hydrargyri clarior elucescat idea, qualitates illius prius sunt expendendae, quae quidem non

(g) Stahl. Fund. Chym. p. 125.

(h) Id. Spec. Bech. p. 101.



non modo aliquid exacte metallici, verum etiam subtilissimi fluidificantis principii praesentiam, cui penetrabilem suam vim praecipue debet hydrargyrum, testari videntur; primum equidem docet ejus pondus, splendor metallicus, natalis locus; alterum, fluor ficcus, penetrabilitas ac volatilitas persuadet. Cum igitur metallicas habeat notas, iisdem nascatur principiis, & insuper calcinatione per se, uti metalla reliqua, expulsis pro parte binis principiis, inflammabili scilicet, & mercuriali, fluiditatem, splendoremque argenteum amittat, ac in calcem pulverulentam terreae indolis faceffat, iterumque nova insinuatione illorum pristinam formam recuperet, de principiis ejusdem, ac reliquorum metallorum communibus, neutiquam dubitari posse censeo.

§. 161. **S**i enim hydrargyrum per se, diuturniore calore, in pulverem vel gryseum, vel flavescentem, vel rubrum mutetur, paullo ponderosius & fixius evadit; iste tamen pulvis, seu calx igne violentiore in auras avolat, relicto tantillo terrae fuscae, & levius; quod si calx haec leviter cum pulvere carbonum uratur, in mercurium currentem rursus diffluit: eademque, si supra carbonem, lentis causticae foco exponatur, in vitrum primo colliquescit, dein a nova principiorum insinuatione pristinam hydrargyri assumens formam, illico sub fumi specie in aërem evanescit; supra tegulam solari foco exposita, itidem vitrescit; at si violentiore igneo motu volatilis fiat, citissime evaporat, non nisi parum pulveris subfusi crassioris terrei, in vitrum tandem convertendi, relinquens (i).

§. 162. **E**x quo clare apparet, in mercurio veram vitrescibilem terram existere, quae tamen in eo, ob principii mercurialis abundantiam, ac aëris subtilissimi continuo calore agitati concursum, & fluida, & volatilis deprehenditur; unde & Becherus, ubi de causa fluoris mercurii agit, haec subjicit: *interjectae enim particulae terreae (mercuriales scilicet) cum per se volatiles sint, facile ob disjunctionem particularum metallicarum non modo ipsae evaporant, sed & adjunctas particulas secum auferunt, quod indies contingere videmus, cum nimia portione volatilia fixis miscemus; potiora enim, paucioribus*

L 3

domi-

(i) Geoffroy Mat. Med. T. I. pag. 250.

*dominantur*, & in foro politico, & physico (k). In mercurificatione quoque, mediante terra fluida, aëri in metallum ingressum conciliari affirmat (l).

§. 163. **A**lterum pariter principium, phlogiston nempe, seu inflammabile, in hydrargyro haerere evincitur, partim ex §. 160. 161; partim, quod hoc phlogiston tam metallicaе substantiae, quam mercuriali principio, tanquam partibus hydrargyrum constituentibus fere semper adhaereat; praeterea colores, quos mercurius diu digestus, conquassatus, vel & acidis, nitri, vitrioli, &c. tractatus assumit, idem confirmant; hinc Cel. Boerhaavius de pulvere illo cinereo vel nigro, ponderoso, sicco, tenuissimo, ex mercurio post longam perpetuamque agitationem in lagena producto, ait: non esse terram elementarem, multo minus terram, quae ut principium constituens ingenium mercurii format nativi; si enim calcinatione exploretur, varios mirosque successive adparare colores (m).

§. 164. **M**anifestatur praeterea hoc principium in Mercurio, ex animatione ejus rite instituta, per quam, teste Kunckelio (n), talem caloris concipiendi vim acquirit, ut etiam in frigido simul ac foliis auri miscetur, incalescat; quod & Becherus affirmat (o), dicens: *mercurius communis nullam cum auro notabilem reactionem incipit, quoniam igne interno caret; at quamprimum sulphureis subjectis v. g. vitriolis, aut metallis sulphureis destillatur, ac tum auro jungitur, statim motu sensibili mechanico illud attrahit, resolvit, ac resolvendo reagit, istaque reactione notabiliter instar calcis vivae excalescit, quod ob principium hoc inflammabile copiosius insinuat, maxime contingere videtur.* Tandem tractatio mercurii cum pinguibus, mira certe, de qua alibi dicetur, hoc ipsius principium indigitat. Sic & oleum vitrioli, dum ab hydrargyro abstrahitur, odore acri sulphureo impregnatur, qualis nunquam in illius puri destillatione deprehenditur (p). Quin &, dum in vacuo agitur mercurius, lumen producit electri-

(k) Phys. subt. L. I. p. 197. (l) Ibid. pag. 213. (m) Boerh. El. Chem. T. I. P. 2. pag. 351. (n) Laborat. Chym. P. 3. pag. 250. (o) Phys. subt. II. pag. 381. (p) Juncker. Consp. Chem. T. I. Tab. 39. pag. 990. seq.



electricum dictum, cujus causa probabiliter partibus inflammabilibus in motum deductis adscribenda est, quod itidem odor luminis electrici particularis, phosphori odori fere analogus indicat; quae sane omnia principium inflammabile in hydrargyro esse, abunde testantur.

§. 165. **T**ertium vero principium fluidificans mercuriale eidem inesse, omnium manifestissime apparet ex fluore ejus sicco singulari, in nullo alio totius universi corpore reperiundo; tum & ex subtilitate, penetrabilitate, & volatilitate mirabili, de quibus supra fusiùs dictum; ut adeo de illius praesentia in hydrargyro nullum appareat dubium. Quo tamen perfectior hujus habeatur notitia, visum est, his quaedam superaddere de mercurii artificialis productione; dum nempe metallicis ad suam perfectionem jam deductis mixtionibus, halitus mercuriales (e rebus, quae mercurius non sunt, sed in quibus hoc principium non tam firmiter haeret, facilius producendi) ita applicantur, ut intimius ipsa penetrare, illisque ita insinuari queant, ut, emollitis sensim particulis proportionatis, miscela in mercurium fluentem inde resultet; unde patet, metalla in mercurium currentem abire, dum a superveniente principio mercuriali emolliuntur, attenuantur, & in fluidum statum deducuntur; evincitur simul, mercurium nihil aliud esse, quam metallum, ea sui parte, qua molliem & fluiditatem induit, plurimum auctum (q). Ubi & imprimis illa experimenta, a Bechero, & Stahlio tantopere laudata, considerationem merentur, quae cum mercurio & regulo antimoni bene parato, per numerosas & operosas amalgamationes, digestiones, ablutiones, destillationes perficiuntur, ut & similes argenti cum mercurio tam vivo, quam sublimato tractationes, quas omni observatione dignas judicat Stahlius (r), & de quibus alibi commodior erit dicendi locus.

§. 166. **A**d penitiorem hujus principii in mercurio agnitionem, hujus coagulationes, densationes, & quasi fixationes, per pinguedines, salia, olea, vitriolum, sulphur, &c. haud parum conferunt; licet enim plurimae harum transmutationum imperfectae,

&

(q) Idem ibid. pag. 1003.

(r) Specim. Bech. pag. 100.

& inconstantes sint, patet tamen exinde, mercurium ad metallicam duritiem aptum esse, neque aliud in eo requiri, praeter penitiorem terrae vitrescentis admixtionem, & cum copioso fluidificante principio subactionem; ita Kunckelius testatur, a se mercurium, ope salis puri metallici, in argentum finissimum esse conversum (s). Idem affirmant alii plures, quorum experimenta ipsa in sequentibus adducam.

§. 167. **P**ertinent huc cumprimis illa Boylei, quae ex Apologia Clavei de quibusdam experimentis, quorum ope mercurii metallici in metalla nobiliora figi possint, adducit, ubi inquit: *se locutum de argento vivo a metallis prolicito, quod vulgare, ob nimiam frigiditatem, & humiditatem, nimium concoctioni sit contumax: cui operationi, licet paullo ante mercurios corporum metallicorum in genere praescribat, praecipue tamen mercurium arte ab argento extractum commendat.* Atque alibi eodem libro se ipsum expertum refert: *nuda coctione argentum vivum, ex stanno prolicitum, posse quadam causa efficiente, ut loquitur in purum aurum mutari.* Expertissimus Alexander van Suchten narrat alicubi, certo modo, quem innuit, fieri posse mercurium ex cupro, qui non eo sit colore, ut caeteri mercurii, verum viridi. Cui ego adjiciam virum quemdam illustrem, cujus nomini peregrinationes ejus & crudita scripta celebritatem conciliavere, nuper mihi asseverasse, se pluries mercurium plumbi (quem, quidquid etiam Authores polliceantur, paratu valde difficilem, in notabili saltem quantitate deprehendes) in aurum perfectum fixatum vidiſſe (t).

§. 168. **H**aëtenus de mixtione, atque principiis hydrargyri factis actum existimo. Superest, ut exploretur, num aër in eodem hoc corpore lateat. Afferro igitur, aërem non in ipsa particularum mixtione, tanquam principium constitutivum: sed solum in poris, quos globuli mercuriales, sibi mutuo contigui relinquunt, haerere; id quod experimentis antlia pneumatica institutis comprobatur; ex hydrargyro enim sub recipiente posito, extrahendo aërem, bullulae apparent aëreae, quae per totam ejus columnam in altum ascen-

(s) Kunckel laborat. Chym. Part. 2. p. 132. (t) Boyle Chymist. sceptic. P. 4. p. 94.



ascendunt. Idem fere contingit, si hydrargyrum ad ignem ebulliat; si vero idem tubo Torricelliano inclusum sub recipiente ponatur, & sub eo vitrum, aliquam quantitatem spiritus nitri concentrati continens, collocetur: fundo autem campanae tubulus parvus vitreus, qui modicum mercurii contineat, & parte una tantillo cerae leviter oblitus sit, filo, vel alio modo adnectatur ita, ut orificium inferius tubuli cera obductum, vitrum spiritum nitri continens spectet: Si tum gradus mercurii in barometro notetur, ac speculo caustico cereum illud obturaculum liquetur, ut mercurius ex tubulo in spiritum nitri depluat: contingit, ut, siquidem mercurius a spiritu nitri mox cum ebullitione solvi incipit, hydrargyrum alterum tubo Torricelliano inclusum denuo altius ascendat, atque durabilem suum progressum, situmque fervet. Unde patet, halitum illum aëreum expansum, solventis concursu, e mercurio expulsum esse.

§. 169. **N**eque aliud indoles, & effectus ejus expansilis, etiam a levissimo aëris calore, denotat; si enim inclusus calefiat, vasa omnia diffringit. Unde dixit Baco Verulamius: *videmus, quod mercurius (maxime crudum, & aquosum corpus) calefactus, arteque conclusus, eadem cum pulvere pyrio vi polleat (u)*. Patet ergo, aërem subtilissimum in mercurio haerere, non tamen in ejus mixto, sed tantum in aggregato; unde apparet ratio, cur hydrargyrum in solo aggregato, non mixto, humiditatem aqueam recipere, ac retinere queat; qua de causa, & cum regulo antimoni non commiscetur, neque amalgamationis quidem subit speciem, nisi prius madefactus fuerit, a quo tamen, post exhalationem, vel dissipationem aquae, siccata nempe massa, rursus secedit (x).

§. 170. **L**icet autem hydrargyrum aërem subtilissimum contineat, crassiorem tamen haud admittit; patet in *barometro* sic dicto *lucente*, ubi mercurius aëris ingressum a loco superiore vacuo excludit. Ideoque Verulamius mercurio vim corpora conservandi attribuit, sequenti experimento: *sume florem Caryophylla-*  
M la-

(u) Verulam. Sylv. Sylvar. Cent. I. exp. 30. p. 761. Lips. 1694. (x) Juncker Consp. Chem. T. I. Tab. 39. pag. 1005.

*latum, leniterque baculo alliga, utrumque vitro leviter circa os inclinato, vel declivi impone, quod repleveris mercurio vivo adeo, ut flos cooperiatur; pondus modicum vitri orificio impone, ut bacillus deprimatur: elapsis quatuor, aut quinque diebus redi, ut inspicias, deprehendesque flore vegeto, caule duriori, minusque flexili, quam fuit, si comparaturus juxta ponas alium florem, quem eodem tempore collegeris, manifestius erit discrimen (y). Hoc autem tantum contingere ob exclusionem aëris, confirmat idem effectus, si flos in vacuo fervetur.*

§. 171. **A**tque haec sunt, quae tanquam probabiliora proponere sum conatus. Equidem non sum nescius, difficultates magnas, & multas, quae hinc inde occurrerunt, a me vel intactas relictas: vel adeo non satis enodatas esse, ut argumentis solidissimis in contrarium agitari non possint. Sed quis est, qui ex his ambagibus se unquam satis expedivit? quis rem tantis obvolutam tenebris pro dignitate illustravit? neque is ego sum, qui aut ingenii perspicacia polleam tanta, aut experimentorum tantae varietati, & copiae instituendae par sim, quanta quidem ad laborem hunc deposcitur; ideoque ad meliora, solidiore ratione, certioribusque experimentis suffulta condiscenda paratissimus, tenuitatem meam coram profiteri nequaquam erubesco, illud unum in votis habens: ut materia haec, ex qua tanta in summos Principes, Remque adeo publicam universam, redundant commoda, semper magis magisque excolatur & perficiatur; ad quod promovendum, si meam, qualemcunque, contulero symbolam, satis amplum lucubrationum mearum fructum me retulisse arbitrabor. Jamque ad hydrargyri naturam, usum, habitumque erga alia corpora rimandum, & experimentis, qua ex Cel. Authoribus collectis, qua propria industria institutis confirmandum, me accingo.

(y) Verulam. loc. cit. Cent. 8. exp. 796. pag. 920.



## S E C T I O    I I I .

De Hydrargyri natura, usu, & habitu ad operationes,  
aliaque corpora.

### C A P U T    I .

*De Hydrargyri natura, & usu in genere.*

§. 172. **C**orpus hocce metallicum tactu esse frigidum, fluore sicco, pondere mirabili, splendore argenteo praeditum, idem mobilissimum, penetrans admodum, volatile: ex principiis metallicis, terra nempe vitrescente, & inflammabili pauca, mercuriali fluidificante multa, in terrae recessibus naturaliter misceri, nasci, atque concursu aëris subtilissimi a calore perpetuo agitati, particulas sphaericas, laevigatas, politas acquirere, praecedentibus binis sectionibus abunde, credo, expositum est. Superfunt tamen aliae proprietates, quae illius naturam magis declarant, omni sane consideratione dignissimae, de quibus jam agendum est.

§. 173. **O**fferit se primo loco, ejus *vis inertiae*. Quam clare evincit resistentia, quae corporibus motis in hydrargyro contingere videtur; corpus enim quodvis motum in aqua decies quater minorem invenit resistentiam, atque quater decies millies fere minorem in aëre; vis enim haec inertiae, seu illa conditio corporum, qua obnituntur viribus illatis, ab aliis corporibus motis, vel prementibus, increfcit pro ratione quantitatis materiei; vel, quod idem est, vis inertiae proportionalis est quantitati suae materiae; unde quo major est quantitas mercurii, eo magis vis ejus inertiae increfcit.

§. 174. **A**ltera hydrargyri proprietas est partium illud constituentium *homogeneitas*. Illud enim homogeneum corpus a Physicis nuncupari consuevit, *quod in omnibus partibus ejus-*

*eiusdem est densitatis* (7). Quod cum de hydrargyro praepri-  
mis verum sit, consequens est, ut homogeneitas inter illius attri-  
buta jure merito reponatur.

§. 175. **H**aec vero *densitas* in eo absolvitur, quod multa hy-  
drargyri corpuscula exiguum occupent locum; vel  
quod sub paucio volumine magnam quantitatem materiae compre-  
hendant; - habet se, uti *gravitas* ipsius specifica, quae differt in  
variis hydrargyri speciebus, prout diversa illius est mixtio; unde  
& major, minorve habetur densitas ope Hydrostaticae detegen-  
da, solidorum nempe comparatione, quam pulcherrimis experi-  
mentis illustravit Celeb. 's Gravesande; is mercurii bene purgati  
densitatem esse ut 13, 54. aut 13, 57. circiter, optimi vero  
& purissimi ut 13, 62.prehendit (a). Nec minus Cl. Mus-  
schenbroeck eadem in materia elaboravit, qui & Tabulam confi-  
gnavit, specificas nonnullorum corporum gravitates indicantem (b),  
cumque in ea variorum mercuriorum gravitas diversa habeatur,  
illinc depromptam coram proponere visum est:

Minera mercurii Ducatus Bipontini prope Baumholder.	-	-	2, 962
- - - ex eodem Ducatu prope Meissenheim	-	-	5, 213
- - - petrae expers interlucentibus globulis ex			
Hydria	-	-	6, 243
Mercurius Germanicus	-	-	14, 000
- - - Britannicus	-	-	13, 593
- - - semel destillatus a Boërh.	-	-	13, 570
- - - auro purissimo unitus & centenis vicibus de-			
stillatus	-	-	13, 550
- - - cum argento simili modo tractatus	-	-	13, 580
- - - plumbo unitus, in pulverem mutatus, dein			
refuscitatus	-	-	13, 550
- - - quingentis undecim vicibus destillatus	-	-	14, 110
- - - sublimatus corrosivus	-	-	8, 000
- Mer-			

(\*) 's Gravesande Phys. elem. Tom. I. L. 3. c. 2. pag. 417. (a) Ibid. Tom. I. p. 445.  
(b) Inst. Phys. P. I. pag. 350. seq. Lugd. Batav. 1748.



Mercurius dulcis bis sublimatus	-	-	-	12, 353
- - - ter sublimatus	-	-	-	9, 882
- - - quater sublimatus	-	-	-	8, 235
Turbith minerale	-	-	-	8, 325

§. 176. Nec minus notari meretur catalogus ille, quem Celeb. Boërh. ex Transact. Philosoph. adducit (c), ubi metallorum pondera ad aquam purissimam sequenti modo se habent :

Aurum	-	-	-	-	19636
Mercurius	-	-	-	-	14019
Plumbum	-	-	-	-	11345
Argentum	-	-	-	-	10535, 11087
Cuprum	-	-	-	-	8843
Ferrum	-	-	-	-	7852
Stannum	-	-	-	-	7321
Granatus	-	-	-	-	3978
Vitrum	-	-	-	-	2805
Aqua antliae	-	-	-	-	100
His addit Hamberger aëris pondus	-	-	-	-	1 $\frac{3}{17}$ (d).

Monet insuper Boerhaavius, inde optima methodo explorari incognita corpora, ut sciatur, an metalli multum iis insit? imo saepe patere, quale id sit; quae difficultas pondera augendi, ut caetera metalla densata mutantur in aurum, vel alia corpora transeant in metalla: quae materies auri proxima? ut in hoc mutari queat, respectu ponderis?

§. 177. Sciendum porro, quod metalla, dum in aquam immittuntur, uti corpora reliqua graviora, perdant eo plus sui ponderis, quo aqua est gravior, frigidior, impurior: ut ex hydrostaticis patet; id quod pulcherrime demonstravit Kufferus, qui, referente Ill. Wolffio (e) definivit, perdere in aqua de suo pondere:

M 3

Au-

(c) Elem. Chem. T. I. P. 2. pag. 18. seq. (d) Hamberger. Elem. Phys. §. 378. pag. 299. (e) Nutzliche Versuche P. I. c. 18. pag. 518. Halle 1745.

Aurum	-	-	-	-	-	$\frac{1}{18}$
Mercurium	-	-	-	-	-	$\frac{1}{14}$
Plumbum	-	-	-	-	-	$\frac{1}{12}$
Argentum	-	-	-	-	-	$\frac{1}{10}$
Cuprum	-	-	-	-	-	$\frac{1}{9}$
Ferrum	-	-	-	-	-	$\frac{1}{8}$
Stannum	-	-	-	-	-	$\frac{1}{7}$

Quo pacto bonitas, ac puritas metallorum optime potest explorari, uti fusius loco citato describitur.

§. 178. **C**aeterum corpora quaecunque ponderosiora sunt hyeme, quam aestate, cum aestivis mensibus a calore rarefiant: hybernis vero condensentur omnia, unde & specifica gravitas diversimode mutatur; nec tamen haec mutatio aequaliter omnibus contingit corporibus; siquidem fluida longe magis a calore expanduntur, quam quidem firma; Mercurius, qui aestate uncias septem, drachmas duas, grana sex ponderabat, hyeme uncias septem, drachmas duas, grana quatuordecim exhibuit, quod experimentis evicerunt Cl. Hombergius, & Eisenschmidius, illaque in tabulam redegerunt. Eadem Tabula etiam videri potest apud Musschenbroeck (*f*). Patet igitur, hydrargyrum aestate levius esse, quam hyeme; quod in applicatione mercurii ad corpus humanum, imprimis dum externe, forma inunctionis adhibetur, usum habere potest, qua de re suo loco postea.

§. 179. **H**is accedit *Vis Cohæsionis* particularum hydrargyri inter se mutua, quae pendet a vi naturali attrahente particularum, qua ad se mutuo tendunt universali naturae lege. Comprobatur autem illa cohaesionis vis ex resistentia, quam ipse mercurius exhibet §. 173, atque ex ipsa attractione, sensibus apparente; si enim binae guttulae hydrargyri purissimi laevigatae chartae, vel speculo plano impositae sibi propinquae fiunt, ad se invicem volant, & nictu oculi citius in unam conglomerantur sphaeram (*g*). Haec autem particularum cohaesio in hydrargyro, cum  
fem-

(*f*) *Inst. Phys. P. I. §. 888. pag. 365.* (*g*) *Ibid. §. 680. pag. 262.*



semper proportionalis fit numero punctorum contactus, in unico puncto fieri videtur, idque tum ob figuram sphaericam §. 20, cum ob fluiditatem §. 6, 13, atque eo augetur magis, quo plures tales sphaerulae sibi contiguae existunt; hinc quo massa mercurii major est, eo magis increfcit vis resistentiae, & cohaesionis: & contra.

§. 180. **U**nde licet hydrargyrum, utpote corpus ex meris gravioribus constans particulis §. 13., majori quantitate collectum, vi sua cohaesionis resistat attractioni aliorum corporum solidorum, specificè leviorum, nec facile iis adhaereat, nisi forte iisdem gaudeant principiis: Si tamen minima illius sit moles, levioribus quoque se sociat corporibus; si enim duo vitra ita jungas, ut angulum efforment, quem gutta mercurii sphaerica tangat, simul ac vitra removere conaberis, gutta a vitro attracta fiet sphaeroidea, axe longiore vitra pertranseunte. Sic & hydrargyri guttulae, ab ipso in fumum abeunte, formatae, charta, linteo madido, vitro polito exceptae, iis adhaerent. Guttula mercurii minima chartae insistent, a cuspide vitri admotum attrahitur (*h*). Licet vitrum majori mercurii copiae admotum nihil omnino attrahat; neque enim attractio vitri tunc superare valet vim cohaesionis plurimum particularum in unum collectarum, seu in aggregato majori existentium. Cognitio haec, in usu medico externo mercurii, an non lucem aliquam affundit?

§. 181. **V**im tamen hanc cohaesionis globulorum inter se quis determinet? fieri quidem id posse videtur, si lamina aurea purissima, magnitudine quadrati pollicis, ope setae equinae, bilanci suspendatur, &, bilance ad aequilibrium reducta, superfici mercurii sic imponatur, ut ab hoc in omni puncto tangatur; quantum jam ponderis requiritur ad laminam iterum avellendam, tanta videtur esse vis cohaesionis particularum hydrargyri in spatio quadrati pollicis comprehensarum.

§. 182.

(*h*) Ibid. Part. I. §. 690. pag. 268.

§. 182. **F**ortius tamen attrahitur hydrargyrum a corporibus solidis principio mercuriali §. 140. multum gaudentibus, quam ipsius particulae inter se cohaerent, modo immediatus fiat contactus in omni puncto, nullo impedimento intermedio; unde metallis imprimis, ferro excepto, se sociat; si enim purus globulus argenti, plumbi, vel stanni, mercurio imponatur, hujus superficies circum corpus immersum altior est, nec gravitate sua ad libellam defluit. Item si hydrargyrum in vas simile, v. g. stanneum effundatur, a lateribus vasis attrahitur, & ab omni puncto sustinetur ita, ut in medio cavitatem formet. Quando autem vas illud ita impletur, ut mercurius ab omni parte defluat; attractione mutua partium in medio magis, quam ad latera, elevatur, & superficiem convexam format (*i*). Unde & mercurius in tubo stanneo eodem modo ascendit, quo aqua in tubo capillari; & si e vase stanneo polito mercurius effundatur, guttae mercurii ad latera vasis ita defluunt, uti contingit, dum parum aquae sensim ex vitro repleto effunditur (*k*).

§. 183. **S**i guttulae hydrargyri minimae corporibus electricis frictis, ut vitro, sulphuri, resinis &c. propius applicentur, mox attrahuntur; at si eadem paullo majores fuerint, mox iterum dimittuntur. Si autem aliqua mercurii copia, infra talia corpora, in conveniente distantia, ponatur, superficies ejus velut in tumorem elevatur, guttulae mox lapsurae instar, sed inversae. Causa hujus est vis electrica attrahens. Vid. de his Noletus, Haucksbejus, Haufenius, Wincklerus, aliique.

§. 184. **A**b aliis vero corporibus solidis minus attrahitur, quam ipsius particulae inter se cohaereant, seu, quod idem est: mercurii partium cohaesio superat vim attrahentem aliorum corporum solidorum; sic globulus ferreus, aut ferri frustum, si mercurio imponatur, hujus superficies circum corpus immersum deprimitur, cavitatem quasi formando, nec defluit pondere suo ad eam implendam. Quod si bini tales globuli ferrei ipsi imponantur, circum utrumque talis formatur cavitas; unde hi duo globi se se  
mu-

(*i*) 's Gravesande Phys. Elem. Math. T. I. C. 5. N. 91. pag. 23. (*k*) Kruger Natur Lehre P. I. pag. 258. & 268.



mutuo petunt ; ubi enim illae duae cavitates junguntur , pressio minuitur , sicque versus illam partem feruntur. Ratio hujus phaenomeni videtur esse , quia ferrum in suo mixto parum , vel fere nihil principii mercurialis in se continet §. 140. seqq. Unde & alia metalla , dum hoc privantur principio , mercurii partes non amplius assumunt , nec cum eo amalgamari possunt (*l*) , simul impuritas ferri , & major porositas efficit , ut numerus punctorum contactus , qui virtuti attrahenti semper proportionalis est , imminuatur , sicque attractio minor fiat , nec superare queat cohaesionem particularum mercurii inter se.

§. 185. **E**x iisdem causis varia mercurii cum aliis corporibus phaenomena possunt explicari ; nam si ille in vas vitreum infundatur , similia cava format ad latera vasis , uti §. 184. Unde & globulus ferreus mercurio tali vase contento impositus ad latera hujus fertur. Ob eandem rationem mercurius in tubum capillarem vitreum sibi immersum , nunquam potest ascendere , sed ejus superficies intra tubum semper erit depressior ad duas lineas , quam superficies ejusdem extra tubum circumfluentis , neque disjunguntur particulae mercurii , ut in tubum penetrare queant , nisi tam profunde immergatur , ut pressio columnae superincumbentis superet pondere suo vim cohaesionis illarum partium , quae orificio tubi immerfi sunt proximae (*m*). Attamen iste mercurii in tubum capillarem ascensus mire procurari potest , si dissolutione auri prius impraegnetur (*n*) ; tunc enim particulae auri minimae interno tubo adhaerentes mercurium fortius attrahunt , quam ipsae particulae mercurii inter se cohaereant.

§. 186. **S**imiliter si in tubulum vitreum curvum , cujus crus alterum angustum sit , habeatque diametrum , duodecimam pollicis partem non excedentem , posito primo crure latiori infundatur mercurius , ubi hic quiescet , inaequales erunt mercurii altitudines ; at in latiore crure major (*o*). Hujus phaenomeni ratio

N fere

(*l*) Neumann Chym. Med. T. I. P. 1. pag. 379. (*m*) Kruger Natur Lehre P. I. §. 224. p. 258. (*n*) Khell Phys. T. 1. Disp. 4. §. 86. p. 504. (*o*) 's Gravesande Phys. Elem. Math. P. I. c. 5. Exp. 10. N. 90. pag. 22.

fere eadem est ; cum enim mercurius a vitro non fortius attrahatur , quam partes ipsius inter se cohaerent , & mercurii guttula in tubo angustiori majus occupet spatium altitudinis , quam in latiori , majoremque disjunctionem partium suarum petat ; quae a solo pondere , & pressione columnae superincumbentis hic absolvitur ; pressio autem mercurii in latiore tubo tanta non sit , ut majorem disjunctionem particularum inducere , aut altiore ingressum in angustiore tubum promovere , & sustinere valeat : hinc & altitudo mercurii in angustiori tubo minor est , quam in latiori. His experimentis tenacitas quoque , seu vis cohaesionis mercurii determinari posse videtur ; atque ex haecenus dictis patet , cur mercurii guttula ligno , chartae , spongiae , lapidi , linteo , aliisque imposita nunquam diffuat , sed sphaericam servet figuram , nisi a pondere ipsius mercurii inferius plana reddatur. Huc illa Boylei pertinent , dicentis : *aliquoties data opera observavimus , ipsum argentum vivum , quam ponderosum etiam sit , imprimis si quis illud tenui filo in vas eodem minerali fere repletum labi sinat , bullas suppeditare , satis numerosas , & amplas , quamvis mox evanescentes (p).* Unde videri ait : mercurium habere quamdam viscositatem , vel levidensem aliquam partium complicationem , aliudve adhaesionis genus.

§. 187. **A**lia hydrargyri proprietas , mira certe , qua tam diversimode mutari , varias formas coloresque assumere aptum est natum , jam generatim ac breviter enucleanda venit. Ac primo quidem , igne varie tractatum , vel expanditur , vel aufugit , vel ut nonnulli volunt , in liquorem transparentem mutatur , vel per longam digestionem , in corpus firmum , gryseum , flavescens , rubicundum , abit ; frigore constringitur illaeso suo fluore ; agitatum , tritumve in pulverem gryseum , vel nigrum fatiscit. Deinde si variis miscetur corporibus , variis sub larvis latet , dum ex natura fluida in solidam , de volatili in fixam , de blanda in rodentem , de proprio in omnes alios fere abit colores , Boerhaavio teste (q). Unde & Boyle dicit : *cum regulo antimonii , & argento sub-*

(p) Rob. Boyle Histor. fluid. & firmit. Sect. 52. p. 78. (q) Elem. Chem. Tom. II. Parte III. p. 311.



*sublimari illud conspexi in genus aliquod crystallorum, cum alia mistura in corpus ductile, cum alia in fragilem, & duram substantiam redegi; & sunt qui adfirmant, congruis additamentis reducere se posse argentum vivum in oleum, imo & in vitrum, ne plura memorem, attamen ex omnibus hisce concretis exoticis recuperare eundem omnino mercurium fluidum possumus, qui praecipuum erat ipsorum ingrediens, quique tantopere in iis larvabatur (r). Et alibi de prodigioso liquore Alkahest Raymundi Lulli ex Helmontio refert, mercurium per ejus abstractionem horae quadrante coagulari, liquorem autem illum vehementer salinum, apud mercurium, in quem agit, nihil relinquere, ipsum tamen ita coagulare, ut jubeat eum in subtilem reducere pulverem (s).*

§. 188. **S**olvitur hydrargyrum in variis menstruis; salium aculeos promte recipit, arcteque detinet, unde in corrosivum abit venenum. Cum acido salis disponitur ad album colorem inducendum, & cum eo sociatum, levi calore in salem crystallinum album sublimatur; non item cum vitriolo, vel nitro. Ab acido tamen nitroso facile dissolvitur, & ad rubrum colorem disponitur. Ab oleo vitrioli difficillime quidem solvitur, attamen ab eo multum figitur, &, uti ab acido sulphuris, ad flavum, seu citrinum colorem adaptatur. Ab aqua regis aegre admodum dissolvitur, a salibus alkalinis nullo modo mutatur. Sic & pro varietate praecipitantium, jam sulphureum, jam obscure flavum, mox album, rubicundum, nigrescentem, violaceum, aliosque induit colores, qui multiplici modo possunt variari, teste Neumanno (t). Nam si v. g. mercurius spiritu nitri solvatur, & sale tartari praecipitetur, subsidet sub pulveris crocei specie. Sale vero marino, praecipitatum album exhibet; cum aqua calcis vivae, flavus, sicque pro varietate solventis ac praecipitantis versicolor apparet.

§. 189. **S**unt & aliae hydrargyri proprietates, mirabiles admodum, uti *vis expansilis* ab aëre subtilissimo ipsi inhaerente §. 169. *Vis conservandi corpora*, arcendo aërem crassiores, de

N 2

(r) Boyle in Chymist. Sceptic. P. I. prop. 2. p. 15. (s) Id. Hist. fluid. & firm. Sect. 67. p. 82. (t) Chym. Med. T. I. P. 3. Sect. 5. §. 48. p. 383.

de qua pariter §. 170. actum; Praeterea si Rudolpho Goclenio Professori Matheseos Marpurgensi fides habenda, qui, referente Untzero (u) testatur, quod hydrargyrum eam vim agendi in magnetem habeat, ut, penetrando intimas ejus partes, proprium spiritum extrahat, eumque impofterum omni penitus facultate attrahendi ferrum privet; quin imo idem mercurius a magnete per distillationem abstractus, ita virtute magnetica impraegnatur, ut, cum alias involet aurum, eique se se applicet, ipsum etiam solis corpus in mensa certo spatio diffitum, motu locali quoque cogat ad se transire; quod si, inquam, ulteriori experientia constaret, certe mirandam vim mercurii amplius exponeret, & acutissimis indagatoribus novum laborem ingenii exhiberet. Sciendum tamen, quod Philosophi Florentini in experimentis cum magnete captis deprehenderint, virtutem illius eandem mansisse, quae penetraverat per mercurium (x). Atque ipse Cel. Musschenbroeck magnetem cum mercurio sublimato in igne repetitis vicibus tractavit, observavitque, mercurium sublimatum nihil quidquam in magnetem egisse, neque ejus vim mutasse (y).

§. 190. **S**ingulare est, quod ex Abbate Boucaudio refert Junckerus (z); Si nempe foramini profundo telluris spongiosae, per hastam viginti circiter pedum impactam formato, hydrargyrum ad libras decem infundatur, hoc sensim profundius ad inferiora terrae, seu caloris subterranei cunabula descendere; post aliquot menses perpetuum ex eo foramine exhalare fervorem, vitra, aliaque imposita calefacientem. Recte tamen Borrichium in scripto de ortu, & progressu Chemiae monere, hoc non ubivis succedere, tum ob telluris soliditatem, & saxa, mercurii iter sufflamantia, tum ob aquarum scaturigines. Similiter Acoftam in Hist. Indic. L. 3. C. 19. tradere: in Guancavelica Peruviae, unde extrahitur minera mercurii, fontem perennem manare aquae calidae; praeterea solennem molitorum querelam esse, cataraclas, ageresque suos a mercurio, per inimicas manus injecto, perforari. Sic

(u) Anat. Spagyr. mercur. L. I. p. 10. (x) Exper. Acad. del cimento p. 247.  
 (y) Phys. Exper. Dissert. de magnete, Cap. 2. Exp. 30. proc. 2. p. 78.  
 Lugd. Bat. 1729. (z) Consp. Chem. T. I. Tab. 39. pag. 1007. & 1012.



Sic & hypogea profundiora, & puteos, hyeme, victis rigore omnibus aliis, tepidum fumum in aëra eructare, visceribus telluris materiem caloris assidue ministrantibus.

§. 191. **D**enique sunt, qui machinas mercurio mobiles reddere student, quemadmodum olim Daedalus statuum animasse traditur. Idem de eburnea Pygmalionis statua intelligi potest; an & furax Promethei ferula ignis solaris loco, hydrargyrum sustulit? certe Drebbelius machinam miram, perpetuum mobile nuncupatam, variarum scenarum, mercurii, calorisque ope productarum, varietate stupendam perfecit, quae in litteris ipsius ad Imperatorem Rudolphum II. datis, atque Deliciis Mathematicis Schwenterii, & Harsdoerfferi insertis, descripta habetur (a). Ubi & de alio perpetuo mobili, per mercurium parando mentio fit; qua de re Becherus ait: neminem post Drebbelium Thermoscopia ad motus mechanicos producendos adhibuisse, nisi quod ipse anno 1656. Imperatori Ferdinando III. imaginem ejus in vitro exhibuerit, sole sereno, ex nubibus artefactis, se representantem, tempestate vero & procellis, se visui subtrahentem. Afferit praeterea, quod thermoscopii ope, non modo indice horologii gradus raritatis, & densitatis exprimere, eosque etiam notu, campanulae cujusdam proprio impulsu significare; sed & automata communia quaecunque, nisi tamen non adeo magni ponderis fuerint, resolvere potuerit ita, ut, quoad durantem materiam, mobile perpetuum physico-mechanicum exhiberet; eo etiam rem se deduxisse perhibet, ut & Chemicis utilis esset in construendo Athanore, ignem semper aequabilissimum exhibente: ponitur nempe thermoscopium in ipsum vas digestorium, cum reliquis vitris digerendis, notatur in eo desideratus caloris gradus, & tum requisita machinula applicatur, furnusque singulis viginti quatuor horis debite carbonibus repletur; dehinc, si nimis augeatur ignis, thermoscopium occludet orificium camini; si vero calor deficere incipiat, idem orificium camini aperiet, unde calor augebitur;

N 3

adeo,

(a) Schwenter & Harsdoerffer Delic. Math. T. II. Part. 2. pag. 399. Norimbergae 1677.

adeo, ut thermoscopium sic applicatum semper in temperando calore occupetur, sicque diu, noctuque ignem regat, ita, ut per integrum mensem furnum taliter dispositum nec minimum in caloris gradu errasse deprehenderit (*b*).

§. 192. Denique & Gabriel Fallopius ludicra spectacula recenset, quae hydrargyrum exhibere dicit; *Solent enim, ait, annuli parari spectantibus admirationem parientes, dum nimirum in cavitatem talis annuli internam mercurium vivum recondunt, annulumque postea vel candelae flammae, vel prunis candentibus admovent, tum mercurium inclusum, calore ignis exagitatum, moliri exitum, quem cum non inveniat, hinc inde varie moveri, istoque motu una annulum commovere.* Panis, cui nux, argento vivo, sulphure, & nitro repleta, ac diligenter clausa, inserta fuit, priusquam in clibanum mittatur; ubi incaluerit, ita salit, ut jucundum spectaculum praesentibus exhibeat (*c*). Eodem modo ex ollis ferventibus pisa mire expelli, si argentum iis vivum includatur, modo ne nimia ollae altitudo, ignisve remissior obstiterit. Non absimili ratione contingit, si ovis in alterutra extremitate perforatis paucillum mercurii infundatur, atque, glutine convenienti occlusis iterum foraminibus, ignis admoveatur; illa enim tunc miros faciunt saltus, quos ignari magicis incantamentis adscribent (*d*). Plura id genus ab Authoribus proferuntur, quae, ut ludicra, praestigiatoribus, & circumforaneis potius sunt relinquenda.

§. 193. Jam, qualia hydrargyrum in vacuo praebeat phaenomena, paucis contemplemur: primo, si illud depuratum, in globulo vel tubulo vitreo, ex quo aër, antliae vel ignis ope expulsus sit, tum vero hermetice clauso, agitetur, lumen producit, quod non injucundo sane spectaculo est. Hoc phaenomenon, primo casu observatum fuit 1675. a Picardo Mathematico Gallo, Academiae Regiae sodali in observatorio Parisino, qui barometrum, a pluribus annis jam conservatum, nocte obscurissima

trans-

(*b*) Bechet. Phys. subtt. pag. 499. seqq. (*c*) Gabriel. Fallop. Op. omn. in Traët. de merc. Cap. 37. pag. 387. & de fossil. Cap. II. p. 337. Francof. 1584. (*d*) Juncker. Consp. Chem. Tom. I. Tab. 39. pag. 1008.



transportans observavit, motu mercurii quaedam fulgura per vices apparere, qualia in Phosphoro Anglicano videntur, dum aëri exponitur. Periculo tum in aliis pluribus barometris facto, non nisi unicum inventum fuit, Cassini puto, Astronomi incomparabilis, de quo du Hamel paucis innuit (*e*), quod prope eadem, quae Picardi, praestaret; qua de re legi potest libellus Gallico idiomate ab anonymo 1686. editus de barometris, thermometris, & hydrometris; qui 1708. Amstelodami recusatus fuit. Diarium tamen Parisinum dudum ante, Anno nimirum 1676, mense Majo, mox nempe post detectum phaenomenon, ejus meminit, sed nescio quo pacto res haec quinque fere lustris neglecta tandem a Cel. Bernoulli primum exactius perquisita fuit, qui peculiari dissertatione *de mercurio lucente in vacuo* An. 1719. edita modum talia barometra conficiendi indicat (*f*), ubi, ne soli curiositati inservire videretur, utilitatem quoque adducit ex tali Phosphoro mercuriali capiendam; horologium nempe nocte lucidum parari posse, ope duorum tuborum oblongorum, seu vitrorum conicorum aëre vacuorum, & interposito diaphragmate eburneo perforato, inter se conglutinatorum, clepsydrae instar, in qua mercurius per foraminulum ex uno vitro in alterum defluens, filum lucidum repraesentat, quod paullatim decrescens, horas indicat. Simili modo dicit, & lampades perpetuo lucentes, pluviam igneam, seu lucidam, aliasque machinas splendentes luminosas parari posse; horologium autem illud lucidum dictu facile, factu perdifficile est. Sic & ope antliae pneumaticae, sub recipiente, fontes salientes mercuriales noctu lucentes, ex eodem fundamento adornari possunt (*g*). De tali autem Barometro & Phosphoris similibus alii quoque scripserunt, uti Weidlerus in Dissert. de Phosphoro mercuriali, Haucksbejus, Hombergius, Newtonus, Leibnitius &c. Ratio vero hujus phaenomeni, videtur esse materies luminosa tam in poris mercurii quam vitri haerens, per mutuum horum affricum in motum deducta, atque ab aëre, in iisdem poris latente, elastico, propulsa in locum, ubi minor est resistentia.

§. 194.

(*e*) Hist. Acad. R. Sc. 1698. p. 312. (*f*) Bernoulli Op. omn. Tom. II. N. 112. pag. 323. seqq. item pag. 389. (*g*) 's Gravesande Phys. Elem. Mathem. T. II. Nro. 2494. Exp. 14. pag. 679.

§. 194. **A**lium autem Phosphorum ex mercurio lucidum Lemery sequenti modo describit: *Phosphori ex urina parati grana decem, solve in drachmis duabus olei spicae in phiala super flamma candelae, quod magna ebullitione fit; injice postea hydrargyri purissimi drachmam dimidiam, continuo agita, & habebis massam amalgamati similem, in obscuro lucentem (h).* Huc pertinet, quod Cl. Pott de quodam Philochymico recenset, qui ex mercurio cum sale communi eousque purgato, donec ex forma sua currente in magma albicans, immobile, lunae instar mutatus esset, admixtione salis tartari, & digestionem cum spiritu terebinthinae, oleum acquisivit, quod in tenebris, Phosphori instar, lucidum apparuit (i).

§. 195. **R**estat denique, ut amplissimum corporis hujus metallici usum generatim complectar; is quidem partim ex haecenus dictis patet, partim ex dicendis elucescet magis: utuntur nimirum hydrargyro Mathematici, Physici, Mechanici, Oeconomici, Metallurgi, Chymici, Medici, Anatomici, Pharmaceutae, Chirurghi &c. *Physico Mechanicis* ad aquarum, aliorumque liquidorum gravitatem, densitatem, puritatemque indagandam; ad mensurandam corporum attractionem, ad pressionem aëris explorandam; qua in re prima ceperunt specimina in Italia Torricellius Galilaei discipulus, & Casparus Bertus. Quos excepere in Gallia du Hamel, de la Hire, Paschalius. In Suecia Cartesius; Boyle, Hooke, Brounker, in Anglia. In Germania nostra, & quidem Vindobonae Valerius Magnus; Guerickius Magdeburgi; Altorfii Sturmius. Unde mox barometra, thermometra, atque aërometra, ignota prius nomina, increbuerunt. Quin & ad indagandum motum tremulum soni, teste Wolffio, adhiberi potest; is enim in vasculum, quo pro potu Theae utebatur, infudit tantum mercurii, quantum requiritur, ut fundus vasculi obtegatur, libram unam circiter; imposuit dein vasculum tabulae lignae undique liberae, non longe a tabula campanam horologii locavit, & forti mallei ictu sonum excitavit.

(h) Cours de Chym. P. 3. C. 2. pag. 681. & Hist. Acad. Reg. Sc. 1701. pag. 3.

(i) Pott. Exercit. Chym. de sulph. metall. pag. 17.



citavit, quo facto mox in superficie hydrargyri motum, gyrorum instar, observavit, cujus centrum in medio erat mercurii; addit simul, quod, si quis exacte hos velit observare gyros, circulosque inde ortos, a latere, vultu profundius inclinato, inspiciendum sit; rationem subjicit, quia motus campanae tremulus communicatur tabulae, a qua vasculum, & mercurius in illo contentus similem recipit motum, non ab aëre; si enim campana manu teneatur, ac tum percutiatur, experimentum non succedit (*k*).

§. 196. **P**hyfici mercurium pro correctione penduli adhibent; sic Cl. Clarham ad occurrendum variationi hybernae & aestivae usus est, affigendo parti inferiori penduli tubum vitreum cum mercurio, qui a calore dilatatus, ascendendo tantum abbreviat pendulum, quantum a calore plus aequo dilatatur, & contra: a frigore condensatus, descendendo tantum illud elongat, quantum plus aequo ab eodem frigore contrahitur; hinc centrum dilatationis, seu punctum illud, quod describit arcus, erit in eadem distantia a centro, seu puncto illo motus, ex quo pendulum affigitur (*l*). Idem, sed paulo aliter, tentavit Becherus, imponendo simul mercurio sic applicato globulum ferreum, qui pro gradu raritatis, vel densitatis aëris, vel ascendet vel descendet in tubo illo vitreo, pendulique motum vel accelerabit, vel retardabit ad desideratam exigentiam (*m*). Praeterea cum hydrargyrum adeo mobile sit, ut a levissimo calore, & pressione aëris mox in motum deducatur, nec tamen, nisi magno admodum calore ebulliat; aptissimum utique est aliorum corporum caloribus mensurandis; & quia a nullo haëtenus noto frigore in solidam massam condensatur, cuicumque etiam frigori explorando inservit; cognoscitur enim, quantum dilatetur vel constringatur in tubo cuicumque gradui respondens (*n*).

§. 197. **N**ec minus artifices varii ad opera sua perficienda illo utuntur; sic aurifabris medium est, quo metalla, vasaque auro obducantur; speculorum confectoribus necessarius est, ut per eum stannea foliola speculo laevigato alias diaphano ad-

O

hae-

(*k*) Wolff Nutzliche Versuche P. III. C. 2. §. 10. p. 36. seqq. (*l*) Transact. Angl. 1726. N. 392. Art. 4. (*m*) Phys. subt. p. 501. (*n*) Mulichenbr. Inst. Phys. P. 2. pag. 419. §. 991.

haereant, ac pelluciditatem impedian. Eodem modo & vitra obducuntur varia, superficie interiore, ut specula imitentur. Moliatores auri eo indigent in auro sic tractando, ut ad pigmenta possit adhiberi. Pictores ex eo, aliisque rebus additis cinnabarim, aurum, musicum dictum, argentumque ejusdem nominis parant, quo ad pingendum utuntur. Venatores ex plumbo & hydrargyro globulos fundunt, qui e sclopeto explosi ita diffiliunt, ut plures aviculas simul occidant. Quin & piscatores in nassas suas pisces numerosissimos pelliciunt, methodo ab Untzero tradita (o). Nam metallurgos quid commemorem, cum notissimum sit, eos ope mercurii metalla nobiliora ex mineris, arenave educere, & ab ignobilioribus segregare.

§. 198. **T**ranseo ad *Physico-Chemicos*, qui in examinandis hydrargyri qualitatibus, mutationibus, reductionibusque toti occupantur, dum ejus habitum ad varia corpora explorant, metalla cum eo amalgamant, resolvunt, calcinant, mercurificant, solutiones varias explorant, num aurum contineant; dum enim solutionibus dilutis aurum continentibus parum mercurii injicitur, ejus superficies ab auro contento pellicula sui ipsius coloris brevi inficitur, teste Boyleo (p). Varia item alia cum eo efficere student, de quibus partim jam egimus, partim acturi sumus. Alchymistae item varie eum exercent, jamque figere, jam animare, jam in metalla nobilia transmutare conantur. *Chemicis Pharmaceutici* ex eo varia prae-parata conficiunt, illum diversimode miscendo, coquendo, solvendo, sublimando, praecipitando; unde pro ratione *Æthiops* mineralis, *Cinnabaris*, *Mercurius sublimatus*, dulcis, diaphoreticus, solaris, lunaris, jovialis, praecipitatus albus, ruber, flavus, viridis, *Turpethum minerale*, &c. exsurgunt. Sed iidem etiam *Decocta*, *Con-servas*, *Emplastra*, *Unguenta*, aliaque inde parant.

§. 199. **V**enio ad *Anatomicos*, quibus ad varias cadaverum partes implendas apprime idoneus est. *Medici vero practici* eo ad explorandum calorem febrilem, vel corporis totius, vel partium, commodissime utuntur; alias & interne & externe ad va-  
rios

(o) Anat. Spag. merc. p. 175. (p) Experim. de color. p. 23.



rios morbos debellandos porrigunt; externe quidem vel forma amuleti, vel emplastri, unguenti, suffumigii &c.; interne vero in pulvere, conserva, electuario, pillulis, morsulis, decoctis, &c.: a quibus ambigui quidem, semper tamen mirabiles producuntur effectus. Porro ad infecta corporis humani necanda remedium est praesentissimum; quin & Cosmeticorum, amabili sexui adeo expetitorum, numerum adauget, teste experientia, & confirmante Boyleo, dum inquit: *memini, nobilem quandam foeminam, quae aliquot aulas sua pulchritudine prae aliis ornaverat, mihi fassam esse, insipidum hunc liquorem inter omnia innoxia faciei Cosmetica esse optimum omnium, quae unquam repererit (q).* Aliae capillos nigro colore inficiunt, dum solutionem mercurii, & argenti, utramque aqua forti factam, miscent, ac tantum aquae communis addunt, quantum requiritur ad vim corrodentem hujus liquoris ita diluendam, ne cuprum amplius afficiat, neque bullas in ejus superficie excitet; ac tum capillos crebro humectant (r).

§. 200. Quae tamen adhuc in intimo suo recessu recondita habet hydrargyrus, nondum existit artifex, quantumvis perfectus, & qui Philosophus tam per ignem, quam per aquam dici cupiat, qui penitus explorata perspectaque habeat; sive illius vires, dotes, & potentiam in re medica, sive erga corpora caetera contemplemur. Certe in medicina solus diversimode praeparatus integrum fere adornat pharmacopolium; dum jam resolvit, obstructions tollit, tumores discutit; jam anthelminticus vermes necat, & expellit: jam catharticus, ventrem & blande & violenter solvit: nunc emeticus, lenes aut fortes ciet vomitus; alias diaphoreticus, perspirationem sudoresque promovet; mox diureticus factus, urinam pellit; sed & sialagogus ptyalismum inducit; eundem nonnunquam nihil horum omnium agere observes. At vero quam stupendi, quam a se diversi, corporis ejusdem, hi sunt effectus!

O 2

CA-

(q) Chymist. Scept. pag. 133. (r) Geoffr. Mat. Med. T. I. c. 2. p. 312.

## CAPUT II.

*De hydrargyri habitu ad ignem.*

§. 201. **E**a est mercurio peculiaris proprietas, ut a minimo calore mox dilatetur, & rarefiat, a frigore vero illico densetur; docent Thermometra, quorum inventionem Cornelio Drebbelio Almariensi Batavo debemus, qui, ob raras inventiones suas a Rege Jacobo in Angliam evocatus, primus quoque microscopiorum repertor fuit (s). Haec postea a variis mutata, & ad meliorem usum accommodata fuere, inter quos Fahrenheitius praecipuus est, qui thermoscopium suum, frigore arte aucto, eo deduxit, ut 40. gradibus mercurius haereret infra 0; cum tamen naturali summo frigore raro haereat ad 5tam notam infra gradum congelationis; adeoque arte contractus fuit ad  $\frac{1}{289}$  suae molis; mansit tamen aequè fluidus, mobilis, & expansilis, ac antea, licet hoc modo per frigus ad pondus auro proximum accedat. Contra vero quo major illi calor applicatur, eo magis quoque dilatatur, utque tardius incallescit, ita calorem diutius retinet §. 4. 5; a calore hominis sani ad gradum 92. vel 94. extenditur, a calore vero atmosphaerae gradum 84, rarissime 90. attingit; in calore bullientis aquae ad 212, ab oleo bulliente ad 600. ascendit, ac tum ipse ebullire, & aufugere incipit.

§. 202. **S**i jam calculum ineamus, quod a summo frigore arte producto contrahatur ad 40. infra 0, ac rursus a calore, usque dum ebulliat, ad 600. extendatur; apparet, illum condensari posse per partes 640. suae molis, adeoque proprium ipsius pondus  $\frac{1}{17}$  gravius, vel levius fieri a solo calore vel frigore nobis hactenus noto (t). Observandum tamen, computum hunc adeo exactum non esse; namque notatum fuit, & vitrum ipsum a calore manus dilatari ita, ut globulus vitreus distensus sit ad  $\frac{1}{1000}$  in sua capacitate, teste Amonton (u). Unde si thermometrum calidiori liquido immergatur, primo momento descendit, mox ascendit;

(s) Traité anonyme de barom. Therm. &c. p. 54. Amst. 1708. (r) Boerh. El. Chem. T. I. P. 2. p. 87. seqq. (u) Mem. Acad. Reg. Sc. 1704. p. 12.



dit; si vero frigidiori immittatur liquori, primo ascendit, ac dein descendit; quod phaenomenon ab aliis non mutationi vitri, sed caloris effectui attribuitur ( $x$ ). Sic Halejus credit, calorem, calefaciendo liquores, non aequabiliter eos expandere, sed per saltus quosdam ( $y$ ). Praeterea & vi ponderis vasa vitrea parum dilatantur, teste Musschenbroek ( $z$ ).

§. 203. **D**um autem vehementiori ignis gradui exponitur, cohaesio particularum §. 179. seqq. sensim integre in ejus superficie solvitur, ita, ut instar fumi eleventur, & in auras avolent. Idcirco ait Boyle: *quamvis argentum vivum inter omnia corpora nobis nota primum ab auro gravitatis locum teneat, attamen in vaporem reductum ferri hac illac videtur, ut aliae terrestres particulae in aëre nostro sursum deorsum natantes* ( $a$ ). Simul exemplum affert deauratoris, cujus annulus in digito a vaporibus mercurii dealbatus, & quasi argentatus fuit. Et Boerhaavius: *Mercurius igne simplici 600. graduum aufugit, nisi linteo, charta, corio humido, vel frigidulo receptaculo excipiatur priori forma; aër eo impraegnatus corpus humanum dum alluit, mire illud penetrat, & pyralismum excitat* ( $b$ ). Quin & vitra ab eo penetrari, Cassius testis est; at quousque porro dilatari, attenuarique possit, quis facile dixerit? immanem tum illius fieri superficiem, certum est; quod eo contingit citius, quo fortiori igni exponitur; verum quousque ignis gradus augeri queant, & qualem tum habituri essent potentiam, nos adhuc latet; omnium enim maximus, nobis cognitus, est, dum silices, aut metalla &c. in vitrum rediguntur, quod imprimis contingit in foco Villettiano, si fortissimus Tschirnhausianus opposito occurso directus in primum irruat.

§. 204. **U**t autem hydrargyri habitudo ad ignem clarius pate-  
scat, experimenta sequentia occurrunt considerata: argentum vivum per metalla accurate depuratum, hinc nativo liquidi-  
us, in vase puro flamma accensa lampadis idoneo tempore

O 3

di-

( $x$ ) Saggi di Nat. Sper. pag. 178. seqq. ( $y$ ) Transact. Abridg'd T. II. p. 34. ( $z$ ) Tentam. Experim. in Acad. del Ciment. P. II. Exp. 9. p. 11. ( $a$ ) Hist. fluid. & firm. p. 40. ( $b$ ) Boërh. Elem. Chem. T. I. P. 2. p. 263.

digestum, fit pulvis niger, albus, ruber, pondere auctus quodammodo in hac operatione (c). Ignis lenis sensim auctus argentum vivum in phiala vitrea longo temporis spatio transmutat in pulverem utcunque fixum varii coloris, vix ulli liquori miscibilem. Si vero statim a principio illi adhibetur ignis magnus, tum illico totum avolat; rursumque si adhibetur subito ignis ingens ad hoc argentum vivum jam fixatum, lento & per gradus aucto igne, tum totum iterum volatile fit, ut ita ignis uno gradu destruat, quod ipse consecerat altero. Mercurius ope metallorum arte singulari depuratissimus, longa dein ignis applicatione digestus in phiala vitrea, in pulverem fixatum, & aliquam particulam metalli boni vertitur, antiquo interim pondere aucto (d).

§. 205. **D**e digestionem autem hydrargyri, indeque sequente mutatione in pulverem, varii meminerunt Authores. Becherus ait: *tendit omnis mercurius ad statum sulphureitatis, quod ex sola digestionem mercurii communis videmus, qui sine ulla alia materia vel re, per se in pulverem praecipitatur siccissimum* (e). Hoffmannus inquit: *mercurius vivus solo aethereo sale, sine ullius rei additione, igne chemico praecipitatur in corpus rubicundissimum, durum* (f). Geoffroy dicit: *hydrargyrum in vas vitreum infernale, ut ajunt, inclusum, in arena digeratur igne gradatim aucto, in pulverem cinereum primo convertitur, qui paullatim rubicundissimus evadit* (g). Neumannus idem fere affirmat, & modum sequentem praescribit: mercurius vivus optime purificatus, q. v. immittatur phialae, cujus orificium leviter obturetur, digeratur in arena lento igne per plures septimanas, sic ut gradus ignis proportionem temporis sensim augeatur, hoc modo totus tandem in calcem rubicundam transibit mercurius; illa vero calx fixa non est, nisi forte minima illius pars, quae aliqualem fixitatem prae se ferre videtur (h).

§. 206. **C**l. Hombergius, qui pulcherrima instituit hujus rei experimenta, perhibet, mercurium per longam digestionem non interruptam in vase clauso, mutari in corpus firmum, al-

(c) Id. ibid. pag. 193. (d) Idem ibid. pag. 218. (e) Phys. subst. Suppl. II. p. 391.

(f) F. Hoffm. Op. omn. Suppl. I. P. II. pag. 138. (g) Mat. Med. T. I. C. 2. p. 91. (h) Neum. Chym. Med. T. I. P. III. p. 489.



album, vel rubicundum, pro lubitu artificis, multo gravius, ac fixius mercurio prius currente; quod si teratur, & cum novo mercurio amalgametur, iterum digestioni diuturnae, sed validiori exponatur, sic aliquoties procedendo mercurium tandem mutari in pulverem rubicundissimum, & fixum, igni sat valide, ultra 24. horas resistentem; qui si tandem igne aperto violentiori tractetur, partim in fumum, mercuriumve: partim in metallum abit, nullo consueto ignis gradu mutabile, nisi foco Villettiano exponatur, quo in materiam terrestrem, levem, porosam fatiscit. Effectus hos adscribit materiae lucis, quae sensim intimius penetrat, partemque mercurii in metallum mutat (*i*). Neumannus phaenomeni hujus rationem paullo aliter refert, ait nempe, ignem penetrare in poros mercurii, illiusque globulos pro varia horum resistentia, diversimode dilatare; unde figuram earum sphaericam necessario in aliam mutari, arctioremque harum particularum nexum inter se produci; sic mercurium de se fluidum solidescere, & in calcem abire debere (*k*).

§. 207. **D**emum & Stahl's exprobanda est sententia, inquietis: Mercurii vivi, sale & aceto ab omni nigredine loti, cum calce viva semel, iterumque destillati, in patella figulina, aut crucibulo ad levem fumigationem calefacti, q. v. immitte phialae, quam hermetice claude: tum per integrum annum, & ultra, leni continuo arenae igne digere, donec in vitri fundo pulveris rubri facie semifixi jaceat; inde possibile videri dicit, ulteriori continuatione in majorem, & denique plenariam fixitatem eum reduci posse, neque tamen exinde clariorem essentiae mercurii cognitionem hauriri: minus, tali digestionem omnino denique fixatum mercurium, aurum futurum judicat, sed probabiliorem Becheri amplectitur sententiam, mercurium nempe, seu aquam metallicam a sulphure, seu igne metallico, non materialiter differre, sed potius ejusdem cum hoc substantiae esse, & sola coctione ab eo discrepare; si itaque ulteriori continuata digestionem atomi mercuriales arctius densentur, improbable non esse, ex hac combinatione condensatoria  
fixius

(*i*) Mem. Acad. R. Sc. 1705. pag. 88. seqq. & 1706. p. 260. seqq. (*k*) Neum. Chym. Med. T. I. P. I. p. 317.

fixius concretum, & tenacius, itaque novum mixtum productum iri; quod & aliae in diversis subiectis magis superficiales combinationes, digestionem in aliam consistentiam, atque constantiam commutatae, confirmare videntur, idque ex doctrina fermentationis patere innuit; notat simul, quod, si huic novo producto nova mercurii vivi portio addatur, ea longe citius in eandem substantiam, & fixitatem transitura sit, quam si sola digestionem exponatur (1).

§. 208. **O**bservari hic de hydrargyro velim, quod, licet omni cura, & arte purgatum sit, per longam trituram, imo & solo concussu agitatum diu, mutetur in pulverem mollem, cinereum, vel nigrum, ponderosum, tenuissimum, acrem, penetrantem, vi medicata ad ulcus quodcunque cacoëthes, & carcinomatofum, ditissimum, observante Boërhaavio; cujus pulcherrima experimenta nonnulla, Regia Societas Londinensis actis inseruit suis, quae reliquis Magni Viri operibus, Venetiis Anno 1742. recensis, annexa habentur. Infunditur nempe hydrargyrum optime depuratum in lagenam vitream fortem, quae orificio optime subere ac caemento clauso, bene munita, in cistellam ligneam rite adaptatam inditur, & ita firmatur, fursuribusque circumdatur, ut intra cistellam vitrum hoc plane immobile haereat. Totus hic apparatus affigitur ad caudicem tundentem molendini fullonarii, noctes diesque mobilis, modo spiret ventus; sic hydrargyrum intra arctos hosce carceres vitri quassationi perpetuae expositum ultra octo menses, sine ullius alterius rei additamento, magnam partem mutatur in pollinem molliissimum, nigerrimum, copiosum, tenuissimum, saporis acris, metallici, saporem aeris utcunque referentis; manet idem pondus, mercurius residuus per alutam transprimi, ac pulvis in aluta remanens separari potest. Quo purius vero est hydrargyrum, eo facilius in talem pulverem convertitur. Boerhaavius ex unciiis 16. mercurii venalis vix  $\frac{1}{2} \frac{1}{8}$ : id est, drachmam unam, grana novem circiter; ex unciiis vero duabus, sexagies & semel destillati mercurii, agilissimi, nitentis, drachmas duas cum granis 26, eadem operatione obtinuit; an mercurius pauciore copia sic agita-

tus

(1) Stahl. Fund. Chym. p. 130



tus facilius in talem abit pollinem? ex hoc vero patet, pulverem hunc non esse faecem mercurii, inde per ignem separabilem (*m*): sed potius a materia lucis subtilissima, omnia permeante, mercurio quasi irretita, & continua agitatione aliquatenus fixata, ac cum eo subacta, productus esse videtur, non secus fere, ac in confectione aethiopis mineralis mercurius tritura cum sulphure in pulverem nigrum mutatur. Probabile quoque est, a substantia vitri ipsius aliquid deteri per diuturnum hunc affrictum; etenim & aquae guttula, saepe cadendo, lapidem cavat.

§. 209. **P**ulvis hic, §. 208, majorem ignis gradum sustinere valet, quam ipse mercurius vivus, atque si calcinatione exploratur, varios & miros pedetentim colores exhibet, potest dissolvi variis menstruis, quin & igne validiore, in merum vivum argentum reduci. Boerhaavius drachmas duas, & grana 26. urfit igne valido aperto, in retorta pura vitrea, ut postremo retorta duabus horis canderet; invenit in excipulo drachmas duas cum granis totidem argenti vivi purissimi, insipidi, splendentis; adhaesit lateribus vitri hinc inde aliquantulum mercurii, quod accurate colligi non potuit, in fundo autem retortae paucillum fixi remansit maculae parvae instar modo visibilis (*n*); fors materia a vitro detrita fuit; reliqua enim luminosa materia a validiore ignis agitatione iterum in auras abiit, ut in experimento §. 129. demonstratum est, atque ita pristinam recepit mercurius formam.

§. 210. **H**ydargyrum in cucurbitis vitreis conicis, fundo plano instructis, phiala vitrea chemica inversa clausis, igni centum octoginta graduum per plures menses expositum, dat pulverem nigrum, similem omni dote priori; ex quo sequitur, ignem, & quassationem idem agere in mercurium hoc in gradu (*o*). Haec, & similia experimenta incredibili labore, ac industria perfecit Cel. Boerhaavius, quorum nonnulla Actis Parisinis inserta sunt (*p*), digna profecto, ut ex Gallico traducta idiomate hic coram fistantur.

**P**

§. 211.

(*m*) Boerh. El. Chem. T.I. Part. 2. p. 350. seqq. (*n*) Idem in Op. omn. Med. pag. 431. seqq. Venet. 1742. (*o*) Idem ibid. pag. 432. (*p*) Mem. Acad. R. Sc. 1734. p. 539. seqq.

§. 211. **S**umfit hydrargyrum, quale apud mercatores Amstelodamenses venale prostat, quod destillatum ex retorta nec minimum reliquit faecum; cum aceto destillato, & sale marino commixtum, diuque agitatum, purum mansit. Hujus hydrargyri per alutam prius transpressi libram unam indidit cucurbitae purae, cujus collum sat longum erat, hujus orificium charta in conum convoluta obturavit, aliamque super impositam collo alligavit ita, ut pulvis nullatenus penetrare, aër vero libere ingredi, & egredi posset. Cucurbitam hanc sic munitam in furno calori exposuit, ultra centesimum caloris gradum thermometri Fahrenheitiani, continuo adhibendo a 15<sup>ta</sup> Novembris Anno 1718. ad 23<sup>tiam</sup> Maji 1734, id est: annis quindecim, mensibus sex, & diebus octo. Examinans post haec mercurium in cucurbita, fluidum invenit, & in ejus superficie parum pulveris nigri, qui in mortario tritus in mercurium currentem reviviscebatur. Totum hunc mercurium dein in retorta vitrea pura, destillationi commisit, circa finem ita ignem augendo, ut retorta fere canderet, in qua ne minimum quidem remansit, sed mercurius totus in vas recipiens transiit, sine ulla mutatione sensibili.

§. 212. **A**deoque in hac operatione mercurius aequè fluidus, aequè volatilis, sine ulla separatione puri ab impuro, in sua natura permansit, nulla sui parte in metallum ullum commutatus; *hinc evanescit eorum opinio, inquit vir Celeb. qui credunt metalla fieri ex mercurio currente, & sulphure fixante per digestionem unitis; cum nec verosimile videatur, mercurium in mineris in metalla figi posse, per solam actionem caloris subterranei diuturni, raro ultra gradum septuagesimum ibidem observari, ubi aëris accessus liber est; sulphur autem, quod plurimi Alchymistarum pro principio, metallorum elementa conjungente in corpus solidum, malleabile, fixumque usque ad gradum fusionis, habent; non videtur esse materia eadem luminis & ignis, licet solum ignem putent medium esse unicum ad producendam miram illam unionem sulphuris & mercurii.* Haëtenus Boerhaavius: Verum de his jam supra, Sectione secunda, fusiùs actum est. Ne vero dubium remaneret, num in adducto, §. 211. experimento, liber aëris accessus ignis actionem,



coctionemve non impediverit, alterum instituit experimentum, quod probat, hydrargyrum eodem temporis spatio §. 211. etiam in vasis optime clausis digestum, nullatenus metallum fieri (9).

§. 213. **I**mmisit igitur denuo hydrargyrum purissimum in vitrum conicum, cujus fundus planus erat, orificium obturavit, exposuit calori centum graduum a 6ta Decembris 1732. usque ad 8. Julii 1733, id est: septem mensibus, & biduo; at etiam hic immutatus perstitit hydrargyrus, cujus dein uncias sex simili indidit vasi vitreo, in cujus orificium immisit collum phialae inversae, commissuris minime lutatis; postea exposuit per quatrimum igni arenae sat violento, ita, ut mercurius ascendere inciperet, eo consilio, ut omnis prorsus humiditas in eo forte delitescens expelleretur; tum commissuras horum duorum vasorum luto exactissime firmavit, & sic mercurium igni arenae satis valido exposuit, ita, ut is placide ascendere, ac descendere cogeretur; similem caloris gradum continuavit usque ad 29. Januarii 1734, seu mensibus septem ac diebus viginti, ac tum hydrargyrum in fundo vasis fluidum invenit, nigro leviter tectum pulvere subtilissimo, non fixo, nihil aderat praecipitati, licet gradus fere bullientis aquae semper fuerit adhibitus; hunc postea per chartam siccam in conum inversum convolutam trajecit, in cujus apice foramen fuit capilli crassitiem vix aequans; mercurius purus transiit, & pulvis niger separatus in charta remansit, qui tritus in mortario mercurius itidem fiebat; hunc ex retorta pura vitrea destillavit igne arenae sensim aucto, tandemque violento, nihil omnino fixi remansit in fundo retortae, mercurius ferme fluidior, ac fuerat antea, comparuit, caeterum non mutatus.

§. 214. **N**on contentus his Celeberrimus Author, hydrargyrum destillationibus saepissime iteratis, labore immenso torsit, visurus, quid inde futurum esset. Experimenta haec ex Actis Londinensibus desumpta, operibus ejus annexa habentur (r). Si enim hydrargyri purissimi unciae octodecim ex cornuta vitrea pura, igne

P 2

are-

(9) Ibid. p. 542. (r) Boerh. Op. omnia. Med. pag. 432. seqq.

arenæ in excipulum aqua purissima ad quatuor pollicum altitudinem repletum, eousque urgeantur, ut nihil remaneat in alvo vasis: absoluta destillatione ad limbum superficiei, qua steterat hydrargyrum in ventre retortae ante destillationem, manet annulus tenuis, fulgens, pulchre rutilus; si tunc hydrargyrum in aquam transgressum charta bibula siccet, ac purgetur, in eandem cornutam rursus indatur, ac destilletur, idemque labor saepius repetatur, ut Cel. Boerhaavius quingentis & decem vicibus repetiit, sensim singulis destillationibus nascitur aliquid pulveris rubri, splendentis, in retorta; is fixus, nec amplius eo ignis gradu volatilis, quo antea, redditur; saporis est acerrimi, horrendi, metallici, penetrabilis, veneni instar perturbans corpus, sursum, deorsumque purgans doloresque ciens. Mercurius vero, qui in vas recipiens destillat, fluidior semper, ac purior evadit.

§. 215. **T**aediofo hoc labore ex unciiis octodecim hydrargyri, ponderis Amstelodamensis obtinuit pulveris praedicti uncias duas, drachmam unam, grana 58, ita ut octava hydrargyri pars in pulverem hunc secederet; de reliquo mercurio, qui vividissimus, & nitidissimus remansit ad uncias decem, & drachmas aliquot, singulis destillationibus aliquid deperditum est, partim exspirando per gluten, & fissuras retortae (tot enim destillationibus rimas aliquoties egit) partim adhaerendo chartae bibulae, quoties post singulas destillationes ab omni sorde, ac nigredine mundatus est. Ex his manifestum fit, in vase clauso, per motum mechanicum, & parvum ignem, nigrum: per majorem vero, rubrum hydrargyro conciliari colorem.

§. 216. **P**ulvis ille ruber, hac operatione, §. 214, 215, productus, si immittatur in retortam vitream, mundam, crassa argillacea arena temperata, obductam, tum nudo igni imposita sensim per gradus urgeatur, donec retorta infra & supra igne obruta candeat penitus, sicque sex, septemve horas detineatur: transibit ita pro maxima parte mercurius revivificatus in excipulum; igne tamen tam magno aliquid forte dissipatur. Si autem hac operatione peracta, quaedam adhuc pulveris illius rubri pars in retorta  
in-



inveniatur, novo iterum igni exponi, eodemque modo urgeri debet, dum nil nisi paucillum pulveris fusci, levis, & fixi remaneat; sic toties adductus Cel. Author obtinuit ex unciis duabus, drachma una, ac granis 51. pulveris descripti unciam unam, & drachmas septem cum dimidia mercurii currentis purissimi; haesit aliquid in collo retortae, uti & in vase vitreo, ad retortae collum applicato; adeoque binae circiter drachmae dissipatae fuere de toto mercurio. In retortae fundo grana 15. pulveris fusci, subtilis, fixi, in tanto, tamque diuturno igne, remanserunt, & macula lata tenuissima, coloris pulcherrimi rubri, fundo retortae impressa, ac in vitrum quasi penetrans, inventa est. Elucescit igitur, mercurium solo igne verti in pulverem hunc §. 214; solo igne violentiore pristinae rursus formae restitui §. 204; mercurium purissimum, ac multo densiorem, quam antea §. 175, pro paucissima sui parte, nempe septuagesima secunda fere, fixam remanere in tanto ignis gradu, quo vitrum prope fundetur.

§. 217. **P**ulvis autem hic fixus §. 173, cum mercurio amplius non solvitur in amalgama, idem si crucibulo impositus igni aperto ante follem exponatur, ac vis ignis eo intendatur, ut totum crucibulum penitus ignescat, sicque detineatur per quadrantem horae, pulvis ille manet in fluido fixus quidem, sed spongiae instar tumefactus, & fuscus; cui si portionem boracis addas, ignemque folle urgeas, fit massa friabilis, vitrescens, in magno hoc igne fixa. Idem pulvis, vel purus, vel cum borace in massam friabilem dictam mutatus, si per docimasiam, lege artis, cum plumbo examinatur, nihil omnino fixi remanet, adeoque nihil auri, argentine. Ex quibus concluditur denique, hydrargyrum in natura sua per motum mechanicum, digestiones, destillationes descriptas §. 208-216, manere immutabile, neque his modis umquam figi, aut in aliud corpus transmutari posse.

§. 218. **S**imilem fere operationem instituisse videtur Boyle; *si enim, ait: aliquot uncias hydrargyri vasi vitreo immiseris, & vas illud prius accurate occluseris, idque per sex, octo, vel decem septimanas, vel diutius in furno arenae, calore forti, & constanti*

*instructo detinueris; corpuscula argentum vivum constituentia, post innumeras revolutiones, & forte inflexiones, implicationes, aliasque mutationes, ita sibi invicem connectentur, ut fluidi corporis loco, in rubentis pulveris forma appareat; quam mutationem sine exemplo esse dicit, ut multi Physiologi ad fidem ei habendam non facile adducantur; quos ut de ejus possibilitate convincat, aliam prae-parationem docet minus taediosam: Argenti vivi libra, si ex retorta vitrea, igne forti destilletur, plerumque in vasis fundo, & circa ejus latera parum rubri pulveris remanebit, quod nil nisi pars fluidi corporis, maxime ignis actioni exposita, in siccum corpus, octo, vel decem horis, ut existimat, immutatur. Sequentibus item sectionibus dicit: se nescire, qua ratione ignis miram adeo mutationem in argento vivo producat; verum tamen esse, partes hujus liquoris in suis duntaxat superficiebus se invicem tangere, ipsas tamen habere quamdam viscositatem, seu levidensem aliquam complicationem; at per crebras ab igne natas earum evolutiones tandem ita sibi mutuo applicari, ut vel sibi invicem quasi infibulentur, vel super suas invicem superficies labantur, ut alterae alteras tangant, quantum ad ipsarum cohaesionem procurandam requiritur (s).*

§. 219. **P**raecipitatum autem hoc mercuriale, dicit idem loco citato, microscopio optimo dum inspicitur, nil ibi detegi, nisi quod rubens pulvis multa contineat corpuscula diversis aliis coloribus imbuta: minuta pulveris granula nullius esse figurae determinatae, sed gracilia rubrorum coralliorum fragmenta exhibere. Dum autem aliquid minuti pulveris ex nitenti praecipitato auri & mercurii, eidem microscopio supposuit, hoc solum dignoscere potuit, parva granula hujus praecipitati, ex solo mercurio facti, in eo differre, quod adeo pellucerent, ut quis plane crederet, se praestantissimum istarum gemmarum genus, quas *granata* aurifabri appellant, conspiciere. Et alibi (t) de eodem praecipitato dicit: parva granula hujus praecipitati, etiam a nudo oculo in distantia aliqua, parvulorum corallii fragmentorum ad instar, apparuisse; proxime enim corallia interdum, si bonae sint notae, trans-

(s) Boyle Hist. fluid. & firmit. pag. 77. Sect. 51. seqq. (t) Idem Hist. Experim. de color. pag. 27.



transparentiam quamdam habere; ex quibus patere arguit (u), argentum vivum aliaque fluida corpora ex plurimis corpusculis duris constare, si quidem texturae eorum, mutatione spoliari fluore suo, & stabilia; iterumque in minima divisa, fluida reddi possunt. Quid autem certa quaedam genera commotionis, ac dissociationis partium corporis ad colorum mutationem conferant: alibi narrat (x), dicens: *non modo liquet in alterationibus coloris observandis in argento vivo, nonnullisque aliis concretis, quae diu a Chemicis in convenienti calore, in clausis licet vasis detinentur: sed etiam in obviis degenerationibus colorum, quos quivis potest in contusis cerasis, aliisque fructibus animadvertere, colorem laesae cum colore sanae partis ejusdem fructus postea comparando.* Denique & advertere juvat, Kunckelium in Laboratorio suo Chymico, ubi de simili praecipitatione hydrargyri loquitur, asserere: pulverem illum rubrum nequam fixum esse, sed aceto, & sale tartari, vel & destillatione, mox reviviscere (y).

§. 220. **A**d miratione dignum est, siquidem veritate nititur, quod Digbeus adnotavit; hydrargyrum nempe in destillatione primo instar fumi elevari, posteaque in vas recipiens, forma globulorum collectum transire. Si autem parum mercurii vel in alembico, vel collo retortae in loculum adaptatum collocetur, omnem mercurium, in vaporem actum, ibi colligi, nec minimum ejus in vas recipiens transiturum esse (z). Notabilis quoque est hydrargyri destillatio in aquam inspidam per se, violento igne debitis in vasis peragenda, qua de re plures Authores meminere; sic Stahlius operationem hanc ex Basilio Valentino, & Kerckringio notat (a), quae peragitur in retorta tubulata, candefacta in inferiore parte, cui applicantur sex, aut octo, aut plura recipientia capacia, quorum singulorum rostrum in alterius ventrem insertum sit; aptato ita instrumento, hydrargyrum parvis portionibus, drachmae semis, aut unius, per tubulum, citissime occludendum, in candens destillatorium immissum violento ignis motu minu-

(u) Id. Hist. fluid. & firmit. Sect. 54. pag. 79. (x) Id. Hist. Experiment. color. pag. 23.

(y) Kunckel Laborat. Chym. P. 3. Cap. 6. pag. 227. (z) Kenelmi Digbei Eröffnung unterschiedlicher Heimlichkeiten der Natur pag. 56. (a) Stahl. Fund. Chym. p. 131.

nutissime statim disjicitur, & cum impetu in vasa recipientia, tenuis fumi instar, delabitur, & magna parte in aquam limpidam convertitur. Licet autem hac operatione aqueam substantiam exacte referat: si tamen haec aqua lento calore balnei maris, vel arenae intensiore destilletur, denuo in fundo destillatorii magna ex parte in pristinam currentem formam redit, quod repetita opera toti huic aquae accidit.

§. 221. **S**imilem fere hydrargyri in aquam conversionem describit Digbeus, destillando nempe mercurium ex retorta, mox violento igne, in vas recipiens magnum; sic tantillum aquosae substantiae in recipiente colligitur, cujus sufficiens quantitas repetito labore, & novo adhibito mercurio, obtinetur (*b*). Sic & Boyle testatur, ex quodam mercurio (nam non in omni ita feliciter succedit) nulla facta additione, certo quodam tractandi artificio, quintam, vel quartam limpidi liquoris partem separatam fuisse, qui a vulgari Peripatetico pro aqua haberetur, & quem vulgaris Chymicus phlegma vocare non dubitaret, qui in mercurium reduci nequit, proindeque larvae modum excedit. Ad majorem hujus confirmationem adnectit amicorum quorundam asseverationem, qui profitebantur, se argenti vivi libram fere totam in aquam redegissee sine ulla alterius rei additione, mercurium duntaxat igne perite, in vasis de industria eum in finem excogitatis urgentes. Illam tamen aquam ad philosophicam super auro operationem peragendam sine successu adhibitam fuisse; unde ignem aequae interdum alterare corpora, ac dividere posse: ejusque ope a mixto corpore obtineri, quod in ipso non praeexistebat (*c*). Et alibi celebrès quosdam Spagyricos, ipsumque Raymundum Lullum asserere ait: solo igne posse mercurium in commodis vasis, magna saltem ex parte, in liquorem aquae instar tenuem, cum eaque miscibilem, reduci, adeo, ut nuda ignis actione possibile sit mixti corporis partes ita secundum novos, differentesque modos disponi, ut modo hanc, modo illam habeant consistentiam, possintque in hoc statu ad miscibilitatem cum aqua disponi, in illo non item (*d*).  
Ite-

(*b*) Digbeus Experim. Chym. pag. 149 - 151. (*c*) Boyl. Chymist. Scept. p. 46. seqq.  
(*d*) Idem ibid. pag. 8.



Iterumque alibi ex Lulli autoptae testimonio adducit: liquorem illum interdum valde languidum, si ullum, saporem habere: ejus tamen operationes etiam in quaedam corpora mineralia admodum esse peculiares, mercuriumque ipsum, licet particulis minutissimis, auri poros penetrantibus constet, insipidum esse (e). Qua de re Kunckelius quoque memorabilem refert historiam (f).

§. 222. **E**x productione hujus aquei liquoris probare nititur Cel. Hoffmannus, hydrargyrum constare effluviis subtilissimis, aethereis, particulisque metallicis specificis saturatum esse. §. 98. *Alit enim mercurius, inquit, magnetismum quemdam, qui dependet a particulis aethereis in mercurio eminentibus, quae caloris & ignis impetu in motum astantur, novumque aetherem cum matrice sua aquea attrahunt; pari modo, ut spiritus nitri summe aethereus, volatilis, metallicis moleculis adjunctus, vel & alkalinis, ut cretae, admixtus, continuo abit in deliquium, copiosasque allicit particulas aethereas, ac lucidas, quae, si mixtura rite tractetur, satis conspicuae, Phosphorum constituunt Balduini (g).* Sic & Ludovicus de Comitibus tradit, mercurium vulgi, per spiritum mundi aëreum per sympathiam solvi (h). Cel. Hales autem de hac aquae ex hydrargyro productione judicat: aquam illam vi ignis, partim ex ipsis lateribus vasis destillatorii, partim ex ipso luto, quo excipuli orificium collo retortae agglutinatur, expelli (i). Pott opinatur, ad methodum illam mercurium in aquam convertendi, clavem quamdam, adhuc incognitam, requiri pro absolvendo hoc labore; atque ex Authore Disquisitionis Helianae in Theatrum Chymicum, memorat: facillime mercurium, carbonum tritorum beneficio, per ignem, in liquorem reduci, qui certo artificio postea soli animam extrahat (k).

§. 223. **D**enum & Agricola in Poppium, experimenti hujus modum paullo aliter proponit: *Hydrargyri portionem in cucurbitam mitte, cui quantitatem arenae fluviatilis optime siccatae injice,*  
Q
len-

(e) Idem ibid. p. 133. (f) Labor. Chym. p. 216. seq. (g) Fr. Hoffm. Op. omn. Suppl. I. P. 2. pag. 129. (h) Tract. de Metall. p. 225. (i) Statique des Végétaux, Experim. 79. p. 172. (k) Pott Exercit. Chym. de sulph. metall. p. 26.

*lento igne destilla, sic mercurius maximam partem aquae forma transillabit (l).* Cassius refert, se apud amicum suum vidisse vitrum mercurio pellucido plenum, instar liquoris diaphani, summe ponderosi, in quo aurum, velut glacies in aqua calida, solvebatur, & sub obscura aliquantum forma subsidebat, liquore interim nullum notabilem colorem fuscipiente (m). Becherus asserit, se modum novisse spiritu salino mercurium vulgarem augmentandi, & saepe augmentatum in diaphanum, humidum corpus, pondere tamen mercurio aequali, redigendi, sed quod tamen in mercurium currentem reduci nullo alio modo possit, nisi addito metallo puro, quod, cum liquore hoc humido unitum, liquorem siccum denuo constituat (n). Cui & Junckerus suffragatur (o).

§. 224. **Q**uid hydrargyro fiat, dum foco lentis causticae majoris exponitur, dictum est §. 161. mox nempe totum in uberrimos fumorum rivos diffunditur. At idem prorsus contingit, dum prunis candentibus superinjicitur. Quod si prius in calcem redigatur, ac postea supra tegulam eidem foco exponatur, in materiam vitrescentem colliquescit, quae in fumos citissime abit, relicto pauco pulvere subtilissimo fusco, qui in vitrum fuscum, subflavum tandem convertitur. Eadem autem calx carbonibus imposita sub foco lentis, mox fumum spargit copiosum, atque colliquescendo se unit in globulos minimos mercuriales, qui illico in fumum ascendunt, teste Geoffroy (p).

### C A P U T III.

#### *De Hydrargyri habitu ad aërem.*

§. 225. **H**ydargyro aërem subtilissimum in minima divisum inesse, docent bullulae aëreae tam in ebullitione ad ignem, quam in vacuo Boyleano, sub recipiente, cum antlia pneumatica, prodeuntes §. 168. 169. Aërem tamen crassiores inde

ex-

(l) Agricola in Popp. P. I. p. 150. Norimberg. 1686. (m) Juncker Consp. Chem. T. I. Tab. 39. p. 1004. (n) Becher Phys. subtl. in Experim. de miner. aren. perpet. p. 456. (o) Consp. Chem. T. I. Tab. 39. pag. 1004. (p) Mem. Ac. R. Sc. 1709. p. 174. seq.



excludi, §. 170, 193. dictum est; minimae nimirum particulae aëris, quae in globulorum mercurialium interstitiis latent, ea replent, aëremque communem excludunt, quamdiu mercurius vi atmosphaerae compressus, illas retinet; si autem haec pressio quocunque modo tollatur, ut ita particulae mercurii minori nisu inter se compingantur, aëreae particulae mox elevant incumbentem molem mercurii, atque ex interstitiis ejus se expediunt, ubi quietae latebant: idque contingit citius, si calor concurrat, qui facit, ut aër tanto facilius se extricet. Talis autem aërea particula e loculo suo excussa, dum sui similem penitus contingit, & cum ea adunatur, mox ambae mutuo se se repellunt, bullulamque formant, binis talibus constantem particulis, quae dum ex fundo per reliqua interstitia mercurii sursum ascendit, similibus solitariis particulis excussis in itinere jungitur, crescit, &, tendendo ad superficiem mercurii, semper eo majorem bullam format, quo superficiei fit propior, minusque premitur (q).

§. 226. **Q**uamdiu autem illae particulae aëreae in interstitiis globulorum latent, nulla arte plus aëris in mercurium induci potest, partim quod interstitia illo jam repleta sunt: partim quia particulae aëris circumfluentis ita inter se cohaerent, ut non facile in minima se dividi patiantur, sed bullas prius satis amplas requirant, quam se corpori alicui insinuent; quod experimentis omni exceptione majoribus comprobavit Cel. Boerhaavius (r). Hinc & mercurius in tubo Torricelliano suspensus nil aëris transmittit intra vacuum superius relictum, ad quod replendum tanta vi aër in superficiem ejus nititur, qui, licet ad ultimam densitatem possibilem, quae est decima sexta pars totius, reduceretur, non tamen transfudat per vitrum, nec per mercurii meatus transit; quod si aër sic densatus igne incalescat, incumbens mercurii pondus elevabit quidem, nec sic tamen per mercurium, vitrumve penetrabit (s). Quae omnia etiam Cl. Mariotte demonstravit (t). Si autem particulae illae aëreae, quae solitariae in ejus poris se-

Q 2

pa-

(q) Boerhaav. Elem. Chem. T. I. P. 2. p. 288. (r) Ibid. p. 237. seq. (s) Idem ibid. pag. 240. seqq. (t) Oeuvres de Mariotte de l' Acad. Roy. T. I. p. 151. seqq. à la Haye 1740.

paratae haerent, integre, quod tamen difficulter fit, inde foveantur, mercurius in tubis barometricis, ex observatione Hugonii, mirabiliter ad quinquaginta pollices, & ultra, suspensus haeret (u): at si tum aër denuo accedat, protinus illius poros penetrat, eademque tenaciter inhaerens, interstitia, ut antehac, occupat.

§. 227. **H**ydrgyrum ab aëre fluido, gravi, elastico, globo nostro terraqueo undique incumbente, premitur eo magis, quo aër est densior; eo autem est densior, quo profundior; densitas enim illius est in ratione ponderum comprimentium: ratione autem suae densitatis & calor validius in eum agit, unde fortius se expandit, & rarefcit; aër enim a minima mutatione caloris illico expanditur, & a frigore mox densatur, adeoque reciproce oscillat; hinc ejus variatio, agitatio, ponderis mutatio afflicta; unde & hydrgyrum tanquam corpus mobilissimum, fluidum, dum tubo includitur vitreo, ab impresso aëris motu ascendit, descendit, perpetuo movetur (x). Ideoque gravitati, & ponderi aëris explorando aptissimum est, utpote quod, simul ob suam gravitatem, ac densitatem, commodiorem operationem suppeditat ad excitandum in minore longitudine vacuum, quam ope cujuslibet alterius fluidi fieri posset.

§. 228. **S**i enim tubus vitreus, quatuor pedes longus, superius hermetice clausus, mercurio repleatur, & inferius alii mercurio, vasculo adaptato contento, immergatur, ac deinde mercurius tubo contentus a pondere aëris in superficiem mercurii in vasculo contenti prementis sustentetur; ita, ut mox vi gravitatis propriae descendendo, se restituat ad aequilibrium aëris prementis ad altitudinem viginti septem pollicum cum dimidio, dum columnae aëreae basis, quae a superficie mercurii in vasculo stagnantis, usque ad extremitatem atmosphaerae exporrigitur, exacte respondet basi columnae mercurialis; hinc, crescente pondere aëris quacunque de causa, crescit quoque altitudo columnae mercurialis, dum a pressu aëris magis elevatur, imprimis si nullus aër in superiori tubo con-

ten-

(u) Boerh. El. Chym. T.I. pag. 238. (x) Ibid. p. 288.



tentus resistat, cujus alias inclusi elater solus aequatur differentiae ponderis mercurii suspensi; quod incrementum exacte observatur, si tubo adaptatur charta, in qua pollices, partesque minores exacte delineatae habentur.

§. 229. **B**arometri hujus inventor fuit Torricellius, Mathematicus Magni Hetruriae Ducis, & Galilaei Successor, anno 1643, indeque istiusmodi tubi *Torricelliani* audiunt; quod is omnium primus aëris gravitatem definire sit ausus. Merfennus, id intelligens, mox anno sequenti evulgavit novum hoc experimentum, hunc Paschalius, & Petitus excepere Rothomagi in Normannia 1647. Post hos Perierius experimentum in summo Arverniae monte, Puy de Dome indigenis nuncupato, instituens, observavit, mercurium in profundiori atmosphaera altius haerere in tubo, quam in summitate montis, ubi columna aërea est brevior (y). Haec dein Anno 1655. Otto Guerickius pluribus pulcherrimis inventis illustravit in Germania; tandemque Angliae suae fidus Robertus Boyle perpolivit, perfecit, quem aequis passibus Mariotte secutus est (z), alique §. 195. memorati.

§. 230. **S**ummum autem aëris pondus, post tot iterata experimenta, compertum est in Tubo Torricelliano esse  $30\frac{1}{2}$ : minimum vero  $27\frac{1}{2}$  pollicis, adeo, ut differentia sit fere decima pars totius (a). Hujus diversae gravitatis causae variae sunt, nempe meteora, venti, calor, frigus, tempestates multiplices, loca vel altius, vel profundius sita, &c: de his Kruquii Tabulae meteorologicae consuli merentur.

§. 231. **C**um autem hydrargyri pondus ad aquam pluviam fere sit ut 14 ad 1, aqua haec vero ad aërem communem tempore ponderis medii atmosphaerae, & in calore anni totius medio, in ratione ut 1 ad 800 (b), sequitur, mercurium ad aërem esse, fere ut 11200 ad 1; vel, secundum Cl. Wolfium

Q 3

fium

(y) Traité anonyme de Barom. Therm. &c. pag. 9. seqq. (z) Boerh. El. Ch. T. I. P. 2. pag. 232. (a) Id. ibid. pag. 233. (b) Musschenbroeck Inst. Phys. de aëre §. 1341. pag. 571.

fiunt hydrargyri pondus est ad aquam ut  $13\frac{1}{2}$  ad 1, aquae vero ad aërem ut 846 ad 1, ergo pondus hydrargyri ad aërem ut 11280 ad 1. Unde supponendo aërem ubique esse ejusdem densitatis, atmosphaerae proximae instar, 11280 altior foret columna aërea, quam mercurii, cum quo aequilibratur (c).

§. 232. **H**ydrgyrum aërem inficit, & ab eo vicissim inficitur; licet enim mercurius anno integro, aëri libero, vel & radiis solis expositus, non exhalet, nec quidquam de pondere suo perdat, uti Mariotte tentavit (d), neque mercatores, qui illum quotidie transfundendo manibus tractant, & in tabernis, vasa hydrargyro repleta, saepe non obturata, aestate & hyeme, ad plures centenarios, imo quandoque in cameris foco accenso calefactis per plures annos servant, unquam inde offendantur, neque aurum ibi suspensum dealbetur, nisi immediatum cum eo fubeat contactum; si tamen majori gradui caloris, quam ducentesimo duodecimo, exponatur, jam volatile fit (e), eoque citius exhalat, quo calor magis increfcit, ac tum aër ab illo ita impraegnatur, ut metalla dum alluit, vel dealbet, vel fragilia reddat, & corpus humanum mire penetret, ac symptomata varia, saepe periculosa, excitet; eodem prorsus modo in antris subterraneis, uti metalla caetera, sic & hydrargyrum, a motu, & calore subterraneo, aut aliis causis §. 108, attenuatur, resolvitur, & in vaporem metallicolis nocivum elevatur.

§. 233. **Q**uod vero hydrargyrum vel solo aëris contactu infici possit, sequentia docent experimenta: Exponatur mercurii purissimi certa copia libero aëri in vase amplo, & aperto, elapsis aliquot diebus ejus superficies, prius nitida, & polita, pellicula quadam tenuissima obtecta apparebit, qua remota post dies aliquot alia rursus conspicietur, quae primo subtilissimae araneae telae similis, paulatim ad majorem perveniet consistentiam, quae microscopio examinata, speciem argenti, in folium tenuissimum

(c) Wolff Nutzliche Versuche P. I. p. 158. (d) Mariotte T. II. p. 331. (e) Wal-  
lerius Mineral. Class. 3. p. 282.



mum malleo diducti, refert. Iterum, si gutta hydrargyri purissimi & politissimi cadit ex altitudine pedali, vel sesquipedali, observatur plerumque in superficie tersa, & polita, post guttae delapsae immersionem, labes, seu macula quaedam, magis minusve sensibilis, manifesto indicio, guttam cadendo inquinari ab aëris impuritatibus (*f*). Insuper aër in se gerit omnia corporum dissolutorum genera, salina, sulphurea, &c. hinc fieri vix potest, quin sensim quaedam particulae applicentur, quae idoneae sunt ad illud corpus instar menstrui dissolvendum; ut itaque aër hoc respectu vice menstrui universalis fungi sit censendus; hinc plumbum in cerussam, cuprum in aeruginem, ferrum in ferruginem, suo motu, & contactu assiduo vertit, quae tum accedente vento in auras feruntur. Hydrargyro, ac nobilioribus metallis hoc quidem minus, ac difficilius accidit, quorum solventia salina, volatilia, acida, nitrosa, vel marina, in aëre vix haerent, nisi circa officinas Chymistarum (*g*).

## C A P U T IV.

### *De Hydrargyri habitu ad Aquam.*

§. 234. **M**ercurius ad aquam, seu corpus illud fluidum, inodorum, insipidum, pellucidum, excolor, congelabile, habet se ratione ponderis plerumque ut 14 ad 1. §. 231. ideoque huic injectus mox fundum petit, nec unquam cum ea misceri, dissolvique potest; attamen humiditatem aquae in se recipit non protinus secessuram, ob rationem §. 169. Quod si cum aqua fortiter per plures horas ebulliat, nec minimum sui ponderis amittit, nec a fundo vasis attollitur. Si autem in cucurbita, apposito alembico, tam diu coquatur, donec aqua omnis expulsa sit, hydrargyrum in fundo vasis ficcum remanet, sine ulla sui jactura, non tamen tunc aucto igne. Mercurius illico ascendit ad latera cucurbitae, & in capitellum, ut demonstravit Cel. Boerhaavius in  
ex-

(*f*) Bernoulli Op. omn. T. II. p. 338. seq. (*g*) Boerh. El. Ch. T. I. P. 2. p. 238.

experimentis, quae Actis Londinensibus inserta leguntur (*h*). Licet autem in aqua plane insolubile videatur, vim tamen ei communicat anthelminticam, antaphrodisiacam, & cosmeticam, teste Boyleo §. 199, Hoffmanno (*i*), aliisque.

§. 235. **A**n illa vis, quam aqua recipit per coctionem cum hydrargyro, pendet a salinis particulis in aqua latentibus, & illud pro parte solventibus? an a subtilissimo illo universalis haerente in poris aquae? an aqua a mercurio vim suscipit, uti vinum a vitro antimonii vim emeticam? certe pondus in neutro minuitur. An denique a subtilissimo illo principio fluidificante §. 140 seqq., subiecto nempe alkahest insipidi, mire penetrantis, cum aqua facile miscibilis §. 154?

§. 236. **M**emorabilis est proportio caloris aquam inter, & hydrargyrum, quam praesente Cel. Boerhaavio, Fahrenheit instituit (*k*). Sumsit nempe argentum vivum, & aquam, ejusdem exquisitae mensurae, sed caloris diversi, quae duo fluida dum ocysime pariter permiscebantur inter se, oriebatur ex hac miscela temperamentum aliquod, sed cum notabili differentia: nam si aqua erat calidior, quam mercurius, tunc semper erat temperatura, ex miscela hac nata, calidior, quam differentia dimidiata, quae expectabatur. Contra si mercurius erat calidior, exurgebat temperatio minus calida, quam esset dimidiata differentia; & semper talis deprehendebatur diversitas, ac si in priore casu fuisset facta permistio trium partium calidarum aquae cum duabus partibus frigidis: aut in posteriore tres partes aquae frigidae cum duabus calidae. Quod si sumas tres moles extensione aequales mercurii, & duas aquae: ac tum, alterutro calefacto, permistionem facias, nascetur temperatio respondens dimidiatae differentiae caloris in utroque.

§. 237. **H**yrargyrum purissimum, si, aqua affusa, diu teratur, salem praebere dicitur; si nempe selibrae hydrargyri

(*h*) In Op. omn. Med. p. 435. (*i*) Op. omn. T. I. P. 2. p. 198. & Suppl. I. P. 2. p. 197. (*k*) Boerh. El. Chem. T. I. P. 2. p. 145.



gyri affundantur aquae purae mensurae binae, terantur continuo diebus quatuordecim in vase adaptato, cavendo, ne quid incidat pulverum, aqua tum filtretur per chartam emporeticam, ac lento igne evaporet, hoc processu obtinetur sal ruber, qui, spiritu vini solutus, tincturam rubram exhibere dicitur (1). Quod si cum aqua diu conquassetur solummodo, in minimos quidem faceffit globulos, at brevi rursus coituos; si vero cum aqua longiore tempore agitetur: eandem turbidam reddit, pulveremque gryseum, nigrescentem dimittit.

## C A P U T V.

### *De Hydrargyri habitu ad metalla in genere.*

§. 238. **H**ydryrgyrum, corpus metallicum singulare, non tamen metallum verum, nec principium metallorum esse, dictum fuit §. 3. 105. 153.; pondere quoque a singulis metallis differre §. 176.; quod item e sequenti tabula ab Illust. Wolffio proposita (m) clarius elucescet.

Si pondus auri dividatur in partes	-	-	100
habebit hydrargyrum	-	-	71, $\frac{3}{7}$
Plumbum	-	-	60, $\frac{10}{19}$
Argentum	-	-	54, $\frac{22}{7}$
Cuprum	-	-	47, $\frac{7}{9}$
Ferrum	-	-	42, $\frac{2}{9}$
Stannum	-	-	38, $\frac{8}{9}$

§. 239. **I**dem tamen, metallis omnibus, ferro excepto, facile se jungit, cujus ratio videtur esse, quod metalla eodem fluidificante principio §. 142., gaudeant, plus, minus; quo enim illa graviora, molliora, malleabiliora, fusiliora, eo plus de illo principio participant, eoque hydrargyrum fortius attrahunt, & ab illo

R  
vi-

(1) C. de la Garaye Chym. Hydraul. pag. 232. (m) Nutzliche Versuche P. I. §. 191. pag. 518.

vicissim attrahuntur, quam alia, in quibus contrarium occurrit; quod arguitur ex metallis alias facile malleabilibus, quae, quamprimum principio inflammabili §. 124. eique adnexo mercuriali privantur, hydrargyrum amplius in se non recipiunt. Exilitas globulorum mercurialium hic porro considerata subit; illi enim, calore externo agitati, poros metallorum promte subeunt, eaque, motu gravitatis ita divellunt, ut (aëre, praesertim in corporum solvendorum interstitiis, rarefcente, ac elaterium recuperante) sub mole minima globulis hydrargyri innatent.

§. 240. **E**adem vero metalla, si partibus heterogeneis, arsenicilibus, salinis, terreis crassioribus penitissime mista sint, jam conjunctionem, & amalgamationem cum mercurio respuunt; docet id ferrum, & metalla imperfecta, uti regulus antimonii, &c. Idem accidit, si metalla salibus in calces reducta sunt, uti luna cornea, croci metallorum exusti, &c. vel si pingui quodam externe tantum spurcata, nec tum mercurium in se recipiunt, ob impeditum principiorum metalli cum hydrargyro immediatum contactum; unde hydrargyrum ad varia metalla vario modo se habere comperitur: quod ut clarius patefcat, habitudo haec singillatim examinanda est.

## C A P U T VI.

### *De Hydrargyri habitu ad aurum.*

§. 241. **A**urum, metallorum omnium purissimum, simplicissimum, fixissimum, ponderosissimum, cujus quantitas, pedem cubicum Parisinum mole aequans, ponderat uncias 21220 (n), colore, plus minus luteo, splendente gaudet; argento mollius, stanno & plumbo durius, vix sonorum, aut elasticum, admodum malleabile, ac ductile, ita, ut unicum ejus granum extendi queat in filum 500. ulnas longum (o), & computu facto,

(n) Mem. Acad. R. Sc. 1713. p. 206. (o) Cassius de auro, p. 77



Et o, spatium 651590. vicibus majus, quam antea, occupans (*p*); Artifices enim unicum illud granum intra pelles in bracteā extendunt, quae tenet 36. pollices quadratos cum dimidio, & 24. lineas quadratas (*q*). Tenacitate & cohaesione partium quoque reliqua longe superat metalla; namque filum aureum, sectione  $\frac{1}{16}$  pollicis rhenani, pondus 500. librarum fert, antequam rumpatur; igni commissum, quamprimum percanduit, in fluorem abit, facilius quidem cupro, & ferro, tardius vero reliquis metallis. Fluens colorem servat marinum, per longissimum tempus sine ullo sui detrimento; calorem omnium metallorum summum in se recipiens (*r*), ita ut uncia una bimestri spatio, in oculo furni vitrarii fusā, ne granum quidem amiserit (*s*). A foco Villettiano mox liquescit, fumat, calcinatur, tandemque vitrescit (*t*).

§. 242. Cum hoc hydrargyrum omnium lubentissime jungitur, facillime amalgamatur, illud penetrat, ejus compagem dissolvit; quando enim aurum purum, & malleabile, cui nihil heterogenei externe adhaeret, vel in foliola, vel in lamellas tenues, vel in granula minutissima reducitur, ac postea cum mercurii purissimi sufficiente quantitate aliquamdiu teritur, amalgama obtinetur; quod & citius contingit, si hydrargyri calefacti, auro prius candefacto, vel liquato, partes sex, vel plures, agitatione continua addantur, & misceantur. Alio quoque modo amalgama fit, si solutioni auri cum aqua regis dilutae, imponentur lamellae aeris politissimae: aurum praecipitabitur ad fundum, & ad aes; detineatur in calore, donec liquor non amplius turbetur ab aere immisso: concutiantur postea laminae aeris, ut aurum decidat omne ad fundum, effundatur liquor supernatans, & pulvis auri praecipitatus abluatur, exsiccet. Pulvis hic in mortario vitreo cum mercurio abit in amalgama, quod, plus hydrargyri miscendo, dilui poterit. Aut, fac ex auro, & argento per plumbum depuratis, ope bonae aquae fortis doctimaesticae separationem argenti; pulverem nigrum in fundo existen-

R 2

tem

(*p*) Waller. Mineral. p. 406. (*q*) Rieger Introd. ad not. rer. nat. T. I. P. 2. p. 1037. (*r*) Waller. Mineral. p. 407. (*s*) Boyle Chymist. Scept. p. 50. (*t*) Mem. Ac. Reg. Sc. 1707. pag. 30. seqq.

tem ablue, tum siccum, & calidum cum mercurio tere, & mox fiet amalgama album, quod refrigeratum durefcit, & additione mercurii dilui potest (*u*). Modus tamen omnium optimus, quem Rieger ex Boerhaavio describit (*x*), fequens eft: hydrargyrum affufum auro, in retorta ad dimidias per deftillationem evocatur, tum aurum, folo hujus ebullientis aestu diffolutum, abit in amalgama.

§. 243. **T**ale amalgama auri, argentine, phialae inditum, debito ignis gradu adhibito, in arborem exfurgit elegantiffimam, ramulis, coloribusque divitem, vitri lateribus adhaerentem (*y*). Hombergius hac fuper re varia inftituit experimenta, ex quibus fequens huc omnino pertinet: Ex auri, vel argenti uncia una, & hydrargyri unciis decem, fac amalgama, quod faepius aqua ablutum, ac ficcatum immitte in retortam, digere in arena per duos, aut plures dies, igne leni, ne mercurius expellatur; & quo haec digestio durabit diutius, eo metallica haec vegetatio perfectior evadet; tum demum fortiore igne mercurium omnem in vas recipiens expelle, & remanebit aurum, aut argentum, molle, flexile, pulcherrimi coloris, arbufcularum variarum, variaequae altitudinis figuram repraefentans; hae arbufculae dein ex retorta eximi, a massa reliqua adhaerente feperari, candefieri, & confervari poffunt. Notat infuper Hombergius, quod, fi initio, quamdiu amalgama molle, ignis nimis fortis applicatur, particulae aureae, vel argenteae cum mercurio fimul eleventur, maculaeque aureas in retortae parte fuperiore exhibeant (*z*). Similis fere obtinetur vegetatio, fi vel aurum, vel argentum purum, vel horum amalgama fufficiente aquae regiae copia folvatur, folutio clara, aqua pura, plus minusve diluatur, ac tum amalgama auri vel argenti injiciatur, & in quiete relinquatur: brevi pulcherrimae generantur cryftalli, arbufculas fplendentes, metallicas, plures vel pauciores, ac diverfae magnitudinis, reprae-  
fen-

(*u*) Boerh. El. Chem. T. II. P. 3. pag. 317. feqq. (*x*) Rieger Introd. ad not. rer. nat. T. I. P. 2. p. 1079. (*y*) Fr. Hoffm. Op. omn. Suppl. I. P. II. pag. 197. (*z*) Mem. Acad. Reg. Sc. 1710. p. 426. feqq.



sentantes; citius, tardius, pro varietate amalgamatis, dilutionis, & acidi magis, vel minus concentrati (a).

§. 244. **S**i autem amalgama auri §. 242, diu digeratur, con-  
quassetur, teratur, (quo diutius, eo melius) ge-  
nerabitur inde plurimum pulveris insipidi, inodori, tenuis, ni-  
gerrimi (b): huic postea aquam puram adfunde, cum ea con-  
tere, aqua turbida, & nigra fiet, quam statim effunde, amal-  
gama cum aqua nova tere, fiet idem; repete laborem tamdiu,  
dum aqua pura perstat, nec tritu amplius turbetur, sic amalga-  
ma restabit purum, argenti instar, quod tamen, iterata digesti-  
one, motu novo, ac tritu, similem denuo generat pollinem.  
Talem autem pulverem omnia amalgamata sic tractata dare solent;  
plus, minus. Auri quidem amalgama minus. Pulvis hic exsic-  
catus nec metallum est, nec mercurius, neque terra, sed pro-  
ductum metallicum mirabile, in alterutro, vel utroque latens, ex  
unione intima mercurii cum metallo natum, cujus proprietates  
mirabiles admodum, teste Boerhaavio. Si de auro, & argento  
sic paratur magna copia, materies auri, vel argenti semper ea-  
dem perstat, pondere nec aucto nec minuto. Ibi ergo, dicit  
idem Author: pulvis ille de mercurio natus (c).

§. 245. **I**dem amalgama auri, si cum phlegmate aceti, vel aqua  
pura, continuo, diu teratur, pulvis similis §. 244.  
obtinetur. Si tunc liquidum illud decantetur, filtretur, postea  
leviter evaporetur, sal peculiaris obtinetur, referente Neumanno  
(d), & Junckero (e), qui etiam alibi asserit (f): ope phle-  
gmatis aceti non tantum plus illius pulveris obtineri: verum eti-  
am tale phlegma ex auro Tincturam viridescentem extrahere,  
quae in patulo vitro per aestatem relicta, exhalante sensim li-  
quore, in salem hinc inde subviridem abire debet; ex argento  
autem, eadem hac methodo, Tincturam flavam acquiri.

R 3

§. 246.

(a) Ibid. 1692. pag. 171. & Becher. Phys. Subt. p. 438. (b) Boerh. El. Chym. T. I. P. II. p. 351. (c) Ibid. T. II. P. III. p. 318. (d) Neumann Chym. Med. T. I. P. I. pag. 313. (e) Consp. Chem. T. I. Tab. 33. p. 865. (f) Ibid. Tab. 16. pag. 392.

§. 246. **I**dem auri amalgama §. 242., si validiori igne tractetur in vase aperto, mercurius in auras avolat; vel, si clauso vase res peragatur, ascendit, & colligitur in vase recipienti, metallumque in forma pulveris, seu calcis relinquit. Pulvis hic, liquefactione, facile pristinae redditur formae. Mercurius tamen ex metallis, vase clauso, penitus expelli nunquam potest; in aëre autem aperto totus aufugit; cavendum vero, ne a principio violentior adhibeatur ignis; tunc enim mercurius particulas metalli secum in auras rapit (g).

§. 247. **H**ydargyrum cum auro amalgamatum, debito ignis gradu diu digestum, abit primo in pulverem nigrum, dein rubrum, qui validissimo igne reducitur in mercurium currentem; in collo autem retortae aliquid sublimati rubentis haeret, observante Kunckelio. Si autem ab eodem amalgamate aperto igne mercurius evaporet, idemque labor debita encheiresi crebro iteretur: aurum & argentum tandem in pulverem irreducibilem, imo in vitrum migrare asseritur (h).

§. 248. **S**i vero cum auro saepissime subactum, centenis vicibus destilletur: levius fit, §. 175. aurum tamen exin prorsus immutatum remanere, pondere nec auctum nec minutum, Boerhaavius expertus est (i); Cujus laboriosissimum, pulcherrimumque tentamen Transactionibus Philosophicis insertum habetur (k): Sum sit nempe mercurii purissimi uncias viginti quinque: auri purissimi uncias duas cum semisse; huic auro in retorta mercurium affudit, quem per destillationem ad dimidias elicuit, factum fuit amalgama; mercurium vi ignis exstillatum, siccatum, reddidit residuo, rursus eadem copia, destillavit; denuo affudit residuo, & haec repetiit quinquagesies: ultima vice exiverat mercurius purus, amalgama vero in fundo retortae nigrescens mansit, quod in mortario vitreo, pistillo itidem vitreo, affusa aqua pura, trivit, hanc lutulentam factam effudit, & cum alia pura denuo trivit; ut ante: idque tam-  
diu,

(g) Gellert Anfangs Gründe zur Metallurgie. pag. 336. (h) Juncker Consp. Chem. T. I. Tab. 39. pag. 988. (i) Elem. Chem. T. I. P. II. pag. 352. (k) Transact. Philosoph. Nro. 444. p. 371. seq.



diu, donec aqua pura maneret, & amalgama splenderet. Pulvis tritu & lotionem ab amalgamate separatus, colore fuscus, sapore metallico tetricus, horrendusque fuit. Amalgama tum, eodem rursus modo, quinquaginta novis vicibus, exercuit, & obtinuit illud fuscum, quod de novo cum aqua tritum, ac elutum, praedictum pulverem exhibuit; rursusque depuratum, eadem ratione quinquagesies destillando, in fundo retortae subrusum reperit; id vero aqua tritum, lotumque, ut prius, dedit de novo pulverem fuscum. Rursus hoc amalgama splendidissimum quinquagesies urfit, ut prius, & trivit cum aqua, nactusque est iterum pulverem fuscum, & amalgama splendide candidum. Sic ducentis, & quinquaginta destillationibus mercurii (nempe viginti quinque unciarum), ab auro (unciarum duarum cum dimidia), habuit pulveris descripti unciam, & grana quinque: auri, & mercurii uncias viginti quinque, drachmam unam, grana quadraginta sex. Perierant itaque de materie uncia una, duae drachmae, & grana novem. Dein purissimum illud ultimum amalgama iterum destillavit aliis sexcentis viginti & septem vicibus, dimidium mercurii semper educendo, affundendo semper, omissa lotionem cum aqua. Habuit sic atrum amalgama, quod, non ablutum, in retorta vitrea loricata, igne aperto, fortissimo, urfit ita, ut vas spatio trihorii prorsus ab igne canderet. Exiit mercurius purissimus ad viginti uncias. In fundo autem vasis dein reperit uncias duas cum dimidia auri fulgentissimi, sine ulla omnino faece. Tandem etiam pollinem memoratum, de prioribus 250. destillationibus collectum, urfit igne summo, aperto, ex retorta loricata, & obtinuit mercurium ex eo resuscitatum, seu reductum, relictis tantum in fundo pulveris fusci sex granis. Ex his ergo apparet, aurum post toties repetitas cum mercurio conjunctiones, & ignis torturas, nihil omnino perdidisse; nam quod perierat, non fuit de auro, verum de mercurio; pulverem quoque illum ex eodem mercurio natum esse, manifestum est. Evanescit proinde spes omnis, mercurium cum auro, ignis ope, figendi.

§. 249. **Q**uanquam de Experimenti hujus certitudine, multoque magis de Cel. Authoris integritate nefas sit dubitare: sunt tamen alii, & certe magni in arte viri, qui similium fere expe-

experimentorum vix non contrarium successum viderunt. Quo igitur de differentiae hujus causis unicuique sententiam ferre promptius sit: aliorum quoque experimentorum successus nonnullos hic recensere minime supervacaneum duxi. Atque inter hos agmen facile ducit Becherus, asserens: *Aurum enim, vel argentum, si per destillationem mercurium amittat, & cum eo denuo amalgametur, haecque operatio aliquoties repetatur: aurum, vel argentum sic fusile reddi, ut cerae instar fluat, omniaque vitra tingendo penetret* (l). Idem alibi dicit, mercurium post crebras amalgamationes cum auro, vel argento, illa metalla, licet pura, non amplius assumere, eo, quod aliquid mercurii iis adhaereat, ac in eis figatur. Si autem talis calx auri, oleo tartari foetido, vel aceto imbibatur, eam a mercurio denuo arripi, & in amalgama cum eo abire (m). Eadem ferre Junckerus dicit (n).

§. 250. **P**ertinet huc Joannis Osiandri experimentum, qui amalgama ex auro, & mercurio purificato, a superfluo mercurio per corium transpressione, separari jubet, residuum in testa terrea vitreata sub alembico vitreo prunis candentibus imponi: ita ut inter alembicum, & testam spatium maneat ad pollicis circiter latitudinem, quo mercurius ex auro celerius evaporare, & parietibus alembici adhaerere queat. Mercurio sic ad medietatem circiter expulso, reliquam auri massam ab igne removeri, denuo teri, ne coalescat, quod omni studio vitandum inculcat. Mercurio sic penitus abacto, calcem relictam cum novo, vel pristino mercurio denuo amalgamandam: iterumque eodem modo igni committendam, & a mercurio separandam, eundemque laborem repetitis vicibus eousque tractandum, donec aegre mercurium calx recipiat, vel & omnem cum eo conjunctionem respuat; tum talem calcem ab omni mercurio, modo antedicto, liberandam, solícite cavendo, ne calx auri, quodammodo jam rubescens, fundatur. Postea calci huic adfundendo acetum destillatum, extrahi vult, quidquid mercurius ad solutionem aptum reddidit, sicque, Tincturam citrini coloris acquiri, ait. Porro praecipit, ut calci residuae vel novus vel pri-

(l) Bech. Phys. Subt. Suppl. II. p. 405. (m) Idem ibid. pag. 407. (n) Consp. Chem. T. I. p. 399. & 988.



pristinus addatur mercurius, quem tunc promptissime cum illa conjungi perhibet. Haëtenus vero memoratas operationes toties repetendas esse, donec tota aurea calx hoc modo ab aceto resoluta fuerit, solutionem tum leni cinerum calore evaporandam esse: sicque salem in fundo remansurum, qui, aqua purissima solutus, a recrementis depurgetur, evaporet iterum, sal inde sic acquisitus exsiccetur, qui, si dein per retortam destilletur; spiritum penetrantissimum, colore rubicundo pellucidum, sapore suavissimum, fragrantia crocum fere aequantem, praebebit. Ex residuo in retorta manente, ope aceti destillati, salem auri genuinum, nivei candoris, multo priore puriorem, & fixiorem extrahi posse, qui tandem, igne decenter adhibito, in vitrum smaragdinum colliquescat (o). Hoffmannus tamen istam salis auri confectionem opus arduum, ac difficile nuncupat (p).

§. 251. **A**lius est Lucae Osiandri Processus huc itidem faciens: Auri nempe amalgama, a quo superflua mercurii portio per corium expressa fuerit, phialae vitreae exterius probe luto obductae, cui olla in fundo pertusa adaptata sit, impone, ac leni igne mercurium pro maxima parte expelle: sic aurum cinereorum, vel fusco-lividorum globulorum forma remanet. Hos globulos ante refrigerationem vitri exime, tere cum novo mercurio, & aqua purissima affusa continuo agita, donec aqua nigredinem contrahat, quam decanta, novam affunde, idque toties repete, dum nulla nigredo amplius appareat; cum eloto amalgamate dicto modo iterum procede, usque dum tota auri substantia in pulverem nigrum tenerrimum abierit, quem in crucibulo leniter candefac, ut adhaerens ipsi mercurius evaporare queat; sic pulvis ille fusco-flavum colorem acquireret, qui in aurum amplius haud reducitur, sed cum nitro, tartaro, sale communi tractatus in vitrum smaragdinum colliquescit, per repetitas autem cum aceto destillato extractions totus in salem, medicis usibus aptissimum, convertitur. Ea-

S

dem

(o) Juncker Consp. Chem. T. I. Tab. 27. pag. 579. & Tom. II. Tab. 57. p. 156.  
(p) Op. Omn. Suppl. I. P. I. pag. 195.

dem plane phaenomena argentum hoc modo tractatum sistit; pulvis tamen inde productus non adeo nigrescit; tentata reductione in vitrum hyacinthinum flavescentem abit (q).

§. 252. **N**ec minus notabilis est Borrichii methodus, qua salem ex metallis extrahere nititur: Amalgama ex una parte auri purissimi per antimonium fusi, & quatuor partibus mercurii purgatissimi, diu in mortario vitreo tere, & agita, aqua purissima prius affusa, donec pulvis nigrescens natus aquam satis turbidam reddat, quam effunde, & quietam relinque, usque dum molecule nigricantes fundum petierint, supernatantem claram iterum amalgamati affunde, diu interim contere, separa, eundemque laborem toties repete, donec nullus amplius pulvis a tritura producatur, & aqua clara maneat; tunc aliquid recentis mercurii adde, ut amalgama mollius fiat, & antedictum laborem summa cum diligentia continuo per aliquot septimanas repete, omnem pulverem nigrum ab aqua separa, exsicca, qui amplius reduci non poterit. Aquam autem illam leni calore evapora, sic in fundo aliquot grana salis crystallini remanent. Idem cum argento, & quidem expeditius succedere tradit; pulverem tamen sic productum cinerei magis, quam nigricantis esse coloris. Itidem cum stanno; quod pulverem, ex auro geminum, exhibere perhibet. Cupri amalgama, eodem hoc labore tractatum, pulverem quidem primo subnigrum: continuata vero diutius tritura, flavescentem aquae communicare, qui aliquatenus reduci potest. Plumbum sic vexatum, copiosa ramenta, candidorum flocculorum instar, in aquam demittit, quae siccata pulverem dant facile in pristinum corpus reducibilem. Aquam autem, ad cujuslibet amalgamati metalli triturationem adhibitam, evaporando, tantillum salis acriusculi praebere, cujus majorem obtineri copiam, si, aquae loco, tritura cum aceto destillato instituat: nec non, si pulvis ille niger ab omni mercurio tenacius adhaerente liberetur, ac postea in vase aperto, sub diligenti agitatione leniter calcinetur, & cum aceto destillato extrahatur; compendii gratia loco laboriosae triturae amalgama quodvis

(q) Luacker Consp. Chem. Tom. II. Tab. 57. pag. 158.



vis, digestionem committi potest, tali quidem caloris gradu, ut mercurius sublimationi fiat proximus. Ita amalgama spatio 24. horarum cuticula nigra obducetur, quod tunc cum aqua destillata diutius tritum notabilem pulveris atrii quantitatem in aquam demittit, quo subsidente, aqua leniter evaporata, sal genuinus parciore licet quantitate, obtinetur (r). Sales autem hos, si quidem ita vere obtinentur: non sub salina facie metallis inhaerere, sed latentibus in aqua vel salinis, vel acidis particulis, dum e vitrescibili maxime principio aliquid solvunt, ac intime uniuntur: demum formari probabile videtur. Denique & similes fere processus tam Fernelius (s), quam Bernaudus (t), instituerunt, eundemque fere successum experti sunt.

§. 253. **Q**uod autem in experimentis mercurii cum auro a Cel. Boerhaavio institutis §. 244-248. tanta sit differentia effectuum, si comparentur cum reliquis experimentis paulo ante relatis, ratio esse videtur: quia Boerhaavius aurum & hydrargyrum, purissima quidem, absque ulla tamen praeparatione praevia, usurpavit, cum tamen ad talia experimenta, praeparatio utriusque necessaria sit, asserentibus Authoribus aliis; sic Philaleta dicit: *repagula auri vulgaris solve, quae dicitur praeparatio prima &c.* (u): Becherus, ubi de processu Nicolai Bernaudi a crista loquitur, jubet mercurium magno artis studio elaboratum ad haec adhibere (x), & alibi inquit: *argentum vivum vulgi est nimis humidum, aqueum frigidum, & indefinitum pro solvendo auro corporum omnium fixissimo, & calidissimo, dum ob indefinitam suam humiditatem nunquam in statum fixum fusilem sola digestionem coagulari potest, &c.* (y). Sic neque aurum in mercurium agere potest, eundemque mutare, nisi prius subtilisetur, ut penetrari queat (z). Et rursum alio loco: *argentum vivum extra mineras mortuum est; quamprimum autem sulphureis subjectis destillatur, & cum auro jungitur, statim illud motu mechanico attrahit, resolvit, & notabiliter, calcis vivae instar, cum*

S 2

eo

(r) Idem ibid. p. 159. (s) Fernel. de abd. rer. caus. c. 18. (t) Theat. Chym. P. III. p. 755. (u) Philaleth Introit. C. 18. p. 403. (x) Becher Phys. Subt. Suppl. I. p. 340. (y) Idem ibid. Suppl. II. p. 358. (z) Ibid. pag. 373.

eo excalescit; & paulo post: mercurium autem philosophicum aureum esse, & tamen non ex auro communi productum, non miraberis, si antimonium fusum in mercurium communem effuderis, atque scintillulam hujus veritatis, & magnetismi inveneris, & videas disparitatem cum communi (a). Talem autem non dari in natura: sed tantum per artem (b), & per talem mercurium aurum ipsum subtilisari posse (c). In promptu quidem esset plurium ejusmodi Authorem sententias afferre, sed hae sufficere possunt.

§. 254. Aliud Experimentum exhibuit doctissimus Spoerling in Laboratorio Regio Holmienfi: Amalgama ex auri 15, & mercurii 200. partibus constans, aqua pluvia destillata lotum, digestionem leni exposuit, semper aequali per duos menses, in phiala colli angustioris; tum, superfluo mercurio per alutam expresso, reliquum amalgama, tres partes mercurii, respectu auri, continens, digestionem novae commisit, haud interruptae ultra duos menses; tum massae addidit sulphuris stillatitii duplum, quod tamdiu contendo miscuit, donec omnia in nigrum abirent pulverem; hunc indidit crucibulo cui aliud in fundo perforatum inverse imposuit, ita ut foramen superiora spectaret; luto commissuris obductis, igni, ut sensim calefceret, commisit. Sulphure una cum mercurio maximam partem evaporato, ignis gradum eousque auxit, ut totum candesceret. Spongiosam tum auri calcem in crucibulo restitantem cum borace fudit, regulus inde productus fuit satis friabilis; hunc, quia mercurii nonnihil continere visus est, denuo per se fudit spatio semihorae, igne violentissimo, is tum fumos spargebat, effusus, ac frigidatus mallei ictum non bene sustinebat, sed rimis fatiscebat, atque, ubi fractus erat, aliquantulum plumbeus adparebat, praesertim circa centrum. Ex his concluditur: mercurium per diuturnas digestionem quadam sui parte ab auro ita attrahi, ut igne vel fortissimo inde nequeat separari. Sequitur Experimentum alterum, quo probatur: mercurium sola lenissima digestionem auro junctum, neque adminiculo Aquae Regiae inde expelli potuisse (d). Auri vero amalgama, si cum sulphure tractetur, semper in calcem, crocum solis dictam, migrat; licet aurum per se, sulphure vulgari citri-

(a) Ibid. p. 381. seq. (b) Ibid. pag. 384. (c) Ibid. p. 375. (d) Acta literaria Suec. 1731. p. 1.



citriño tractatum, parum vel nihil mutetur (*e*); si enim amalgamati auri expresso, sulphuris dimidia pars, seu aequa portio addatur, terendo bene subigatur, dein super fictili patella debito igne ad lenem usque candorem tractetur, donec sulphurea, & mercurialis substantia expulsa sit, calx auri fere eadem obtinetur, ac si amalgama purum per corium expressum, contritum, super lamina ferrea tenuiter expansum, calore proxime candente ita foveatur, ut mercurius leniter inde exhalare queat (*f*). Idem contingit, si amalgama tale cum sulphure tritum, ac mistum accendatur, tum sulphur primo leni deflagratione absumatur, residuum retortae indatur, & leniori, sed diuturniori igne tractetur, ne aurum, quod facile fit, liquefiat; sic sulphur cum mercurio in cinnabarim sublimatur, calce auri in fundo remanente (*g*). Si autem mercurius primo cum sulphure miscetur, ac in cinnabarim sublimatur: haec autem postea auro addatur, & cum eo sublimetur, aurum inde nonnihil immutatur, neque in altum evehitur. Quodsi cinnabaris haec cum auro igne aperto tractetur, dextra operatione calx auri subtilis, & spongiosa emergit (*h*). Notabilis quoque est minera illa Philosophica Clavei, de qua etiam Becherus (*i*), & Junckerus (*k*), legi merentur. Plures similes praeparationes Croci Solis describit Hoffmannus (*l*), nec minore studio easdem collegit Cl. Rieger (*m*).

§. 255. Denique auri calx ista §. 254., si solvatur partibus tribus aquae regis, digeratur, abstrahatur saepius, & in crystallos cogatur, hae in aqua purissima solvantur, iterum crystallifentur, ac postea cum triplo mercurii purissimi rursus amalgamentur, amalgama sub tegula fornicata ponatur, atque igne lento, sub continua agitatione cum filo ferreo, ita tractetur, ut mercurius sensim exhalet: obtinetur pulvis purpureus, in aceto destillato mox solubilis, qui, si cum spiritu salis dulci digeratur, tincturam dat rubicundam, iteratoque extractionis labore tandem corpus albicans,

S 3

cal-

(*e*) Stahl. Opusc. Chym. Phys. p. 600. (*f*) Ibid. p. 596. (*g*) Junck. Consp. Chem. T. I. Tab. 33. p. 853. (*h*) Id. ibid. Tab. 39. p. 992. (*i*) Phys. Synt. p. 439. seqq. (*k*) Consp. Chem. T. I. Tab. 29. p. 639. seqq. (*l*) Op. omnia. Suppl. I. P. I. p. 199. (*m*) Introd. ad Not. rer. nat. T. I. P. 2. p. 1081. seqq.

calcis instar, remanet, ex quo salem auri fieri posse: ex tinctura vero, si balneo maris leni igne ad ficcitatem abstrahatur, pulverem pulchre rubicundum, sulphur verum auri, remanere docet Basilii Valentinus (*n*). Quod si a vero non abludit, mirabilem sane auri resolutionem fieri posse indicat.

§. 256. Si autem ejusdem calcis semuncia, in menstuo, ex una libra aceti destillati, & unciiis sex salis ammoniaci, (prius ab alumine plumoso, tum & sale gemmae) sublimati, facto, solvatur; solutio haec sanguinea rubicunda per octiduum digeratur, postea abstrahatur, ac remanens massa iterum spiritu salis solvatur. Tum sumatur mercurius sublimatus, digeratur cum affuso spiritu salis per octiduum, dein sublimetur, sublimatum novo salis spiritu solvatur, idque ad tertiam vicem repetatur; hujus sublimati sesquiuncia cum novo spiritu salis concentrato solvatur, solutio fervetur. Deinde unciam salis volatilis urinae, solve in simili spiritu salis. Has binas solutiones sensim, & provide instilla solutioni calcis auri antedictae, ne motus oboriatur nimis violentus; digere per quatriiduum, atque destillationem institue: sublimabitur sic aurum rubini instar, quod cum mercurio in cella collocatum diffuit in rubicundum oleum (*o*). Hoc modo aurum subtilitatem insignem acquirit, ut cum aliis praeparatis eo intimius misceri queat, etsi hac operatione minime destructum sit. Notum quoque est, quod calx auri cum mercurio facta, & fusa, fumet, & partim in vitrum pellucidum, auro levius abeat (*p*).

§. 257. Haecenus de amalgamatione, digestionibus, destillationibus, calcinationibus auri cum mercurio; nunc quid auro, & mercurio solutis fiat, perspicendum. Si solutioni auri cum aqua regis misceatur solutio mercurii cum aqua forti, praecipitatur calx fusca; qua mistura lapides ab artificibus colore fusco tinguntur ita, ut Achatem imitentur (*q*). Si talis solutio auri multa aqua purissima diluatur, ac tum mercurii purissimi magna portio in-

(*n*) Op. omn. P. 2. L. 4. pag. 780. seqq. Hamburg. 1740. (*o*) Juncker Consp. Chem. T. I. Tab. 33. p. 867. (*p*) Mem. Acad. R. g. Sc. 1702. p. 148. & 1707. pag. 40, 106. (*q*) Waller Mineralog. Class. 2. p. 121.



injiatur, progressu temporis, & crebra vasis agitatione, sensim omne aurum a mercurio imbibitur, atque e solutione secedit; quo & Hoffmannus collimat dicens: *si aurum purissimum in aqua regis solvatur, solutioni instilletur mercurii depurati congrua portio: illico in fundum dejicitur aurum una cum aliqua parte mercurii, sub forma pulveris, qui effuso menstruo collectus, & addito liquore alkalino inversus, crebris elutionibus, & spiritus vini deflagrationibus edulcoratur; pro usu interno admodum laudatur (r).* Quod etiam confirmat Junckerus (s), qui ex Bechero sequens affert experimentum: solutioni auri si addatur mercurius, abstrahatur ad salis consistentiam, dein solvatur in spiritu aceti, filtretur, ac denuo inspissetur; massa, cerae instar fluxilis emergit, quae lamellas tenues argenti, si cum iis tantum candescat, penetrat (t).

§. 258. **M**ira est solutio illa, de qua Hoffmannus in Poterium ait: *notum est mihi artificium, amalgama mercurii, & auri, sola aqua insipida, beneficio triturae sufficientis, penitus dissolvendi, ita, ut totum in aquae poros transeat, ex qua deinde pulvis, si igni paullatim tradatur, eleganter purpureus, magnaeque in morbis efficaciae extrahitur (u).* Praeterea si solutioni solis, spiritus fumans, ex amalgamatione stanni, & mercurio sublimato factus, instilletur, colorem coccineum acquirit, & si protinus destillatio instituat, magno impetu flores flavi, rubicundi, in sublime ascendunt, teste Cassio. Si autem solutio auri abstracta, & edulcorata, cum mercurio dulci teratur, & sublimetur; calx auri, subtilis lanuginis fere instar remanet, quod Ettmüllerus observavit (x). Notari hic quoque meretur, quod Durand expertus est: si aurum, cui alia quaevis metalla admixta sunt, cum tribus partibus mercurii sublimati fundatur, caetera volatilia facta in fumum abeunt, relinquentia solum aurum (y). Occurrit simul Cel. Boerhavi experimentum: si auri pollen cum mercurio sublimato corrosivo tritus ex retorta destilletur,

cum

(r) Op. Omn. T. IV. Dissert. Trias, Thes. 20. p. 584. (s) Consp. Chem. T. I. Tab. 33. pag. 860. (t) Ibid. p. 863. (u) Pott Exercit. Chemic. de sulph. metall. p. 35. (x) Juncker Consp. Chem. T. I. p. 477. 861. 863. (y) Durand Hist. nat. de l'or & de l'argent p. 108. Londres 1729. item in Opere, cui titulus: Spectacle de la nature T. III. p. 420.

cum addito regulo antimonii elevatur in altum, olei punicei forma, & penitus volatile redditur ( $\gamma$ ). Simile fere Stahlius instituit: si solutioni auri probe attenuatae immisceatur butyrum antimonii cum mercurio sublimato factum, destillatione aurum per retortam simul transvehitur ( $a$ ). Praeterea si solutionem mercurii sublimati, cum solutione auri conjungas, & aqua fontana diluas, aurum in atomos minutissimas pulcherrimi splendoris praecipitatur; ad pingendum utile ( $b$ ).

§. 259. **N**on intempestivum erit hic adnotare experimentum Cassii de auri & mercurii attenuati concretione: Aurum solve aqua regis, quae ex spiritu nitri, & salis, utroque per oleum vitrioli propulso, componitur. In eadem aqua regis dissolve mercurium purissimum, aut, quod melius, mercurium animatum. Has ambas solutiones instilla in spiritum vini, praecipitabitur pulvis; spiritum deinde per decantationem separa, praecipitatum per lentam spontaneam evaporationem sicca, hoc praecipitatum aqua communi aliquoties edulcora, & sufficienti quantitate similis mercurii redige in massulam spissioris amalgamatis, quod leni igne per duos menses digere, & ubi in pulverem totum conversum fuerit, projectione in aurum liquefactum proba, quousque debitam fixitatem, & assimilationem cum auro acquisiverit ( $c$ ). Similiter & Glauberus observavit, per aurum, & pingua salina, mercurium aliquantum figi posse, ut aegrius ab auro secedat; aurum vero simul eadem opera efficaciter penetrari, & volatile reddi, ita ut in corpus album, fragile, & fugax abeat: Cornu animalis raspati uncias octo, solve in spiritu salino-nitroso, seu aqua regis. In eodem menstruo, solve separatim auri purissimi unciam dimidiam. In aqua forti vero, solve mercurii vivi purissimi uncias duas. Confunde has tres solutiones in cucurbita vitrea, & per alembicum omnem abstrahere liquorem; destillatum foetidum affunde residuo, & sexies inde, vel amplius abstrahere: quo facto, remanens massa in retortula vitrea valido igne tractetur, sic transibit spissum butyrum mercuriale rubrum,

( $\gamma$ ) Elem. Chem. T. I. P. 2. p. 263. ( $a$ ) Fund. Chym. p. 128. ( $b$ ) Maur. Hoffm. Acta Laborat. Altorf. pag. 317. Norimb. & Altorf. 1719. ( $c$ ) Juncker Consp. Chem. T. I. Tab. 29. p. 647.



brum, quod rectificatum solvit aurum, residuum ex retortula collige, & frustulatim, in nitrum fluens in retorta tubulata,ingere: sic ascendent flores purpurei mercuriales; nam priore actu non omnis mercurius ab auro transiit. In nitro fixo remanebit aurum albicans, fragile, quod magna ex parte sub cupellatione deinceps aufugere afferitur (*d*).

§. 260. **M**ulta praeterea celebrantur medicamenta ex hydrargyro cum auro praeparata, quae a quibusdam ut remediae magnae virtutis laudantur, ab aliis contra prorsus repudiantur. De his, Cel. Hoffmannus ait: paucas esse mercuriales praeparationes, quae, si quid usu interno boni praestent, id inde fieri, quod ejusmodi corporibus sint conjunctae, quae, dum se se interponunt minimis globulis mercurialibus, eorum impetum refraenant, saliumque combinationem arcent, sic impediunt, ne in corpore turbas concitent. Corpora autem, quae illud praestant, & convenienti mixtione cum mercurio coeunt, sunt metalla illa purissima corpori non infensa, aurum & stannum purum, quae mercurii violentiam optime cohibent (*e*). Cui quidem vehementer obloquitur Cl. Rock, dicens: a pauxillo auri, cum quo mercurius est sociatus, virtutes ipsi adscriptas neque per experientiam demonstrari, neque ex rationibus Physico-Chemicis deduci posse. Simplicem mercurium, sine additione auri, idem plane praestare (*f*). Experientia oportet, refutentur hae objectiones contrariae. Hoffmannus interim praeparata illa mercurialia laudat, quae cum auro fiunt, propter ejus substantiam homogeneam, facile intime cum mercurio miscendam. Sic ex mercurio, regulo antimonii, & auro, aequo pondere, amalgama fieri jubet, aquam regis postea desuper abstrahere, tum edulcorare; sicque mercurium diaphoreticum magnae virtutis produci (*g*). Iterum alibi: solutionem auri cum aqua regis, solutionem antimonii cum eadem, & solutionem stanni cum aqua forti, partibus aequis misce, injice mercurium, mixturam agita; sic mercurius promte abit in coagulum, absorbendo particulas me-

T

tal-

(*d*) Idem ibid. Tab. 33. pag. 876. (*e*) Fr. Hoffm. Op. omn. T. IV. p. 584.

(*f*) Disput. de Chymia tria superstitiosa p. 12. Budingae 1718. (*g*) Oper. omn. T. IV. P. 5. p. 419.

tallicas; abstrahere spiritum acidum, & supra remanentiam accendere spiritum vini rectificatissimum, sicca. Pulverem hunc, partim salivatione, partim diaphoresi, mira praestare testatur (*h*). Sic quoque auri fulminantis, vel potius pulveris illius rubicundi ex solutione auri, & stanni, interventu aquae praecipitati, congruam portionem, cum mercurio praecipitato albo, probe prius eloto, tritu diuturniore, & aquae aspersione commiscere imperat; quem pulverem, uti alterum ejus praecipitatum §. 275, insignis esse efficaciae asserit loco cit.

§. 261. **V**erum quis mortalium omnia ex auro, a tot, tantisque jaetata remedia consignet? incredibilis certe eorum est numerus, uti Laudanum Mercuriale Paracelsi. Praecipitatum aureum solare in Collectaneis Chemicis Leydensibus descriptum. Mercurii dulces compositi solares, addendo mercurio dulci folia auri, terendo, sublimando; vel immiscendo mercurio dulci crocum solis. Panacea auri purgans, ex auro, mercurio, & antimonio, magno labore parata, describitur (*i*). Tinctura Solis sicca laudatur a quibusdam, quae fit ex amalgamate auri post separatum mercurium, pulverisando, & per tritum miscendo cum cinnabari nativa, additis ambra grysea, oleo cinnamomi, & saccharo, quae olim magno in usu fuit Danorum Regi (*k*). Notus quoque est pulvis auri Cellensis, qui pariter calcem auri continet cum sulphure tritam, & in crucibulo candente deflagratam, ac dein cum cinnabari nativa, saccharo, & oleo cinnamomi commixtam. Cujus plenam descriptionem dedit Helvetius (*l*). Agit autem tale remedium virtute cinnamomi potius, quam quidem auri. Praeterea, cum in his, similibusque praeparatis, aurum non intime cum mercurio misceatur, & igne mercurius mox auferri queat, neque, si cum menstruis corrosivis facta fuerint, acore integre privari queant: aurum item, quocunque modo praeparetur, per se nihil in corpus agat: ideo Hoffmannus, alique, aliam tentarunt mercurii cum auro correctionem, & praeparationem.

§. 262.

(*h*) Id. ibid. Suppl. I. Parte I. p. 197. (*i*) Miscell. Curios. Med. phys. Acad. Nat. C. Decad. 3. ann. 5. o. 94. (*k*) Memoires pour l'Hist. des Sc. & des beaux arts à Trevoux, & Paris. 1713. p. 724. (*l*) Traité des maladies les plus fréquentes T. I. p. 378. Paris. 1724.



§. 262. **H**inc ille commendat imprimis mercurii correctionem nullis additis menstruis, sola ignis moderata actione, atque intima cum auro mixtione, & dissolutione in pulverem rubropurpureum maxime fixum, vi ignis non facile in partes constituentes reducendum, ac renitentem menstruis corrosivis; concretum autem hoc blandissimo corporis calore promte exagitari, atque efficaciae prorsus singularis esse asserit. Ad hujus autem remedii praeparationem, mercurium praeparatum imprimis requiri, ut eo intimius cum auro conjungi queat, id est: animatus fiat, §. 72. De mercurii animatione plures egerunt Authores, variisque illum quaesiverunt laboribus, inter quos Alexander van Suchten, & famosus ille scriptor anonymus Philaletha. Hoffmannus (*m*), Becherus (*n*), Stahlius (*o*), Junckerus (*p*), unanimes fere, sequentem modum, utpote rationi consentaneum, reliquis omnibus anteponunt: Reguli antimonii martialis pars una, cum duabus argenti purissimi, igne colliquantur, postea cum triplo mercurii purissimi amalgama fiat, addita simul, ex mente Becheri, salis ammoniaci, & alkalini, aequali portione determinata, partem nempe cujuslibet unam; amalgamationem hanc accuratam poscere encheiresin, repetito labore, & solerti indagatione addiscendam: amalgama sic factum in phiala igni arenae, digestioni diuturniori exponendum; ita pulverem nigrum ad superficiem ejiciet, quem postea in mortario vitreo tritu, ac aquae successiva affusione elutriandum esse tamdiu, donec amalgama splendidum sit, & aqua limpida maneat. Pulvis ille niger separari, ac exsiccare debet, quem, virgula candente tactum, ignem concipere, accendi, atque sub levi aëris ventilatione fuliginis instar percandescere, & odorem foetidum spirare, licet sales dicti ad amalgamationem non fuerint adhibiti. Amalgama autem siccatum ex retorta igne arenae destilletur, abstrahatur omnis mercurius; ita remanet in fundo retortae argentum purum, quod cum nova portione reguli liquandum, ac eodem mercurio, additis salibus, denuo amalgamandum, digerendum, lavandum, destillandum, eundemque laborem septies repetendum esse, imo quo saepius, eo

T 2

me-

(*m*) Op. omn. T. IV. p. 588. & Suppl. I. P. I. p. 195. (*n*) Phys. Subt. in tota Thef. VI. p. 389 - 416. (*o*) Fund. Chym. p. 133. (*p*) Conspr. Chem. T. I. p. 383. 397. 646. 1021.

melius ; sic demum hydrargyrum multo purius , gravius , minus volatile , & subtilius prodire , quod majoris sit in metalla energiae , & in corpus humanum efficaciae praestantioris , & ad desideratum medicamentum conficiendum quam maxime idoneum. His vero rite , & cum industria administratis , asserit Junckerus loc. cit. , argentum sensim pondere & quantitate minui , valde fusile reddi , & mercurium denique , nisi aceto imbibatur , vix amplius recipere ; videndum interim monet , an non aliquid argenti , & praesertim mercurii , sub trituratione simul cum regulo secedat , atque valde profuturum credit , si ultimo argentum solum cum hoc mercurio , dicto modo , tractetur.

§. 263. **B**echerus autem , de hoc mercurio animato agens , concludit : in marte latere metallorum ignem , sulphur calidum innatum ; illorum vero humidum radicale , & sal resolvens in antimonio esse ; haec duo si vinculo jungantur , & incorporentur communi argento vivo , hoc fieri animatum , resuscitans , emolliens , aurum attenuans , ac penetrans reddens , intime solvens &c. (q) , sulphur autem martis incorporatur in regulum siccum , qui argento mixtus amalgamatur cum mercurio , sicque animatur. Alibi ait : sale ammoniaco pinguedinem in alkali resolvi , hanc resolutam dissolvere sulphur arsenicale reguli , hoc dissoluto liberari ejus mercurium , objectum nempe mercurificans aurum & argentum (r) . De eodem hoc mercurio Stahlius judicat , quod ex eo , encheiresi Suchteniana parum nota , animato , levi digestionem pulvis niger in superficiem secernatur , qui , affricus ad lapidem Lydium , ut aurum se prodat , & argenteis lamellis illitus , ab iisque leni rursus calore evaporatus , maculam flavescentem relinquit , uti in deauratione fieri solet (s) .

§. 264. **M**ercurii jam sic praeparati §. 262. pars una , addatur partibus binis auri purissimi , ex mente Philalethae , vel tribus , aut quatuor , secundum alios , fiat vulgari encheiresi amalgama ; hoc indatur phialae vitreae , cui planum sit fundum , ut  
in

(q) *Phyf. Subt. Suppl. II. p. 388.* (r) *Ibid. pag. 401.* (s) *Fund. Chym. pag. 134.*



in latiore superficiem major sit caloris effectus. Tum phiala, (exhausto prius aëre crassiore, ne, eo calore expanso, vitrum dirumpatur,) hermetice sigilletur, & digestioni congruae, per septem, imo novem menses exponatur ita, ut a minore gradu caloris sensim ad majorem procedatur, sic sensim amalgama in pulverem rubicundum vertitur, qui primis quidem mensibus nondum subigitur adeo, ut in sensibilibus aut alvi fluxum, aut salivationem non excitet; continuata tamen digestionem adeo drastica vi omni privatur, ut pulvis inde emergens, fixus, tutissime ad grana duo, tria, aut quatuor, exhiberi, sicque in aliquot dies continuari possit, & nec tenellis salivationem, aliasve violentas commotiones excitet, quae alias usum mercurialium crudorum sequi solent. *Haec mercurii exaltatio a viris industriis congrua habita fuit ad arcanum Philosophorum opus; de cujus tamen rei successu (Hoffmanni utor verbis) nihil habeo, quod promittam; vires tamen medicae insignes sunt, aliisque medicamentis aequae non datae, ad varios morbos refractarios profligandos; additque Vir Celeb. hoc medicamentum a Cnoeffelio, Luca Tozzi Innocentii XII. Archiatro, atque a famigeratissimo Angliae Medico Crelles, maximo profectu adhibitum: & olim Halae a Chemico dexterrimo, hujus efficacia, febres refractarias, quartanas, podagram per quadriennium durantem, arthritidem fixam, contracturam artuum, paucis dosibus plane sanatam fuisse (t). Alibi tamen de praedicto mercurio §. 262. ait: Si cum eo, & argento amalgama fiat, hoc leni ignis calore durissimum fieri, eundemque mercurium, quoties e retorta destilletur, relinquere aliquot grana pulveris rubicundi, qui cum borace reductus, a Chemico perspicacissimo in Anglia, in aurum purissimum conversus sit; eundemque, si vel cum sulphure minerali purissimo in concretum cinnabarinum deducatur, vel, elaboratione extemporanea, in aethiopem mineralem, remedium praebere exilissima dosi efficacissimum, penetrantissimum, dissolvens, ac dissipans (u). Atque haec de praeparatis ex mercurio, & auro dixisse sufficiant.*

T 3

§. 265.

(t) F. Hoffman. Op. omn. T. IV. p. 547. & 585. seqq. (u) Idem ibid. Suppl. I. P. I. pag. 197.

§. 265. **S**unt porro inter Authores non pauci, qui ipsum quoque aurum in mercurium se scire convertere perhibent, & quidem sequentibus experimentis: Si spiritus salis ammoniaci cum spiritu vini misceatur, huic aurum liquefactum infundatur, hoc, plumbi instar, molle fit; si autem liquefactio, & infusio haec saepius iterentur, aurum tandem lenissimo igne fluit; notusque fuit Bechero modus, spiritu quodam urinoso, aurum, & argentum, omneque metallum reddere fluidissimum, ita, ut cerae instar flueret, cum mercurio facillime amalgamaretur, ac in ejus tandem liquiditatem transiret, id, quod *praeparatio ad amalgamationem & mercurificationem* ipsi vocabatur. Folia auri si diu terantur cum debita quantitate nitri, aluminis, & salis communis, aequali portione, atque haec postea, cum aqua purissima coquendo, solvantur, (quae a Zwelffero *solutio sine strepitu* vocatur): Solutio, oleo tartari per deliquium praecipitetur, liquor praecipitato supernatans, post aliquam digestionem filtretur, iterumque, spiritu salis ammoniaci, vel urinae, praecipitetur; pulvis praecipitatus cum sulphure misceatur, tumque in cinnabarim sublimetur; ex hac, per revivificationem mercurius obtineri dicitur. Melius tamen hoc succedere, si crocus auri, praecipitatus, cum sale ammoniaco debita digestionem tractetur. Sed de his vid. Becherus (x), Stahlius (y), Pott (z), Junckerus (a), alique plures.

§. 266. **U**nzerus alium proponit modum aurum in mercurium reduci: solve aurum in aqua regis, solutionem ad oleositatem abstrahere, quod transiit in vas recipiens, iterum affunde, hoc tertia vice repete, tandem summo igne aquam cum spiritibus expelle; remanebit calx sicca, cui affunde spiritum vini rectificatissimum, quem ter vel quater per alembicum abstrahere; tum calcem hanc cum aequali parte salis tartari, & dimidia salis ammoniaci misce, ac in vas reponere; affunde acetum destillatum, ut supernatet ad duos digitos. Vel praedictae calci auri, dimidiam partem salis ammoniaci misce, ac superfunde oleum tartari ad eminen-

(x) Phys. Subt. Suppl. II. p. 408. & ejusd. Concord. Chym. P. 3. p. 299. (y) Fund. Chym. p. 106. 215. (z) Exercit. de Sulph. metall. p. 10. (a) Consp. Chem. T. I. Tab. 17. p. 400.



mentiam fere unius digiti; materiem hanc in vase bene clauso in balneo maris digere per dies 24., tum exime vas, & primo omnium humorem aufer per destillationem; residuum siccum aqua calida affusa edulcora, donec omnis falsedo ex calce extracta fuerit; hanc siccata in vitreo alembico magna vi sublima, & ostendet se mercurius *vivus* interdum, si omnes sales remoti: *mortuus* vero, in forma mercurii vulgaris sublimati, si sales non remoti fuerint; quem postea cum tartaro calcinato, & calce viva permisce, & per retortam in aquam frigidam igne pelle, & habebis mercurium vivum auri (b).

§. 267. **S**tahlius auri mercurificationem, sequenti experimento commendat: Paretur Sal Ammoniacum sexies cum aequali pondere salis gemmae, & ultimo semel per se sublimatum. Fiat quoque Tinctura salis tartari saturatissima, sanguineae rubedinis, ex sale tartari calcinato, & spiritu vini rectificatissimo. Tum, aurum per antimonium fufum solve in aqua regis, ex libra una aquae fortis, & unciiis quatuor salis ammoniaci antedicti parata; solutionem factam abstrahere ad oleositatem, quod remanet, seponere, donec totum crystallifetur. Crystallos, affusa aqua regia recenti, dissolve, digere, abstrahere, inque crystallos denuo redige, idque tertia vice repete. Postea crystallos has solve in aceto destillato a sale communi prius abstracto, denuo in crystallos coge, aut saltem ad madidam spissitudinem abstrahere: materiam hanc spiritu vini rectificatissimo solve & extrahe; extractum leniter abstrahere ad oleositatem, huic substantiae tunc adjice tantum salis ammoniaci superius descripti, quantum ponderavit aurum assumptum, & terendo in mortario vitreo in tenuissimum magma redige; quod, si sub tritura nimis durum fiat, affunde tantillum spiritus vini ante abstracti, spontanea tunc evaporatione inspissetur, ut in globulos formari queat; quos postea immitte in phialam, iisque superfunde tincturam tartari supradictam, ad eminentiam trium digitorum; phialam mox arcte occlude, & in cella, aut in aqua frigida aliquot dies reponere, tum in aëre tepido colloca ad idem tempus, ac subinde in  
aqua

(b) Anat. Spagyr. Mercur. L. I. p. 103.

aqua leniter tepida plures dies, aut etiam septimanas demerge, donec sedimentum mucilaginosum appareat; deinde leni calore balnei destilla spiritum volatilem, ad remanentiam liquoris paulo spissioris; destillatum denuo affunde, iterumque abstrahere, hoc tertia vice repete; tandem aucto successive calore, omnem humiditatem evoca; tumque gradatim intenso igne arenae, sublimationem perage, ita, ut simul ac aliquid sublimari conspicias, gradum ignis, qui tunc viget, serves. Sublimatum cum duplo olei tartari per deliquium misce, & ex retorta vitrea, luto obducta, in aquam vase recipiente contentam, cui parum salis ammoniaci additum sit, propelle, quidquid tum vivificatum est, collige (c). De mercurificatione auri per mercurium supra egimus §. 249.

§. 268. **U**ltimo aurum etiam vere destrui posse, cum Sebaldo Schwertzero plures consentiunt Authores: si nempe aurum in singulari aqua regis attenuatum, cum menstruo Alembroth, alias etiam *Sal Artis*, vel *Sal Sapientiae* dicto, quod ex mercurio sublimato, & sale ammoniaco paratur, diu, & operose tractetur, fatiscit tandem e mixtione sua, & vere destruitur variis sub phaenomenis. Praeparationem illius salis docet Kunckelius (d), qui etiam modum procedendi, quo aurum vere destruitur, demonstrat (e), unde vera auri principia constitutiva patere, dicit Junckerus haec describens (f).

## C A P U T VII.

### *De Hydrargyri habitu ad Argentum.*

§. 269. **A**rgentum, metallum est valde purum, & simplex, colore candido splendens, pondere ad plumbum maxime accedens §. 176. 238., cujus pes cubicus pendet 11523 uncias,

(c) Stahl. Fund. Chym. p. 211. (d) Lab. Chym. P. 3. pag. 258. (e) Idem ibid. p. 290. seqq. (f) Consp. Ch. T. I. pag. 204. 220. 231. 861.



cias, pondere ejus se habente ad aurum fere ut 11. ad 20 (g). Valde fixum; namque uncia ejus, in furno vitriariorum, in jugi fluore, duorum mensium spatio relictum, vix duodecima sui ponderis parte imminutum fuit (h). Ductilissimum omnium metallorum post aurum: potest enim in fila duci, capilli tenuissimi instar, & unicum illius granum extendi in filum, tres ulnas in longitudine, & quatuor pollices in latitudine habens, uti filiductores norunt, qui unam argenti unciam extendunt in longitudinem 3232. pedum, quae adhuc magis extenditur, si fila plana reddantur, ut possint fericeo filo superinduci (i). Est durius, & magis elasticum plumbo, stanno, & auro: minus vero cupro, & ferro; tinniens magis, quam aurum, & reliqua metalla, cupro excepto; tenacitate cedit auro, & ferro, superat reliqua; nam filum argenteum sectione  $\frac{1}{16}$  pollicis Rhenani, pondus fert 370. librarum; antequam rumpatur (k). Ad ignem funditur, simul ignitur (l), facilius quam cuprum, aut ferrum: difficilius, quam plumbum & aurum (m). In foco vitri ustorii collocatum fumat, magis, & citius, quam aurum, sed non totum vitrescit, uti aurum (n).

§. 270. **A**rgentum cum mercurio facile amalgamatur, & quidem methodo, §. 242 data. Vel si solutioni argenti cum spiritu nitri, vel aqua forti factae, & vigecuplo aquae dilutae, immittantur lamellae politae aeneae: praecipitabitur argentum in forma lanuginis cineritiae, quae adhaeret lamellis, uti §. citata dictum fuit; haec separata, & aqua calida edulcorata, purissima, ac supra ignem siccata, dat pulverem tenuissimum, splendentem, argenteum, cui mercurium immiscendo fit amalgama (o). Si autem argentum cum minima sulphuris quantitate prius caementetur, omnem cum mercurio conjunctionem, ac amalgamationem respuit (p). Praeterea argentum quoque amalgamatur, quando illius solutioni cum aqua forti factae, atque ad siccitatem abstractae, additur acetum destil-

U

stil-

(g) Mem. Acad. Reg. Sc. 1713. p. 206. (h) Boyle Chym. Scept. pag. 50. 52. (i) Mem. Acad. R. Sc. 1713. p. 205. (k) Wallerius Mineral. Class. 3. p. 391. (l) Boerh. El. Ch. T. I. Part. 2. p. 21. (m) Rieger Introd. ad Hist. rer. nat. T. I. P. 2. p. 869. (n) Mem. Acad. R. Sc. 1702. p. 150. & 1707. p. 186. (o) Boerh. El. Ch. T. II. P. 3. p. 300. 317. (p) Hoffm. Op. omn. Suppl. I. P. I. p. 197.

stillatum, quod ad tertiam usque vicem abstrahitur, novum semper acetum affundendo; residuus sal solvitur aqua pluviali, filtratur, evaporatur ad consistentiam discretam, cui si injiciatur mercurius, coagulatur, atque argento junctus durefcit. Modum hunc Ill. Schroeder sub Titulo *Tincturae stultorum* describit (q).

§. 271. **A**malgama argenti puri cum quadruplo mercurii puri factum, si cucurbitae vitreae indatur, & in digestionem paulo fortiori ponatur, exurgit arbuscula pulcherrima (r). Vel si amalgama argenti, aut argentum purum, aqua forti, vel spiritu nitri solvatur, solutio aqua pluvia pura diluatur; tum amalgama argenti, plus minus injiciatur, in quiete relinquatur: exurgent ex illo varia filamenta, colore argenti nitentia, pulchras arbusculas repraesentantia §. 243, haec variant figura, magnitudine, duratione, celeriore, aut tardiore progressu, pro varietate proportionis ingredientium; conveniunt tamen omnes in eo, quod arbusculam producant, (*Arbor Dianae* solet nuncupari) quae non per modum vegetationis, sed crystallisationis, e sola dissolventis menstrui, & particularum metallicarum unione, exurgit. Plura super hac materia legi possunt apud Hoffmannum (s), & in Actis Parisinis (t). Insuper notandum, quod, si mercurii magna portio solutioni additur, argentum praecipitetur, & cum illo in amalgama coalescat: Mercurius vero ab acido salis solutus, ab argento immisto pariter praecipitatur (u).

§. 272. **A**malgama argenti, diu digestum, conquassatum, aut tritum, dat pulverem tenuem, insipidum, inodorum, nigerrimum, uti §. 190. Si diu teratur cum aqua, pulverem demittit subnigrum, cinereum; unde etiam sal acquiritur, praesertim si loco aquae, phlegmate aceti tritura fiat, §. 191 (x). Si autem tale amalgama teratur supra lapidem Porphyritem, tum aceto acerrimo lavetur, pulvis exsiccet, & cum aqua gummata misceatur, ad

(q) Unterricht vom Goldmachen. Exp. I. p. 461. Leipzig. 1737. (r) Hist. Ac. Reg. Sc. T. II. p. 150. & Mem. ejusd. T. X. p. 171. (s) Op. omn. Suppl. I. P. I. p. 197. 203. (t) Hist. Acad. R. Sc. 1704. p. 40. 1727. p. 33. (u) Junck. Confp. Chem. T. II. Tab. 63. p. 331. (x) Id. ibid. T. I. Tab. 34. p. 331.



ad scribendum, & pingendum adhibetur (y). Idem, uti & auri amalgama, si metallis puris superponatur, tum in igne teneatur, ut avolet mercurius: metalla argento, vel auro obducta apparent, quod artifices *deargentare*, vel *deaurare* vocant. Solent vero deceptores mercurio aurum, argentumve abscondere, tum plumbo infundere, atque hoc modo Chrysopoësin, aut Argyropoësin mentiri. Fraus tamen haec facile detegitur, dum mercurius in cochleari ferreo super igne positus, mox avolat, ac metallum solum relinquit.

§. 273. **A**malgamata auri, & argenti, carbonibus imposita, non strepunt, contra ac amalgamata stanni, ac plumbi. Cupri vero amalgama recens confectum, supra prunas infremit equidem: at si diu foveatur calente loco, nullum omnino strepitum ciet (z). Mercurius autem repetita cum argento destillatione tractatus, gravior evadit, quin tamen hoc immutet; prorsus enim idem superfluit Boerhaavio (a); licet asserant alii, argentum cum mercurio amalgamatum, si per destillationem mercurium amittat, & cum eo denuo amalgametur, haecque operatio aliquoties iteretur; argentum adeo fusile reddi, ut cerae instar lique scat, ac denique in mercurialem fluxum, sed spissiusculum, transire §. 249. (b). Sic & argentum in pulverem irreducibilem redigi, memini §. 247. Calcinatio vero argenti per mercurium, atque salis extractio eodem modo, uti cum auro, perficitur, more Osiandri, & Borrichii §. 250. seqq. Idem tamen argentum, per mercurium, seu sulphure absente, seu accedente, igne, ac tritura itidem, non secus ac aurum, in calcem resolvitur §. 254, quae fusa in vitrum hyacinthinum migrat (c). Notabile est, quod si sulphur argento admisceatur, huic lenissimo calore fluiditatem, simul & fragilitatem conciliet, coloremque ex gryseo atrum inducat: Si enim argentum limatum, aut laminatum *stratificetur* cum sulphure in tigillo; quo igni imposito, & candefacto, sulphur parum deflagret; tum post fluxum, in quem promptissime abeunt, effundantur; prodibit massa

U 2

nigra,

(y) Caneparius de atrament. pag. 371. Londini 1660. (z) Thom. Bartholinus Act. Med. & Phil. Hafn. T. I. Obs. 67. (a) El. Ch. T. I. P. 2. p. 351. (b) Bech. Phys. Subt. Suppl. II. p. 406. (c) Juncker Conspect. Chem. T. I. Tab. 34. pag. 887

nigra, minerae argenteae instar, quam Glas-Ertz vulgo vocant, quae scindi ut plumbum, & in varias subtiles figuras fundi potest; unde adhibetur ad figuras plantarum, aut animalium exprimendas, quas sat accurate repraesentat, dummodo in exactas formas e gypso, tripoli, &c. paratas, fundatur. Sulphuratum ita argentum (vel etiam ex eo conflatae figurae, si ignitis carbonibus, vel tegulis imponantur) in tenuissima fila exfurgit, ac crescit (*d*).

§. 274. **N**otum est experimentum Hombergii, quo demonstravit, mercurium, sulphuri prius certo modo admistum, lamellam argenteam, dimidia linea crassam, penetrare, si supra eam positus leni igne fundatur; haec tamen lamella, colore plumbeo inde tincta, & integra, & malleabilis remanet (*e*): Argenti purissimi quantum placuerit, solve in aqua forti, praecipita sale communi, calcem praecipitatum edulcora aqua ebulliente, donec omni careat sapore, sicca leni calore; hujus calcis partem unam, mercurii sublimati partes duas, antimonii crudi partes tres, misce, & ex retorta vitrea igne arenae gradatim destilla: prodibit statim butyrum antimonii, quod excipit mercurius currens; ubi sic exire cessat, ignem violentum adhibe per horam; tum retortam refrigeratam frange, & materiem collo adhaerentem nigram, metallicam, fragilem, ope cultri exime; quae, moderato calore, cerae instar liquefit, estque proprie cinnabaris argenti, & antimonii. Particula hujus materiae pisi magnitudine, lamellae argenteae antedictae imposita, liquefit, ac, modo dicto, lamellam pervadit, colore plumbeo inficit, argento tamen malleabili restitante, molli, scissili, ut plumbum. Eadem ratione mercurius sublimatus corrosivus laminae argenteae candefactae impositus, eam penetrat cum sono aliquo; si vero argentum nimis crassum sit, illud excavat in profunditatem trium circiter linearum. Cinnabaris autem antimonii, argentum, aliaque metalla, sulphuris communis instar, penetrat, & fragilia reddit (*f*). Quod si cinnabaris haec, vel factitia, vel nativa, cum argenti, vel cupri limatura misceatur, ac destilletur; dat primo liquorem acidulum, ac dein mercurium vivum.

§. 275.

(*d*) Hoffm. Op. omn. Suppl. I. P. I. pag. 190, 202. (*e*) Mem. Ac. Reg. Sc. 1713. p. 310. seq. (*f*) Ibid. pag. 307.



§. 275. **C**onsiderari fane meretur firmissima hydrargyri cum argento conjunctio, quam Kunckelius describit (g). Argenti limati, laminati, aut per cuprum ex aqua forti praecipitati §. 270. semunciam, cui in vitro superaffunde olei vitrioli rectificati unciam unam, impone igni arenae primo leni, tum fortiori, donec oleum vitrioli spumescere, & fervere incipiat cum multarum bullarum adscensu; his cessantibus, argentum, & oleum conjunctim fluent instar cerae, claritate crystallina perfectam solutionem indicante; huic solutioni, si quid mercurii vivi infundatur, hic adeo indurescit, ut sine vitri fractura vix eximendus sit. Si autem in solutionem, mercurium continentem, plus olei vitrioli immittatur, tandem instar cerae fluunt, tum adeo fixe consistunt, ut non nisi magna ignis vi separari queant. Notabilis quoque est processus ille Poterii, qui in ejus Pharmacopoea Spagyrica L.2. C. 13. Hoffmanni operibus inserta, notatus habetur (h): Mercurium in oleo vitrioli solve, solutionem iterum abstrahere, habebis praecipitatum, a quo spiritum vini pluries abstrahere; hujus praecipitati partes duas, calcis argenti partem unam, & salis ammoniaci partem itidem unam, misce, ex retorta sublima; in fundo vasis remanebit materia pulcherrima, auro perquam similis, quae denuo in crucibulo fusa, in vitrum fixum, & transparens convertitur.

§. 276. **S**i solutioni argenti per aquam fortem factae, calenti adingeras, coagulum, albissimi casei instar, deponet; si tum mercurium vivum addas, ac simul destilles, abstracto humore, dein igne forti urgendo, ascendit sublimatum rubrum, estque vera cinnabaris argenti §. 136. Similiter si haec solutio spiritu salis, vel & solutione salis communis, praecipitetur; calx alba, volatilis, penetrans, obtinetur, quae fusa abit in corpus aliquantum pellucidum, & flexile, quod *Luna Cornea* vocatur. Quod, si post factam praecipitationem, portio mercurii injiciatur, tum destilletur, & sublimetur; sublimatum pro parte rubescet: sin autem haec solutio,

U 3

lo-

(g) Laborat. Chymic. P. 3. Cap. 16. p. 301. seq. (h) Hoffm. Op. omn. Suppl. I. P. I. pag. 195.

loco falis, solutione falis ammoniaci praecipitata fuerit; calx adhuc volatilior, quam dicta luna cornea, decidet; quae leni & lenta digestionem, & attenuatione majori, per quaedam falina, nonnihil mercurii currentis praebet (*i*). Similem vero modum cinnabarim argenti acquirendi etiam Cel. Hoffmannus (*k*), & Cl. Pott (*l*), iisdem fere verbis describunt: argenti purissimi uncias duas, solve in sufficiente quantitate aquae fortis; solutionem praecipita, vel solutione falis communis, vel ejusdem spiritu, vel uncia una olei vitrioli; postea injice argenti vivi uncias tres; aquositatem primo leni igne arenae per retortam abstrahere; ultimo igne violentissimo, per aliquot horas continuato, urge; sic mercurius, ex recluso argento, principium inflammabile, seu sulphureum, arripit, & cum eo, pro more suo, in cinnabarim sublimabitur.

§. 277. **B**echerus, hydrargyri ad argentum inquirens habitudinem, sequentia comperit (*m*): Si argentum vivum acuatur, & praecipitetur cum nitro, aut fale communi, & addatur calci argenti vel purae, vel per spiritum nitri crystallisatae; haec postea sublimentur: potior argenti pars cum mercurio ascendet, fietque leviter mercurius currens; *metalla enim, ait, fale, vel spiritu falis ammoniaci, sublimari, subtiliari, atque ad mercurificationem taliter habilitari posse, ut ipsis nihil, praeterquam tertium requisitum, nempe revivificatio, desit.* Memoratu quoque digna est attenuatio argenti a Junckero adnotata: Si argenti limati, aut laminati pars una, cum partibus tribus Salis Alembroth, ex fale ammoniaco, & duplo mercurii sublimati facti, *stratificetur* in cucurbita vitrea; tum igni committatur primo leni, tandem ita aucto, ut materia fluat; ita resolvitur argentum, ut superaffuso postea spiritu vini rectificatissimo, anima argenti evocari queat; quod tamen non tam cito, neque sine praevia argenti praeparatione succedere existimat; certum tamen esse: argentum aqua forti solutum, frequenti hujus menstrui applicatione insigniter volatile reddi, imo ex parte in fluxum mercurialem deduci (*n*).

§. 278.

(*i*) Junck. Consp. Chem. T. I. Tab. 34. p. 889. seq. (*k*) Op. omn. Suppl. II. P. I. p. 34. (*l*) Exerc. Chym. de sulph. metall. p. 7. (*m*) Phys. Subst. Suppl. II. pag. 409. (*n*) Consp. Chem. T. I. Tab. 39. p. 995.



§. 278. **M**ercurius acido concentrato junctus, uti est mercurius sublimatus, argentum facile, & arcte in se recipit, caloris aucti ope, summeque volatile reddit, aequae ac a simplici praecipitatione cornea, teste Junckero (o); residuum autem, quod post destillationem remanet, in vitrum succineum malleabile fundi posse, asserit Wallerius (p); quod & Boerhaavius confirmat (q) dicens: Si argenti purissimi, ex solutione praecipitata calx §. 170. miscetur cum duabus partibus mercurii sublimati, atque destillatio dein fiat ex retorta, tandem igne arenae fortissimo; in fundo retortae manet luna cornea fere perfecta; massa nempe fragilis, ponderosa, resplendens, opaca, fusca, quae in summo igne, maximam partem volatilis facta, avolat; residua vix redit in argentum, sed manet mutata, ab associatione horum salium tam profunde unitorum, fixorum, neque ulla nota salina se manifestantium. Unde & alibi de usu mercurii sublimati ait (r): certe mercurius corrosivus clavis est, Chemicis, infinitis referendis propria; ejus ope, & argenti, forte pro parte quid in aurum, prius non repertum, vertitur. Quare loco cit. sequens ponit experimentum: Si calcis praecipitatae argenti partes duae, cum parte una reguli antimonii tritu bene mixtae, destillant ex retorta igne arenae; prodit butyrum antimonii eo pondere, quo fuit regulus admixtus. Argentum cum parte reguli manet in fundo, & reductum semper dat verum aurum.

§. 279. **I**ll. Schroederus demonstravit, a mercurio sublimato, argentum penetrari, & subtilius reddi; cuprum vero, si simul additum sit, sic resolvi, & partem ejus sulphuream extrahi, ut cum argento uniri queat: Si enim argenti purissimi pars una, cupri hungarici, nihil auri continentis, partes duae, invicem confusa, granulentur: postea mercurii sublimati partes tres probe misceantur, mistura retortae vitreae indatur, atque in balneo sicco collocetur, postmodum igne primo leni, sensim aucto expellatur mercurius in aquam vase recipiente contentam: materia residua in fundo retortae resinae instar confluet; quae exempta, ad flammam candelae, cerae instar liquefcit, flammamque concipit. Haec materia

(o) Idem ibid. T. II. Tab. 63. p. 300. (p) Mineralog. p. 577. (q) El. Ch. T. II. P. III. Proc. 186. p. 302. (r) Ibid. pag. 312.

ria in plumbum fervens ingesta, colliquata, & cineritio examinata, relinquit argentum purum, quod, aqua forti solutum, parum auri dimittit (s).

§. 280. **T**ransmutatio, seu maturatio illa sic dicta argenti per mercurium & oleosa, a Verulamio tentata, hic certe locum promereri videtur; quae laudato Authore sic proponitur: *Angusta paretur fornax, temperatusque excitetur calor, & quidem talis, qui metallum perpetuo liquefactum conservet, non vehementior, quod ad rem vel maxime facit; materia sit argentum, metallum maxime cum auro symbolizans; cum eo quoque decima mercurii vivi pars imponatur, duodecima nitri, justo pondere; quae vegetando, corpusque metalli aperiendo serviunt. Velim & oleosas quandoque injici substantias, quales adhibentur recuperando auro, tormentis separationum exasperato, in eum finem, ut partes arctius, leviusque disponantur, magnum instituti momentum; aurum enim, ut constat, compactissimum, omniumque metallorum ponderosissimum est, maximeque flexibile. Nota, nemini sperandum, ut ex mercurio vivo aurum conficiat, eo quod pondere valeat, nam mercurius nullo modo exploratricibus flammis resistendo par est. Secundum ab argento locum aes, meo judicio meretur, materia ad prioris aptitudinem proxime accedens (t). Becherus, qui idem Verulamii experimentum, sub nomine minerae artificialis, adnotavit (u), credit, metalla continuo fluxu, vel caementatione detenta, & requisitis alterantibus tractata, transmutari, & perfici posse; advertit autem, plus ad Verulamii intentionem, quam verba, respiciendum esse; additque, se novisse quemdam, qui argentum diu in fluxu continendo, & per vices semper mercurium vivum injiciendo, evaporantem ope certi receptaculi recipiendo, non inanem laborem exantlarit; oleositatem autem saepius injiciendam esse, quae idem praestet, quod pulveres reductorii ex borace, fuligine, sevo, tartaro, vel ejus sale constantes, sive separatim, sive conjunctim, super luna, aliisque metallis, in continuo fluxu operentur.*

§. 281.

(s) Schroeder Unterricht vom Goldmachen. p. 423. (t) Baco Verulam. Sylv. Sylvar. S. Hist. nat. Cent. 4. Exp. 327. p. 823. (u) Phys. Subt. Exper. de miner. aren. perpet. pag. 432.



§. 281. Aliud, haud fane his inferius, est Henckelii experimentum, qui vegetatione argenti occupatus, aquam fortem multa aqua dilutam, ab amalgamate separavit, & in eam mercurium injecit, qui argentum in aqua illa adhuc contentum attraxit. Igne leni postea omnem humiditatem evaporavit, ac tenue amalgama acquisivit, quod iterum aqua forti solutum, muria salis marini denuo praecipitavit; hujus praecipitati albi drachmam unam, phialae parvae indidit, cui affudit drachmam unam olei essentialis urinae (quod nempe post repetitas repurgationes, & crySTALLISATIONES salis urinosi, olei amygdalarum instar, omni carens foetore, remanet) ac leni arenae calore per mensem digessit, donec tandem ad siccitatem materia inspissaretur; tum ignem gradatim ad candescentiam usque auxit; ita parum mercurii destillavit, residuum vero fluens instar olei, post refrigerationem, massam exhibuit vitream, coloris margaritarum, in medio regulum gryseum continentem; pondus totius massae fuit drachmae unius, granorum novem; crusta illa vitrea, scoriae instar, regulo undique obducta, separata, ponderavit scrupulum unum. Regulus ille gryseus, fragilis erat, non metallicus, durus, instar boracis vitrefacti, saporis vitriolici, metallici, qui spatio unius anni servatus in pulverem dehiscebat; hujus massae dimidiam partem Henckelius plumbo, & argento in cineritio adjecit, sic inopinato argentum auro dives obtinuit (x). Hoc phaenomenon Author quidam in amoenitatibus Physicis Berolinensibus mercurio attribuit (y). Rieger autem ait: semper in argento cupellato aurum reperiri, etiamsi hoc solum fuerit granulatum, & deinceps in aqua forti solutum (z). Becherus dicit: *argentum nitrum amat, quod nitro principium inflammabile sulphureum insit, quo argentum ad perfectionem auri indiget*; inde fieri, quod singulis solutionibus argenti, in spiritu semper nonnihil auri reperiatur (a). Sed cum idem contingat, si argentum cum arena in vitrum liquata per aliquod tempus in fluxu teneatur, posteaque iterum reducatur §. 118., imo & in omni puri argenti cupellatione aurum reperia-

X

tur;

(x) Henckel Flora Saturn. p. 478. Lips. 1722. (y) Physicalische Belustigungen T. I. p. 6. Berlin 1751. (z) Introd. ad not. rer. nat. T. I. Part. 2. p. 178. (a) Phys. Subt. L. I. p. 178.

tur; videtur & a solo igne adhibito principium illud inflammabile insinuari, & hunc effectum producere posse.

§. 282. **P**raeterea ex argento & mercurio varia parantur remedia, uti Mercurius dulcis lunaris, qui fit vel folia argenti cum mercurio dulci terendo, & postea sublimando: vel immiscendo mercurio dulci lunam corneam &c. quae tamen haud amplius in usu, nec consideratione digna sunt (*b*). Alia quidem adhuc parantur ex argento remedia, ut Sal, Vitriolum seu Crystalli Lunae, Magisterium ejusdem, Argentum hydragogum vel purgans Boylei seu Angeli Salae, Tinctura lunae, Argentum ardens seu Lapis Infernalis, Regulus Antimonii Lunaris, Bezoardicum Lunare, &c. quae tamen omnia, cum sine mercurio fiant, huc non pertinent.

§. 283. **T**andem hydrargyrum in ipsum argentum converti posse, Kunckelius docet, & quidem ope salis metallici (*c*), quale pari modo conflatum D. Linckius Lipsiensis possedit, Rothio teste; qua de re Junckerus variis in locis meminit (*d*). Becherus idem succedere affirmat sequenti experimento: Solve argentum in aqua forti vel spiritu nitri, abstrahere solutionem calore lento, ad consistentiam salis, affunde spiritum aceti, solve aliquoties, semper abstrahendo, & resolvendo; tandem cum spiritu vini sic procede, ultimo relinque in spiritu vini sal argenti sine abstractione: hic spiritus vini sine ulla corrosione, aut violentia, instillatus argento vivo communi, quasi in momento illud figit, ac in Argentum transmutat; & ne credas non plus argenti reperiri, pergit Becherus, quam in spiritu fuit; certe proba bene instituta, & pondere probe examinato, invenies ultra pondus argenti, notabilem quantitatem mercurii in argentum mutatum esse, eique accrevisse: cujus transmutationis rationem, soli penetrantiae argenti adscribit (*e*). Tandem

&

(*b*) Neumann Chym. Med. Dogm. T. I. P. 3. pag. 195. (*c*) Lab. Chym. p. 132. 218. (*d*) Consp. Chem. T. I. p. 59. 901. 1003. & T. II. p. 173. (*e*) Phys. Subt. Suppl. II. pag. 373.



& Henckel: in eadem acquiescit sententia: mercurium aqua forti solutum, ac ficcato stercore humano praecipitatum, in cupellatione argentum exhibuisse (*f*).

§. 284. **D**enique & ex ipso argento produci posse mercurium, plures fide digni affirmant Authores; Conf. Exp. §. 262. Digbeus, & Becherus sequentem quoque adhibuerunt methodum: Amalgamatis argenti mollis partes sex, mercurii sublimati partes octo probe contritas commisce, tum sublima in retorta, ut mercurium dulcem; sic quaedam portio argenti simul ascendit, & sublimatum partim salem, partim mercurium aemulatur; quod in retorta remanet, vel in argentum reduci, vel cum eodem sublimato, aut etiam novo, conteri, misceri, iterumque sublimari potest; sublimatum autem aqua calida elui ac revivificari: sic mercurius pondere auctus prodibit, cui quantum ex argento accreverit, non erit difficile examinare (*g*). Unde Stahlius monet, tractationes argenti cum mercurio sublimato, & mercurio vivo non carere miris effectibus (*h*). Quod partim ad mercurificationem, partim ad penitiorem corporum analysin referri potest. De mercurificatione autem metallorum cum mercurio, dicit Junckerus: omnes qui de hac re aliquid solidi scripserunt, unanimi consensu asseruisse, aurum & argentum in mercurium currentem redigi cum augmento potius, quam dispendio ponderis (*i*).

§. 285. **I**dem, de mercurificatione metallorum per sales, sequentia ex mente Becheri, aliorumque scribit: Sume metalli cujusvis limati partem unam, salis Ammoniaci partem dimidiam, mixta, & bene trita indantur cucurbitae, & sublimentur, capiendo spiritum, qui primum transit, volatilem; sublimatum cum capite mortuo denuo contere, iterum sublima; sublimatum cum residuo misce, atque portionem aliquam aceti, tartari calcinati, nec non spiritum supra dictum volatilem adde, probe miscendo; tuncque in vase clauso per aliquod tempus digere, tandem portionem

X 2

salis

(*f*) Kleine Mineralogische Schriften p. 117. 236. (*g*) Junck. Consp. Chem. T. I. Tab. 17. p. 398. (*h*) Spec. Becher p. 100. (*i*) Consp. Chem. Tom. I. Tab. 39. pag. 1003.

salis tartari adde, & destilla; sic spiritum obtinebis volatilem, cui spiritum salis instilla, & quidquid praecipitabitur, nisi jam mobile sit, tere cum oleo tartari, & revivifica (*k*). De argento autem alibi sequens ponit experimentum: Lunae Corneae partem unam, salis, aut, ut Becherus habet, cinerum Jovis partem dimidiam, destilla per retortam, & reperies, in collo ejus, sublimatum; hoc solve in aqua vulgari pura, ita pulverem acquies valde volatilem, qui siccatus facile, vel terendo cum oleo alkoholifato, vel ope mercurii communis, fiet mercurius; aquam decantatam filtra, evapora, habebis crystallos, seu salem, butyri instar fluentem, coloris pulchri margaritarum, odoris suavissimi, sulphurei (*l*): vid. & Becher. (*m*).

§. 286. **A**lium processum docet Kunckelius: Sume calcis argenti cum sale communi praecipitatae uncias quatuor; salis ammoniaci, salis alkali, aequaliter unciam unam, salis tartari sesquiunciam, salis urinae drachmas duas, spiritus vini rectificatissimi uncias duas; indantur omnia retortae vitreae bene clausae, stent in putrefactione per quatuor septimanas, tum gradatim administrato igne, tandemque fortissimo, sublimatur mercurius (*n*). Boerhaavius inquit: *Certe Hombergiana industria, ope tartari, calcis vivae, salis ammoniaci, & aluminis ovorum, ex selibra argenti, drachmas tres, & grana quinquaginta veri mercurii se produxisse professus fuit* (*o*). Wallerius duplicem affert modum; *primus*: Lunam Corneam misce cum aequa spiritus salis concentratissimi quantitate, digere per mensem, tum tantum spiritus urinosi infunde, quantum ad saturationem requiritur, denuo digere per mensem, dein addito sapone Veneto, & fluxu nigro ad partes aequales, ex retorta destillando prodibit mercurius vivus. *Alter*: Lunam Corneam cum sale volatili urinae, albumine ovi, & spiritu vini rectificatissimo misce, per tres septimanas digere, ac addito fluxu nigro destilla, & mercurium vivum pariter obtinebis (*p*).

§. 185.

(*k*) Idem ibid. Tab. 17. p. 398. (*l*) Ibid. p. 412. (*m*) Becher. Concord. Chym. P. 3. pag. 319. seqq. (*n*) Kunckel. Laborat. Chym. p. 331. (*o*) Elem. Chem. T. II. P. 3. Process. 186. p. 302. (*p*) Waller. Mineralog. Class. 3. p. 406.



§. 287. **T**andem & Untzerus sequenti modo, argentum mercurificandi, usus est: Cape calcis argenti partem unam, cui adde partem dimidiam, aut paulo plus Salis Ammoniaci sublimati, contrita probe, & mixta pone in vitro apto, superfunde oleum tartari clarum ad duorum digitorum eminentiam; vitrum diligenter claude, atque in balneo per mensem colloca, tunc tota massa denigratur; hanc funde in aquam communem, & ablue ab omni falsedine; hoc reitera, donec dulcis sit materia, quam exsicca, & sublima secundum artem, igne primum lento, per dimidium diem, dein fortiori, tandem fortissimo, usque ad vigesimam quartam horam. Cucurbitam refrigeratam tunc aperi, & in summitate reperies pulverem gryseum, quem contere in scutella vitrea cum aceto destillato calido, & revivificabitur. Hunc mercurium argenti ferva in vitro. In fundo vasis est materia nigra, cui iterum dimidium salis ammoniaci adde, superaffundendo oleum tartari, & procedendo cum omnibus ut prius; tandem sublima, & colliges inde plus mercurii (q). Mercurificatio autem metallorum Isaaci Hollandi per unctionem, aut calcinationem, in ejus scriptis legi potest. Denique & argentum veri destrui posse, ut ejus principia constitutiva clarius appareant, Kunckelius Author est (r).

## C A P U T VIII.

### *De Hydrargyri habitudine ad Plumbum.*

§. 288. **P**lumbum, seu Saturnus, est metallum simplex quoque, frequenter tamen aliquid argenti, vel cupri, vel, pro diversitate loci, etiam alia saepe continet metalla (s), colorem habet obscure livescentem, vel ex albo in caeruleum tendentem; ab aëre autem, & aqua mox nigrescit; molliissimum est omnium metallorum, minime elasticum, aut sonorum, facile ductile, pauca tenacitate praeditum, ita ut filum sectione  $\frac{1}{16}$  pollicis Rhenani non

X 3

ultra

(q) Unzer Anat. Spagyr. mercur. L. I. p. 104. seq. (r) Laborat. Chym. P. 3. pag. 335. seq. (s) Mem. Acad. R. Sc. 1733. pag. 313.

ultra  $29\frac{1}{4}$  libras ferat, quin partium ipsius cohaesio integre dissolvatur, ac rumpatur (*t*). Gravitate ad mercurium proxime accedit §. 176. 238; post stannum igne lenissimo fluit diu ante ignitionem; fluens, in superficie, colores variegatos acquirit, spumae instar calcem ejicit; diu fufum vasa plerumque transit; non fixum est, ab igne enim partim in fumum abit, partim vitrescit cito quidem; verum tum fufum nullo vase in igne ultra potest contineri, levia immissa fursum ejicit, cum metallis impuris vitrescit, tumque eadem secum ex cava superficie Catilli docimastici ducit, solum aurum, & argentum a caeteris pura relinquens; utpote vel fumi specie distandis, vel per testae poros transeuntibus (*u*). Facile calcinatur in cinerem gryseum, qui auctiori igne flavescit, violentiori adhuc rubescit, ac in minium convertitur; prunis candentibus impositum, fortiori afflatu ignis, totum in flores albos avolat (*x*). Si supra carbonem, foco Villettiano exponatur, idem contingit, sub copiosissimi fumi forma; super fragmento lapidis autem, foco speculi caustici expositum, partim in fumum abit, partim in cinerem gryseum, brevi flavescens, jamque rubescens migrat; qui, mox sub croceo colore fluens in massam vitream quasi foliatam talci instar, colore luteo viridescens rutilante, auripigmentum aemulans convertitur; sed quae carboni imposita sub eodem foco facile in plumbum reducitur (*y*).

§. 289. Cum hoc plumbo, mercurius facile unitur, ac in amalgama transit: Si plumbi limati parti uni, addas hydrargyri partes duas, tres, aut plures, ac simul teras, sic sensim fiet amalgama; imo si major copia mercurii plumbo affundatur, diuque relinquatur, in amalgama sponte abit, idque eo citius, si leni calore exponatur. Vel plumbo purissimo fuso infunde pondus aequale mercurii calefacti, move virgula ferrea, frigescat; est amalgama mercurii homogeneum coloris argentei, satis durum, tritu magis magisque mollescens, cui terendo in mortario vitreo, quantum volueris, mercurii admisce, unietur ut sal aquae (*z*). Sic & plum-

(*t*) Waller. Mineral. Class. 3. p. 373. (*u*) Boerh. El. Chem. T. I. P. 2. p. 21.  
 (*x*) Juncker. Consp. Chem. T. I. Tab. 38. p. 971. (*y*) Waller. loc. cit. item Mem. Acad. R. Sc. 1709. p. 173. seq. (*z*) Boerh. El. Chem. T. II. P. 3. pag. 316.



plumbo igne liquefacto, antequam penitus refrigescat, & consistat, si imprimatur in superficie fovea, cui linteolum imponatur parum mercurii continens, firmus hic, & fragilis evadit (*a*). Idem contingit, si mercurius linteo inclusus exponatur aliquamdiu supra plumbum ad ignem fluens, sic vapores plumbi fusi intra partes mercurii penetrant, iisque adhaerent, & firmam cohaesionem illarum inter se inducunt (*b*); plumbum enim, commodi furni, & vasorum aptorum adminiculo, satis alte in aëra fumi copiosissimi specie propelli posse, & diversimode a motorum aëris corpusculorum occursum ferri, ut dispersum evanescat, quotidiana docet experientia; unde confirmatur, corporum ponderosorum divisionem in minutas admodum partes ad fluiditatem eorum facere (*c*).

§. 290. **E**x amalgamate, paulo ante descripto, folia ad specula parantur (*d*); uti & mumia illa mineralis Poterii, quam Cl. Geoffroy ita describit: ex Mercurii cinnabari revivificati, partibus duabus, & plumbi parte una, fiat lege artis amalgama, quod in ampulla fictili supra carbonem continuis succussibus fortiter agitetur, donec totum in pulverem nigrum redigatur. Pulvis hic in *matracio* vitreo digeratur, donec flavescat, & servetur usui (*e*). Laudatur ad scabiem, impetigines, ulcera, callos, strumas, tumores mammarum, aliarumque partium glandulosarum, vel solus, vel cum myrrha; adhibetur quoque in emplastro magnetico dicto. Lamellae plumbeae mercurio illitae ad varia commendantur; sed de his alibi: neque enim sunt hujus loci.

§. 291. **A**malgama mercurii methodo Borrichiana tractatum quid exhibeat, vid. §. 252. Becherus inquit: *si mercurii decem partes cum plumbi vel stanni una parte amalgamentur; mercurius ex parte sua resolutoria illud statim tanquam glaciem in aqua resolvit; amalgama hoc bene teratur, & misceatur, dein in lenem digestionem in patina ponatur: sic mercurius intra duodecim horarum spatium, pulverem terreum gryseum, seu nigrum separabit, & ad*  
super-

(*a*) Boyl. Hist. fluid. & firm. Sect. 45. p. 74. seq. (*b*) Neumann Chym. Med. T. I. P. I. p. 317. (*c*) Boyl. loc. cit. Sect. 21. p. 40. (*d*) Waller. Mineral. p. 557. (*e*) Mat. Med. T. I. p. 230.

*superficiem ejicit, qui ad unum latus penna removendus, & digestio tamdiu continuanda est, dum ejusmodi pulvis cesset. Hunc pulverem Author pro sulphure metallico habet, eumque figere, & in argentum projicere jubet; ipsum autem mercurium hac operatione quoque acui, animari, augmentari, & mercurium corporum fieri putat (f).*

§. 292. **D**e plumbi cum mercurio amalgamatione, ac destillatione Becherus ait: *si ex mercurio, & plumbo amalgama facias, & mercurium per retortam igne valido iterum abstrahas ita, ut plumbum in retorta fluat: mercurium tuum accipies, sed notabiliter non modo graviolem, sed & alteratum; aliquam enim portionem plumbi ita sibi unit, ut per retortam ducat, & per corium secum vehat, nulla quod sciam arte, nisi lenta digestionem ab eo separabilem; proinde etiam tardius in fluxu suo currit, cuticulamque facit. Unde manifeste liquere dicit, in composito mercurii communis terram fluidificantem excedere, quae particulas saturni arripit, sibi miscet, ac in fluiditatem ducit (g). Imo si etiam lythargyrium, aut minium mercurio admisceatur, atque hic inde iterum destilletur; pondere similiter augmentum capiet, quod etiam iteratis abstractionibus a calce, aut limatura Martis, aegre tollitur, uti ex Oreschallo Junckerus refert (h).*

§. 293. **S**i autem plumbum, & stannum fusione misceantur, a mercurio etiam in frigore resolvuntur. At si mercurius communis aequali pondere cum marcasita, & plumbo fuso misceatur, & donec frigescat, baculo agitetur, ejus vis resolvens per marcasitam augetur, & plumbum ita resolvit, ut non modo in frigore non consistat, sed & per linteum, & corium simul cum eo transeat; mirum certe, ait Becherus, *quod sola marcasita sine plumbo non transeat cum mercurio per corium, sicut plumbum non sine marcasita, sed, quod mirandum magis, ubi corium haec tria mixta transferint, aliquot dierum spatium etiam absque ullo calore potior marcasitae pars*  
ad

(f) Becher. Phys. Subt. p. 457. (g) Id. ibid. pag. 198. (h) Juncker Consp. Chem. T. I. Tab. 16. p. 386. seq.



ad superficiem, crustae splendentis forma, ejicitur, manente plumbo perpetuum fluido, haud aliter ac fermentum cerevisiam ad fermentationem disponit, quod, hac finita, ad superficiem ejicitur. Praeterea, si cum plumbo particulam cujusvis metalli, vel reguli antimonii liquefeceris, & postmodum cum marcasita, & mercurio, praedicto modo tractaveris: plumbum quidem in mercurium resolvetur, & per corium transibit, sed admixtum metallum ad granum usque separabitur, & in corio manebit; unde patet, metalla quaedam esse magis solubilia, alia minus (i). Imo testatur Wallerius: Mercurium cum bismutho amalgamari; & si id plumbo, stanno, argento miscetur; haec metalla ad faciliorem amalgamationem disponi, ita, ut postea cum mercurio per corium transeant, imprimis si plumbum cum bismutho in mercurium prius oleo calefactum misceatur (k). Mixtura ex plumbo, stanno, bismutho, cum mercurio amalgamatis, speculis haemisphaericis conficiendis inservit (l).

§. 294. **V**aria praeterea parantur, ex plumbo cum mercurio, ad rem medicam spectantia; sic horum amalgama adhibetur ad emplastra varia, laudaturque ad scabiem, & alios affectus cutaneos percurandos. Mumia mineralis Poterii §. 290. ex eodem paratur; lamellae plumbeae, mercurio illitae, externe saepe applicantur. Ex plumbo item puro multa fiunt praeparata in officinis: ut Calces variae, Liquores, Olea, Balsami, Tincturae, Sales seu Magisteria, Emplastra, Unguenta, &c. Quorum usus externus, caute & cum prudentia adhibitus, in ophthalmia, ambustione, cancro, &c. operae pretium facit; in pustulis, rubedine, erysipellate, ulceribus manantibus, serpigine, impetigine, scabie, aliisque affectibus cutaneis, cautione opus est, ne retropulsione malum pejus inducatur. Internus autem remediorum saturninorum usus potius vitandus est; licet enim contra haemoptoën, miētum sanguineum, gonorrhaeam, fluorem album, phrenesin, maniam, melancholiam hypochondriacam, & acrimoniam sanguinis a variis commendentur; cum tamen adstringant, sanguinem coagulent, gravitate, & textura crassiori intime nervearum tunicarum poris

Y

adhae-

(i) Becher. Phys. Subt. Suppl. II. p. 383. seq. (k) Mineral. Class. 3. p. 314.

(l) Ibid. p. 557.

adhaereant, & partim rodendo, partim obstruendo noceant, motumque spirituum turbent, viscerum languores, anorexiam, obstructions, dolores, colicam, oppressiones intolerabiles, alvum clausam, icterum, ardorem internum, contracturam, paralyfin, lentam tabem, tandemque mortem inducere queant: ea potius, cum Cel. Boerhaavio (*m*) venenis adnumeranda; hinc ab interno ipforum usu omnino est abstinendum. Sed haec, utpote ad praesentem tractatum minus facientia, velut per transennam dicta sunt. Jamque ad propositum revertor.

§. 295. **E**x plumbo cum mercurio sulphur extrahi posse Hoffmannus (*n*) & Pott (*o*) asseverant, sequente quidem methodo: Solve plumbum aqua forti, solutionem aqua communi satis debilita, postea vel spiritu, vel muria salis, vel oleo vitrioli praecipita; adde tunc mercurium vivum, atque eodem modo abstrahere, & sublima uti §. 276. Sublimatum obtinebis rubrum, cinnabarim nempe, quae principium illud inflammabile sulphureum Saturni continet. Videtur his consentire Junckerus, dum ait (*p*): Calx plumbi praecipitata, si cum quarta parte sulphuris mineralis per aquam fortem fixati destilletur ex retorta vitrea loricata, praebet parum mercurii sublimati, qui tradente Glaubero, in cella in oleum mercuriale penetrans colliquescit. Eadem autem calx ubi ex aqua forti decedit, adjecta statim certa copia mercurii vivi, & instituta destillatione, abstracta prius aqua Stygia, fortiori dein igne, suppeditat rubicundum sublimatum; quod restat in fundo cucurbitae, retinet adhuc aliquid mercurii; qui si ex retorta validissimo igne expellatur, residuum, antimonii instar, striatum in fractura apparet, & cupellatum maculam auri, & argenti relinquit, uti citatus Author ex Alchymia denudata refert. De hac methodo sulphur metallorum eliciendi dictum fuit §. 135. seqq. Cui & Becherus consentit (*q*). Praeterea si plumbum cum mercurio sublimato tractetur, aequè volatile redditur, ac argentum §. 278 (*r*).

§. 296.

(*m*) Elem. Chem. T. II. P. 3. pag. 291. (*n*) Op. omn. Suppl. II. P. I. pag. 34.  
 (*o*) Exercit. Chym. de Sulph. metall. p. 7. (*p*) Consp. Chem. T. I. Tab. 38.  
 p. 972. seq. (*q*) Phys. Subt. p. 508. (*r*) Junck. Consp. Chem. T. I. pag.  
 972. & Tom. II. p. 330.



§. 296. **N**otandum hic occurrit, quod Kunckelius transmutationem mercurii in plumbum, aut metalla quaecunque imperfecta, impossibilem cenfeat (*s*); quae enim cum saccharo Saturni, vel Lythargyrio perficitur, est simplex amalgamatio, horumque reductio in plumbum; licet Johannes Rhenanus in Dissert. de Chem. veritate; Michael Mayerus in Viatorio; aliique plures asseruerint, mercurium vivum, per se alias mobilem valde, ac fluidum, in perfectum plumbum converti posse; hocque vicissim, ut Heliophilus de Percis, aliique Chemici, docent, in verum vivum currentem mercurium reduci posse, ut refert Unzerus (*t*). De productione autem mercurii ex plumbo, seu hujus mercurificatione, varii Authores varia dicunt, ac experimentis multifariis rei veritatem evincere conantur, quorum quae praestantiora sunt, hic adnectenda duxi. Becherus tradit, ex plumbo, & antimonio, solo sale communi, mercurium produci posse, atque solam aquam falsam plumbum in mercurium currentem vertere; imo & plumbum, si aëri diu exponatur, lanuginem contrahere albißimam, levi negotio in mercurium vertendam (*u*). Eitmüllerus, plumbum in aëre ponderosius fieri observavit; & Wedelius senior, in plumbeo suo atramentario mercurium invenit (*x*). Morhofius autem tradit in Epistolis de transmutatione metallorum: quod, si stilus aureus in minera Saturni parumper moveatur, particulae mercurii illi adhaerescant; videtur tamen illa minera fors mercurialis fuisse. Junckerus dicit, nullum metallum esse, e quo citius, quam e plumbo, mercurius componi, ac demonstrari queat, idque a sale communi in albam cerussam, scopo praesertim mercurificatorio corrodi, si rasura plumbi cum eo commista in cella reponatur, ut sal desuper deliquescat. Contra ab Alkali caustico longiori tempore valde resolvi, ut etiam aliquid mercurii vivi fundat (*y*).

§. 297. **D**e hac autem mercurificatione metallorum per sales, ait idem Junckerus: quod tam e sale, quam ex metallo quaedam pars ad hujus productionem concurrat; cum sine spe-

Y 2

cia-

(*s*) Lab. Chym. P. 3. p. 251. (*t*) Anat. Spagyr. merc. L. I. p. 47. (*u*) Phys. Subt. p. 57. & 314. seq. (*x*) Mem. Acad. Reg. Sc. 1733. p. 318. (*y*) Consp. Chem. T. I. p. 972. 974. 981.

cialibus additamentis ille nunquam obtineatur ; Becherum autem specialissimam mercurii affinitatem cum sale communi primum docuisse, nimirum, quod acidum illud de principio mercuriali participet, & sal communis arsenicale quid foveat, quo mediante metalla volatilia reddi, & in statum arsenicalem degenerare possint : terrae autem mercurialis tenuitatem specificam in causa esse, quo minus ex hac mixtione spiritus salis communis separari, & in aliam siccescentem terram transponi possit ; hinc metallorum mercurificationem negotium vocat difficillimum ; cum enim operationes Chemicæ potissimum sint præcipites, & magis Pyrotechniam, quam Halotechniam, & Zymotechniam referant ; hæc autem substantia tenuissima ad fluiditatem humidam fere accedat, tum ab ignis motu undique disjicitur, & inde speratus effectus non sequitur, qui magis a digestionem, & triturationem longinqua, repetitisque imbibitionibus expectandus est (7). De mercurificatione autem metallorum cum ipso mercurio dicit Hoffmannus : mercurium turgere essentia quadam aetherea, quæ in particulas metallicas homogeneas mercuriales magnetice appellit, illasque in fluorem deducit ; esse enim mercurium vulgarem ad mercurificationem metallorum haud levis operæ ; hinc quoque non inepte dixisse Veteres : *fac mercurium metallicum, per mercurium communem* (a). Totum ergo hujus rei negotium in eo absolvi videtur, ut principium illud fluidificans quocunque modo metallis ita applicetur, ut ipsis se intime insinuare, particulas aptas emollire, ac in statum fluidum deducere queat.

§. 298. **P**roductionem autem mercurii ex plumbo, Becherus variis docet modis : Plumbi granulati, quater, vel quinque cum spiritu salis perfusi, ficcati, triti ; cum æqua portione salis communis, optime misce ; mixturæ huic adde terræ Passaviensis, ad pondus utriusque ; mista pone in retortam, & per gradus, igne aperto, elice spiritum, cum quo aliqua pars plumbi quasi foliati, varii coloris, in vas recipiens transibit, atque in collo retortæ quid sublimati hærebit ; hoc cum spiritu, & materia in vase recipiente contenta, misce, ac ex nova retorta ad siccitatem abstrahe ; spiritum abstra-

(7) Ibid. T. I. p. 1016. & T. II. p. 332. seq. (a) Op omn. Phys. Med. Suppl. I. P. 2. pag. 133.



abstractum cum oleo, vel sale tartari praecipita, donec sibilus omnis cessaverit, & invenies mercurium in vase currentem. Quod si non succedat, totum ex alembico abstrahe, abstractum revivifica, & spiritu salis praecipita (*b*). Junckerus hunc processum describens, ponit loco plumbi granulati, Saturni cornei selibram, & salis communis libram unam (*c*). Alibi Becherus scribit: Saturnum corneum super oleum tartari fusum, cum triplo salis ammoniaci destillatum, mercurium dedisse (*d*). Qua super re, & Stahlius legi meretur (*e*). Dictum processum paulo secus describit idem Becherus (*f*): Solve plumbum in aqua forti, & praecipita spiritu salis, vocatur Saturnus Corneus, quem aequali pondere salis communis misce, iterumque terrae alicujus non fluentis, ut est Passaviensis, quantum ponderat, adde, probe miscendo; mixtum hoc destilla per gradus ex retorta, & non pauca pars Saturni transcendet in vas recipiens, foliorum metallicorum instar, ut in speculis utimur, prorsus fluidorum, ita ut ipsis ad plenariam mercurificationem nil praeterquam brevis manipulatio desit. Hoffmannus autem (*g*) terram mercurialem plumbi, facile in mercurium verti posse, si fumus ejus exceptus cum oleo tartari per deliquium teratur, ac destilletur, ex Bechero asseverat.

§. 299. Aliud Experimentum habet Kunckelius: Laminis tenuibus plumbi, affunde lixivium validum ex calce viva, & cineribus faginis paratum, leni calore sensim evapora humorem, per vices plus lixivii adde, denique idem in coagulum evapora, huic dein aquam calidam affunde, sic magno cum foetore sulphureo, sulphur, calcis nigrae instar, praecipitabitur; humorem clarum decanta; residuis lamellis novum lixivium saepius affunde, totumque laborem toties repete, donec omnes lamellae in talem calcem fatiscant, quam edulcoratam, & pro subtilioribus particulis obtinendis elutam, demum cum sale tartari, & limatura martis tractatam, mercurium vivum praebere asserit (*h*). Et alibi: ex ly-

Y 3

thar-

(*b*) Becher. Concord. Chym. Nro. 17. pag. 330. (*c*) Consp. Chem. T. I. p. 401. seq. (*d*) Loc. cit. pag. 333. (*e*) Fund. Chym. p. 213. (*f*) Phys. Subt. L. I. p. 404. seq. (*g*) Op. omn. Suppl. I. P. I. in not. ad Pöter. p. 208 (*h*) Laborat. Chym. p. 428. seq.

thargyri vel stanni per salem calcinati, vel & saturni cornei unciis duabus, cum cinerum clavellatorum uncia una & dimidia, & calcis vivae uncia una mistis, atque ex retorta vitrea fortiter destillatis, prodire granula quaedam mercurii, collo retortae interius adhaerentis, quae charta caerulea inde abstergi possunt, si vero distincte non appareant, aurum chartae affricum, albedine inde acquisita, certitudinem exhibitura est (*i*).

§. 300. **A**liud Experimentum describitur in libello anonymo: Sume florum plumbi, uti ex caminis furnorum in officinis metallicis abraduntur, & salis communis, & ammoniaci, partes aequales, mixta irrota urina putrida, ut pulmenti consistentiam assequatur; tum in vase apto committe fimo equino, & per duos menses in putrefactione relinque. Postea exime materiem, & per retortam phlegma, omnemque liquorem foetidum abstrahere; si quid aucto igne una sublimetur, id materiae residuae denuo adde, atque hanc cum aequo pondere cinerum clavellatorum puriorum, calcis vivae, & pauxillo limaturae ferri, probe misce terendo; mixturam rursus aliquamdiu putrefactioni expone, ac denique per retortam gradatim destilla, donec materiem quandam viscidam, butyri antimonii instar prodire videas; ultimo ignem admove violentissimum, sicque mercurius prodibit (*k*).

§. 301. **A**liud ex Unzero: Plumbi granulati Villacensis libram unam, Salis Ammoniaci puri uncias quatuor, misce, & affunde olei tartari per deliquium ad eminentiam lati pollicis, stent in vitro per octiduum in fimo, quem singulis quinque diebus renova: Sesquimense obtinebis mercurium vivum, proxima potentia. Exime ergo plumbum, & affunde acetum destillatum, tere, & agita in lignea patella pistillo ligneo, consistet mercurius vivus, quem ablutum per pannum exprime (*l*).

§. 302. **D**iversum ab his Wallerius proponit: Plumbum aqua forti solve, spiritu salis praecipita, praecipitatum aequali pon-

(*i*) Id. ibid. p. 205. & 420. (*k*) Neue Seigerung, und Erz Beitzung p. 225.  
 (*l*) Anat. Spagyric. merc. p. 106. seq.



pondere spiritus falis concentrati misce; tribus, quatuorve septimanis digere, tum spiritum urinosum adde, quantum ad saturationem sufficit; mixta iterum mensis spatio digere, demum addito fluxu nigro, & Sapone Veneto, aequali portione, destillationem institue, ita obtinebis mercurium plumbi (*m*).

§. 303. **S**ed memorabile cum primis est experimentum D. de Grosse: Sumsit is plumbi laminati minutim scissi uncias quatuor, injecitque sensim in uncias octo spiritus nitri optimi, aequali quantitate aquae diluti; & observavit, quod, ut plumbum solvatur, ita fragmenta ejus pulvere gryseo, ac brevi crusta alba obducerentur; quae cum integram plumbi dissolutionem impediret, calori arenae, ad ebullitionem usque, exposita est, sicque spatio duarum, triumve horarum, plumbum omne solutum est, liquor vero eminens, lacteus fuit; reliquit solutionem hanc in calore, donec in superficie crystalli formarentur; tum, effuso liquore, in fundo phialae invenit semunciam pulveris grysei, continentis globulos vere mercuriales; pulverem hunc porro examinans magna ex parte salinum, vel terrestrem deprehendit, sed qui aurum dealbaret. Liquor ille decantatus, brevi deposuit pulverem albißimum, subtilißimum, ponderosum; tum limpidus factus colore flavo solutionem auri cum aqua regis factam aequavit; saporem primo dulcedinis, tunc acrimoniae, linguae impressit. Liquorem hunc evaporavit, unde crystallos obtinuit, seu saccharum saturni. Hae crystalli in crucibulo fusae, vitrescentesque, regulum, uti cerussa, exhibuere. Porro pulverem illum gryseum investigando, non totum esse mercurialem comperit, sed crystallos dictas continere difficulter solvendas, hinc praecipitatas, pulveremque album; a quo solutio alba reddita est; Sollicitus ergo de separatione portionis mercurialis, & reliquarum hujus massae substantiarum, affudit aquam bullientem, ac in vase, calori arenae continuo exposuit, eo consilio, ut crystalli solverentur; liquor inde lacteus est factus, & post nychthemera crusta alba, pinguis, ad latera vasis, & in superficie liquoris apparuit, quae separata praebuit pulverem gryseum, levem, pinguedinosum, singula-

larem nempe materiam mercurialem, quae auro affricata illud dealbavit. Reliquum liquorem, qui in fundo vasis supra materiam eminebat, effudit in cucurbitam magnam, novam aquam calidam affudit, idque viginti, aut triginta iteravit vicibus; semper in superficie aquae similis cuticula pinguis nascebatur; aquam illam decantatam collegit omnem in cucurbita magna; remansit praecipitatum copiosum, aurum non amplius dealbans, pulveris albi instar, quod mirabundus examinavit, comperitque parva plumbi frustula, non dissoluta, in hoc pulvere latere, quae exactius rimando prorsus fere mercurialia deprehendit, ac cum mercurio, hac operatione enato in amalgama reducta. Aquam reliquam in cucurbita collectam evaporavit, indeque obtinuit magisterium, seu calcem, aurum nullatenus dealbantem, quae cum acido pro parte solubilis fuit, calcinata in pulverem luteum abiit, igne fortiore parum sublimati levissimi exhibuit, saporis nullius, zinci floribus fere similis, tandem violentissimo igne partim in vitrum; partim in parvos plumbi globulos reducta apparuit, supra carbonem tota, cum fluxu vero nigro ex parte tantum, in plumbum rediit (n).

§. 304. Denique & Cel. Boerhaavius tot experimentorum a variis  
**D**jaetatorum specimen capturus, labore indefesso, & summa industria, modis diversis plumbum cum salibus & hydrargyro experiri, est adnifus. Haec sua conamina partim Academiae Regiae Parisinae Commentariis; partim Actis Londinensibus inserta leguntur; quaedam item in laudatissimis Chemiae Elementis descripta habentur, quae cum habitudinem hydrargyri ad plumbum haud mediocriter illustrent, quo potui, studio collecta coram sistere adlaboravi, ut de phaenomenorum differentia iudicium ferre, causamque penitus rimari unicuique promptius, ac proclivius esset. Primum tentamen, in Elementis Chemiae propositum, sic se habet: *Salis crystallini plumbi, (cum aceto, vel spiritu nitri, facti,) accuratissime siccati, minutissime contriti unciiis duabus, adde olei tartari per deliquium uncias quatuor, pone in digestionem, quo diutius eo melius; dein adde Salis Ammoniaci unciam, misce accurate, iterum digere va-*  
*se*

(n) Mem. Acad. Reg. Sc. 1733. pag. 313 - 328.



*se clauso, egressum digerendo liquorem reaffunde; quo bis terve facto, exsiccetur materies lento igne penitus; siccata exponatur aëri humido, ut solvatur. Siccetur iterum, dein sicca materies destillet ex retorta vitrea loricata, per gradus successivos, tandem summos arenae possibiles, in excipulum magnum, in quo aliquid aquae purae adsit. Transibit materies triplex, quam miraberis; in fundo retortae singularis alia remanebit mire mutata. Ex hoc experimento, dicit Cel. Author; multa singularia prorsus addiscuntur, quae cum voluptate conspicias; nam metallum ita per oppositos sales successive apertum, solutumque, dein coagulatum, & solutum in aëre, quam maxime mutatur, aperitur, dividitur, ab omni, quod non est mercuriale metallicum, separatur, sic partem metallicam mercurialem puram seorsim a caeteris secretam exhibere poterit, si industria artis tandem eo pervenire queat (o).*

§. 305. **A**lterum, quod in Memoriis Academiae Regiae Scientiarum legitur (p), sic instituit: Dissolvit cerussam in spiritu nitri sex partibus aquae debilitato, quantum quidem solvi poterat; solutionem limpidam, filtratam indidit vasi vitreo puro, & leni calore inspissavit, postea in loco frigido reposuit, ut in crystallos abiret; harum crystallorum uncias quatuordecim in mortario vitreo contrivit in pollinem, quem aqua pluvia purissima dissolvit, solutionem hanc triplo aquae ejusdem diluit, cui postea sensim solutionem limpidam salis Ammoniaci cum aqua itidem pluvia factam instillavit; mox albicans, lactea facta est mixtura, & plumbum praecipitatum fuit, in forma pulveris albissimi, eodem prorsus modo, quo idem cernere est in solutione argenti per spiritum nitri, ubi primum in istam injicitur salis Ammoniaci quidpiam. Pulvis hic niveus, saepius lotus, & aqua multa edulcoratus, dein siccatus, insipidus plane fuit, pondere unciarum octodecim cum dimidia; hujus uncias sex in urinale vitreum purum immisit, cui affudit lixivium fortissimum, ex calce viva, & cineribus per cribrum trajectis factum, ad eminentiam duorum digitorum; phialam textit charta bibula, quam collo ejus firmiter adligavit; totum dein apparatus

Z

fur-

(•) Boerh. Elem. Chem. T. II. P. III. Proc. 175. pag. 292. (p) Ann, 1734. pag. 534. seq.

furno putrefactionis imposuit ad gradum caloris 96., ibique reliquit a 6. Februarii 1732. usque ad 13. Augusti, anni ejusdem, sex nempe mensibus, totidemque diebus. Invenit tum massam albam, salisam quam tritam indidit retortae vitreae, luto ex argilla arenaque obductae, commisit igni aperto sensim aucto, ut tandem per tres horas canderet; in collum retortae ascendit, parum fuliginis albae sed nihil mercurii; in fundo remansit materia fragilis, semivitrificata, coloris cinerei, quae in pulverem reducta eundem servavit colorem. Hunc pulverem diu in mortario terendo, miscuit lixivio ex sale alcali, & calce viva parato; mortarium, quo mixtura continebatur, charta texit ita, ut liber aëri concederetur aditus, & igne lento exsiccavit; dein novum affundendo alcali, exposuit calori graduum 96. a 18. Augusti 1732., usque ad 15. Octobris 1733., id est: mensibus fere quatuordecim, quotidie intra hoc tempus terendo, & agitando mixturam in mortario illo vitreo, quo continebatur. Sic tandem obtinuit pulverem album, siccum, acrem; quem novo lixivio affuso tamdiu teri curavit, donec in pastam abiret, quam denuo putrefactioni, ut antea exposuit, & quotidie agitando, reliquit a 15. Octobris 1733. usque ad 21. Februarii anni sequentis, mensibus nempe quatuor, & diebus quinque; massam tunc salinam, albam, sapore salem marinum aemulantem obtinuit, quae trita, ac aqua abluta, & leni calore siccata, exhibuit pulverem album, insipidum. Hunc rursus immisit in retortam loricatam, & igni exposuit violentissimo aliquot horis continuato; nullus inde prodiit mercurius, collum autem retortae coloribus variegatis pictum apparuit, massa in fundo remanens friabilis, varios colores, sibi mutuo crustarum instar incumbentes, exhibuit; pondere unciarum quinque, drachmarum sex cum dimidia; haec denique tritu reducta in pulverem cineres referebat subrutilos. Ex his conclusit, productionem mercurii ex plumbo, a tot Authoribus decantatam, experientia minime confirmari; cumque ex plumbo cum salibus facillime omnium metallorum mercurius produci jactetur: consequens esse, ut ex aliis metallis longe adhuc difficilius idem eliciatur; imo dubitare se ait, utrum Authorum asserta, non opinione potius, quam experientia, nitantur.



§. 306. **U**teriori tamen veritatis amore ductus, ex Isaaci Hollandi traditione de plumbi mercurificatione, alium non minus taediosum exantlavit laborem (q): Ex optimo Lythargyrio, & aceto destillato, oleum vel succum saturni dictum, paravit; cujus uncias duas in vase vitreo aperto, igne lento, continuo, calcinavit a 6. Junii 1734. usque ad 19. Julii, seu diebus quadraginta tribus. Pulverem inde natum album, diu minutissime teri curavit in mortario vitreo, pistillo vitreo, adjunxitque lixivium ex sale alkali fixo fortissimo cum aqua saturatissimum; mortarium charta cooperuit, servavitque in calore 90. graduum assiduo aequali, a 21. Julii ad 27. Novembris, quatuor nempe mensibus, & diebus quinque, intra quod tempus, quamprimum pulverem siccatum observaverat, inter conterendum semper novum addidit lixivium. Ultimo autem die materiam hanc siccam & albam in pollinem reduxit impalpabilem, quem in retortam vitream luto obductam immisit, & igni exposuit sensim aucto, ut tandem retorta horas quatuor ignesceret. His peractis, nec minimum mercurii globulum, vel in collo retortae, vel in vase recipiente, observavit; in fundo autem retortae, massam nigerrimam, levem, in forma pulveris, alkalini urentis saporis invenit, quem in cella in vitro plano reposuit, ubi mox incipiebat humescere, ibique reliquit a die 28. Novembris 1734. usque ad 8. Januarii 1735. adeoque quadraginta & uno diebus. Observavit materiem mole auctam, omnem portionem salinam, humiditate aëris, sponte per deliquium diffluxisse; partem vero metallicam in fundo, forma pulveris nigri reperit; haec omnia inter se confusa reliquit, & siccavit, mixturamque obtinuit nigerrimam, quam retortae vitreae denuo indidit, & igni commisit ita sensim aucto, ut in fine horis quatuor incandesceret; nec tamen hoc labore vel minimum obtinuit mercurii, sive in vase recipiente, sive in retorta, in cujus fundo remansit materies coloris cinerei, saporis admodum caustici urentis, ignis instar, quae in aëre mox liquebat.

Z 2

§. 307.

(q) Mem. Acad. Reg. Sc. 1734. pag. 547. seq.

§. 307. **C**um itaque, ope salium, nec sic quidem ex plumbō se mercurium obtinere posse videret: experimenta alia, cum mercurio nempe currente, sequenti encheiresi instituit. (r): Plumbi puri in cochleari ferreo fusi unciam unam, mercurii purissimi in alio cochleari ferreo calefacti, unciis tribus commiscuit; mox uniebantur in massam solidam, coloris argentei; quam tritam, & emollitam phialae parvae indidit prius calefactae; hanc subere obturatam in furno exposuit calori graduum 84. continuo aequali, a die 11. Februarii 1732. ad 10. Januarii 1735. adeoque triennio vix non integro; invenit posthac amalgama molle, sub pistillo fluxile, butyri instar, pondere unciarum quatuor, quod a concussu mox nigrescebat. Idem vero hoc amalgama, eodem die 10. Januarii 1735. indidit retortae vitreae purissimae, & urfit igne arenae, in sine suppressorio, ita ut per quadrihorium tota igniretur arena; transierunt in vas recipiens unciae duae, drachmae sex, cum dimidia mercurii; in collo autem, & fundo retortae pulvis apparuit ruber, in ipsa destillatione ex mercurio natus; exigua argenti vivi copia collo inerat, & aliquot miera plumbei globuli, pulveris forma, se offerebant, quae simul collecta ponderarunt grana quinquaginta & duo. In fundo retortae massa solida plumbi remansit pondere drachmarum septem, granorum quinquaginta quinque. De Saturno itaque deficiebant grana quinque, quae vero a granulis supra dictis retortae collo adhaerentibus refarciebantur; ut adeo plumbi fere nihil, hydrargyri grana quadraginta tria desiderarentur, quam jacturam tot operationibus necessario fieri, quis non videt? Ex his proinde iterum conclusit Boerhaavius, *nec mercurium ex plumbō produci, nec eundem in plumbum figi posse*; plumbum enim idem mansit, pondere nec auctum, nec imminutum; nam quod mercurius etiam per se, iteratis destillationibus tractatus, aliqua ex parte in pulverem rubrum fixum convertatur, supra, §. 214. innuimus.

§. 308. **M**irum sanē cuique videbitur, quid sit, quod similia ferre Becheri §. 291. & Kunckelii §. 299. experimenta, tam diversos a Boerhaavianis successus sortita sint? equidem hujus

(r) Ibid. pag. 549. seq.



jus causae decisionem sublimioribus lubens relinquo ingeniis; id certe inter omnes constat, quod in Chemicis operationibus exigua saepe circumstantia totum immutet successum, effectusque e diametro sibi oppositos producat. Quamvis autem Cel. Author in experimento §. 307. diuturna nempe plumbi cum mercurio amalgamati digestionem, nullam pulveris nigri inde producti mentionem injiciat; alibi tamen §. 244. ait: ab omni amalgamate, digestionem, talem acquiri pulverem. Idem fere probat sequens ipsissimi Authoris experimentum: *Purissimo plumbo in cochleari ferreo ad ignem liquefacto adfundite argenti vivi purissimi triplum, miscete, erit mistum amalgama coloris splendidi, instar argenti purissimi, ubi asservatur per annos, tale manebit, nec mutatum.* Si vero dein atteritur in mortario vitreo per vitreum pistillum, aut in Catino ligneo, ope lignei pistilli, brevi, quod miremini, tota massa nigrescit prorsus; & si tum cum affusa aqua iterum conteritur, tunc turbida nigritudine aqua supernatans effundatur; relinquit iterum amalgama purum; id si servatur, purum perstat. Si denuo conteritur, ut prius, iterum nigra reddit, nec facilem adeo dabit finem operi, ut libri promittunt, expertus loquor. Hic manifesto cernitur, mercurium plumbo mistum non repellere de plumbo, aut de se materiem illam nigram; sed quando per mechanicum hunc attritum, attenuatio, permistio, partium diversarum applicatio fit magis intima; tum exsurgit potentia illa mercurii in plumbum, & hujus in mercurium; dumque intimae mercuriales utriusque partes se invicem contingunt quam proxime, eo ipso materies ab his aliena ab utrisque illis repellitur, atque, uti locuti sunt veteres artifices, exspuitur; quae quam difficillime quacunque alia methodo inde separari poterat. Si autem amalgama ita factum, ope iteratae cum mercurio destillationis, & cohobationis tractatur, tum, ut in priore modo proposito, tritu, item actione ignis, eadem materies nigra parari, atque aqua dein ablui potest; nata iterum sic vi manifesta repellente, cujus effectum postea separatio haec feliciter obtinetur. Et valde mirabilis enascitur adunatio particularum mercurialium per virtutem prius occultam attractricem, manifestantem se, postquam repellens vis heterogenea prius separaverat, quae impedimenta dabant, ne homogenea se mutuo perfecte contingere-

rent, & tum depurata utrimque mercurialia, se mutuo amplexa, non praevisi quid generant (s).

§. 309. **N**otat porro in ultimis fuorum experimentorum scholiis (t), mercurium per destillationem a plumbo §. 307. separatum admodum fluidum evasisse, & hinc inde in vase myrrhino albo commotum, latera illius brevi colore livido infecisse, maculamque reliquisse, quae, charta absterfa, repetitis vicibus denuo comparuerit; porro talem mercurium chartae albae siccae injectum vestigia nigra impressisse, & superficiem ejus pellicula tenuissima, subpingui tectam apparuisse; unde cogitavit, an non pars metalli aliqua pinguis, tot destillationibus cum mercurio ascendat; vel, ut in Elementis Chemiae habet (u), an non mercurius aliquam plumbi partem in destillatione secum rapiat, quae adhaerens superficiei mercurii, postea separetur? minime tamen inde sequi, ait, partem illam metalli in mercurium esse conversam.

§. 310. **R**urfus aliud cum mercurio, & plumbo amalgamatis aggreffus est tentamen; hoc vero fere simile illi, quod cum mercurio puro §. 208. seq., aut quod cum amalgamate stanni, de quo postea, instituit: Inclusit amalgama ex plumbo & mercurio factum in lagenam vitream, fortem, optime clausam, cistella munitam, caudici tundenti molendini fullonarii firmiter affixit ac diuturnae & continuae exposuit conquassationi, ut videret, quid inde futurum foret; cum autem auferendo lagenam, haec mala fortuna rupta fuerit, & materia intus contenta perierit, operationis progressum infortunium hocce sustulit.

§. 311. **T**andem immortalis ille Vir, Mercurium ope plumbi sic mutare novit, ut ex fundo cucurbitae calore nondum bullientis aceti ascenderet (x): Ex plumbi selibra, & Mercurii sesquilibra factum amalgama concussit in vitro: natus fuit pulvis niger-

(s) Boerh. Elem. Chem. T. I. P. 2. pag. 371. sequ. (t) Mem. Acad. Reg. Sc. 1734. pag. 552. (u) T. I. P. 2. pag. 263. (x) Boerh. Oper. omn. Med. Nro. 14. P. 435.



gerrimus; hunc immisit cucurbitae vitreae quatuordecim pollices altae, superfudit acetum vini destillatum, geminata destillatione purissimum; abstulit leni destillatione phlegma, postea ignem parum auxit, sic tamen, ut liquor nullo modo ebulliret; ascendit in caputellum mercurius una cum phlegmate, & inde in excipulum. Idem aliis modis expertum se dicit, & rem speculatione dignam judicat. Nec multum ab simili artificio argentum vivum volatile redditum vidit adeo, ut in furno digestorio elevaretur minore calore, quam est sani hominis; ascendebat autem juxta latera vasis, erat metallo mixtum, & siccissimum.

§. 312. **P**ro coronide hujus capitis adducam Kunckelii artem, utpote ad principia hujus metalli indaganda inservientem, qua plumbum integre destruitur (y): Plumbi granulati uncias quinque, sulphuris uncias duas misce; mixtura in patina fictili prunis imposita, mox accenso sulphure, nitri instar, exardescit; residuum cum cineribus clavellatis fufum, reddit aliquid plumbi nativo durioris; Scoria superstitans si elutriatur, terram plumbi, & cinerum clavellatorum exhibet nigram; haec denuo in vase quodam super prunis ignita in ochream abit flavedinem, quae fusa validiori igne vitrum praebet pallidius; hoc si denuo fundatur injecto carbonum pulvere, partim in plumbum reducitur: partim autem in scoriam vitream irreducibilem, & penitus destructam abit; plumbum vero reductum si saepius ita tractetur, tandem totum in puram destructum iri terram asserit, ex qua verum sal saturni elici potest. Junckerus autem de hoc experimento ait (z): terram illam nigram non esse puram substantiam e destructo plumbo, & terra cinerum clavellatorum, sed de plumbo sulphurato exusto adhuc participare; an vero ex ita destructo plumbo verum sal metallicum, nec non e floribus, quae sub accensione sulphuris, & reductione cum alkali ascendunt, si commodo instrumento capiantur, mercurius plumbi produci queat: periclitentur curiosi, quorum interest.

CA-

(y) Kunckel. Laborat Chym. p. 419. seq. (z) Consp. Chem. T. I. Tab. 38. pag. 971. 976.

## CAPUT IX.

*De Hydrargyri habitu ad Stannum.*

§. 313. **E**st stannum metallum, colore albo argento proximum, molle, flexile, malleabile, minus ductile quam plumbum, sed eo nonnihil durius; auro vero metallisque caeteris mollius; magis elasticum, quam plumbum, caeteris vero metallis minus; haud adeo sonorum, nisi alia ei admisceantur metalla; tenacius plumbo, filum enim stanneum sectione  $\frac{1}{10}$  pollicis Rhenani, pondere  $49\frac{1}{2}$  librarum rumpitur (a). Est porro metallorum omnium levissimum §. 176. 283.; reliquis minus simplex, sed parvo igne fumos edens sulphureos, a parte metallica facile separandos, & fere combustibiles; unde & ad ignem longe minus durabile est (b); citius enim eo, quam metalla caetera, fluit, gradu caloris parum majore, quam aquae ferventis, diu ante ignitionem, quae non nisi post fortiores fusionem succedit; fusum citissime rursum frigore constringitur; si autem in fluore diutius detineatur, partim in fumum abit, partim in cinerem gryseum mutatur. Hujus metalli limatura, si ad candelae flammam funditur, flammam caeruleam exhibet, odoremque spargit sulphureo-alliaceum; cum nitro si fusioni exponatur, mox detonat, violentiori ignis gradu tractatum in vitrum convertitur coloris opalini. In foco Villetiano, momento funditur, uberrimos spargens fumos, albos, densos, qui excepti dant flores albos; superficies ejus calce alba subtilissima tegitur, quae sensim crystallos parvas pellucidas format, in eodem foco non amplius fusiles; Crystallos hae si fragmento lapidis imponentur, foco expositae, pro parte in vitrum vel album, vel rubescens abeunt; si autem vel crystallos hae, vel vitrum, supra carbonem, vel addito pingui quodam tractentur: mox in pristinum redeunt corpus, quod Geoffroy, & Hombergius pulcherrimis comprobarunt experimentis (c).

§. 314.

(a) Waller. Mineral. Class. 3. p. 384. seqq. (b) Boerh. El. Chem. T. I. P. 2. pag. 22. (c) Mem. Acad. R. Sc. 1709. p. 172. seq. & 1710. p. 230. seqq.



§. 314. **F**acile hoc metallum unitur mercurio, ejusque amalgama eodem paratur modo, quo §. 223. Mercurius a stanno fluente figitur, sicut de plumbo §. nunc cit. dictum est. Stannum Anglicum in laminas diductum si mercurio imponatur, gravius, & mercurius levior evadit, testante Wallerio (*d*). Amalgama stanni inservit speculis conficiendis, quorum latera obversa hoc obducuntur; sed & in aliis Mechanicorum operibus usum suum praestat (*e*). Bernoullius dicit, amalgama Jovis lumen ex vitro polito elicere, si ei affricetur (*f*), quod quidem etiam amalgamate quocunque non nimis molli fieri judico; notum siquidem est, lumen electricum ab affricu variorum corporum ad vitrum excitari posse.

§. 315. **Q**uod si amalgama stanni diu teratur, aut digestionem exponatur: pulverem nigrum in superficie generat §. 291., qui licet a Bechero pro sulphure stanni habeatur, accuratior tamen adhuc eget indagine. Quod vero idem hoc amalgama longa trituratione cum aqua salem praebeat, si methodo Borrichiana examinetur, itidem §. 252. explicatum est. Occurrit hic, quod Unzerus notat: si stanno igne liquato argentum vivum injicias, postea ab igne removeas, & ex retorta vitrea omnem mercurium abstrahas, ut stannum in fundo remaneat; postmodum mercurium abstractum iterum stanno prius fuso infundas, ut amalgama fiat, iterumque abstrahas, hoc quinquies, vel sexies repetas; stannum sic tractatum, dum inflectitur, nullum amplius edet stridorem (*g*).

§. 316. **S**i autem stanno amalgamato spiritum salis affundas, atque ex retorta destillationem instituas, liquorem obtinebis, qui vase clauso servatus quiescit; aëri aperto contiguus illico in fumum densissimum abit, licet id post multos annos contingeret (*h*). Hoffmannus ex stanno, mercurio sublimato, arsenico, spiritum fumantem parari posse dicit, ad usus Chemicos, & Mechanicos utilissimum (*i*). Et alio loco: ex mercurii partibus tribus,

A a

stan-

(*d*) Mineral. p. 389. (*e*) Collect. Chym. Leidens. p. 233. (*f*) Bernoulli Op. omn. T. II. p. 383. (*g*) Unzer Anat. Spagyr. mercur. L. I. p. 194. (*h*) Boerh. El. Ch. T. I. P. 2. p. 264. (*i*) Op. omn. Suppl. I. P. I. L. 2. in not. ad Pot. p. 207.

stanni parte una; & mercurii sublimati partibus quatuor, spiritum perpetuo fumantem, seu cum aëre fermentantem fieri (*k*). Paulo secus hunc describit Stahlius: Stanni uncias duas, hydrargyri uncias duas cum dimidia fume, fac amalgama, huic terendo, misce mercurii sublimati uncias quatuor cum semisse; destilla per retortam vitream igne arenae in vas recipiens capax, aquam frigidam continens, commissuris luto unitis. Notandum autem, mixturam hanc super lamina stannea, vel ferrea stanno obducta, si ponatur in cella, deliquescere in liquorem lacteum, *oleum mercuriale* dictum, quod tamen & solus mercurius sublimatus facit, dum sic tractatur, ac metallum corrodit (*l*).

§. 317. **G**eoffroy vero, qui similem prope describit fumantem spiritum, addit: primo prodire liquorem pellucidum, deinde spiritus impetuose prorumpentes, ac tandem flores albos ad collum, & partem superiorem retortae elevari; tunc cessante destillatione liquorem turbidum separari, ac in phiala exacte obturata servari jubet, cum, simul ac aëri libero exponitur, in fumos spissos uberrimos effundatur (*m*). Phaenomeni rationem Hoffmannus reddit, ubi de vi acidi salis communis in solutione mercurii agit: *Acidum salis communis*, ait: *mercurium prompte solvit, & arripit, & interpositione spiculorum inter globulos mercuriales motum fluiditatis impedit, ut mercurius solidescens nanciscatur consistentiam; secedit vero rursus stanni interventu. Unde destillatione fortiori forma spiritus crassi in aëre libero fumantis prodit* (*n*). Tunc enim acidum salis mercurium deserit, & stannum, quod facilius solvit, invadit. Hoc actu blandus excitatur calor, quo partes subtiliores propelluntur, & spiritus adeo volatilis inde emergit, ut per liberum aërem in fumum facile disjiciatur. Spiritus autem ille fumans unica destillatione non purus emergit; hinc a particulis metallicis liberandus est: quod fit, si aër huic spiritui in vase congruo admittatur, ut illius ope in fumum actus transpiret in vas recipiens, metallicum ita sedimentum in fundo relinquitur (*o*).

§. 318.

(*k*) Id. ibid. Suppl. II. P. 3. pag. 129 (*l*) Juncker Consp. Chem. T. I. p. 962. & 995. (*m*) Geoffroy Mat. Med. T. I. p. 284. (*n*) Hoffm. Op. omnia. T. IV. p. 569. (*o*) Stahl. Fund. Chym. pag. 63.



§. 318. **O**pe mercurii stannum sublimatur, & a solo igne, colore donatur aureo, teste Hombergio (*p*), vocatur tunc *aurum Mosaicum*, seu *Musivum*, vulgo *Purpurina*, cujus variae dantur descriptiones: Mercurii cum stanno amalgamati drachmae sex, misceantur drachmis tribus sulphuris, & totidem salis ammoniaci, sublima, quod remanet in fundo, est aurum musicum (*q*). Alium modum Unzerus docet: Stanni liquefacti libram unam fume, huic ab igne remoto, infunde uncias octo vel decem mercurii, continuo miscendo adde sulphuris contriti, & salis Ammoniaci aequaliter libram unam; optime mista, & trita in mortario lapideo pone in cucurbita vitrea, luto bene munita, coque in fornace, igne primum admodum lento, dein aucto, agitando materiam, aliquamdiu baculo, donec citrinum acquirat colorem; quo facto, ab igne tolle cucurbitam, eamque refrigerescere sine, sic obtinetur pulcherrima Purpurina, uti promittit Author, colore aureo infecta, quae postea lixivio teratur, eodemque, vel urina, addito pauxillo croci, eluatur, & aqua gummata temperetur; usus est ad pingendum, & scribendum (*r*).

§. 319. **A**liter eundem processum describit Geoffroy: Ex stanni Anglici puri uncia una, mercurii ex cinnabari revivificati drachmis decem fiat amalgama, quod misceatur cum sulphuris communis drachmis decem, & drachma una salis ammoniaci; omnia tenuissime trita, & accurate mista sublimentur igne vehementi per quatuor horas; quaedam cinnabarina substantia ad vasorum partem superiorem elevabitur, in ima vero parte spongiosa substantia aurei coloris remanebit, quae plurimis aquis lota aurum musicum dicitur; Pictoribus inservit, & Medicis nonnullis, qui illud diaphoreticum existimantes, a granis decem ad triginta exhibent in affectionibus hystericis, hypochondriacis, & febribus malignis (*s*). Alias hujus conficiendi methodos Kunckelius tradit (*t*). Boyleus de eodem dicit: Mercurium, stannum & sulphur, sublimari posse in substantiam auri similem, quae participat de plurimis, nisi forte

A a 2

omni-

(*p*) Mém. Acad. Reg. Sc. 1710. p. 234. (*q*) Waller. Mineral. p. 574. (*r*) Unzer. Anat. Sp. gyr. merc. L. I. p. 175. (*s*) Geoffroy Mat. Med. T. I. p. 284. (*t*) In Arte Vitriaria pag. 426. seq.

omnibus ingredientibus (*u*). Sic & Caneparius ex mercurio, marcasita, vel stanno, arsenico, & sale ammoniaco, aequaliter mistis & sublimatis, purpurinam fieri argenteam memorat (*x*).

§. 320. **E**x stanno cum mercurio, & bismutho, debite praeparatis conficitur *argentum musicum*, *musaicum*, vel *muffivum* dictum, cujus praeparatio iterum varie describitur; König enim sequentem tradit modum: Stanni, Bismuthi, aequo pondere sesquiunciam fume, fluant simul, agita, adde mercurii drachmas duas, fiat amalgama, quod temperatum cum albumine ovi, vel spiritu vini, in quo Gummi Laccae & Gummi Arabicum soluta sint; Pictoribus inservit (*y*). Maetrius accipit Stanni optimi sesquiunciam, committit crucibulo forti, & ubi fusionem minatur, addit Marcasitae Lunaris aequalem portionem, miscet rudicula ferrea, tum eximit ex igne crucibulum, & paullulum refrigerare finit; addit postmodo mercurii drachmas sex super igne calefacti, donec crepitet, effundit in lapidem frigidum, & super porphyritem in alcohol redigit (*z*). Non multo diversam init viam Kunckelius (*a*). Wallerius denique haec habet: Si mercurii drachmas duas cum stanni, & bismuthi aequaliter drachma una & dimidia amalgames, & ovi albumine temperes; obtinebis argentum musicum (*b*).

§. 321. **E**x stanno cum mercurio varia parantur remedia valde laudata: Sic si stanni amalgama in aqua forti solvis, & solutionem abstrahis, calcem obtinebis; quam si repetitis vicibus edulcoras, & sexies, vel decies alcohol vini affusum deflagret *Mercurium* habebis sic dictum *Diaphoreticum*. Si solutio dicta clara, & limpida ad remanentiam dimidii evaporetur, & sponte praecipitata calx tractetur ut prius, idem obtinetur remedium; quod laudant in lue Venerea, scabie inveterata, ulceribus malignis, febribus, atque obstructionibus pertinacissimis a granis duobus, ad quinque (*c*). Junckerus tamen existimat, neminem fore, qui facile hoc reme-

(\*) Boyle Tr. de Gemmar. orig. & virtut. pag. 52. (\*) Theatr. Chym. Vol. II. p. 517. (y) Emman. Koenig. Regn. Mineral. Sect. 2. p. 65. Basil. 1703. (z) Maets Chem. rat. p. 34. Lugd. B. 1690. (a) Ars Vit. P. 2. p. 427. seq. (b) Mineralog. p. 574. (c) Collect. Chym. Leidens. 1693. p. 299.



medium magnis laudibus extollat (*d*). Si autem stanni amalgama cum aequa portione mercurii sublimati conteratur in alkohol, & in cella ponatur supra tubulam marmoream, vel vitream; massa resolvetur in liquorem §. 316., portio hujus in mercurium revivificabitur; liquorem dein a mercurio separa, & per retortam primum leni igne phlegma abstrahere; tum mutato vase recipiente, oleum mercuriale purum, aucto igne prodibit, quod maximarum esse virium perhibetur in ulceribus malignis. In hoc oleo si cuprum solvatur, & in crystallos redigatur; calcinatione obtinetur pulvis aurei coloris, qui verus domitor ulcerum malignorum dicitur (*e*). Si idem oleum cum aqua forti ex nitro, & vitriolo facta miscetur, destilletur, & a mercurio vivo quater abstrahatur; mercurius inde in calcem fixam mutatur, quae saepius edulcorata, & deflagratione spiritus vini tractata, praebet mercurium diaphoreticum, seu mercuriale magnum calcinatum Paracelsi dictum, quod in morbis Chronicis pertinacissimis tantopere laudatur (*f*). Ab his tamen, ac similibus, utpote suspectis remediis, potius abstinendum judico.

§. 322. **A**lium tamen mercurium diaphoreticum commendat Hoffmannus, ex mercurii amalgamate cum stanno, spiritu nitri desuper abstracto; quem, bene praeparatum, non facile, nisi majore dosi vehementiam exercere, & salivationem excitare ait (*g*). Veram autem ejus praeparationem sic describit: ex laminis stanni Britannici puri cum mercurio depurato, lege artis sine ignis accessu fiat amalgama, a quo sufficiens quantitas spiritus nitri ex retorta vitrea igne arenae abstrahitur; pulvis in fundo retortae relictus albicans aqua pluvia edulcoratur, quod ut aptius fieri queat, spiritus vini supra pulverem aliquoties deflagretur, ut eo melius in superficiem eliciantur infixae menstrui spicula, in aquam calidam postea facile recipienda; ut vero penitus invertantur spicula menstrui corrosiva, quae elotione auferri nequeunt; cum affuso liquore nitri fixi super porphyritem aliquot horis teratur, idque, exsiccato prius pulvere, ter repetatur; ultimo exsiccata materia aqua calida abluatur,

A a 3

&amp;

(*d*) Consp. Therap. gen. Tab. 8. p. 256. (*e*) Collect. Chym. Leid. p. 202. seq.  
 (*f*) Ibid. p. 305. seq. (*g*) Oper. omn. Suppl. II. P. 3. pag. 129.

& subsidens pulvis ad usus colligitur. Hoc remedium ut plurimum per insensibilem parum auctam perspirationem, vel sudorem agit, teste Hoffmanno, si conveniens adhibeatur regimen, egregiam exferit efficaciam; addit praeterea laudatus Author, stanni sulphur multum vulgari subtilius, ac purius antimonii sulphure, cohibere quidem nimium impetum globulorum mercurialium, saliumque acriorum accessum praeccludere; at non adeo figere, & obtundere penetrandi vim, uti sulphur crassius in cinnabari facit (*h*).

§. 323. **E**xstant adhuc diversa alia praeparata ex stanno cum mercurio facta, sub titulo Mercurii diaphoretici, ut ille Poterii ex stanni amalgamate in pulverem trito, & spiritus vini repetita supra illum deflagratione (*i*); Alter Comitis Oxoniensis, qui ex mercurio, & sulphure aequali dosi, tritis supra ignem in pulverem nigrum, tum additione pauci stanni, & in crucibulo liquefactione, continuaque ignitione, in pulverem fuscum mutatur (*k*). Alia quoque ex stanno, sed sine mercurio, fiunt pharmaca, ut Sal Jovis, Diaphoreticum Joviale, Antihecticum Poterii, &c. quae vero nec hujus sunt loci, nec ea merentur laudem praeconia, quae iis nonnulli attribuunt.

§. 324. **S**olutio stanni cum spiritu salis, si misceatur cum solutione aquosa mercurii sublimati, alba evadit mixtura; in aqua Regis solutum stannum cum mercurio sublimato non albescit modo, sed & praecipitatur albedine saturata; stannum vero resolutum in spiritu vitrioli mercurium sublimatum reddit colore opalino praeditum (*l*). Sulphur ex stanno eodem modo potest obtineri, quo ex argento, §. 276. Quidam stanno hydrargyrum figere student, dum amalgamato stanno aquam fortem adfundunt, & pulverem post ebullitionem remanentem, & subsidentem, sub tegula candesciente postea urgent; sed licet calx aliqua sic remaneat, tamen haec a stanno potius, quam mercurio enascitur. Alii ex stanno nonnihil auri, vel argenti produci posse contendunt, dum fulmen Paracelsi  
lami-

(*h*) Id. T. IV. p. 584. (*i*) Idem ibid. Suppl. I. P. I. pag. 195. (*k*) Stahl. Fund. Chym. p. 193. (*l*) Hierne Acta Chemic. Holm. T. II. p. 93.



laminis stanni, vel & plumbi, vel cupri, applicant; sic subitanea horum penetratione, subtiliorumque partium unione, miculam nobilis metalli in cupellatione se manifestantem generari asserunt (*m*). Glauberus similem fulminantem mixturam ex nitro, sulphure, carbonibus tiliae, cum Jove limato, incendit, indeque non nihil auri vel argenti promittit (*n*). Cassius pulverem pyrium supra stannum vel plumbum fusum injicit, ac post detonationem, & fulminationem quaedam auri grana in cupellatione se obtinuisse scribit (*o*).

§. 325. **M**ercurium currentem ex stanno produci posse, a plurimis fide dignis asseritur, quorum experimenta praecipua hic adnectere consultum dixi: Hoffmannus ait (*p*): Si mercurii sublimati, vitrioli, nitri, aequali portione unciam semissem in aqua communi solvas, solutionem misceas cum limatura plumbi, & stanni aequali dosi drachmarum duarum, dein leni igne ad siccitatem coquas, materiem relictam destilles; habebis mercurii vivi pene unciam dimidiam, quem si cum prodeunte butyro, & capite mortuo iterum misceas diuturniore trituratione, iterumque destilles, & hoc quater repetas; tunc stannum, ac plumbum pene totum in mercurium currentem vertitur, & scoriae terrestres metallicaе nullo modo in pristinum metallum reduci possunt.

§. 326. **J**unckerus ex Glaubero, & Bechero sequentem notat modum: Sume stanni granulati, & nitri aequalem dosin quantum vis: misce, ac tigillo forti plures *Alludeles* sibi invicem adaptatos impone, quorum inferior foramen pro ingestione materiae, & superior parvum quendam exitum, vel potius alembicum vitreum cum aperto rostro habeat. Tum in candefactum prius tigillum mixturam supradictam ad drachmam unam per vicesingere, clauso semper mox foramine ope frusti cujusdam luti sicci: materia sic detonabit, & flores in sublime ferentur, quos absterge, & collige. Si flores hi iterato labore sublimentur; eo melius succedit negotium (*q*). Flores hi, praesertim sublimiores, si cum tartaro  
ad

(*m*) Juncker Consp. Chem. T. I. Tab. 27. p. 598. (*n*) Glauber Part. III. de Miner. p. 385. (*o*) Cassius de auro p. 22. (*p*) In Op. omn. Suppl. I. P. 2. C. 5. p. 133. (*q*) Juncker. Consp. Chem. T. I. pag. 401. & 967.

ad nigredinem calcinato probe conterantur, postea in aqua solvantur, addendo per vices crystallorum tartari in pulverem reductarum partem fere dimidiam, ubi effervesce incipit, vas claudatur, & post digestionem aliquot hebdomadum, finita ebullitione, lento igne destilletur, mercurius simul elevabitur, facile vivificandus. Potest quoque ex stanno mercurius acquiri, uti ex plumbo §. 299. methodo scilicet Kunckeliana; uti &, si flores dicti (aut illi, qui e caminis furnorum in officinis metallicis abraduntur; aut methodo Gebriana sublimati, injiciendo nempe stannum in pulverem redactum prunis, floresque, fumi specie adscendentes, capiendo) cum aequali pondere salis ammoniaci, & communis, misceantur, atque uti flores Plumbi §. 300. tractentur, mercurius pariter exurgit (r). Quod si, ex mente Unzeri (s), lamella stanni cum vitriolo, & sale prius calcinati, & friabilis facti, in calcem conteratur, &, admixtis sale tartari, & ammoniaco, affundatur urina, in vase apto per 14. dies stent in putrefactione, postea admisto bolo vulgari, vel tartaro, per retortam igne forti destilletur: mercurius in vas recipiens transibit, qui in aqua subsidebit.

§. 327. **S**tahlius sententiam suam hac super re sequentibus exprimit (t): non nulli hoc (attenuationem nempe & mercurificationem metallorum per sale Ammoniacum,) adscribunt meracae resolutioni metalli in partes subtilissimas; verum sane illud est, quod sal urinosum volatile, quo intimius acidae salis ammoniaci parti coagitur, eo ipso aliquid adhuc separat sive de substantia salis acidici, seu volatilis urinosi illud sit, uti v. g. in praecipitatione mercurii sublimati, aut mercurii in spiritu salis simpliciter soluti; si enim talis per affusionem salis ammoniaci, aut salis fuliginis volatilis praecipitetur, cadit pulvis tenuissimus, levis, & spongiosus, quod naturae mercurii vivi contrarium est, & accessum cujuscunque rei in hac praecipitatione manifesto designat, necessario vel a sale acido, vel volatili urinoso; si enim Sali Ammoniaco metallum aliquod adjungatur, mixtura ad tempus digeratur, tumque adjecto sale tartari fiat destillatio; spiritus urinosus aliquam metalli partem intense sub-

ti-

(r) Idem ibid. Tab. 6. p. 404. seq. (s) Anat. Spagyr. Merc. p. 105. seq. (t) Fund. Chym. Dogm. & Experim. pag. 66.



tiliatam secum corripit ita quidem, ut aurum tali spiritui impositum a mercurio, quem ex metallo factum continet, in instanti dealbetur; vel affusione nova spiritus salis, portiuncula talis mercurii ex illo spiritu praecipitari queat. Becherus de mercurio ex stanno producto ait (*u*): Claveum retulisse in Apologia sua, se nuda coctione argentum vivum, ex stanno prolicitum, in purum aurum mutare posse.

§. 328. **P**erspiciacissimus rerum naturalium indagator Boerhaavius, indefesso labore, uti caetera, ita qui se Mercurius erga Stannum, & hoc vicissim erga Mercurium gerat, exploravit; si nempe haec bina corpora unita prius, longa digestionem, conquassatione diuturna, & destillationibus tententur. Experimenta haec Commentariis Academiae Regiae Parisinae inserta sunt (*x*). Sumsit Mercurii purissimi uncias tres, Stanni optimi unciam unam, eodem modo tractavit, ac plumbum §. 236.; amalgamando, digerendo, eodem gradu caloris, per idem tempus, tandem & ex retorta vitrea destillando; his peractis obtinuit in vase recipiente uncias duas, drachmas quatuor mercurii summe fluidi, in fundo retortae invenit pulverem, cujus una pars subtilissima, pauca copia mercurii fixati composita apparebat; altera vero ejus pars crassior, nigra, ex minimis particulis, consistentia stanno similibus, constabat; in initio autem colli retortae parum adhuc mercurii haesit, quae omnia simul sumpta pendebant drachmas duas, & grana quinque; in fundo massa fuit solida, stannea, pondere unciae unius, drachmae unius, granorum novem. Deficiebant igitur grana 46., quae tot operationibus facile utique pereunt. Ex quibus conclusit: nullum hac operatione ex stanno produci posse mercurium; sed drachmae tres, grana quatuordecim, plus nempe quam septima mercurii pars, stanno unita, & adeo fixata fuit, ut ab illo separari non potuerit tali gradu ignis, quo arena quatuor horarum spatio affiduo candeat; magna certe affinitas Jovem inter, & Mercurium, in quorum medio sol est.

B b

§. 329.

(\*) Phys. Subt. Suppl. I. Cap. 5. p. 315. (\*) Mem. Acad. Reg. Sc. 1734. pag. 550. seq.

§. 329. **A**lterum ejusdem Cel. Authoris experimentum sic se habet (y) : Stanni optimi in cochleari ferreo fusi uncias duabus, affudit mercurii purissimi probe calefacti uncias decem, continuo terendo miscuit, ut fieret amalgama, quod calefactum siccissimum, immisit in lagenam vitream, quam bene obturatam, munitamque cistellae indidit lignae, hanc vero alligavit caudici tundenti molendini fullonici, ibique reliquit ut continuo fere diu, noctuque agitaretur, a 30. Novembris Anni 1732. ad 9. Januarii usque 1735., biennio nempe, cum diebus quadraginta. Lagenam tunc abstulit adhuc illaesam, in cujus fundo mercurium invenit currentem, & postquam diebus aliquot in quiete steterat, observavit, amalgama in parte superiore satis durum. Pondus totius erat unciarum duodecim. Hujus amalgamatis uncias undecim, drachmas septem ex retorta vitrea, luto munita, igne aperto, destillavit, sub finem ita aucto, ut tota retorta duas horas percandesceret. Ita eandem exacte quantitatem mercurii iterum obtinuit, quam addiderat, summe tamen fluidi; in fundo retortae massa stannea vitro adhaerens remansit, cum pauca materia flava, quasi foliacea. Haec massa facile ad ignem fusilis, stanni instar, fuit, & superficies ejus aëri exposita varios adeptæ est colores. Stanni massa ponderavit unciam unam, drachmas sex, & mediam, exigua adhuc supererat copia materiae supra dictæ flavæ. Ex his constare ait, per concussionem tam diuturnam, stannum a mercurio nequaquam ita dissolvi posse, ut mercurius inde producat, destillatione igne tam violento.

§. 330. **N**otabile est, quod mercurius, his binis operationibus, a stanno per destillationem separatus, eodem modo ac ille a plumbo §. 235., summe fluidus, & cuticula tenuissima subpingui tectus apparuerit, similiaque vestigia tam in vase myrrhino albo, quam in charta motus, reliquerit; id quod, uti supra §. 309. innuimus, parti metallica pingui, mercurii superficiei adhaerenti, seque iterum separanti, attribuit; & particulas quidem metalli, tot iteratis destillationibus, mercurio uniri posse, nihil tamen ejus in mer-

(y) Ibid. 1734. p. 551.



mercurium mutari. Rem tamen hanc animadversione dignam cen-  
seo ; cum enim mercurius , etsi eadem quantitate , multo tamen  
fluidior prodierit, an non fortasse partes suas crassiores deposuit, pu-  
rioribus, mercurialibus quidem, ex stanno arreptis ? sane id ut su-  
spicemur, & major fluiditas, & pristinum pondus suadent, multoque  
adhuc magis, quod mentio nulla fiat, an non stannum, huic opera-  
tioni superstes, durius, fragiliusque evaserit.

§. 331. **E**xperimenta haec, & similia haud parum certe lucis af-  
fundunt ad penitiorem hydrargyri cognitionem. Plura  
in hac materia elaborasse Virum Celeberrimum, & quidem modis  
longe aliis, laboriosioribusque, patet ex eo, quod horum cum  
Publico communicationem ipse sit pollicitus (z) ; ast vitam diutur-  
norem, quae Magnis fuerat saepe negata Viris ; huic quoque non  
concessam fuisse, jure dolent boni omnes. Utinam illi, qui Defuncti  
Chirographa adservant, in publica commoda illa evulgent !

## C A P U T X.

### *De habitu Mercurii ad Cuprum.*

§. 332. **A**es, Cuprum, vel & Venus, dictum, quod ex Vene-  
ris astro suas mutuari influentias olim crederetur, est  
metallum ex classe ignobilium, de variis aliis saepe participans me-  
tallis ; invenitur in mineris variis, quae omnium pulcherrima co-  
lorum varietate superbiunt ; dum purum est, diffractum colore ru-  
bicundo splendet ; caeteris metallis post argentum ponderosius §. 176  
238., eo tamen est gravius, quo purius (nisi plumbum contineat) ;  
sub malleo ductile plus quam ferrum, patet ex filis aeneis subtilis-  
simis, & foliis metallicis ex Aurichalco diductis ; elasticitate ferro  
cedit, reliqua superat ; duritiae ferro, tenacitate argento proximum ;  
filum enim aeneum, cujus sectio perpendicularis  $\frac{1}{16}$  pollicis Rhe-  
nani, libras  $299\frac{1}{4}$  sustinet, antequam rumpatur (a) ; prae cun-  
ctis

B b 2

(z) Mem. Acad. Reg. Sc. 1734. p. 552. (a) Waller. Mineral. Class. 3.  
p. 353. seq.

Etis metallis maxime tinniens, sonorum, quod fila aenea, tensa; docent. Facile igitur ante fusionem, funditur post ferrum difficillime, fusum aquae mire resistit, a cuius contactu validissime summò cum periculo movetur, & disjicitur; satis quidem est fixum, ab igne tamen forti, & diuturno fumans, ex parte comburitur, & volatile fit, partim in vitrum fuscum, vel caeruleo-viridescens; scoriaeque faceffit; in foco vitri ustorii Villettiani funditur in vitrum opacum, ruberrimum; ustione autem, & calcinatione in cinerem mutatur rubicundum; cum inflammabili quocunque reducitur facile (b). Ab aqua, aëre, vapore salium, aeruginem contrahit, & corroditur; quocunque modo solutum, & corpori humano ingestum, vim exercet emeticam; usu vero externo medicamentum praebet Chirurgicum corrosivum (c).

§. 333. **M**ercurius cum hoc metallo difficiliter unitur & in amalgama vertitur: Si Aes, subtiliter limatum sensim injiciatur spiritui nitri, vel aquae forti communi, solvitur cum ebullitione, & fumis rubris, tincturam concedens liquori viridem ipso momento injectionis; pergendo ita, donec ultima pars injecta non amplius viridescat, praesto est *solutio aeris* saturata; in quam duodecuplo aquae purae dilutam, calefactamque impositae lamellae politae ferreae incrustantur colore aeris, ferrum solvitur, & concussione cadit aes in fundum forma pulveris, qui, effuso liquore supernatante, aqua calida ablutus ad insipiditatem, siccissimus, in mortario vitreo cum aequali copia mercurii calidi contritus, dat *Amalgama aeris*, quod, affusione copiosioris hydrargyri, pro lubitu dilui poterit (d).

§. 334. **P**otest quoque Cuprum seu limatum, seu granulatum, cum mercurio calefacto sequenti modo in amalgama redigi: difficiliter tamen semper, quam reliqua metalla, eo quod cuprum de partibus heterogeneis plus participet, minusque princi-  
pii

(b) Mem. Ac. Reg. Sc. 1709. p. 169. seq. (c) Boerh. El. Chem. T. I. p. 21. item T. II. p. 303. seq. & Rieger Introd. T. I. P. I. p. 286. sequ. (d) Boerh. El. Ch. T. II. Process. 190. pag. 305. & Process. 203. p. 317.



pii mercurialis contineat §. 140. uti Neumannus testatur (e): Limaturae Cupri, vel Aurichalci parti uni paululum candefactae in mortario ferreo, addantur Mercurii vivi calefacti partes sex; continuo terendo metallum a mercurio quadantenus recipitur; quod tum apparet, affundatur, sub continuata trituratione, aqua communis, quae turbida evadet; & si Aurichalcum assumptum fuerit, Cadmiam sub forma pulveris grysei secum eluet; si vero Cuprum, pulverem subnigrum exhibebit §. 197.; effusa hac aqua, recentem affunde, denuo tere, donec nihil amplius secedat pulveris, & amalgama purum ac tenerum conspiciatur; a quo si mercurius per ignem separetur, & quod remanet, calx nempe Veneris, cum borace fundatur, Cuprum purum recuperatur; potest haec fusio, experimenti gratia, cum tubulo, in carbone excavato institui, ita docente Junckero (f), qui alio loco (g) dicit: Amalgama Cupri ex Aurichalco, Cadmiam in ipso latentem detegit; atque eodem modo metallum Principis Roberti, & Cuprum arsenico dealbatum dissolvi potest, & examinari, cum haec eadem ratione fatiscent, licet ultimum sub contusione, & tritura tenacius se gerat; ab ascendentibus autem vaporibus solícite hic cavendum. Quod vero Aurichalcum, aes illud compositum ex Cupro, & Cadmia adjectis carbonibus: metallum vero Principis Roberti ex Cupro, & Zinco, vel Marcasita aurea, addito fluxu nigro, fiat, notum est; de quo item Collectanea Leydensia (h), Junckerus (i), alique plures consuli merentur.

§. 335. Sic & per additionem Reguli Antimonii, Cuprum, vel Ferrum cum Mercurio amalgamari potest: Si enim fumus Cupri quantum vis, Reguli Antimonii simplicis aut martialis partem dimidiam, ut injecta in crucibulum candens liquefiant, effusa in mortarium ferreum calefactum contendantur in pulverem, cui calenti addantur Mercurii calefacti partes quatuor, terantur, & miscantur, donec amalgama factum sit; tum sub perpetua tritura parum aquae simplicis affundatur, teraturque donec massa integra justam habeat mollitiem: sensim Regulus secernitur, qui saepe repetita af-

B b 3

fu-

(e) Chym. Med. T. I. P. I. Sect. 6. C. 7. §. 3. 4. p. 379. (f) Consp. Chem. T. I. Tab. 16. p. 383. (g) Ibid. p. 390. (h) Collect. Chym. Leid. 1693. C. 488. p. 532. (i) Consp. Chem. T. I. p. 906. 1058. & 1061.

fusionem aquae, continua trituratione & ablutione per vices, in forma pulveris nigri eluitur, sicque purum amalgama cupri obtinetur (*k*). Idem purum, vel & Argento mistum, amalgama, in mortario ferreo tritum, in phiala clausa viginti quatuor horis digestum tanto ignis gradu, ut Mercurius paululum ascendere videatur: indurescit, & pulverem nigricantem reguli antimonii ad superficiem ejicit, qui reiterata affusione aquae, & longa cum ea trituratione, totus sensim elui potest, donec aqua pura, & amalgama splendidum maneat; quod siccatum, si ex retorta destilletur, & mercurius inde expellatur, residuum cum novo Regulo, ut ante, liquetur, cum Mercurio expulso iterum amalgametur, teratur, digeratur, eluatur, destilletur, idemque labor decies aut amplius repetatur, Cuprum sic sensim quantitate & pondere minuitur, valde fusile fit, tandemque mercurium, nisi aceto imbibatur, vix amplius recipit; calx autem in fine remanens quasi fluida, si cum quodam menstruo mercuriali, vel ad mentem Stahlii, cum oleo vitrioli, multo sale communi, aut cum vitriolo, nitro, sale, vel & ipso mercurio sublimato misceatur, destilletur, sublimetur, & ad summam attenuationem perducatur, mercurius tandem inde obtinetur. Quod si haec operatio non saepe repetitis laboribus instituitur: Cuprum in calcem quidem abit, sed reducibilem. Amalgamatio tamen haec per regulum antimonii, ad metalla duriora, & flexilia, uti est inter reliqua etiam cuprum, in pulverem convertenda, & eloto inde regulo, pura separanda inservit; abstracto enim mercurio pulvis ille statim colligi, & ad promptas, tenuesque solutiones adhiberi potest (*l*). Becherus meminit, D. Daniele Kraftium in literis, Lipsia Londinum die 5. Maji 1680. missis, asserere; se continua amalgamatione, & cohobatione mercurii super cupro, ex unaquaque libra Veneris anni spatium, per vices semunciam auri acquisivisse, ac multifariis tentaminibus rei veritatem abunde evicisse (*m*).

§. 336. **S**ubit hic alius Cupri amalgamandi modus, qui alias coagulatio mercurii cum vitriolo, & viridi aeris perperam audit. Sume Viridis aeris, Salis communis, aequales portiones, un-

(*k*) Ibid. Tab. 16. p. 383. seq. (*l*) Ibid. p. 390. 397. seq. & 907. (*m*) Becher Opusc. Chym. rar. p. 170. Norimb. & Altorf. 1719.



uncias sex, coque in vase ferreo cum aqua, addito pauco aceto; solutioni bullienti immitte argenti vivi uncias quatuor, coque, agitata, donec amalgama factum fuerit; erit massa flavescens, idque intra spatium semihorae continget; tum humorem decanta, flavum illud crassamentum repetitis aquae affusionibus in mortario tere, & purifica, ut nitidum sit (n). Fit autem hoc amalgama, tum ab acido, aerugini vel vitriolo inhaerente, ferrum invaditur, & pro parte solvitur, itaque cuprum dimittitur, quod liberum, facile mercurium recipit, & cum eo in amalgama abit (o). Huc quoque mercurii coagulatio Boylei pertinet, de qua §. 144. dictum est. Vel ex mente Poterii: *Sume Mercurii partem unam, Vitrioli caerulei partes quatuor, bulliant simul in sufficiente quantitate aquae communis in vase terreo, marte terso & polito, benigno aspectu operationem respiciente; quo peracto mercurium elice aqua frigida, atque vivum, & nondum coagulatum per alutam a coagulato separa; miraberis, mercurium austero & immaturo Veneris spiritu coagulari, fusilemque reddi.* De hac vero coagulatione Hoffmannus inquit in notis ad Poterium (p): *Mercurius ex solutione vitrioli Veneris in amplexum arripit particulas aeneas, ipsasque in amalgama convertit; unde, evocato mercurio, remanet Venus, flavescente colore tineta, & ductilis; additque Celeb. Author, longe compendiosius hanc operationem procedere, si assumatur Viride Aeris, & Tutia, aequali pondere: Nitrum, & Tartarus sesquipondere, ac igne fusorio in crucibulo clauso, liquefactio instituat: massa coloris aurei, reguli instar, fundum petet, ex qua varii annuli confici possunt.* In hac autem operatione, praeter ipsam cupri extractionem, mercurio in auras expulso; nihil nisi aurichalcum obtinetur; Tutia enim est species Cadmiae, quae, ignis ope Cupro accrescens, id flavo colore tingit (q).

§. 337. **A**malgama Cupri recens, quocunque modo confectum, carbonibus impositum candentibus strepit; at si diu foveatur loco calido, nihil omnino §. 273. Idem, cum aqua diu

(n) Juncker. Confp. Chem. T. I. Tab. 16. p. 384. (o) Ibid. p. 387. (p) Hoffm. Op. omn. Suppl. I. P. I. L. 2. p. 187. (q) Juncker. Confp. Chem. T. I. Tab. 16. p. 391.

diu tritum, vel & digestioni expositum, aut repetita digestionem, & cohobatione mercurii tractatum, uti caetera omnia pulverem praebet nigrescentem, qui nec est metallum, nec mercurius §. 144. 308. Borrichiana autem methodo §. 252. tractatum, tincturam aquae communicat flavescentem, & pauxillum salis exhibet. Caeterum notandum, quod, sicut metalla caetera etiam solo vapore, fumoque mercuriali penetrantur, ac amalgamantur, si nimirum, metallum laminatum orificio vasis calcinatorii, aut cucurbitae, in qua mercurius calore furni in fumum elevatur, impositum, vel ita suspensum sit, ut illud vapor mercurii petat, unde friabile fit, & tractu temporis in ramenta minora una cum mercurio in fumis illis recepto descendit, & amalgama format, tardius quidem, & imperfectius illo, per modum immersionis facto (r): ita etiam Cuprum, halitui hydrargyri expositum, argenteum primo acquirit colorem, sed non permanentem (s), si vero diutius ibi relinquitur, fragile evadit.

§. 338. **C**uprum itaque mercurio dealbari potest, fere uti arse-  
nico per nitrum fixato (t). Si enim mercurius praecipitatus albus, vel ruber affricetur superficiei politae lamellae cupreae, calefactae, haec inde mox argenti resplendet instar; nam Cuprum sales acidos facile trahit, & arripit ex calce mercurii; hinc statim amalgama facit in superficie cupri, coloremque inducit argenteum (u). Si monetam cupream immittas in solutionem mercurii factam per aquam fortem, vel spiritum nitri, tota quasi argentea apparebit. Mercurius vivus sale ammoniaco subactus, & sublimatus, dein per deliquium in cella solutus Venerem impositam colore argenteo elegante inficit (x).

§. 339. **A**rgentum vivum acido concentrato junctum, seu, quod idem est, mercurius sublimatus, cuprum, ope caloris aucti, facile & arte arripit, & volatile reddit; nam si per retortam destilletur, massa remanet volatilis, fusilis, flammam promte suscipiens (y). Hinc si accipias limaturae Cupri partem unam,  
Mer-

(r) Bohnius Differt. Phys. Chem. 12. §. 14. Lipsiae 1696. (s) Geoffroy Mar. Med. T. I. Sect. 7. C. 1. Art. 4. p. 301. (t) Agricola in Popp. P. 2. C. 4. p. m. 129. seq. (u) Boerh. El. Ch. T. II. P. 3. Proc. 196. pag. 309. & 341. (x) Rieger. Introd. ad not. rer. nat. T. I. P. I. p. 293. sequ. (y) Juncker. Consp. Chem. T. I. p. 910. & T. II. p. 330.



Mercurii sublimati corrosivi partes duas, simul mixta ex retorta vitrea sublimes: Hydrargyrum a Salibus separatim sub Mercurii currentis forma in recipiente colliges; Cupro cum Salibus ei intime mixtis in fundo superflite, quod inde solutum refinae forma flavum, vel rubrum transparens, interdum opace rubrum se sistet. Massa haec ad flammam candelae, ceu Hispanica cera liquefcit, accenditur, flammamque viridem aut caeruleam spargit (z). Massa haec, Junckero teste (a), quasi gummosa, fluxilis, volatilis, inflammabilis, si terrae pingui admista destilletur, spiritum dat viridem, qui, Auro addito, Mercurium praecipitatum tingere & figere debet; Cuprum autem, ait, a concentrato Spiritu Salis penetratur, & a largiore hujus acidi Salis mercurialis §. 151. coalitu volatile fit, ut subtiliores ejus partes admistionem nobiliorem transferri queant.

§. 340. **V**aria ex Cupro cum mercurio parantur remedia; sic Mercurius Veneris diaphoreticus, quem Beguinus ita describit (b): Sume Limaturae Cupri unciam unam, Mercurii sublimati uncias duas, Salis Ammoniaci uncias duas cum dimidia; haec bene mixta, trita, indantur *matracio*, & in arena calida reponantur, ut instar cerae fluant; *matracium* calidum deinde transferatur in frigidam adeo, ut Mercurius Viridis effluat, qui, ficcatus prius, in retortam exiguum indatur, cui superfundatur Spiritus Sulphuris, vel Vitrioli, digeratur per diem in cineribus calidis, & per duas cohobationes destilletur; quod remanet, bis vel ter, aqua communi, dein aqua cordiali lavandum est. Hac operatione Unzerus Mercurium Veneris quoque promittit (c). Laudatur hoc remedium in Lue Venerea, & contra Pestem, ad granum unum vel alterum exhibitum; Tali operatione quoque Mercurius praecipitatus viridis obtinetur, qui fit: dum Solutionem Mercurii Aqua forti factam mifces cum Solutione Veneris Spiritu Salis peracta (d); Hunc Geoffroy etiam sic describit: Sume Mercurii uncias quatuor, Cupri limati unciam unam, solvantur separatim in Spiritu Nitri, solutiones misce,

C c ad

(z) Mem. Ac. Reg. Sc. 1707. p. 183. & 185. (a) Consp. Ch. T. I. Tab. 15. p. 370. seq. (b) Tyroc. Chym. L. II. C. 13. p. 325. seq. (c) Anat. Spagyr. Merc. L. I. p. 105. (d) Neumann. Chym. Med. T. I. P. 3. Sect. 5. Class. 2. p. 396.

ad siccitatem evapora ; massam superstitem pulverisatam cum Aceto destillato ad sex transversorum digitorum eminentiam digere ; acetum tinctura viridi , vel subcaerulea saturatum decanta , & novum superfunde , tandem tincturam leni calore evapora ad melleam consistentiam. Igne femoto indurescit materia , quae pulverisata viridis est. Purgat per superiora , & inferiora , laudatur in gonorrhoea virulenta a granis duobus ad sex ; minus tamen tutus illius usus a quibusdam existimatur , ob Cupri venenatam qualitatem (e). Tandem & alia remedia ex Venere parata a compluribus laudantur , uti Pillulae , & Pocula perpetua , vomitum cientia , ex Cupri unciis duabus , Stanni libra una , Reguli Antimonii drachma una , liquatis & fufis , quae simul cum aliis , locis infra citatis descripta habentur (f). Circa exhibitionem horum remediorum , utpote per vires acres , corrosivas , & nunquam a cupro separandas , emeticas , in corpus humanum agentium magna cautione opus est ; namque Venus , praesertim dum spiritibus acidis est unita , classi venenorum jure merito adscribitur (g).

§. 341. **L**ocum hic meretur mirabile Becheri experimentum de Cupri resolutione (h) : Solve Cuprum in Aqua forti : inter solvendum , pars in fumum rubrum abit , quem alembico recipies , sic pauco , vel nullo accedente calore in excipulum destillabit spiritus viridis , valde subtilis ; durabit haec destillatio , quamdiu fumus ruber durat. Hic Spiritus viridis subtilissimus est , ruberque fumus per multos dies ei supernatat , viriditatem autem intensam post aliquod tempus perdit , ac aqueus apparet ; talis ex omnibus metallis procedit , si Aqua fortis concentrata sit , excepto Auro , quod in alio solvente idem praestat. Si in hoc spiritu modicum Mercurii solvas , postea evapores , & fortiori igne in praecipitatum rubicundissimum urgeas , idque in liquefactam Boracem injicias , ut bene fluat , donec borax vitreitatem acquirat , tumque effundas : vitrum eleganter caeruleum invenies ; hoc denuo liquefac ,  
&

(e) Geoffroy Mat. Med. T. I. C. 2. Art. 4. p. 257. (f) Collect. Chym. Leidens p. 57. & 532. Item Boerh. El. Ch. T. II. P. 3. pag. m. 303. Rieger Introd. ad not. rer. nat. T. I. P. I. p. 297. seq. (g) Boerh. Instit. Med. §. 1139. (h) Becher. Subt. L. I. Sect. 5. C. 2. p. 180.



& carbones debita proportione injice, rursus liquefac, & effunde: invenies animam Veneris in medio vitri ex caeruleitate condensatam, diaphanam rubini instar, quae cui usui inserviat, alibi videntum. Quod vero cessante fumo rubro, & prodeuntibus albis postea guttulis in alembico remanet, aperto tunc mox alembico calori exponatur, & totum solvatur, tunc in fundo flavum invenies pulverem, quem pro faecibus, licet Cupri homogeneis, habet; corpore enim Veneris resoluta, & attenuata, graviores ejus partes decidunt.

§. 342. **A**lii ope Cupri mercurium student figere hoc modo: Cuprum, vel Aurichalcum fluat in crucibulo, metallo fluenti injice Mercurium chartae involutum, qui prius cum quadam quantitate Tartari, & Sulphuris tritus, atque Aceto in pulpam reductus, iterumque exsiccatus fuerit; tum parum Boracis adde, & postea bonam copiam vitri in pulverem reducti, ut tota massa fluens tecta sit, ac relinquatur per aliquod tempus in igne, sic Mercurium ex parte a Cupro figi referunt, ut decima illius pars in cattillo docimastico argentum purissimum persistet. Nec tamen semper eodem modo rem succedere, tradit Aldroyandus (*i*). Sic asserente eodem Authore: Si Aeris vlti uncia una cum aequa portione Auri liquefacti fluat in crucibulo, tum cum sesquiuncia Mercurii fiat amalgama: materiae huic leni igne fluenti, injiciatur Sulphuris vivi, Nitri, & Salis Ammoniacy, aequalis dosi, agitetur baculo ferreo; refrigerata postea materia eximatur, ex retorta vitrea phlegma abstrahatur, postea diu noctuque digeratur; manebit pulvis ruber, pulcherrimae cinnabaris forma, qui fluenti Argento, & Auro injectus, ea exaltare dicitur (*k*).

§. 343. **S**i Solutio Cupri, Aqua Forti, vel Regia facta ad dimidium prius abstrahatur, cum notabilis menstrui copia ad solutionem hujus requiratur, solutio adhuc calida Oleo Vitrioli praecipitetur; (Sal enim communis hoc metallum non reddit corneum) tum si Mercurius addatur, & abstracto omni menstruo per fortio-

C c . 2

(*i*) David. Kelner Synops. Mus. Metall. p. 250. Lipsiae 1701. (*k*) Ibid. pag. 216. seq.

tiolem ignem sublimatio fiat: Cinnabaris acquiritur metallica, testibus Hoffmanno (l), Pott (m), & Junckero (n), qui postremus addit, quod, si idem labor crebro repetatur, residuum nempe Aqua forti solvendo, & cum Mercurio sublimando, Cuprum plane destrui, atque, remanente terra, verum metallicum Sal extrahi posse.

§. 344. Denique Mercurius ex ipso Cupro per Sales produci posse traditur, uti jam vidimus per Mercurium §. 335. 340. Becherus enim inquit (o): *Si ex Cupro Mercurium elicere velis, aliqua tibi ex Venere extrahenda sunt, Sulphur nempe arsenicale, Mercurium Veneris coagulans.* Et alibi dicit (p): Expertissimum Alexandrum van Suchten ipsi narraſſe, certo quodam modo fieri posse Mercurium ex Cupro, non qui colore sit, ut caeteri Mercurii, argenteo, sed viridi. Pertinet huc observatio Boylei, qui aliquando ipse Solutionem crudi Mercurii in bona Aqua forti factam, viridissimi coloris acquisivit, quem tamen non fuisse diuturnum, ipse asseverat, creditque, Mercurium ex Venere factum fuisse (q). Idem Cel. Author alio loco memorat: Solutionem Mercurii, & Cupri factam cum Spiritu Salis, coloris lutulenti subrubentis, exstitisse, quamdiu fervaretur in cucurbita, vel alio vase clauso, in quo perfecta fuerat; at effusam in phialam non clausam, sed aëri expositam, post aliquot spatium temporis, jucundum virorem, Smaragdi ad instar acquisivisse (r). Ipse quoque Becherus, insurgens in Rolfinckium hoc negantem, modum proponit illius conficiendi his verbis (s): *Praeparet ex Marte, vel Venere, more communi Vitriolum, solvat in Urina, digerat lente per aliquot dies, filtret, terram albam in filtro servet, liquorem filtratum leniter destillet per alembicum, sub finem dando ignem sublimationis, tunc in primo liquore, qui exstillat, Mercurium currentem inveniet, saltem tot grana, quae ad demonstrandam veritatem sufficient.* Liquor vero rectificatus in  
medi-

(l) Op. omn. Suppl. II. P. I. Dissert. de Sulph. metall. pag. 34. (m) Exercit. Chym. p. 7. (n) Consp. Chem. T. I. Tab. 35. p. 908. (o) Phys. Subt. Suppl. II. p. 366. (p) Id. ibid. Suppl. I. p. 315. (q) Boyle Introd. ad Hist. qualit. partic. p. 4. (r) Idem in Tract. de Magnet. Cael. & aër. p. 20. (s) Phys. Subt. Suppl. II. p. 413. seq.



*medicina si non primum, saltem non postremum locum obtinebit.* Idem alibi Mercurium Mayeri Pharmacopolae Ulmenfis sic describit: Sume Veneris limatae uncias tres, Salis Tartari uncias duas, Salis Ammoniaci unciam unam, misce, adde Aceti destillati uncias duodecim, in vase clauso per quatuordecim dies, & noctes, digere, sic ut quotidie semel terantur, tunc ex arena destilla, & sublimatum revivisce (t).

§. 345. Tandem & Rieger aliud ex Swedenborgio citat experimentum ad Mercurium Cupri producendum (u): Sume Laminarum Cupri libras tres, irrorentur Aceto destillato forti, in quo solutus sit Sal Ammoniacus, stent per quatuor dies & noctes in lentissima digestionem, dein pulverisentur, adde ad unam libram hujus pulveris Cremoris Tartari libras duas, Salis Volatilis Urinae libram unam, postea in cella fluant per octo dies: invenies Mercurium. Wallerius vero sequentem commendat methodum (x): Cupri cinis misceatur cum Sale Ammoniacico, dein per aliquot tempus aëri exponatur, cum Sapone misceatur, & destilletur, sicque Mercurius obtinetur.

## C A P U T XI.

### *De habitu Mercurii ad Ferrum.*

§. 346. Ferrum, Mars quoque dictum, quod olim crederetur ab astro Marte accipere influentias, est metallum ignobile, colore albo-gryseum, ab aëre nigrescens, fractum splendet, malleabile est & ductile sub malleo, in filamenta distractile, ut patet ex chordis Musicis ferreis; in magnam tamen subtilitatem diduci non potest quin dehiscat, aut fragilitatem prodat; est omnium metallorum maxime elasticum, docent hoc elateres horologiorum, sclopetorum, claustrorum, ferrarumque; durissimum, imprimis si in chalybem mutetur, tunc enim metalla reliqua, imo ipsum Ferrum, cum

C c 3

eo

(t) Opusc. Chym. rar. p. m. 170. (u) Introd. ad not. rer. nat. T. I. P. I. p. 299. (x) Mineral. Class. 3. pag. 372.

eo limari, scindi, cudi potest. Summa post Aurum gaudet tenacitate; filum enim ferreum sectione  $\frac{1}{10}$  pollicis Rhenani pondus sustinet librarum 450. sine solutione cohaesionis partium (*y*). Sonorum quoque est, uti rursum chordae musicae, & chalybs ipse, evincunt; pondere, post Stannum, omnium levissimum §. 176. & 238. Ab aëre, & aqua ferruginem contrahens rubro-fuscam; solvitur plurimis menstruis, variosque fuscipit colores; a Magnete trahitur, eumque vicissim trahit, is enim ex genere minerarum ferri est; ignitur facile, diu ante fusionem, imo sola trituratione, & concussione frequenti mallei, ita ut fila sulphurata accendat, & a motu violento molendinorum, & rotarum in curru, ignem excitari queat. Fortiore ignitione crepitat, fumat, scintillas ejicit a materie quasi combustili, ignitum penitus mollescit, & frigidae aquae tactum fert, a quo tamen ejus ductilitas imminuitur; fixius quidem est Stanno & Plumbo, sensim tamen comburitur, si aër liber concurrat: at, hoc excluso, diu valide resistit igni sine combustione (*z*). Omnium difficillime funditur, igne quantumvis magno, ac tum quidem malleabilitatem perdit. Foco caustico expositum quid exhibeat, pulcherrimis proposuere tentaminibus Hombergius, & Geoffroy (*a*): funditur nempe in massam nigrescentem, quasi piceam, quae dein vitrescit, fragilibusque evadit: vel avolat fere tota sub scintillis splendentibus. Porro omnium metallorum facillime destruitur, cum Plumbo & Antimonio illico in scorias abit (*b*).

§. 347. **E**st vero hoc metallum inimicum Mercurio, difficillime si quidem illi jungitur; nec Mercurius Ferrum penetrare potest, teste Dalibardo (*c*), qui globulos ex variis metallis factos ponens in mercurium currentem, ut videret, an ab effectibus aëris externi illa defendat: observavit, pondera illorum mutari, uti mutabatur coeli temperies; & quidem omnium distinctissime observavit in Auro, Argento, & Cupro, in Plumbo non adeo, quia tarde sensim

(*y*) Waller. Mineralog. pag. 327. seq. (*z*) Neumann Lect. Chym. von Salpeter, Schwefel, Spiesglas und Eisen p. 377. seq. (*a*) Mem. Ac. Reg. Sc. 1706. p. 158. & 1799. p. 164. seqq. (*b*) Boerh. El. Ch. T. I. P. 2. p. 22. (*c*) Auserlesene Abhandlungen der Königl. Acad. der Wissenschaften zu Paris P. I. p. 121. Leipzig. 1752.



sim dissolvebatur : in Stanno minus, in quo dissolutio nimis cito succedebat: in Ferro autem plane nullam gravitatis mutationem observabat, ob rationem ante dictam. Ferrum hydrargyro immersum innatat, lamina autem Ferri tenuis, si hydrargyro impressa per aliquot dies teneatur, fragilis fit a subtili quadam penetratione, ut Junckerus loquitur (*d*). Quod si eadem lamella in Mercurium currentem immittatur, ac vase purissimo clauso fervetur: brevi tota corrosa, in pulveris rubri formam fatiscet (*e*).

§. 348. **S**i autem Ferrum mercurii vaporibus exponatur: tam durum inde fit, ut instar vitri frangi possit (*f*). Id quod etiam Dorneus affirmat: Trabem, seu catenam ferream totam ex parte, qua Mercurii fumum excepit, instar vitri fragilem reddi (*g*). Chalybs candefactus, si aquae loco in Argento vivo exstinguatur, durior fit, & commodus ad instrumenta, quibus ferrum, vel lapides scalpuntur, uti & ad caela fabricanda (*h*). Ferro autem fuso si Mercurius injiciatur, in auras fumi instar, avolat, Ferrumque immutatum relinquit.

§. 349. **H**ydargyrum cum Ferro non nisi arte, & singulari labore amalgamari potest; vera enim, & intima horum conjunctio difficillima est, & ut Geber loquitur, subtile requirit ingenium. Poterius tamen sequenti modo id fieri monet: Limatura Martis recens, & Mercurius optime purgatus, sufficienti quantitate Vitrioli caerulei adjecta, cum debita proportionem Aceti acerrimi, coquantur per tres, vel quatuor horas, spatula lignea continuo agitando, novumque subinde Acetum addendo; postea Mercurius a Ferro, caeterisque, aqua frigida affusa segregetur, per corium prematur; sic in corio habebis Amalgama (*i*). Tentandum foret, an non forte Bismuthum, aut Regulus Antimonii, amalgamationem hanc adjuvent? Certum siquidem est, Regulum Antimonii martialem, Martis quid continere, & tamen certa encheiresi cum mercurio

(*d*) Consp. Chem. T. I. Tab. 36. p. 931. (*e*) König Regn. Miner. Sect. 2. C. 8. p. 79. Basil. 1703. (*f*) Paracels. Op. omn. Vol. II. L. de Conserv. rer. nat. p. 89. Genev. 1658. (*g*) Gerard Dorn. Pract. C. 17. (*h*) Junck. Consp. Chem. T. I. Tab. 36. p. 929. (*i*) Hoffm. Op. omn. Suppl. I. pag. 195.

rio amalgamari posse uti §. 335. dictum est: Sed de hoc in Capitulo de habitudine Mercurii ad Antimonium commodior erit scribendi locus. Kunckelius quidem testatur, Mercurium cum Ferro adeo uniri posse, ut arctissime semet amplectantur, & Mercurius plane figatur (*k*). Cui Pott subjungit (*l*): tam Sulphur Martis subtilius, quam ejus Sal intimus, vel breviori via utraque, mediante Oleo Vitrioli, per cohobationem, cum Mercurio uniri, & fere totum figi, ut reduci non possit.

§. 350. **A**dmirabile est, quod Libavius de emollitione Ferri scribit: ferrea instrumenta, inquit, affricu Argentum Vivum fiunt fragilia, quod conducere potest ad Crocum Martis parandum. Quidam jubent ferreis canalibus, seu cannis, aut pixidibus, Plumbum includere, in igne cremare, ut Plumbum effugiat; dein novo indito opus repetere; quod si fiat aliquoties, cereum fieri Ferrum ait; Plumbo ei humiditatem mercurialem communicante. Alias Ferrum, illitum Pasta ex luto, tartaro, ac sulphure facta, ac igne lignorum candefactum, pariter mollius evadit se ipso. Vel si fimo equino argilla misto obturetur, ignibusque cremetur. Alii Oleo Lini restinguunt laminas ferri candefactas, donec mollescant, Aeris Cyprii instar, dein Amalgamate ex Plumbo, & Argentum vivo perlitas, inferunt in Caementum atque inter prunas per tres horas relinquunt. Laminis his si quartam Plumbi candidi partem adjeceris, & una liquaveris: Ferrum argenteum obtinebis. Plures alios idem Author recenset modos emolliendi Ferrum, sic alibi dicit: Ferrum purgatur Aquis deterforiis, & Mercurio immergitur, a quo purgatur. Funditur & cum Stanno, indeque facta scobs, aut lamellae, Argentum vivo macerantur: sic facile amalgamatur, & ope hydrargyri purgatur, quo minus corrumpi possit (*m*).

§. 351.

(*k*) Juncker. Consp. Chem. T. I. Tab. 39. p. 1014. (*l*) Dissert. de Sulph. metall. p. 45. (*m*) Libavius L. 6. de qualit. Magist. p. 232. & 239. seq. Francof. 1611.



§. 351. **Q**uo tamen penitus pernoscerem, qua ratione Solutiones Ferri & Mercurii, diversis menstribus factae, ac mixtae se gerant, sequentia ipse perfecit specimina: Solutioni Martis cum Spiritu Nitri factae coloris obscure aurantii, aequalem affudi solutionis Mercurii limpidae portionem, quae posterior fundum distincte petebat, agitando miscui, & limpida manebat mixta solutio; hanc ex retorta destillando, igne arenae primum lento Spiritum nitri debilem obtinui: aucto deinde, concentratum fumantem, vaporum rubrorum forma in excipulum transeuntem. Adhuc fortiore igne ascendebat ad colli extremitatem Sublimatum pulcherrimi citrini coloris, ventrem versus pulchre rubescens, priore compactius, insipidum; in fundo remansit massa sicca, fragilis, ex fusco rufescens, moleculis pulchre rubentibus, velut cinnabarinis interspersis, quae, igne aperto fortissimo calcinando, dedit parum Salis sublimati, albicantis, acerrimi, & tantillum Mercurii vivi purissimi, mobilissimi, extremo retortae collo undiquaque adhaerentis, & speculum quodammodo repraesentantis. In fundo remansit Crocus martis subruber, insipidus, vix adstringens.

§. 352. **I**n similem Solutionem Martis cum Spiritu Nitri injeci parum Mercurii, qui cum effervescentia, & calore solvebatur illico, solutio haec evadebat turbida, ex qua destillationi ut prius commissa, prodiit primo Spiritus nitri itidem debilissimus, tum fumans, ac aucto ita igne, ut retorta percandesceret, elevabatur in anteriorem colli retortae partem Sublimatum album, aut cinereum potius, corrosivum, tandemque citrinum; versus alvum retortae vero parum Sublimati rubri insipidi haerebat; massa in fundo residua sicca, fragilis, ex fusco rubescens, stiptica deprehendebatur.

§. 353. **P**orro in Solutionem Mercurii per Spiritum Nitri factam injeci modicum limaturae Martis; clara mansit in frigore solutio, intacto Marte: qui vero in calore mox dissolutus est. Ex hac solutione; per destillationem prodiit primum nitri

spiritus acidulus debilis ; igne sensim , usque dum retorta canderet , aucto , Sublimatum , fere ut in superiori experimento , reperi , nisi quod in hoc obscurior videretur color ; sed nec residuum a priore differebat.

§. 354. **S**imilia quoque cum Ferro, Mercurio, & Aqua Forti tentavi : Solutioni Martis cum Aqua forti factae, rubicundae ; addidi similis solutionis Mercurii aequam portionem , huic subsidenti innatabat altera , agitando utraque unita clara manebat, nihilque praecipitabatur ; destillando primum Aqua fortis debilior , tum concentrata , vaporum rubrorum forma , in vas recipiens transibat ; deinde ignem fortissimum , quatuor horarum spatio adhibui ; tandemque frigefactam retortam fregi , in cuius anteriore colli parte inveni parum Sublimati albi, crystallini, corrosivi : in media erat Sublimatum crystallinum , pulcherrime citrinum ; parum salinum : in posteriore vero , alvum versus , haerebat pauxillum Sublimati jucunde rubescentis, splendentisque, & magis compacti ; residuum obscure rufescens igne aperto calcinavi , ex quo elicui parum Mercurii , uti §. 352. ; remansit in fundo Crocus Martis subruber , ad colorem purpureum accedens , insipidus , vix adstringens.

§. 355. **S**ic & Solutioni Martis cum Aqua forti , addidi parum Mercurii vivi , qui leni calore brevi dissolvebatur , turbabatur solutio ; quam destillationi commisi in retortula luto obducta , igne aperto , prodiit sensim Aqua fortis : aucto igne ascendit parum Sublimati albi corrosivi ; cui proximum adhaerebat citrinum , parum falsum ; ast parte posteriore colli reperiiebatur Sublimatum pulcherrimum , ipsa Cinnabari dilutius , floridiusque rubens , insipidum , vitro firmiter inhaerens. In fundo erat Crocus Martis , ex fusco rubescens , pulverulentus , insipidus , vix adstringens.

§. 356.



§. 356. **S**olutioni Mercurii simili addidi parum Limaturae Martis recentis, quae statim solvebatur cum ebullitione; abstracto ut in praecedentibus experimentis menstruo inveni in anteriore parte colli retortae Sublimatum albescens gryseum, leve, spiculis albis splendentibus praeditum: in posteriore vero elegantissime citrinum, crystallinum vix corrosivum; cui proxime adjacebat Sublimatum pulcherrime rubescens, compactum, insipidum; quae in retorta supererat materia, spongiosa, coloris obscuri, saporis vix salini, insipida fere, parumque adstringens comperiebatur.

§. 357. **C**um Spiritu Salis, qualis nempe in Pharmacopoliis prostat, haud absimilia institui tentamina; ast quamquam ab hoc menstruo neque Mars, nec Mercurius dissolvi videatur, nisi pauca quantitate: menstruum tamen viridiusculum, ac turbidum evadit, Marte interim, ac Mercurio, etiam post coctionem fundum petentibus, quorum tum hic plumbeum colorem induit. Notandum vero, me in omnibus his enarratis experimentis ad quatuor uncias menstrui unciam dimidiam Ferri, & Mercurii applicuisse; geminas Solutiones has, Martis nempe, & Mercurii cum Spiritu Salis separatim factas una cum sedimentis conjungi, ac ex retorta loricata, igne aperto & per gradus aucto destillavi; Ultimo tandem adeo magno, ut retorta penitus candesceret. Prodiit primo liquor acidulus, salinus, non corrosivus, odore parum martialis, pondere unciarum sex, & dimidiae; in anteriore colli parte haesit Sublimatum cinereum, leve, pulverulentum, globulis Mercurialibus hinc inde interspersis; quod exemptum ponderavit grana quinquaginta, quodque in aëre libero brevi in deliquium abiit. Huic proximum erat Sublimatum albissimum, pulcherrimas in crystallos concretum, siccissimum, corrosivum, pondere drachmae unius, granorum quinquaginta. In retorta remansit massa nigricans, resplendens, sicca, spongiosa, friabilis, salina, admodum stiptica, similis pulveri limaturae Martis subtilissimo, quae humorem aëris brevi attrahebat, ponde-

rabat autem unciam unam, & grana quadraginta. Residuum hoc parvae cucurbitae indidi, cui capitellum imposui, excipulumque applicui, sicque fortissimo arenae igne materiem calcinavi, ut integra canderet hora; ascendit parum Sublimati, valde stiptici, & adstringentis, colore ex flavo nigrescente, quod in cubili, spatio viginti quatuor horarum, in rubicundum deliquescebat humorem; verum idem humor intra paucos dies rursum concrevit in massam luteam, quae leni calore velut cera diffuere, in frigido iterum consistere observata est. Quod in retortae fundo supererat forma limaturae Martis, splendens, nigrum, valde adstringens, ab aëre itidem humescens deprehendebatur.

§. 358. **S**imili Solutioni Martis cum Spiritu Salis infudi parum Mercurii, qui brevi cuticula quasi cinerea obductus apparebat, nec solvi poterat, licet coqueretur, sed totus fere quasi plumbeus in fundo remanebat. Mixturam hanc iterum, ex retorta luto munita, igne aperto destillavi, ut antea: prodiit liquor subacidus, stipticus, martialis; in collo retortae parum Sublimati, cinerei, splendentis, una cum granulis Mercurii haesit, quod in aëre brevi deliquescebat. Posterius Sublimatum erat album, crystallinum, corrosivum: massa vero in fundo remanens fusca, lutescens, corrosiva, stiptica deprehensa est, quae vitro tam firmiter adhaerebat, ut ab eo separari nequiverit, ideoque massam una cum vitro contudi, ac in phiala crucibulo imposita calcinavi, ut §. praecedente dictum est, sic in superiore colli parte obtinui parum Sublimati splendide flavescientis, mox in aëre liquescentis; inferius aliud erat Sublimatum, splendens itidem, & crystallos ferreas minimas exhibens, saporis parum salini, sed admodum adstringentis, idque in aëre libero brevi rubedinem hinc inde contraxit, cinnabaris sublimatae fere ad instar, dumque microscopio lustrabatur, crystallos rubras, pellucas, pulcherrimas, velut rubinos totidem exhibebat, ab aëre parum humoris quidem concepit, nec tamen in deliquium abiit. Residuum in fundo fuit massa dura, fragilis,









gilis, splendens, nudo oculo, ut ferri limatura, compacta apparuit, microscopio vero examinata, spicula splendidissima continere visa est.

§. 359. **U**lterius Solutioni Mercurii cum Spiritu Salis factae parum Limaturae Martis injeci; mixtio coctione turbida, ac flavescens evasit; quae destillatione igne aperto exhibuit liquorem martialem non corrosivum: tum Sublimatum primo gryseum adhaerentibus globulis mercurialibus, deinde crystallinum album, corrosivum; residuum forma pulveris nigrescentis, vel, limaturae Martis remansit stipticum valde, & adstringens.

§. 360. **S**umsi denique Spiritus Vitrioli, qualis venum prostat, uncias quatuor, huic injeci unciam dimidiam Limaturae Martis; solvebatur brevi Ferrum, solutio erat viridis, quae loco frigido crystallos in fundo dabat, Vitriolum nempe Martis. In similem ejusdem spiritus quantitatem infudi Hydrargyri unciam semissem, quod neque coctione solvi poterat, sed in fundo, forma calcis gryseae albescentis, jacebat. Has binas solutiones calidas miscui, retortae vitreae loricatae indidi, destillationi commisi; prodiit primum liquor acidus, odoris sulphurei, volatilis, penetrantissimi, non corrosivus, ad uncias sex cum dimidia: igne fortiori sensim aucto ad excandescentiam retortae continuo, prodiit parum liquoris acidi concentrati, nebularum albarum facie; in collo retortae reperi Sublimati albisimi, corrosivi drachmas sex, in fundo retortae Materiem in superficie fragilem, subrusam, inferius pulverulentam, coloris incarnati, siccissimam, insipidam, pondere unciae unius, aetrium drachmarum; quae tota igne aperto fortissimo calcinata nihil sublimati amplius praebuit, sed parum fumans in Calcem abiit rubicundam, insipidam fere, quae attracto ex aëre humore colorem obscuriorem adepta est; saporem vero vitriolicum, stipticum, adstringentem.

§. 361. **E**idem solutioni Ferri ope Spiritus Vitrioli, instillavi parum Mercurii, qui etiam in calore immutatus in fundo perstitit; hujus misturae destillatione obtinui liquorem acidum sulphureo-volatilem, & Sublimatum corrosivum albißimum, cui Mercurii puri granula adhaerebant; residuum in retorta summo igne calcinatum pulchre rubrum, Colcotharis instar siccum, saporis parum vitriolici, adstringentis deprehensum est, quod ab aëre haud multum humescebat.

§. 362. **R**ursum Solutioni simili Mercurii cum Spiritu Vitrioli §. 360. factae, injeci parum limaturae Martis, quae solvebatur, solutio turbida, flavescebat, quae eodem modo destillata primo dedit liquorem acidulum, dein parum sulphureum volatilem, vaporum alborum forma; igne intensiori ascendit Sublimatum corrosivum album, cum adhaerentibus nonnullis Mercurii granulis; remansit in fundo retortae corpus in superficie quasi gryseum, inferius rubrum, acre, stipticum, in aëre admodum humescens.

§. 363. **U**ltimo idem cum Oleo Vitrioli meracissimo tentavi, drachmis nempe duabus Limaturae Martis, uncias duas olei Vitrioli affudi, calori arenae ad ebullitionem exposui; Mars in calcem ex fusco albicantem redactus in fundo mansit. Eandem Mercurii, & Olei Vitrioli quantitatem in phiala parva ebullitioni exposui; Mercurius in calcem albam mutatus in fundo apparuit; has solutiones miscui in retorta, & destillavi igne primum lento, quo Liquorem acidum sulphureum, penetrantissimum elicui; vehementiore autem, vas recipiens nebulis albis replebatur, quo continuato ascendit in collum retortae parum Sublimati albi corrosivi: in fundo vero remansit Calx alba, ponderosa, friabilis, saporis vitriolici, adstringentissimi; haec affusa aqua mox luteum induebat colorem, in aëre item sponte deliquescebat; quam dum in phiala igne fortissimo calcinavi ita, ut horae spatium per-  
candesceret, obtinui sublimatum albißimum, splendidissimum;  
ma-



maxime corrosivum; in fundo phialae mansit Crocus Martis omnium pulcherrimus, coloris fere coccinei, saporis vix ullius, nisi adstringentis, qui dum aëri exponebatur, parum humidi attraxit. Ex quibus demum conficitur, Mercurium Ferro nunquam intime uniri posse, nisi forte in experimentis a §. 351 - 356. recensitis, Principio Martis inflammabili junctus, sublimatum illud rubrum constituere dicatur.

§. 364. **S**i Ferrum Aqua Forti vel Regia solvatur, solutio ad medium abstrahatur, & calida Oleo Vitrioli praecipitetur, additoque Mercurio sublimetur, uti de Cupro §. 266. dictum fuit: Cinnabaris metallica pariter obtinetur (n). Ex conjunctione nempe Principii Inflammabilis Ferri cum Mercurio; unde omnia metalla sic disponuntur, praeparantur, recluduntur, ut verum Sulphur, & terra tingens ex ipsis separari possit; flavum autem, leve, corrosivum sublimatum, quod in sublimatione superiores occupat partes, a rubro, gravi, insipido, metallico, sollicitè est separandum, hoc a modo citatis Authoribus *Cinnabaris* dicitur, quae si ex perfectis metallis parata sit, eximios in re medica praestet effectus. Sulphur autem ab hac Cinnabari iterum liberari posse, §. 138. dictum fuit.

§. 365. **A**n ex Ferro, & Mercurio vegetatio produci queat, uti ex Argento & Mercurio *arbor Dianae* §. 271., tentavit Lemery filius, qui postquam materiem fluidam probe paraverat, Ferrum quidem brevi ascendit, & in superiore parte vitri pulchram vegetationem rubram produxit: Mercurius autem in fundo remansit in forma pulveris citrini; alias quoque vegetationes describit (o), sed quae hujus non sunt loci.

§. 366. **M**ercurius sublimatus laminae ferreae impositus in cella deliquescit, teste Neumanno (p), quod & Jun-

(n) Pot. Exercit. de Sulph. metall. pag. 7. & Junck. Consp. Chem. T. I. pag. 936.  
(o) Mem. Ac. Reg. Sc. 1707. p. 329. (p) Chym. Med. T. I. P. I. p. 415.

Junckerus (*q*) confirmat, dicens: Mercurius sublimatus mixtus cum Limatura Ferri, vel tantum super Laminam Ferri dispersus, intra unam aut alteram horam liquefit, & primo aquae forma ipsi innatat: sensim vero, corroso per acidum Ferro, miculas Mercurii currentis dimittit. Quin etiam solutus in Aqua simplici Mercurius sublimatus, atque in vase ferreo aliquantum coctus reviviscit. Quod etiam fit, si Mercurius sublimatus, aut & Cinnabaris quaecunque, cum Limatura Martis misceatur, & tum fortiori igne destilletur.

§. 367. **I**ngens profecto est numerus Praeparatorum ad usum Alchemisticum decantatorum ex Ferro, ut & aliorum Remediorum martialium: Sic Croci varii per calcinationes, reverberia, ope Salium acidorum & alkalinarum: sic Sales, Vitriola varia, Olea, Flores, Mars diaphoreticus, Aquae martiales, Tincturae diversae, Aroph Paracelsi, Electuarium chalybeatum, Extractum Martis Mynsichti, Pillulae martiales Sydenhami, Tartarus chalybeatus, Lapidēs vulnerarii martiales, Mars fulminans, Unguentum Hombergii contra ferruginem, & sexcenta alia, quae tamen, cum sine Mercurio peragantur, huc non faciunt, sed relegi possunt apud Boerhaavium (*r*), Hoffmannum (*s*), Neumannum (*t*), Beguinum (*u*), pluresque alios.

§. 368. **S**i Mars eodem praeparetur modo, quo Cuprum §. 344., aliquot grana Mercurii, uti ex illo, possunt acquiri. Teichmayerus, adnotante Wallerio (*x*), alium tradit processum: Limaturam Martis expone aëri libero per integrum annum, tum in pulverem redige subtilissimum, quem, ut purum acquiras, eluito, ac denuo expone aëri per alterum annum  
sub

(*q*) Consp. Chem. T. I. Tab. 39. p. 995. (*r*) Elem. Chem. T. I. P. 2. p. 353. & T. II. p. 279. seq. (*s*) Op. omn. Suppl. I. P. I. p. 205. seq. (*t*) Lect. publ. Chym. von Salpeter, Schwefel, Spiesglas, und Eisen. pag. 415. seq. (*u*) Tiroc. Chym. p. 337. seq. (*x*) Mineralog. Class. 3. pag. 351.



sub dio, tandem per retortam destilla, & obtinebis materiem in collo retortae haerentem, tenacem, & cum hac simul aliquid Mercurii. Unzerus vero sequenti se usum methodo scribit: Sume Mercurii sublimati, Salis Ammoniaci sublimati partes aequales, sublima simul aliquoties; sublimatum in pulverem redactum, irriga aqua Salis Ammoniaci aliquoties, resicca; repete imbibitionem novies, dein solve per deliquium in cella, in aquam pellucidam. Jam calcem Ferri imbibe quoque aqua Salis Ammoniaci aliquoties; deinde resiccatam perfunde aqua altera mercuriali, & bidui spatio fiet inde Mercurius vivus (y). Agricola in Poppium (z) Mercurium fieri dicit ex ferro: Si hujus limatura cum Tartaro, Nitro, Arsenico, aequali dosi unciarum duarum, in regulum colliquetur; hic cum Salis Ammoniaci uncia una, & Mercurii sublimati unciis duabus rursus misceatur ac in crucibulo sub camino liquefiat, sic Mercurium obtineri memorat. Verum binis postremis experimentis non tam productio Mercurii, quam ejus e sublimato resuscitatio peragi videtur.

§. 369. Tandem etiam ipse Celeb. Boerhaavius hanc Mercurii ex Ferro productionem experiri est admissus, ubi Ferri sublimationem cum Sale Ammoniaci proponit (a); Ferrum enim cum Sale Ammoniaci tritum, & sublimatum dat flores Salis Ammoniaci martiales; materies salino-ferrea in fundo cucurbitae remanens, fusco-rubra, saporis austerissimi, facile abit ab aëre humido in liquorem spissum, aureum, adstringentem, Oleum martiale dictum, de quo modo laudatus Author ait: *Qui curiosi, laborumque patientes, residuum ferri, salisque corpus aëri exponunt, ibi solvunt, iterum coagulant, inspissant vicissim iterum, tandem id metallicum tam mire, tam profunde eviscerant, ut nec olei, nec operae poeniteat unquam. Quis Chemicorum nescius regulae toties inculcatae, solve, &*

E e

coa-

(y) Unzer. Anat. Spag. merc. L. I. p. 105. (z) pag. m. 387. (a) Boerh. El. Chem. T. II. P. 3. Process. 169. p. m. 285. seq.

coagula? *An tandem repetito opere Mercurius de metallo ita resolutus prodit? mihi tentanti equidem necdum successit. Sed infiniti usus experimenta metallica cum Sale Ammoniaco.*

§. 370. **A**tque hic Tentamen istud, media velut in incude, abrumpendum erat; plura fateor, adcuratiore lima perpolire, ac experimentis numerosioribus, propria industria institutis corroborare fuit animus: Ast quo minus id fieret, angustiae temporis prohibuere. Caeterum advertere velim Lectores Benevolos, non alium mihi hoc labore scopum esse propositum, quam ut de Hydrargyri natura, & in corpus humanum viribus recte tandem quidpiam concludi possit: ejusque usus, & abusus non perfunctiore expendatur; id quod Parte Altera, quam haud paullo limatiorem coram sistere est animus, praestabitur; quod etiam in causa fuit, cur nulla, utpote operi adhuc manco, & mutilo, Corollaria subnectenda existimarim.

F I N I S.













